













# পল্লী-সমাজ

স্ব. শ্রী ১৯৫৫ চন্দ্র চট্টোপাধ্যায়

গুরুদাস চট্টোপাধ্যায় এণ্ড সন্স

২০৩-১-১ কর্ণওয়ালিস ষ্ট্রীট ... কলিকাতা - ৬

দুই টাকা পঞ্চাশ নয়া পয়সা

একত্রিংশ মুদ্রণ

অগ্রহায়ণ—১৩৬৪



শরৎচন্দ্র চট্টোপাধ্যায়



## চতুর্দশ সংস্করণের বিজ্ঞাপন

না-দেখার জন্ত অনেক ভুল-চুক এই বইখানির মধ্যে  
ক্রমশঃ প্রবেশ লাভ করিয়াছিল। নানা স্থলে অর্থের অসঙ্গতিও  
কম ছিল না। বর্তমান সংস্করণে যথাশক্তি নিজে দেখিয়া  
সমস্ত সংশোধন করিয়া দিলাম।



# গল্পী-সমাজ

১

বেণী ঘোষাল মুখ্যোদের অন্তরের প্রাঙ্গণে পা দিয়াই সম্মুখে এক প্রোচা রসগীকে পাইয়া প্রশ্ন করিল, এই যে মাসি, রমা কই গা ?

মাসি আত্মিক করিতেছিলেন, ইঙ্গিতে রামাঘর দেখাইয়া দিলেন। বেণী উঠিয়া আসিয়া রন্ধনশালার চৌকাঠের বাহিরে দাঁড়াইয়া বলিল, তা হ'লে রমা কি করবে স্থির করলে ?

অলস্ত উনান হইতে শঙ্কায়মান, কড়াটা নামাইয়া রাখিয়া রমা মুখ তুলিয়া চাহিল, কিসের বড়দা ?

বেণী কহিল, তারিণী খুড়োর আঁকের কথাটা বোন ! রমেশ ত কাল এসে হাজির হয়েছে। বাপের আঁক খুব ঘটা ক'রেই করবে ব'লে বোধ হচ্ছে—যাবে নাকি ?

রমা ছুই চক্ষু বিশ্বয়ে বিস্ফারিত করিয়া বলিল, আমি যাব তারিণী ঘোষালের বাড়ি ?

বেণী ঈষৎ লজ্জিত হইয়া কহিল, সে ত জানি দিদি। আর যেই যাক তোরা কিছুতেই সেখানে যাবি নে। তবে গুন্টী নাকি ছোঁড়া সমস্ত বাড়ি বাড়ি নিজে গিয়ে বলবে—বজ্জাতি বুদ্ধিতে সে তার বাপেরও ওপরে যায়—যদি আসে, তা হ'লে কি বলবে ?



রমা সরোষে জবাব দিল, আমি কিছুই বলবো না—বাইরে দরওয়ান্ তার উত্তর দেবে।

পূজানিরতা মাসির কর্ণরঞ্জে এই অত্যন্ত রুচিকর দলাদলির আলোচনা পৌছিবামাত্রই তিনি আফ্রিক ফেলিয়া রাখিয়া উঠিয়া আসিলেন। বোনঝির কথা শেষ না হইতেই অভ্যন্তরীণ থৈ-এর মত ছিটকাইয়া উঠিয়া কহিলেন, দরওয়ান্ কেন? আমি বলতে জানি নে? নছার বেটাকে এমনি বলাই বলব যে বাছাধন জন্মে কখনো আর মুখ্যো-বাড়িতে মাথা গলাবে না। তারিণী ঘোষালের ব্যাটা টুক্বে নেমন্তন্ন করতে আমার বাড়িতে? আমি কিছু ভুলি নি বেণীমাধব! তারিণী তার এই ছেলের সঙ্গেই আমার রমার বিয়ে দিতে চেয়েছিল। তখনও ত আর আমার যতীন জন্মায় নি—ভেবেছিল, যত্ন মুখ্যের সমস্ত বিষয়টা তা হ'লে মুঠোর মধ্যে আসবে—বুঝলে না বাবা বেণী! তা যখন হ'ল না, তখন ঐ ভৈরব আচাধ্যিকে দিয়ে কি সব জপ-তপ তুক-তাক করিয়ে মায়ের কপালে আমার এমন আগুন ধরিয়ে দিলে যে ছমাস পেরুল না বাছার হাতের নোয়া মাথার সিঁদুর ঘুচে গেল! ছোটজাত হয়ে চায় কি না যত্ন মুখ্যের মেয়েকে বৌ করতে। তেমনি হারামজাদার মরণও হ'য়েছে—ব্যাটার হাতের আগুনটুকু পর্য্যন্ত পেলো না। ছোটজাতের মুখে আগুন! বলিয়া মাসি যেন কুস্তি শেষ করিয়া হাঁপাইতে লাগিলেন। পুনঃ পুনঃ ছোটজাতের উল্লেখ বেণীর মুখ স্নান হইয়া গিয়াছিল, কারণ তারিণী ঘোষাল তাহারই খুড়া। রমা ইহা লক্ষ্য করিয়া মাসিকে তিরস্কারের কণ্ঠে কহিল, কেন মাসি, তুমি মাতুষের জাত নিয়ে কথা কও? জাত ত আর কারুর হাতে গড়া জিনিস নয়? যে যেখানে জন্মেছে সেই তার ভাল।

বেণী লজ্জিতভাবে একটুখানি হাসিয়া কহিল, না রমা, মাসি ঠিক কথাই বলেছেন। তুমি কত বড় কুলীনের মেয়ে, তোমাকে কি আমরা ঘরে আনতে পারি বোন! ছোটখড়োর এ কথা মুখে আনাই বেয়াদপি!

আর তুচ্ছ-তাকের কথা যদি বল ত সে সত্যি ! দুনিয়ায় ছোটখুড়ো আর ঐ ব্যাটা ভৈরব আচাষির অসাধ্য কাজ কিছু নেই । ঐ ভৈরব ত হয়েছে আজকাল রমেশের মুরব্বি ।

মাসি কহিলেন, সে ত জানা কথা বেণী ! ছোঁড়া দশ-বারো বছর ত দেশে আসে নি—এতদিন ছিল কোথায় ?

কি ক'রে জানব মাসি ? ছোটখুড়োর সঙ্গে তোমাদেরও যে ভাব, আমাদেরও তাই । শুন্ছি এত দিন নাকি বোম্বাই না কোথায় ছিল । কেউ বল্চে ডাক্তারি পাশ ক'রে 'এসেচে, কেউ বল্চে উকিল হ'য়ে এসেচে, কেউ বল্চে সমস্তই ফাঁকি—ছোঁড়া নাকি পাঁড়-মাতাল । যখন বাড়ি এসে পৌঁছল তখন হুচোখ নাকি জবাফুলের মত রাঙা ছিল ।

বটে ? তা হ'লে তাকে ত বাড়ি ঢুকতে দেওয়াই উচিত নয় !

বেণী উৎসাহভরে মাথার একটা ঝাঁকানি দিয়া কহিল, নয়ই ত ! হাঁ রমা, তোমার রমেশকে মনে পড়ে ?

নিজের হতভাগ্যের প্রসঙ্গ উঠিয়া পড়ায় রমা মনে মনে লজ্জা পাইয়া-ছিল । সলজ্জ মুহূ হাসিয়া কহিল, পড়ে বৈ কি ! সে ত আমার চেয়ে বেশি বড় নয় । তা ছাড়া শীতলাতলার পাঠশালে দুজনেই পড়তাম যে ; কিন্তু তার মায়ের মরণের কথা আমার খুব মনে পড়ে ! খুড়িমা আমাকে বড় ভালোবাসতেন ।

মাসি আর একবার নাচিয়া উঠিয়া বলিলেন, তার ভালোবাসার মুখে আশ্রয় । সে ভালোবাসা কেবল নিজের কাজ হাঁসিল কন্সবার জন্তে । তাদের মতলবই ছিল তোকে কোনমতে হাত করা ।

বেণী অত্যন্ত বিজ্ঞের মত সায় দিয়া কহিল, তাতে আর সন্দেহ কি মাসি ! ছোটখুড়িমার যে—

কিন্তু তাহার বক্তব্য শেষ না হইতেই রমা অপ্রসন্নভাবে মাসিকে বলিয়া উঠিল, সে সব পুরানো কথার দরকার নেই মাসি ।

রমেশের পিতার সহিত রমার যতই বিবাদ থাক, তাহার জননীর সম্বন্ধে রমার কোথায় একটু যেন প্রচ্ছন্ন বেদনা ছিল। এত দিনেও তাহা সম্পূর্ণ তিরোহিত হয় নাই। বেণী তৎক্ষণাৎ সায় দিয়া বলিল, তা বটে, তা বটে! ছোটখুড়ি ভাল-মালুকের মেয়ে ছিলেন। মা আজও তাঁর কথা উঠলে চোখের জল ফেলেন।

কি কথায় কি কথা আসিয়া পড়ে দেখিয়া বেণী তৎক্ষণাৎ এ সকল প্রসঙ্গ চাপা দিয়া ফেলিল। বলিল, তবে এই ত স্থির হ'ল দিদি, নড়চড় হবে না ত ?

রমা হাসিল। কহিল, বড়দা, বাবা বলতেন আগুনের শেষ, ঋণের শেষ, আর শত্রুর শেষ কখনো রাখিস্ নে মা। তারিণী ঘোষাল জ্যাস্তে আমাদের কম আলা দেয় নি—বাবাকে পর্য্যন্ত জেল দিতে চেয়েছিল। আমি কিছুই ভুলি নি বড়দা, যতদিন বেঁচে থাকব, ভুলব না। রমেশ সেই শত্রুরই ছেলে ত! তা ছাড়া আমার ত কিছুতেই যাবার ঘো নেই। বাবা আমাদের দুই ভাইবোনকে বিষয় ভাগ ক'রে দিয়ে গেছেন বটে, কিন্তু সমস্ত বিষয় রক্ষা করার ভার শুধু আমারই উপর যে! আমরা ত নয়-ই আমাদের সংস্রবে যারা আছে তাদের পর্য্যন্ত যেতে দেব না। একটু ভাবিয়া কহিল, আচ্ছা বড়দা, এমন কর্ত্তে পার না যে কোনও ব্রাহ্মণ না তাদের বাড়ি যায় ?

বেণী একটু সরিয়া আসিয়া গলা খাটো করিয়া বলিল, সেই চেষ্টাই ত কর্ত্তি বোন! তুই আমার সহায় থাকিস্, আর আমি কোনও চিন্তে করি নে। রমেশকে এই কুঁয়াপুর থেকে না তাড়াতে পারি ত আমার নাম বেণী ঘোষাল নয়। তার পরে রইলাম আমি, আর ঐ ভৈরব আচার্য্য! আর তারিণী ঘোষাল নেই, দেখি এ ব্যাটাকে এখন কে রক্ষা করে।

রমা কহিল, রক্ষে করবে রমেশ ঘোষাল। দেখো বড়দা, এই আমি ব'লে রাখলুম, শত্রুতা কর্ত্তে এও কম করবে না।

বেণী আরও একটু অগ্রসর হইয়া একবার এদিক ওদিক নিরীক্ষণ করিয়া লইয়া চোকাঠের উপর উবু হইয়া বসিল। তার পর কণ্ঠস্বর অত্যন্ত মৃদু করিয়া বলিল, রমা বাঁশ ছুইয়ে ফেলতে চাও ত, এই বেলা, পেকে গেলে আর হবে না তা নিশ্চয় ব'লে দিচ্ছি! বিষয়-সম্পত্তি কি ক'রে রক্ষা করতে হয় এখনও সে শেখে নি—এর মধ্যে যদি না শত্রুকে নিশ্চল করতে পারা যায় ত ভবিষ্যতে আর যাবে না; এই কথাটা আমাদের দিবারাত্রি মনে রাখতে হবে যে এ তারিণী ঘোষালেরই ছেলে—আর কেউ নয়!

সে আমি বুঝি বড়দা!

তুই না বুঝিস্ কি দিদি! ভগবান তোকে ছেলে গড়তে গড়তে মেয়ে গড়েছিলেন বৈ ত নয়। বুদ্ধিতে একটা পাকা জমিদারও তোর কাছে হটে যায় এ কথা আমরা সবাই বলাবলি করি। আচ্ছা, কাল একবার আসব। আজ বেলা হ'ল যাই, বলিয়া বেণী উঠিয়া পড়িল। রমা এই প্রশংসায় অত্যন্ত প্রীত হইয়া উঠিয়া দাঁড়াইয়া বিনয়-সহকারে কি একটু প্রতিবাদ করিতে গিয়াই তাহার বৃকের ভিতর ছাঁৎ করিয়া উঠিল। প্রাঙ্গণের এক প্রান্ত হইতে অপরিচিত গম্ভীর কণ্ঠের আহ্বান আসিল—রাণী কই রে?

রমেশের মা এই নামে ছেলে-বেলায় তাহাকে ডাকিতেন। সে নিজেই এতদিন তাহা ভুলিয়া গিয়াছিল। বেণীর প্রতি চাহিয়া দেখিল তাহার সমস্ত মুখ নীলবর্ণ হইয়া গিয়াছে। পরক্ষণেই রুক্ষ মাথা, খালি পা, উত্তরীয়টা মাথায় জড়ানো—রমেশ আসিয়া দাঁড়াইল। বেণীর প্রতি চোখ পড়িবামাত্র বলিয়া উঠিল, এই যে বড়দা, এখানে? বেশ—চলুন, আপনি না হ'লে কন্বে কে? আমি সারা গা আপনাকে খুঁজে বেড়াচ্ছি! কৈ, রাণী কোথায়? বলিয়াই কবাটের স্রুমুখে আসিয়া দাঁড়াইল। পলাইবার উপায় নাই, রমা ঘাড় হেঁট করিয়া রহিল। রমেশ মুহূর্তমাত্র

তাহার প্রতি দৃষ্টিপাত করিয়া মহাবিস্ময় প্রকাশ করিয়া বলিয়া উঠিল, এই যে! আরে ইস, কত বড় হয়েছিচ্ রে? ভাল আছিচ্?

রমা তেমনি অধোমুখে দাঁড়াইয়া রহিল। হঠাৎ কথা কহিতেই পারিল না; কিন্তু রমেশ একটুখানি হাসিয়া তৎক্ষণাৎ কহিল, চিন্তে পারছিচ্ ত রে? আমি তোদের রমেশদা।

এখনও রমা মুখ তুলিয়া চাহিতে পারিল না; কিন্তু মৃদুকণ্ঠে প্রশ্ন করিল, আপনি ভাল আছেন?

হাঁ ভাই, ভাল আছি; কিন্তু আমাকে আপনি কেন রমা? বেগীর দিকে চাহিয়া একটুখানি মলিন হাসি হাসিয়া বলিল, রমার সেই কথাটা আমি কোন দিন ভুলতে পারি নি বড়দা! যখন মা মারা গেলেন, ও তখন ত খুব ছোট! সেই বয়সেই আমার চোখ মুছিয়ে দিয়ে বলেছিল, রমেশদা, তুমি কেঁদ না, আমার মাকে আমরা দুজনে ভাগ করে নেব।—তোর সে কথা বোধ করি মনে পড়ে না রমা, না? আচ্ছা, আমার মাকে মনে পড়ে ত?

কথাটা শুনিয়া রমার ঘাড় যেন লজ্জায় আরও বুঁকিয়া পড়িল। সে একটিবারও ঘাড় নাড়িয়া জানাইতে পারিল না যে, খুড়িমাকে তাহার খুব মনে পড়ে! রমেশ বিশেষ করিয়া রমাকে উদ্দেশ্য করিয়াই বলিতে লাগিল, আর ত সময় নেই, মাঝে শুধু তিনটি দিন বাকি, যা করবার ক'রে দাও ভাই, বাকে বলে একান্ত নিরাশ্রয় আমি তাই হয়েই তোমাদের দোরগোড়ায় এসে দাঁড়িয়েছি। তোমরা না গেলে এতটুকু ব্যবস্থা পর্য্যন্তও করতে পার্চি না।

মাসি আসিয়া নিঃশব্দে রমেশের পিছনে দাঁড়াইলেন। বেগী অথবা রমা কেহই যখন একটা কথারও জবাব দিল না, তখন তিনি স্তম্ভের দিকে সরিয়া আসিয়া রমেশের মুখপানে চাহিয়া বলিলেন, তুমি বাপু তারিণী ঘোষালের ছেলে না?

রমেশ এই মাসিটিকে ইতিপূর্বে দেখে নাই ; কারণ সে গ্রাম ত্যাগ করিয়া যাইবার পরে ইনি রমার জননীর অস্থলের উপলক্ষে সেই যে মুখুষ্য-বাড়ি ঢুকিয়াছিলেন আর বাহির হন নাই । রমেশ কিছু বিস্মিত হইয়াই তাহার দিকে চাহিয়া রহিল । মাসি বলিলেন, না হ'লে এমন বেহায়া পুরুষ-মানুষ আর কে হবে ? যেমন বাপ তেমনি ব্যাটা । বলা নেই, কথা নেই, একটা গেরস্তর বাড়ির ভেতর ঢুকে উৎপাত করতে সরম হয় না তোমার ? রমেশ বুদ্ধিব্রষ্টের মত কাঠ হইয়া চাহিয়া রহিল ।

আমি চল্লুম, বলিয়া বেণী ব্যস্ত হইয়া সরিয়া পড়িল । রমা ঘরের ভিতর হইতে বলিল, কি বক্চ মাসি, তুমি নিজের কাজে যাও না—

মাসি মনে করিলেন, তিনি বোন্দির প্রচ্ছন্ন ইজিতটা বুঝিলেন । তাই কণ্ঠস্বরে আরও একটু বিষ মিশাইয়া কহিলেন, নে রমা, বকিস্ নে । যে কাজ কন্ঠেই হবে তাতে আমার তোমাদের মত চক্ষুলজ্জা হয় না । বেণীর অমন কোরে পালানোর কি দরকার ছিল ? ব'লে গেলেই ত হ'ত আমরা বাপু তোমার গমস্তাও নই, খাস-তালুকের প্রজাও নই যে তোমার কর্মবাড়িতে জল তুলতে, ময়দা মাথতে যাবো । তারিণী মরেচে, গাঁ শুদ্ধ লোকের হাড় জুড়িয়েচে ; এ কথা আমাদের ওপর বরাত দিয়ে না গিয়ে নিজে ওর মুখের ওপর ব'লে গেলেই ত পুরুষমানুষের মত কাজ হ'ত ।

রমেশ তখনও নিষ্পন্দ অসাড়ের মত দাঁড়াইয়া রহিল । বস্তুতঃই এ সকল কথা তাহার একান্ত দুঃস্বপ্নেরও অগোচর ছিল । ভিতর হইতে রামাঘরের কবাটের শিকলটা ঝন্ ঝন্ করিয়া নড়িয়া উঠিল ; কিন্তু কেহই তাহাতে মনোযোগ করিল না । মাসি রমেশের নির্বাক ও অত্যন্ত পাণ্ডুবর্ণ মুখের প্রতি চাহিয়া পুনরপি বলিলেন, যাই হোক, বামুনের ছেলেকে আমি চাকর-দরওয়ান দিয়ে অপমান করাতে চাই নে—একটু হুঁস ক'রে কাজ ক'রো বাপু—যাও । কচি খোকাটি নও যে ভদ্রলোকের বাড়ির ভেতর ঢুকে আবদার ক'রে বেড়াবে । তোমার

বাড়িতে আমার রমা কখন পা বুতেও যেতে পারবে না, এই তোমাকে আমি ব'লে দিলাম !

হঠাৎ রমেশ যেন নিদ্রোখিতের মত জাগিয়া উঠিল এবং পরক্ষণেই তাহার বিস্তৃত বক্ষের ভিতর হইতে এমনি গভীর একটা নিশ্বাস বাহির হইয়া আসিল যে, সে নিজেও সেই শব্দে সচকিত হইয়া উঠিল। ঘরের ভিতর কবাটের অন্তরালে দাঁড়াইয়া রমা মুখ তুলিয়া চাহিয়া দেখিল। রমেশ একবার বোধকরি ইতস্ততঃ করিল, তাহার পরে, রান্নাঘরের দিকে উদ্দেশ্য করিয়া কহিল, যখন যাওয়া হতেই পারে না, তখন আর উপায় কি ; কিন্তু আমি ত এত কথা জান্তাম না—না জেনে যে উপদ্রব ক'রে গেলাম সে আমাকে মাপ ক'রো রাণি ! বলিয়া ধীরে ধীরে চলিয়া গেল। ঘরের ভিতর হইতে এতটুকু সাড়া আসিল না। বাহার কাছে ক্ষমা ভিক্ষা করা হইল সে যে অলক্ষ্যে নিঃশব্দে তাহার দ্বথের দিকে চাহিয়া রহিল রমেশ তাহা জানিতে পারিল না। বেণী তৎক্ষণাৎ ফিরিয়া আসিয়া দাঁড়াইল। সে পালায় নাই, বাহিরে দুকাইয়া অপেক্ষা করিতেছিল মাত্র। মাসির সহিত চোখাচোখি হইতেই তাহার সমস্ত মুখ আফ্লাদে ও হাসিতে ভরিয়া গেল, সরিয়া আসিয়া কহিল, হাঁ, শোনাতে বটে মাসি ! আমার সাধ্যাই ছিল না, অমন ক'রে বলা ! এ কি চাকর-দরওয়ানের কাজ রমা ? আমি আড়ালে দাঁড়িয়ে দেখলাম কি না, ছোড়া মুখখানা যেন আবাড়ের মেঘের মত ক'রে বার হ'য়ে গেল ! এই ত—ঠিক হ'ল !

মাসি ক্ষুণ্ণ অভিমানের সুরে বলিলেন, ঠিক ত হ'ল জানি ; কিন্তু এই দুটো মেয়েমানুষের ওপর ভাব না দিয়ে, না স'রে গিয়ে নিজে ব'লে গেলেই ত আরও ভাল হ'ত ! আর নাই যদি বলতে পারতে, আমি কি বল্লুম তাকে, দাঁড়িয়ে থেকে শুনে গেলে না কেন বাছা ? অমন স'রে পড়া উচিত কাজ হয় নি।

মাসির কথার ঝাঁজে বেণীর মুখের হাসি মিলাইয়া গেল। সে যে এই অভিমানের কি সাফাই দিবে ভাবিয়া পাইল না; কিন্তু অধিকক্ষণ ভাবিতে হইল না, হঠাৎ রমা ভিতর হইতে তাহার জবাব দিয়া বসিল; এতক্ষণ সে একটি কথাও কহে নাই। কহিল, তুমি যখন নিজেকে বলেছ মাসি, তখন সেই ত সকলের চেয়ে ভাল হয়েছে। যে যতই বলুক না কেন, এতখানি বিষ জিভ দিয়ে ছড়াতে তোমার মত কেউ ত পেরে উঠত না—

মাসি এবং বেণী উভয়েই যারপরনাই বিস্ময়াপন্ন হইয়া উঠিলেন। মাসি রান্নাঘরের দিকে ফিরিয়া কহিলেন, কি বলি না ?

কিছু না। আশ্চর্য্য কর্ত্তে বসে ত সাতবার উঠলে—যাও না, ওটা সেয়ে ফেল না—রান্নাবান্না কি হবে না? বলিতে বলিতে রমা নিজের বাহির হইয়া আসিল এবং কাহাকেও কোন কথা না বলিয়া বারান্দা পার হইয়া ওদিকের ঘরে গিয়া প্রবেশ করিল। বেণী গুহুমুখে চুপি চুপি জিজ্ঞাসা করিল, ব্যাপার কি মাসি ?

কি ক'রে জানব বাছা ! ও রাজরাণীর মেজাজ বোঝা কি আমাদের মতো দাসী-বাদীর কর্ত্ত ? বলিয়া ক্রোধে, ক্ষোভে তিনি মুখখানা কালিবর্ষ করিয়া তাঁহার পূজার আসনে গিয়া উপবেশন করিলেন এবং বোধ করি বা মনে মনে ভগবানের নাম করিতেই লাগিলেন। বেণী ধীরে ধীরে প্রস্থান করিল।



এই কুঁয়াপুরের বিষয়টা অর্জিত হইবার সম্বন্ধে একটু ইতিহাস আছে তাহা এইখানে বলা আবশ্যক। প্রায় শতবর্ষ পূর্বে মহাকুলীন বলরাম মুখুয্যে তাঁহার মিতা বলরাম ঘোষালকে সঙ্গে করিয়া বিক্রমপুর হইতে এদেশে আসেন। মুখুয্যে শুধু কুলীন ছিলেন না বুদ্ধিমানও ছিলেন। বিবাহ করিয়া বর্দ্ধমান রাজ-সরকারে চাকরি করিয়া এবং আরও কি কি করিয়া এই বিষয়টুকু হস্তগত করেন। ঘোষালও এই দিকেই বিবাহ করেন; কিন্তু পিতৃশ্রদ্ধা শোধ করা ভিন্ন আর তাঁহার কোন ক্ষমতাই ছিল না; তাই দুঃখে কষ্টেই তাঁহার দিন কাটিতেছিল। এই বিবাহ উপলক্ষেই নাকি দুই মিতার মনোমালিন্য ঘটে। পরিশেষে তাহা এমন বিবাদে পরিণত হয় যে এক গ্রামে বাস করিয়াও বিশ বৎসরের মধ্যে কেহ কাহারও মুখ-দর্শন করেন নাই। বলরাম মুখুয্যে যে দিন মারা গেলেন সে দিনও ঘোষাল তাঁহার বাটীতে পা দিলেন না; কিন্তু তাঁহার মরণের পরদিন অতি আশ্চর্য্য কথা শুনা গেল। তিনি নিজের সমস্ত বিষয় চুল-চিরিয়া অর্দ্ধেক ভাগ করিয়া নিজের পুত্র ও মিতার পুত্রগণকে দিয়া গিয়াছেন। সেই অবধি এই কুঁয়াপুরের বিষয় মুখুয্যে ও ঘোষালবংশ ভোগদখল করিয়া আসিতেছে। ইহারা নিজেরাও জমিদার বলিয়া অভিমান করিতেন, গ্রামের লোকেও অস্বীকার করিত না। বখনকার কথা বলিতেছি তখন ঘোষাল বংশও ভাগ হইয়াছিল। সেই বংশের ছোট তরফের তারিণী ঘোষাল মোকদ্দমা উপলক্ষে জেলায় গিয়া দিন-ছয়েক পূর্বে হঠাৎ যে দিন আদালতের ছোট-বড় পাঁচ-সাতটা মূলভূবি মোকদ্দমার শেষফলের প্রতি ভ্রক্ষেপ না করিয়া কোথাকার কোন অজানা আদালতের মহামান্য শমন মাথায় করিয়া নিঃশব্দে প্রস্থান করিলেন, তখন তাঁহাদের কুঁয়াপুর গ্রামের ভিতরে ও বাহিরে একটা

হলহুল পড়িয়া গেল। বড় তরফের কর্তা বেণী ঘোষাল খুড়োর মৃত্যুতে গোপনে আরামের নিশ্বাস ফেলিয়া বাড়ি ফিরিয়া আসিল এবং আরও গোপনে দল পাকাইতে লাগিল, কি করিয়া খুড়োর আগামী শ্রাদ্ধের দিনটা পণ্ড করিয়া দিবে। দশ বৎসর খুড়ো-ভাইপোর মুখ দেখাদেখি ছিল না। বহু বৎসর পূর্বে তারিণীর গৃহশ্রুত হইয়াছিল। সেই অবধি পুত্র রমেশকে তাহার মামার বাড়ি পাঠাইয়া তারিণী বাটীর ভিতরে দাস-দাসী এবং বাহিরে মোকদ্দমা লইয়াই কাল কাটাইতেছিলেন। রমেশ রুড়কি কলেজে এই দুঃসংবাদ পাইয়া পিতার শেষ কর্তব্য সম্পন্ন করিতে সুদীর্ঘকাল পরে কাল অপরাহ্নে তাহার শ্রুতগৃহে আসিয়া উপস্থিত হইল।

কর্ম্মবাড়ি। মধ্যে শুধু ছুটা দিন বাকি। বৃহস্পতিবার রমেশের পিতৃশ্রাদ্ধ। দুই-একজন করিয়া ভিন্ন গ্রামের মুকুন্দবিরা উপস্থিত হইতেছেন; কিন্তু নিজেদের কুঁয়াপুরের কেন যে কেহ আসে না রমেশ তাহা বুঝিয়াছিল এবং হয়ত শেষ পর্য্যন্ত কেহ আসিবেই না তাহাও জানিত। শুধু ভৈরব আচার্য্য ও তাহার বাড়ির লোকেরা আসিয়া কাজকর্ম্মে যোগ দিয়াছিল। স্বগ্রামস্থ ব্রাহ্মণদিগের পদধুলির আশা না থাকিলেও উত্তোগ-আয়োজন রমেশ বড়লোকের মতই করিয়াছিল। আজ অনেকক্ষণ পর্য্যন্ত রমেশ বাড়ির ভিতরে কাজকর্ম্মে ব্যস্ত ছিল। কি জন্ম বাহিরে আসিতেই দেখিল ইতিমধ্যে জন-দুই প্রাচীন তদ্রলোক আসিয়া বৈঠকখানার বিছানায় সমাগত হইয়া ধূমপান করিতেছেন। সম্মুখে আসিয়া সবিনয়ে কিছু বলিবার পূর্বেই পিছনে শব্দ শুনিয়া ফিরিয়া দেখিল, এক অতি বৃদ্ধ পাঁচ-ছয়টি ছেলেমেয়ে লইয়া কাসিতে কাসিতে বাড়ি ঢুকিলেন; তাঁহার কাঁধের মলিন উত্তরীয়, নাকের উপর একজোড়া ভাঁটার মত মস্ত চশমা—পিছনে দড়ি দিয়া বাঁধা। শাদা চুল, শাদা গাঁফ—তামাকের ধূঁয়ায় তাম্রবর্ণ। অগ্রসর হইয়া আসিয়া তিনি সেই ভীষণ চশমার ভিতর দিয়া রমেশের মুখের দিকে

মুহূর্তকাল চাহিয়া বিনা বাক্যব্যয়ে কাঁদিয়া ফেলিলেন। রমেশ চিনিল না ইনি কে, কিন্তু যেই হোন্ বাস্ত হইয়া কাছে আসিয়া তাঁহার হাত ধরিতেই তিনি ভাঙা গলায় বলিয়া উঠিলেন, না বাবা রমেশ, তারিণী যে এমন ক'রে ফাঁকি দিয়ে পালাবে তা স্বপ্নেও ভাবি নে, কিন্তু আমারও এমন চাটুষ্যে বংশে জন্ম নয় যে, কারু ভয়ে মুখ দিয়ে মিথ্যা কথা বেরুবে। আসবার সময় তোমার বেণী ঘোষালের মুখের সামনে ব'লে এলুম, আমাদের রমেশ যেমন শ্রদ্ধের আয়োজন করুচে এমন করা চুলোয় থাক, এ অঞ্চলে কেউ চোখেও দেখে নি। একটু থামিয়া বলিলেন, আমার নামে অনেক শালা অনেক রকম ক'রে তোমার কাছে লাগিয়ে যাবে বাবা, কিন্তু এটা নিশ্চয় জেনো এই ধর্মদাস শুধু ধর্মেরই দাস আর কারো নয়। এই বলিয়া বৃদ্ধ সত্য-ভাষণের সমস্ত পৌরুষ আত্মসাৎ করিয়া গোবিন্দ গাঙুলীর হাত হইতে হ'কাটা ছিনাইয়া লইয়া তাহাতে এক টান দিয়াই প্রবলবেগে কাসিয়া ফেলিলেন।

ধর্মদাস নিতান্ত অত্যাক্তি করে নাই। উত্তোগ-আয়োজন যেরূপ হইতেছিল, এদিকে সেরূপ কেহ করে নাই। কলিকাতা হইতে ময়রা আসিয়াছিল। তাহার প্রাঙ্গণের একধারে ভিয়ান চড়াইয়াছে—সেদিকে পাড়ার কতকগুলো ছেলেমেয়ে ভিড় করিয়া দাঁড়াইয়াছে, কাঙালীদের বস্ত্র দেওয়া হইবে। চণ্ডীমণ্ডপের ও-ধারে বারান্দায় অল্পগত ভৈরব আচার্য্য থান কাড়িয়া পাট করিয়া গাদা করিতেছিল—সে দিকে জন-কয়েক লোক থাবা পাতিয়া বসিয়া এই অপব্যয়ের পরিমাণ হিসাব করিয়া মনে মনে রমেশের নির্বুদ্ধিতার জন্ত তাহাকে গালি পাড়িতে ছিল। গরাব-ছুখী সংবাদ পাইয়া অনেক দূরের পথ হইতেও আসিয়া জুটিতেছিল। লোকজন, প্রজাপাঠক বাড়ি পরিপূর্ণ করিয়া কেহ কলহ করিতেছিল, কেহ বা মিছামিছি শুধু কোলাহল করিতেছিল। চারিদিকে চাহিয়া ব্যয়বাহুল্য দেখিয়া ধর্মদাসের কাসি আরও বাড়িয়া গেল।

প্রত্যুত্তরে রমেশ সঙ্কুচিত হইয়া না-না বলিয়া আরও কি বলিতে যাইতেছিল, কিন্তু ধর্মদাস হাত নাড়িয়া থামাইয়া দিয়া ঘড়্ ঘড়্ করিয়া কত কি বলিয়া ফেলিলেন, কিন্তু কাসির ধমকে তাহার একটি বর্ণও বুঝা গেল না।

গোবিন্দ গাঙুলী সর্কাগ্রে আসিয়াছিলেন সুতরাং ধর্মদাস যাহা বলিয়াছিল, তাহা বলিবার সুবিধা তাঁহারই সর্কাপেক্ষা অধিক থাকিয়াও নষ্ট হইয়াছে ভাবিয়া তাঁহার মনে মনে ভারি একটা ক্ষোভ জন্মিতে-ছিল। তিনি এ সুযোগ আর নষ্ট হইতে দিলেন না। ধর্মদাসকে উদ্দেশ করিয়া তাড়াতাড়ি বলিয়া উঠিলেন, কাল সকালে, বুঝ্লে ধর্মদাসদা, এখানে আসবো ব'লে বেরিয়েও আসা হ'ল না—বেগীর ডাকাডাকি—গোবিন্দখুড়ো, তামাক খেয়ে যাও। একবার ভাবলুম কাজ নেই—তার পর মনে হ'ল ভাবখানা বেগীর দেখেই যাই না। বেগী কি বল্লে জান বাবা রমেশ! বল্লে, খুড়ো, বলি তোমরা ত রমেশের মুকুবি হয়ে দাঁড়িয়েচ, কিন্তু জিজ্ঞেস করি লোকজন খাবে-টাবে ত? আমি বা ছাড়ি কেন? তুমি বড়লোক আছ না আছ, আমার রমেশ কারো চেয়ে খাটো নয়? তোমার ঘরে ত এক মুঠো চিঁড়ের পিত্তেশ কারু নেই। বললুম, বেগীবাবু, এই ত পথ, একবার কাঙালী বিদ্যেটা দাঁড়িয়ে দেখো। কালকের ছেলে রমেশ, কিন্তু বুকের পাটা ত বলি একে! এতটা বয়স হ'ল, এমন আয়োজন কখনও চোখে দেখি নি; কিন্তু তাও বলি ধর্মদাসদা, আমাদের সাথিই বা কি। যার কাজ তিনিই ওপর থেকে করাচ্ছেন। তারিগীদা শাপভট্ট দিকপাল ছিলেন বৈ ত নয়!

ধর্মদাসের কিছুতেই কাসি থামে না, তিনি কাসিতেই লাগিলেন, আর তাঁহার মুখের সামনে গাঙুলীমশাই বেশ বেশ কথাগুলি এই অশরিক তরুণ জমিদারটিকে বলিয়া যাইতে লাগিল দেখিয়া ধর্মদাস আরও ভাল কিছু বলিবার চেষ্টায় যেন আকুলি-বিকুলি করিতে লাগিলেন।

গাঙুলী বলিতে লাগিলেন, তুমি ত আমার পর নও বাবা—নিতান্ত আপনার। তোমার মা যে আমার একেবারে সাক্ষাৎ পিস্তুতো বোনের খুড়তুতো ভগিনী। রাখানগরের বাঁড়ুঘো-বাড়ি—সে সব তারিণীদা জানতেন! তাই যে কোন কাজ-কর্ম—মামলা-মোকদ্দমা করতে, সাক্ষী দিতে—ডাক গোবিন্দকে!

ধর্মদাস প্রাণপণ-বলে কাসি থামাইয়া থিঁচাইয়া উঠিলেন, কেন বাজে বকিস্ গোবিন্দ? থক্—থক্—থক্—আমি আজকের নয়—না জানি কি? সে বছর সাক্ষী দেবার কথায় বল্লি, আমার জুতো নেই, খালি-পায়ে যাই কি করে? থক্—থক্—তারিণী অমনি আড়াই টাকা দিয়ে এক জোড়া জুতো কিনে দিলে। তুই সেই পায়ে দিয়ে বেণীর হ'য়ে সাক্ষী দিয়ে এলি! থক্—থক্—থক্—

গোবিন্দ চক্ষু রক্তবর্ণ করিয়া কহিলেন, এলুম?

এলি নে?

দূর মিথ্যাবাদী।

মিথ্যাবাদী তোর বাবা!

গোবিন্দ তাঁহার ভাঙা-ছাতি হাতে করিয়া লাফাইয়া উঠিলেন, তবে রে শালা!

ধর্মদাস তাঁহার বাঁশের লাঠি উচাইয়া ধরিয়া হুক্কার দিয়াই প্রচণ্ডভাবে কাসিয়া ফেলিলেন। রমেশ শশব্যস্তে উভয়ের মাঝখানে আসিয়া পড়িয়া শুভিত হইয়া গেল। ধর্মদাস লাঠি নামাইয়া কাসিতে কাসিতে বসিয়া পড়িয়া বলিলেন, ও শালার সম্পর্কে আমি বড়ভাই হই কি না, তাই শালার আঁক্কেল দেখ—

ওঃ, শালা আমার বড়ভাই! বলিয়া গোবিন্দ গাঙুলীও ছাতি গুটাইয়া বসিয়া পড়িলেন।

সহরের ময়রারা ভিয়ান ছাড়িয়া চাহিয়া রহিল। চতুর্দিকে বাহারা

কাজ-কৰ্মে নিযুক্ত ছিল, চোঁচামেচি শুনিয়া তাহারা তামাসা দেখিবার জ্ঞান সমুখে ছুটিয়া আসিল; ছেলেমেয়েরা খেলা ফেলিয়া হাঁ করিয়া মজা দেখিতে লাগিল এবং এই সমস্ত লোকের দৃষ্টির সমুখে রমেশ লজ্জায়, বিষ্ময়ে, হতবুদ্ধির মত স্তব্ধ হইয়া দাঁড়াইয়া রহিল। তাহার মুখ দিয়া একটা কথাও বাহির হইল না। কি এ? উভয়েই প্রাচীন, ভদ্রলোক—ব্রাহ্মণ-সন্তান। এত সামান্য কারণে এমন ইতরের মত গালিগালাজ করিতে পারে? বারান্দায় বসিয়া ভৈরব কাপড়ের থাক দিতে দিতে সমস্তই দেখিতেছিল, শুনিতেছিল। এখন উঠিয়া আসিয়া রমেশকে উদ্দেশ্য করিয়া কহিল, প্রায় শ-চারেক কাপড় ত হ'ল, আরও চাই কি?

রমেশের মুখ দিয়া হঠাৎ কথাই বাহির হইল না। ভৈরব রমেশের অভিভূত ভাব লক্ষ্য করিয়া হাসিল। যুহু অশ্রুযোগের স্বরে কহিল, ছিঃ গাঙুলীমশাই! বাবু একেবারে অবাক হ'য়ে গেছেন। আপনি কিছু মনে করবেন না বাবু, এমন ঢের হয়! বৃহৎ কাজ-কর্মের বাড়িতে কত ঠেঙাঠেঙি রক্তারক্তি পর্য্যন্ত হ'য়ে যায়—আবার যে-কে সেই হয়। নিন্ উঠুন চাটুয্যোমশাই—দেখুন দেখি আরও থান ফাড়া কি না?

ধর্মদাস জবাব দিবার পূর্বেই গোবিন্দ গাঙুলী সোৎসাহে শিরচালন পূর্বক খাড়া হইয়া বলিলেন, হয়ই ত! হয়ই ত! ঢের হয়! নইলে বিরদ কক্ষ বলেচে কেন? শাস্তরে আছে লক্ষ কথা না হ'লে বিয়েই হয় না যে! সে বছর—তোমার মনে আছে ভৈরব, যুহু মুখুয্যোমশাইয়ের কথা। রমার গাছ পিতিষ্ঠের দিনে সিঁদে নিয়ে রাধব ভট্টাচাখিতে হারাণ চাটুয্যেতে মাথা ফাটাফাটি হ'য়ে গেল; কিন্তু আমি বলি ভৈরব ভায়া, বাবাজীর এ কাজটা ভাল হচ্ছে না! ছোটলোকদের কাপড় দেওয়া আর ভাস্মে ঘি ঢালা এক কথা। তার চেয়ে বামুনদের এক জোড়া, আর ছেলেদের একখানা ক'রে দিলেই নাম হ'ত। আমি বলি বাবাজী সেই যুক্তিই করুন, কি বল ধর্মদাসদা?

ধর্মদাস ঘাড় নাড়িতে নাড়িতে বলিলেন, গোবিন্দ মন্দ কথা বলে নি বাবাজী। ও ব্যাটারদের হাজার দিলেও নাম হবার জো নেই। নইলে আর ওদের ছোটলোক বলেছে কেন? বুঝলে না বাবা রমেশ?

এখন পর্য্যন্ত রমেশ নিঃশব্দে ছিল। এই বস্ত্র-বিতরণের আলোচনায় সে একেবারে যেন মগ্ন হইয়া পড়িল। ইহার স্মৃতি-কুস্মিত সঙ্কেত নহে, এখন এইটাই তাহার সর্বাপেক্ষা অধিক বাজিল যে, ইহারা যাহাদিগকে ছোটলোক বলিয়া ডাকে, তাহাদেরই সহস্র চক্ষুর সম্মুখে এইমাত্র যে এতবড় একটা লজ্জাকর কাণ্ড করিয়া বসিল সে জগৎ ইহাদের কাহারও মনে এতটুকু ক্ষোভ বা লজ্জার কণামাত্রও নাই। ভৈরব মুখপানে চাহিয়া আছে দেখিয়া রমেশ সংক্ষেপে কহিল, আরও দুশ কাপড় ঠিক ক'রে রাখুন।

তা নইলে কি হয়? ভৈরবভায়া, চল, আমিও যাই—তুমি একা আর কত পারবে বল? বলিয়া কাহারও সম্মতির অপেক্ষা না করিয়া গোবিন্দ উঠিয়া বস্ত্ররাশির নিকটে গিয়া বসিলেন। রমেশ বাটার ভিতর যাইবার উপক্রম করিতেই ধর্মদাস তাহাকে একপাশে ডাকিয়া লইয়া চুপি চুপি অনেক কথা কহিলেন। রমেশ প্রত্যুত্তরে মাথা নাড়িয়া সম্মতিজ্ঞাপন করিয়া ভিতরে চলিয়া গেল। কাপড় গুছাইতে গুছাইতে গোবিন্দ গাঙুলী আড়চোখে সমস্ত দেখিলেন।

কৈ গো, বাবাজী কোথায় গো? বলিয়া একটি গীর্ণকায় মুণ্ডিতশ্রদ্ধ প্রাচীন ব্রাহ্মণ প্রবেশ করিলেন। ইহার সঙ্গেও গুটি-তিনেকছেলে-মেয়ে। মেয়েটি সকলের বড়। তাহার পরণে শুধু একখানি অতি জীর্ণ ডুরে-কাপড়। বালক দুটি কোমরে এক-একগাছি ঘুনসি ব্যতীত একেবারে দিগম্বর। উপস্থিত সকলেই মুখ তুলিয়া চাহিল। গোবিন্দ অভ্যর্থনা করিলেন, এস দীহুদা, ব'সো। বড় ভাগ্যি আমাদের যে তোমার পায়ে ধুলো পড়ল। ছেলেটা একা সারা হ'য়ে যায়, তা তোমরা—

ধর্মদাস গোবিন্দর প্রতি কটমট করিয়া চাহিলেন। তিনি অক্ষেপমাত্র না করিয়া কহিলেন, তা তোমরা ত কেউ এ-দিক মাড়াবে না দাদা ; বলিয়া তাঁহার হাতে হুঁকাটা তুলিয়া দিলেন। দীলু ভট্টাচাষ আসন গ্রহণ করিয়া দক্ষ হুঁকাটায় নিরর্থক গোটা-দুই টান দিয়া বলিলেন, আমি ত ছিলাম না ভায়া—তোমার বোঁঠাকরণকে আনতে তাঁর বাপের বাড়ি গিয়েছিলুম। বাবাজী কোথায় ? গুনচি নাকি ভারি আয়োজন হচ্ছে ? পথে আসতে ও-গাঁয়ের হাটে গুনে এলুম খাইয়ে-দাইয়ে ছেলে-বুড়োর হাতে ষোল থানা ক'রে লুচি আর চার জোড়া ক'রে সন্দেশ দেওয়া হবে।

গোবিন্দ গলা খাটো করিয়া কহিলেন, তা ছাড়া হয়ত একথানা ক'রে কাপড়ও। এই যে রমেশ বাবাজী, তাই দীলুদাকে বল্ছিলাম বাবাজী—তোমাদের পাঁচজনের বাপ-মায়ের আশীর্বাদে জোগাড়-সোগাড় একরকম করা ত যাচ্ছে, কিন্তু বেণী একেবারে উঠে পড়ে লেগেছে। এই আমার কাছেই দুবার লোক পাঠিয়েছে। তা আমার কথা না হয় ছেড়েই দিলে, রমেশের সঙ্গে আমার যেন নাড়ীর টান রয়েছে ; কিন্তু এই যে, দীলুদা, ধর্মদাসদা, এঁরাই কি বাবা তোমাকে ফেলতে পারবেন ? দীলুদা ত পথ থেকে গুনতে পেয়ে ছুটে আসছেন। ওরে ও ষষ্ঠীচরণ, তামাক দে না রে ! বাবা রমেশ, একবার এদিকে এস দেখি, একটা কথা ব'লে নিই ! নিভুতে ডাকিয়া লইয়া গোবিন্দ ফিস্ ফিস্ করিয়া জিজ্ঞাসা করিলেন, ভিতরে বৃদ্ধি ধর্মদাস-গিন্নী এসেছে ? খবরদার খবরদার, অমন কাজটি ক'রো না বাবা ! বিটলে বায়ুন বতই ফোসলাক ধর্মদাস-গিন্নীর হাতে ভাঁড়ারের চাবি-টাবি দিয়ে না বাবা, কিছুতে দিয়ে না—ঘি, ময়দা, তেল, হুন অর্ধেক সরিয়ে ফেলবে। তোমার ভাবনা কি বাবা ? আমি গিয়ে তোমার মামীকে পাঠিয়ে দেব। সে এসে ভাঁড়ারের ভার নেবে, তোমার একগাছি কুটো পর্য্যন্ত লোকসান হবে না !

রমেশ ষাড় নাড়িয়া 'যে আজ্ঞে' বলিয়া মৌন হইয়া রহিল। তাহার



বিশ্বয়ের অবধি নাই। ধর্মদাস যে তাহার গৃহিণীকে ভাঁড়ারের ভার লইবার জন্য পাঠাইয়া দিবার কথা এত গোপনে कहিয়াছিল গোবিন্দ ঠিক তাহাই আন্দাজ করিল কিরূপে ?

উল্লঙ্ঘ্য শিশু-ছুটা ছুটিয়া আসিয়া দীর্ঘদার কাঁধের উপর ঝুলিয়া পড়িল—বাবা, সন্দেশ খাব।

দীর্ঘ একবার রমেশের প্রতি একবার গোবিন্দের প্রতি চাহিয়া कहিলেন, সন্দেশ কোথায় পাব রে ?

কেন, ঐ যে হচ্ছে ; বলিয়া তাহারা ওদিকের ময়রাদের দেখাইয়া দিল।

আমরাও দাদামশাই, বলিয়া নাকে কাঁদিতে কাঁদিতে আরও তিন-চারিটি ছেলে-মেয়ে ছুটিয়া আসিয়া বৃদ্ধ ধর্মদাসকে ঘিরিয়া ধরিল।

বেশ ত, বেশ ত, বলিয়া রমেশ ব্যস্ত হইয়া অগ্রসর হইয়া আসিল—ও আচাধ্যমশাই, বিকেল-বেলায় ছেলেরা সব বাড়ি থেকে বেরিয়েছে, খেয়ে ত আসে নি—ওহে ও, কি নাম তোমার ? নিয়ে এসো ত ঐ থালাটা এদিকে ?

ময়রা সন্দেশের থালা লইয়া আসিবামাত্র ছেলেরা উপুড় হইয়া পড়িল ; ঝাঁটিয়া দিবার অবকাশ দেয় না এমনি ব্যস্ত করিয়া তুলিল। ছেলেদের থাওয়া দেখিতে দেখিতে দীননাথের গুঞ্চদৃষ্টি সজল ও তীব্র হইয়া উঠিল—ওরে ও খেঁদি, খাচ্চিস্ ত, সন্দেশ হয়েছে কেমন বল দেখি ?

বেশ বাবা, বলিয়া খেঁদি চিবাইতে লাগিল দীর্ঘ মুহূর্ত্ত হাসিয়া ঘাড় নাড়িয়া বলিলেন, হাঁ, তোদের আবার পছন্দ ? মিষ্টি হ'লেই হ'ল। হাঁ হে কারিগর, এ কড়াটা কেমন নামালে—কি বল, গোবিন্দ ভায়া, এখনও একটু রোদ আছে ব'লে মনে হচ্ছে না ?

ময়রা কোন দিকে না চাহিয়াই তৎক্ষণাৎ कहিল, আজ্ঞে, আছে বৈ কি ! এখনো ঢের বেলা আছে, এখনো সন্ধ্যা আহিকের—

তবে কৈ, দাঁও দেখি একটা গোবিন্দ ভায়াকে, চেখে দেখুক কেমন

কলকাতার কারিগর তোমরা ! না, না, আমাকে আবার কেন ? তবে আধখানা—আধখানার বেশি নয় ! ওরে বষ্টিচরণ, একটু জল আন দিকি বাবা, হাতটা ধুয়ে ফেলি—

রমেশ ডাকিয়া বলিয়া দিল, অমনি বাড়ীর ভেতর থেকে গোটা-চারেক থালাও নিয়ে আসিস্ বষ্টিচরণ ।

প্রভুর আদেশ মত ভিতর হইতে গোটা-তিনেক রেকাবী ও জলের গেলাস আসিল এবং দেখিতে দেখিতে এই বৃহৎ থালার অর্ধেক মিষ্টান্ন এই তিন প্রাচীন ম্যালেরিয়াক্রিষ্ট, সদব্রাহ্মণের জলযোগে নিঃশেষিত হইয়া গেল ।

হাঁ, কলকাতার কারিগর বটে ! কি বল ধর্মদাসদা ? বলিয়া দীননাথ রুদ্ধনিঃশ্বাস ত্যাগ করিলেন । ধর্মদাসদার তখনও শেষ হয় নাই এবং যদিচ তাঁহার অব্যক্ত কণ্ঠস্বর সন্দেশের তাল ভেদ করিয়া সহজে মুখ দিয়া বাহির হইতে পারিল না, তথাপি বোঝা গেল এ বিষয়ে তাঁহার মতভেদ নাই ।

হাঁ, ওস্তাদি হাত বটে ! বলিয়া গোবিন্দ সকলের শেষে হাত ধুইবার উপক্রম করিতেই ময়রা সবিনয়ে অনুরোধ করিল, যদি কষ্টই কল্পেন ঠাকুরমশাই, তবে মিহিদানাটাও একটু পরখ ক’রে দিন ।

মিহিদানা ? কৈ, আন দেখি বাপু ?

মিহিদানা আসিল এবং এতগুলি সন্দেশের পরে এই নূতন বস্ত্রটির সদ্যবহার দেখিয়া রমেশ নিঃশব্দে চাহিয়া রহিল । দীননাথ মেয়ের প্রতি হস্ত প্রসারিত করিয়া কহিলেন, ওরে ও খেঁদি, ধর দিকি না এই ছুটো মিহিদানা ।

আমি আর খেতে পারিব না বাবা !

পার্বি, পার্বি । এক ঢোক জল খেয়ে গলাটা ভিজিয়ে নে দিকি, মুখ মেরে গেছে বৈ ত নয় । না পারিস, আঁচলে একটা গেরো দিয়ে রাখ,

কাল সকালে খাস্। হাঁ বাপু, খাওয়ালে বটে! যেমন অমৃত! তা বেশ হয়েছে। মিষ্টি বুঝি ছুরকম করলে বাবাজী?

রমেশকে বলিতে হইল না। ময়রা সোৎসাহে কহিল, আজ্ঞে না, রসগোল্লা, ক্ষীরমোহন—

আ ক্ষীরমোহন! কৈ সে ত বার করলে না বাপু?

বিস্মিত রমেশের মুখের পানে চাহিয়া দীননাথ কহিলেন, খেয়েছিলুম বটে রাধানগরে বোসেদের বাড়ি। আজও যেন মুখে লেগে রয়েছে। বললে বিশ্বাস করবে না বাবাজী, ক্ষীরমোহন খেতে আমি বড্ড ভালোবাসি।

রমেশ হাসিয়া একটুখানি ঘাড় নাড়িল। কথাটা বিশ্বাস করা তাহার কাছে অত্যন্ত কঠিন বলিয়া মনে হইল না। রাখাল কি কাজে বাহিরে যাইতেছিল। রমেশ তাহাকে ডাকিয়া কহিল, ভেতরে বোধ করি আচাধ্যমশাই আছেন; বা ত রাখাল, কিছু ক্ষীরমোহন তাঁকে আনতে ব'লে আয় দেখি।

সন্ধ্যা বোধ করি উত্তীর্ণ হইয়াছে। তথাপি ব্রাহ্মণেরা ক্ষীরমোহনের আশায় উৎসুক হইয়া বসিয়া আছেন। রাখাল ফিরিয়া আসিয়া বলিল, আজ আর ভাঁড়ারের চাবি খোলা হবে না বাবু!

রমেশ মনে মনে বিরক্ত হইল। কহিল, বল্ গে, আমি আনতে বলছি।

গোবিন্দ গাঙুলী রমেশের অসন্তোষ লক্ষ্য করিয়া চোখ ঘুরাইয়া কহিলেন, দেখলে দীহুদা ভৈরবের আক্কেল? এ যে দেখি মায়ের চেয়ে মাসির বেশি দরদ। সেই জগ্গেই আমি বলি—

তিনি কি বলেন তাহা না শুনিয়া রাখাল বলিয়া উঠিল, আচাধ্যমশায় কি করবেন? ও-বাড়ি থেকে গিন্নীমা এসে ভাঁড়ার বন্ধ করেছেন যে!

ধর্মদাস এবং গোবিন্দ উভয়ে চমকিয়া উঠিলেন, কে বড়গিন্নী?

রমেশ সবিস্ময়ে জিজ্ঞাসা করিল, জ্যাঠাইমা এসেছেন ?

আজ্ঞে হাঁ, তিনি এসেই ছোট বড় দুই ভাঁড়ারই তালাবন্ধ ক'রে ফেলেছেন।

বিস্ময়ে, আনন্দে রমেশ দ্বিতীয় কথাটি না বলিয়া দ্রুতপদে ভিতরে চলিয়া গেল।



জ্যাঠাইমা !

ডাক শুনিয়া বিশ্বেশ্বরী ভাঁড়ার ঘর হইতে বাহিরে আসিলেন। বেগীর বয়সের সঙ্গে তুলনা করিলে তাহার জননীর বয়স পঞ্চাশের কম হওয়া উচিত নয় ; কিন্তু দেখিলে কিছুতেই চল্লিশের বেশি বলিয়া মনে হয় না।

রমেশ নির্নিমেষ চক্ষে চাহিয়া রহিল। আজও সেই কাঁচা সোনার বর্ণ ! একদিন যে রূপের খ্যাতি এ অঞ্চলে প্রসিদ্ধ ছিল আজও সেই অনিন্দ্য-সৌন্দর্য্য তাঁহার নিটোল, পরিপূর্ণ দেহটিকে বর্জ্জন করিয়া দূরে বাইতে পারে নাই। মাথার চুলগুলি ছোট করিয়া ছাঁটা, স্নমুখেই দুই একগাছি কুঞ্চিত হইয়া কপালের উপর পড়িয়াছে। চিবুক, কপোল, গুণ্ঠাধর, ললাট সবগুলি যেন কোন বড় শিল্পীর বহুযত্নের, বহুসাধনার ফল। সব চেয়ে আশ্চর্য্য তাঁহার দুইটি চক্ষুর দৃষ্টি। সেদিকে ক্ষণকাল চাহিয়া থাকিলে সমস্ত অন্তঃকরণ যেন মোহাবিষ্ট হইয়া আসিতে থাকে।

এই জ্যাঠাইমা রমেশকে এবং বিশেষ করিয়া তাহার পরলোকগতা জননীকে এক সময় বড় ভালোবাসিতেন। বধু-বয়সে যখন ছেলেরা হয় নাই—শাশুড়ী-ননদের যত্নগায় লুকাইয়া বসিয়া এই দুইটি জায়ে যখন একযোগে চোখের জল ফেলিতেন—তখন এই স্নেহের প্রথম গ্রন্থি-বন্ধন

হয় ; তারপরে গৃহ-বিচ্ছেদ, মামলা-মোকদ্দমা, পৃথক হওয়া, কত রকমের ঝড়-ঝাপ্টা এই দুটি সংসারের উপর দিয়া বহিয়া গিয়াছে, বিবাদের উত্তাপে ঝাধন শিথিল হইয়াছে ; কিন্তু একেবারে বিচ্ছিন্ন হইতে পারে নাই। বহুবর্ষ পরে সেই ছোটবোয়ের ভাঁড়ার-বরে ঢুকিয়া তাহারই হাতে সাজানো সেই সমস্ত বহু পুরাতন হাঁড়ি-কলসির পানে চাহিয়া জ্যাঠাইমার চোখ দিয়া জল ঝরিয়া পড়িতেছিল। রমেশের আহ্বানে যখন তিনি চোখ মুছিয়া বাহির হইয়া আসিলেন তখন সেই দুটি আরক্ত আর্দ্র চক্ষু-পল্লবের পানে চাহিয়া রমেশ ক্ষণকালের জ্ঞাত বিস্ময়াপন্ন হইয়া রহিল। জ্যাঠাইমা তাহা টের পাইলেন। তাহাতেই বোধ করি, এই সত্ত-পিতৃহীন রমেশের প্রতি দৃষ্টিপাত করিতেই তাঁহার বুকের ভিতরটা যে ভাবে হাহাকার করিয়া উঠিল তাহার লেশমাত্র তিনি বাহিরে প্রকাশ পাইতে দিলেন না। বরং একটুখানি হাসিয়া বলিলেন, চিন্তে পারিস রমেশ ?

জবাব দিতে গিয়া রমেশের ঠোঁট কাঁপিয়া গেল। মা মারা গেলে বতদিন না সে মামার বাড়ি গিয়াছিল, ততদিন এই জ্যাঠাইমা তাহাকে বুকে করিয়া রাখিয়াছিলেন এবং কিছুতেই ছাড়িতে চাহেন নাই। সে-ও মনে পড়িল এবং ও-ও মনে হইল সেদিন ও-বাড়িতে গেলে জ্যাঠাইমা বাড়ি নাই বলিয়া দেখা পর্য্যন্ত করেন নাই ! তারপর রমাদের বাড়িতে বেগীর সাক্ষাতে বা অসাক্ষাতে তাহার মাসির নিরতিশয় কঠিন তিরস্কারে সে নিশ্চয় বুঝিয়া আসিয়াছিল, এ গ্রামে আপনার বলিতে তাহার আর কেহ নাই। বিশ্বেশ্বরী রমেশের মুখের প্রতি মুহূর্তকাল চাহিয়া থাকিয়া বলিলেন, ছি বাবা, এ সময়ে শক্ত হ'তে হয়।

তাঁহার কণ্ঠস্বরে কোমলতার আভাসমাত্র যেন ছিল না। রমেশ নিজেকে সামলাইয়া ফেলিল। সে বুঝিল, যেখানে অভিমানের কোন মর্যাদা নাই সেখানে অভিমান প্রকাশ পাওয়ার মত বিড়ম্বনা সংসারে

অন্নই আছে। কহিল, শক্ত আমি হয়েচি জ্যাঠাইমা ! তাই, যা পারতুম নিজেই করতুম, কেন তুমি আবার এলে ?

জ্যাঠাইমা হাসিলেন। কহিলেন, তুই ত আমাকে ডেকে আনিব্ রমেশ, যে তোকে তার কৈফিয়ৎ দেব ? তা শোন বলি। কাজ-কর্ম হ'বার আগে আর আমি ভাঁড়ার থেকে খাবার-টাবার কোনো জিনিস বার হ'তে দেব না ; যাবার সময় ভাঁড়ারের চাবি তোর হাতে দিয়ে যাব আবার কাল এসে তোর হাত থেকেই নেব। আর কার হাতে দিস্ নে যেন ! হাঁরে, সে দিন তোর বড়দার সঙ্গে দেখা হ'য়েছিল ?

প্রশ্ন শুনিয়া রমেশ বিধায় পড়িল। সে ঠিক বুঝিতে পারিল না, তিনি পুত্রের ব্যবহার জানেন কি না। একটু ভাবিয়া কহিল, বড়দা তখন ত বাড়ি ছিলেন না।

প্রশ্ন করিয়াই জ্যাঠাইমার মুখের উপর একটা উদ্বেগের ছায়া আসিয়া পড়িয়াছিল ; রমেশ স্পষ্ট দেখিতে পাইল তাহার এই কথায় সেই ভাবটা যেন কাটিয়া গিয়া মুখখানি প্রসন্ন হইয়া উঠিল। হাসিমুখে সম্মুখে অল্পযোগের কর্তে বলিলেন, আ আমার কপাল ! এই বুঝি ! হাঁ রে দেখা হয় নি ব'লে আর বেতে নেই ? আমি জানি রে, সে তোদের ওপর সন্তুষ্ট নয় ; কিন্তু তোর কাজ ত তোকে করা চাই। যা, একবার ভালো ক'রে বল্ গে যা রমেশ ! সে বড় ভাই, তার কাছে হেঁট হ'তে তোর কোন লজ্জা নেই। তা ছাড়া এটা মানুষের এমনি দুঃসময় বাবা, যে-কোন লোকের হাতে-পায়ে ধ'রে মিটমাট ক'রে নিতেও লজ্জা নেই। লক্ষ্মী-মাণিক আমার, যা একবার—এখন বোধ হয় সে বাড়িতেই আছে।

রমেশ চুপ করিয়া রহিল। এই আগ্রহাতিশয্যের হেতুও তাহার কাছে স্পষ্ট হইল না, মন হইতে সংশয়ও ঘুচিল না। বিধেখরী আরও কাছে সরিয়া আসিয়া নৃহৃৎসরে কহিলেন, বাইরে খাঁরা ব'সে আছেন তাঁদের

আমি তোর চেয়ে ঢের বেশি জানি ! তাঁদের কথা শুনিম্ নে । আম, আমার সঙ্গে তোর বড়দার কাছে একবার যাবি চল ।

রমেশ ঘাড় নাড়িয়া বলিল, না জ্যাঠাইমা, সে হয় না । আর বাইরে ঝাঁরা ব'সে আছেন, তাঁরা যাই হোন, তাঁরাই আমার সকলের চেয়ে আপনার ।

সে আরও কি কি বলিতে যাইতেছিল কিন্তু হঠাৎ জ্যাঠাইমার মুখের প্রতি লক্ষ্য করিয়া সে মহাবিস্ময়ে চূপ করিল । তাহার মনে হইল জ্যাঠাইমার মুখখানি যেন সহসা চারিদিকের সন্ধ্যার চেয়েও বেশি মলিন হইয়া গেল । খানিক পরে তিনি একটা নিশ্বাস ফেলিয়া বলিলেন, আচ্ছা, তবে যাই । যখন তার কাছে যাওয়া হ'তেই পারবে না, তখন আর সে নিয়ে কথা কয়ে কি হবে । যা হোক, তুই কিছু ভাবিস্ নি বাবা, কিছুই আটকাবে না । আমি আবার খুব ভোরেই আসবো । বলিয়া বিস্ফেখরী তাঁহার দাসীকে ডাকিয়া লইয়া খিড়কির দ্বার দিয়া ধীরে ধীরে বাহির হইয়া গেলেন । বেণীর সহিত রমেশের ইতিমধ্যে দেখা হইয়া যে একটা কিছু হইয়া গিয়াছে, তাহা তিনি বুঝিলেন । তিনি যে পথে গেলেন সেই দিকে চাহিয়া কিছুক্ষণ নিঃশব্দে দাঁড়াইয়া থাকিয়া রমেশ স্নানমুখে যখন বাহিরে আসিল তখন গোবিন্দ ব্যগ্র হইয়া জিজ্ঞাসা করিলেন, বাবাজী, বড়গিন্নী এসেছিলেন না ?

রমেশ ঘাড় নাড়িয়া বলিল, হাঁ ।

শুনলুম ভাঁড়ার বন্ধ ক'রে চাবি নিয়ে গেলেন, না ?

রমেশ তেমনি মাথা নাড়িয়া জবাব দিল । কারণ, অবশেষে কি মনে করিয়া তিনি যাইবার সময় ভাঁড়ারের চাবি নিজেই লইয়া গিয়াছিলেন । গোবিন্দ কহিলেন, দেখলে ধর্মদাসদা, যা বলেচি তাই । বলি মতলবটা বুঝলে বাবাজী ?

রমেশ মনে মনে অত্যন্ত ক্রুদ্ধ হইল ; কিন্তু নিজের নিরুপায় অবস্থা

স্মরণ করিয়া সহ্য করিয়া চুপ করিয়া রহিল। দরিদ্র দীঘু ভট্টাচার্য তখনও যায় নাই। কারণ তাহার বুদ্ধি-সুদৃষ্টি ছিল না। ছেলে-মেয়ে লইয়া যাহার দয়ায় পেট ভরিয়া সন্দেশ খাইতে পাইয়াছিল, তাহাকে আন্তরিক দুটা আশীর্বাদ না করিয়া, সকলের সম্মুখে উচ্চকণ্ঠে তাহার সাত-পুরুষের স্তব-স্তুতি না করিয়া আর ঘরে ফিরিতে পারিতেছিলেন না। সে ব্রাহ্মণ নিরীহভাবে বলিয়া ফেলিলেন, এ মতলব বোঝা আর শক্ত কি ভায়া? তালাবন্ধ ক'রে চাবি নিয়ে গেছেন তার মানে ভাঁড়ার আর কারো হাতে না পড়ে। তিনি সমস্তই ত জানেন।

গোবিন্দ বিরক্ত হইয়াছিলেন; নির্কোধের কথায় জলিয়া উঠিয়া তাঁহাকে একটা ধমক দিয়া কহিলেন, বোঝো না সোঝো না তুমি কথা কও কেন বল ত। তুমি এ সব ব্যাপারের কি বোঝো যে মানে কস্মতে এসেচ?

ধমক খাইয়া দীঘুর নির্বুদ্ধিতা আরও বাড়িয়া গেল। তিনি উচ্চ হইয়া জবাব দিলেন, আরে এতে বোঝা-বুঝিটা আছে কোন্‌খানে? শুনচ না গিন্নীমা স্বয়ং এসে ভাঁড়ার বন্ধ ক'রে চাবি নিয়ে গেছেন? এতে কথা কইবে আবার কে?

গোবিন্দ আগুন হইয়া কহিলেন, ঘরে যাও না ভট্টাচার্য। যে জন্তে ছুটে এসেছিলে—গুণ্ঠিবর্গ মিলে খেলে, বাঁধ্লে, আর কেন? স্কীরমোহন পরশু খেয়ে আজ আর হবে না। এখন যাও আমাদের ঢের কাজ আছে।

দীঘু লজ্জিত ও সঙ্কুচিত হইয়া পড়িলেন। রমেশ ততোধিক কুণ্ঠিত ও ক্রুদ্ধ হইয়া উঠিল। গোবিন্দ আরও কি বলিতে যাইতেছিলেন কিন্তু সহসা রমেশের শাস্ত অথচ কঠিন কণ্ঠস্বরে থামিয়া গেলেন—আপনার হ'ল কি গাঙুলীমশাই? যাকে-তাকে এমন থামকা অপমান কস্মচেন কেন?

গোবিন্দ ভৎসিত হইয়া প্রথমটা বিস্মিত হইলেন; কিন্তু পরক্ষণেই শুদ্ধাসি হাসিয়া বলিলেন, অপমান আবার কাকে করলুম বাবাজী? ভাল,



ওকেই জিজ্ঞেসা করে দেখ না সত্যি কথাটি বলেচি কি না? ও ডালে ডালে বেড়ায় ত আমি পাতায় পাতায় ফিরি যে। দেখলে ধর্মদাসদা, দীনে বামনার আশ্পর্শ? আচ্ছা—

ধর্মদাসদা কি দেখিলেন তাহা তিনিই জানেন, কিন্তু রমেশ এই লোকটার নির্লজ্জতা ও স্পর্শা দেখিয়া অবাক হইয়া গেল। তখন দীহু রমেশের দিকে চাহিয়া নিজেই বলিলেন, না বাবা, গোবিন্দ সত্য কথাই বলেচেন। আমি বড় গরীব সে কথা সবাই জানে। ঠুঁদের মত আমার জমি-জমা চাষ-বাস কিছুই নেই। এক রকম চেয়ে-চিন্তে ভিক্ষে-শিক্ষে করেই আমাদের দিন চলে। ভাল জিনিস ছেলে-পিলেদের কিনে খাওয়াবার ক্ষমতাও ভগবান দেন নি—তাই বড়-ঘরে কাজ-কর্ম হ'লে ওরা খেয়ে বাঁচে। কিছু মনে ক'রো না বাবা, তারিগীদাদা বেঁচে থাকলে তিনি আমাদের খাওয়াতে বড় ভালোবাসতেন। তাই আমি তোমাকে নিশ্চয় বলছি বাবা, আমরা যে আশ মিটিয়ে খেয়ে গেলুম তিনি ওপর থেকে দেখে খুসীই হ'য়েছেন।

হঠাৎ দীহুর গভীর গুহ চোখদুটো জলে ভরিয়া উঠিয়া টপ্ টপ্ করিয়া দুফোটা সকলের সম্মুখেই ঝরিয়া পড়িল। রমেশ মুখ ফিরিয়া দাঁড়াইল। দীহু তাহার মলিন ও শতছিন্ন উত্তরীয়-প্রান্তে অশ্রু মুছিয়া ফেলিয়া বলিলেন, শুধু আমিই নই বাবা। এদিকে আমার মত দুঃখী-গরীব যে যেখানে আছে তারিগীদার কাছে হাত পেতে কেউ কখনো অমনি করে নি। সে কথা কে আর জানে বল? তাঁর ডান হাতের দান বাঁ-হাতটাও টের পেত না যে! আর তোমাদের আলাতন করব না। নে মা খেঁদী ওঠ, হরিধন, চল বাবা ঘরে যাই, আবার কাল সকালে আসব। আর কি বলব বাবা রমেশ, বাপের মত হও, দীর্ঘজীবী হও।

রমেশ তাঁহার সঙ্গে আসিয়া আর্দ্রকণ্ঠে কহিল, ভট্টাচাৰ্য্যমশাই এই দুটো তিনটে দিন আমার ওপর দয়া রাখবেন। আর বলতে সঙ্কোচ

হয়, কিন্তু এ বাড়িতে হরিধনের মায়ের বদি পায়ের ধুলো পড়ে ত বড় ভাগ্য ব'লে মনে করব ।

ভট্টাচাৰ্য্যমশায় ব্যস্ত হইয়া নিজের দুই হাতের মধ্যে রমেশের দুই হাত চাপিয়া ধরিয়া কঁাদ কঁাদ হইয়া বলিলেন, আমি বড় দুঃখী বাবা রমেশ, আমাকে এমন ক'রে বল্লে যে লজ্জায় ম'রে যাই ।

ছেলেমেয়ে সঙ্গে করিয়া বৃদ্ধ ধীরে ধীরে চলিয়া গেলেন । রমেশ ফিরিয়া আসিয়া মুহূর্তের জন্ত নিজের রুঢ় কথা শ্রবণ করিয়া গাঙুলীমশায়কে কিছু বলিবার চেষ্টা করিতেই তিনি থামাইয়া দিয়া উদ্দীপ্ত হইয়া বলিয়া উঠিলেন, এ যে আমার নিজের কাজ রমেশ, তুমি না ডাকলেও যে আমাকে নিজে এসেই সমস্ত কর্তে হ'ত । তাই ত এসেছি ; ধৰ্ম্মদাসদা আর আমি দুই ভায়ে ত তোমার ডাকবার অপেক্ষা রাখি নি বাবা ।

ধৰ্ম্মদাস এইমাত্র তামাক খাইয়া কাসিতেছিলেন । লাঠিতে ভর দিয়া দাঁড়াইয়া কাসির ধমকে চোখ-মুখ রাঙা করিয়া হাত ঘুরাইয়া বলিলেন, বলি শোন রমেশ, আমরা বেণী ঘোষাল নই । আমাদের জন্মের ঠিক আছে ।

তঁাহার কুৎসিত কথায় রমেশ চম্কাইয়া উঠিল ; কিন্তু আর রাগ করিল না । এই অভ্যস্ত সময়ের মধ্যেই সে বুঝিয়াছিল ইহারা শিক্ষা ও অভ্যাসের দোষে অসঙ্কোচে কত বড় গর্হিত কথা যে উচ্চারণ করে তাহা জানেও না ।

জ্যাঠাইমার সঙ্গেই অহুরোধে এবং তঁাহার ব্যথিত মুখ মনে করিয়া সে বড়দার কাছে যাইবার জন্ত প্রস্তুত হইল । বেণীর চণ্ডীমণ্ডপের বাহিরে আসিয়া যখন উপস্থিত হইল তখন রাত্রি আটটা । ভিতরে যেন একটা লড়াই চলিতেছে । গোবিন্দ গাঙুলীর হাঁকাহাঁকিটাই সবচেয়ে বেশি । বাহির হইতেই তাহার কানে গেল, গোবিন্দ বাজি রাখিয়া বলিতেছেন, এ যদি না ছুদিনে উচ্ছন্ন যায় ত আমার গোবিন্দ গাঙুলী নাম তোমরা বদলে রেখো বেণীবাবু ! নবাবী কাণ্ডকারখানা শুন্লে ত ? তারিণী

ষোড়াল সিকি পয়সা রেখে মরে নি তা জানি, তবে এত কেন ? হাতে থাকে কয়, না থাকে বিষয় বন্ধক দিয়ে কে কবে ঘটা ক'রে বাপের ছাদ করে তা ত কখন শুনি নি বাবা । আমি তোমাকে নিশ্চয় বল্চি বেণীমাধববাবু, এ ছোড়া নন্দীদের গদি থেকে অন্ততঃ তিনটি হাজার টাকা দেনা ক'রেচে ।

বেণী উৎসাহিত হইয়া কহিলেন, তা হ'লে কথাটা ত বার ক'রে নিতে হ'চ্ছে গোবিন্দখুড়ো ?

গোবিন্দ স্বর মুছ করিয়া বলিলেন, সব্ব কর না বাবাজী ! একবার ভালো ক'রে চুকতেই দাও না—তার পরে—বাইরে দাঁড়িয়ে কে ও ? এ কি রমেশ বাবাজী ? আমরা থাকতে এত রাগ্তিরে তুমি কেন বাবা ?

রমেশ সে কথার জবাব না দিয়া অগ্রসর হইয়া আসিয়া বলিল, বড়দা, আপনার কাছেই এলুম ।

বেণী খতমত খাইয়া জবাব দিতে পারিলেন না । গোবিন্দ তৎক্ষণাৎ কহিলেন, আস্বে বই কি বাবা, একশবার আস্বে । এ ত তোমারই বাড়ি ! আর বড় ভাই পিতৃতুল্য । তাই ত আমরা বেণীবাবুকে বলতে এসেছি, বেণীবাবু, তারিণীদার সঙ্গে মনোমালিন্য তাঁর সঙ্গেই যাক—আর কেন ? তোমরা দুভাই এক হও, আমরা দেখে চোখ জুড়োই—কি বল হালদারমামা ?—ও কি দাঁড়িয়ে রইলে যে বাবা—কে আছি সু রে, একখানা কব্বলের আসন-টাসন পেতে দে না রে ! না বেণীবাবু, তুমি বড় ভাই—তুমিই সব । তুমি আলাদা হয়ে থাকলে চলবে না । তা ছাড়া বড়গিন্নীঠাকরুণ যখন স্বয়ং গিয়ে উপস্থিত হ'য়েছেন, তখন—

বেণী চমকাইয়া উঠিল—মা গিয়েছিলেন !

এই চমকটা লক্ষ্য করিয়া গোবিন্দ মনে মনে খুসী হইলেন ; কিন্তু বাইরে সে ভাব গোপন করিয়া নিতান্ত ভালো-মানুষের মত খবরটা ফলাও

করিয়া বলিতে লাগিলেন, শুধু যাওয়া কেন, ভাঁড়ার-টাঁড়ার—করা কম্ব  
বা কিছু তিনিই ত কয়্চেন। আর তিনি না কয়্লে কয়্বেই বা কে ?

সকলেই চুপ করিয়া রহিল। গোবিন্দ একটা দীর্ঘনিশ্বাস ফেলিয়া  
কহিলেন, নাঃ—গাঁয়ের মধ্যে বড়গিন্নীঠাকুরের মত মানুষ কি আর  
আছে ? না হবে ? না বেগীবাবু, সামনে বল্লে খোসামোদ করা হবে,  
কিন্তু যে যাই বলুক, গাঁয়ে যদি লক্ষ্মী থাকেন ত সে তোমার মা। এমন মা  
কি কারু হয় ? বলিয়া পুনশ্চ একটা দীর্ঘনিশ্বাস ত্যাগ করিয়া গম্ভীর হইয়া  
রহিলেন। বেগী অনেকক্ষণ চুপ করিয়া থাকিয়া অশ্রুটে কহিল, আচ্ছা—

গোবিন্দ চাপিয়া ধরিলেন, শুধু আচ্ছা নয় বেগীবাবু ! যেতে হবে,  
কয়্তে হবে, সমস্ত ভার তোমার উপরে। ভাল কথা, সবাই আপনারা  
ত উপস্থিত আছেন, নেমস্তন্নটা কি রকম করা হবে একটা ফর্দ ক'রে  
ফেলা হোক না কেন ? কি বল রমেশ বাবাজী ? ঠিক কথা কি না  
হালদারমামা ! ধর্ম্মদাসদা চুপ ক'রে রইলে কেন ? কাকে বল্তে হবে  
কাকে বাদ দিতে হবে, জান ত সব।

রমেশ উঠিয়া দাঁড়াইয়া সহজ-বিনীত কণ্ঠে বলিল, বড়দা একবার  
পায়ের ধুলো যদি দিতে পারেন—

বেগী গম্ভীর হইয়া বলিল, মা যখন গেছেন তখন আমার যাওয়া না  
যাওয়া—কি বল গোবিন্দখুড়ো ?

গোবিন্দ কথা কহিবার পূর্বেই রমেশ বলিল, আপনাকে আমি  
পীড়াপীড়ি কয়্তে চাই নে বড়দা, যদি অসুবিধে না হয় একবার দেখে  
শুনে আসুবেন।

বেগী চুপ করিয়া রহিল। গোবিন্দ কি একটা বলিবার চেষ্টা করিতেই  
রমেশ উঠিয়া চলিয়া গেল। তখন গোবিন্দ বাহিরের দিকে গলা বাড়াইয়া  
দেখিয়া ফিস্ ফিস্ করিয়া বলিলেন, দেখ্লে বেগীবাবু, কথার ভাবখানা !  
বেগী অশ্রুমনস্ক হইয়া কি ভাবিতেছিল, কথা কহিল না।

পথে চলিতে চলিতে গোবিন্দর কথাগুলো মনে করিয়া রমেশের সমস্ত মন যুগায় পরিপূর্ণ হইয়া উঠিল। সে অর্ধেক পথ হইতে ফিরিয়া আসিয়া সেই রাত্রেই আবার বেণী ঘোষালের বাড়ির ভিতর প্রবেশ করিল। চণ্ডীমণ্ডপের মধ্যে তখন তর্ক কোলাহল উদ্দাম হইয়া উঠিয়াছিল; কিন্তু সে গুনিতেও তাহার প্রবৃত্তি হইল না। সোজা ভিতরে প্রবেশ করিয়া রমেশ ডাকিল, জ্যাঠাইমা!

জ্যাঠাইমা তাঁহার ঘরের স্নমুখের বারান্দায় অন্ধকারে চূপ করিয়া বসিয়াছিলেন, এতরাত্রে রমেশের গলা শুনিয়া বিস্ময়াপন্ন হইলেন।

—রমেশ? কেন রে?

রমেশ উঠিয়া আসিল। জ্যাঠাইমা ব্যস্ত হইয়া বলিলেন, একটু দাঁড়া বাবা, একটা আলো আনতে ব'লে দি।

আলোয় কাজ নেই জ্যাঠাইমা, তুমি উঠো না। বলিয়া রমেশ অন্ধকারেই একপাশে বসিয়া পড়িল। তখন জ্যাঠাইমা প্রশ্ন করিলেন, এত রাত্তিরে যে?

রমেশ মৃদুকণ্ঠে কহিল, এখনো নিমন্ত্রণ করা হয় নি জ্যাঠাইমা, তাই তোমাকে জিজ্ঞাসা করিতে এলাম।

তবেই মুন্সিলে ফেল্লি বাবা! এঁরা কি বলেন? গোবিন্দ গাঙুলী, চাটুয্যেমশাই—

রমেশ বাধা দিয়া বলিয়া উঠিল, জানি নে জ্যাঠাইমা, কি এঁরা বলেন। জানতেও চাই নে—তুমি যা বলবে, তাই হবে।

অকস্মাৎ রমেশের কথার উত্তাপে বিশ্বেশ্বরী মনে মনে বিস্মিত হইয়া ক্ষণকাল মৌন থাকিয়া বলিলেন, কিন্তু তখন যে বল্লি রমেশ, এরাই তোর সব চেয়ে আপনার! তা যাই হোক, আমার মেয়েমানুষের কথায় কি হবে বাবা? এ গাঁয়ে যে আবার—আর এ গাঁয়েই বা কেন বলি, সব গাঁয়েই—এ ওর সঙ্গে থায় না, ও তার সঙ্গে কথা কয় না—

একটা কাজ-কর্ম পড়ে গেলে আর মাহুয়ের দুর্ভাবনার অন্ত থাকে না। কাকে বাদ দিয়ে কাকে রাখা যায় এর চেয়ে শক্ত কাজ আর গ্রামের মধ্যে নেই।

রমেশ বিশেষ আশ্চর্য্য হইল না। কারণ এই কয়দিনের মধ্যেই সে অনেক জ্ঞানলাভ করিয়াছিল। তথাপি জিজ্ঞাসা করিল, কেন এ রকম হয় জ্যাঠাইমা ?

সে অনেক কথা বাবা ! যদি থাকিস্ এখানে আপনি সব জানুতে পার্বে। কারুর সত্যিকার দোষ-অপরাধ আছে, কারুর মিথ্যে-অপবাদ আছে—তা ছাড়া মামলা-মোকদ্দমা, মিথ্যে-সাক্ষী-দেওয়া নিয়েও মন্ত দলাদলি। আমি যদি তোর ওখানে দুদিন আগে যেতুম রমেশ, তা হ'লে এত উত্তোগ-আয়োজন কিছুতে করতে দিতুম না। কি যে সে দিন হবে তাই কেবল আমি ভাব্‌চি, বলিয়া জ্যাঠাইমা একটা নিশ্বাস ফেলিলেন। সে নিশ্বাসে যে কি ছিল তাহার ঠিক মর্ম্মটি রমেশ ধরিতে পারিল না। এবং কাহারও সত্যিকার অপরাধই বা কি এবং কাহারও মিথ্যা অপরাধই বা কি হইতে পারে তাহাও ঠাহর করিতে পারিল না, বরঞ্চ উত্তেজিত হইয়া কহিল, কিন্তু আমার সঙ্গে ত তার কোন যোগ নেই। আমি একরকম বিদেশী বললেই হয়—কারো সঙ্গে কোন শক্ততা নেই। তাই আমি বলি জ্যাঠাইমা, আমি দলাদলির কোন বিচারই করব না, সমস্ত ব্রাহ্মণ-শূদ্রই নিমন্ত্ৰণ ক'রে আসব ; কিন্তু তোমার হুকুম ছাড়া ত পারি নে ; তুমি হুকুম দাও জ্যাঠাইমা !

জ্যাঠাইমা কিছুক্ষণ চুপ করিয়া ভাবিয়া বলিলেন, এ রকম হুকুম ত দিতে পারি নে রমেশ। তাতে ভারি গোলযোগ ঘটবে। তবে তোর কথাও যে সত্যি নয় তাও আমি বলি নে ; কিন্তু এ ঠিক সত্যি-মিথ্যের কথা নয় বাবা। সমাজ যাকে শাস্তি দিয়ে আলাদা ক'রে রেখেচে তাকে জবরদস্তি ডেকে আনা যায় না। সমাজ যাই হোক, তাকে মান্ত কর্ত্তেই

হবে ! নইলে তার ভালো করবার মন্দ কর্মবার কোন শক্তিই থাকে না—  
এ রকম হ'লে ত কোনমতেই চলতে পারে না রমেশ !

ভাবিয়া দেখিলে রমেশ এ কথা যে অস্বীকার করিতে পারিত তা  
নহে ; কিন্তু এইমাত্র নাকি বাহিরে এই সমাজের শীর্ষস্থানীয়দের বড়ব্রত  
এবং নীচাশয়তা তাহার বুকের মধ্যে আগুনের শিখার মত জ্বলিতেছিল,  
তাই সে তৎক্ষণাৎ ঘৃণাভরে বলিয়া উঠিল, এ গাঁয়ের সমাজ বলতে ধর্মদাস,  
গোবিন্দ—এঁরা ত ? এমন সমাজের একবিন্দু ক্ষমতাও না থাকে সেই  
ত ঢের ভাল জ্যাঠাইমা ।

জ্যাঠাইমা রমেশের উষ্ণতা লক্ষ্য করিলেন ; কিন্তু শাস্তকণ্ঠে বলিলেন,  
শুধু এরা নয় রমেশ, তোমার বড়দা বেণীও সমাজের কর্তা ।

রমেশ চুপ করিয়া রহিল । তিনি পুনরপি বলিলেন, তাই আমি বলি  
এঁদের মত নিয়ে কাজ করো গে রমেশ ! সবেমাত্র বাড়িতে পা দিয়েই  
এঁদের বিরুদ্ধতা করা ভাল নয় ।

বিশেষ্বরী কতটা দূর চিন্তা করিয়া যে একরূপ উপদেশ দিলেন তীব্র  
উত্তেজনার মুখে রমেশ তাহা ভাবিয়া দেখিল না ; কহিল, তুমি নিজে  
এইমাত্র বল্লে জ্যাঠাইমা নানান কারণে এখানে দলাদলির সৃষ্টি হয় ।  
বোধকরি ব্যক্তিগত আক্রোশটাই সবচেয়ে বেশি । তা ছাড়া, আমি  
যখন সত্যি-মিথ্যে কারো দোষ-অপরাধের কথাই জানি নে, তখন  
কোন লোককেই বাদ দিয়ে অপমান করা আমার পক্ষে অশ্রায় ।

জ্যাঠাইমা একটুখানি হাসিয়া বলিলেন, ওরে পাগ্‌লা, আমি যে  
তোর গুরুজন, মায়ের মতো । আমার কথাটা না শোনাও তোর পক্ষে  
অশ্রায় ।

কি কর্মবো জ্যাঠাইমা, আমি স্থির করেচি, আমি সকলকেই নিমন্ত্রণ  
কর্মবো ।

তাহার দৃঢ়সঙ্কল্প দেখিয়া বিশেষ্বরীর মুখ অগ্রসর হইল ; বোধকরি বা

মনে মনে বিরক্তও হইলেন ; বলিলেন, তা হ'লে আমার হুকুম নিতে আসাটা তোমার শুধু একটা ছলমাত্র ।

জ্যাঠাইমার বিরক্তি রমেশ লক্ষ্য করিল, কিন্তু বিচলিত হইল না । খানিক পরে আশ্বে আশ্বে বলিল, আমি জানতুম জ্যাঠাইমা, যা অন্ডায় নয়, আমার সে কাজে তুমি প্রসন্নমনে আমাকে আশীর্বাদ করবে ! আমার—

তাহার কথাটা শেষ হইবার পূর্বেই বিস্ময়বাহী বাধা দিয়া বলিয়া উঠিলেন, কিন্তু এটাও ত তোমার জানা উচিত ছিল রমেশ, যে আমার সম্ভানের বিরুদ্ধে আমি যেতে পারব না ?

কথাটা রমেশকে আঘাত করিল । কারণ মুখে সে যাই বলুক, কেমন করিয়া তাহার সমস্ত অন্তঃকরণ কাল হইতে এই জ্যাঠাইমার কাছে সম্ভানের দাবি করিতেছিল, এখন দেখিল এ দাবির অনেক উর্ধ্বে তাহার আপন সম্ভানের দাবি যায়গা জুড়িয়া আছে । সে ক্ষণকাল মাত্র চুপ করিয়া থাকিয়াই উঠিয়া দাঁড়াইয়া চাপা অভিমানের স্বরে বলিল, কাল পর্য্যন্ত তাই জানতুম জ্যাঠাইমা ! তাই তোমাকে তখন বলেছিলুম, যা পারি আমি একলা করি, তুমি এসো না ; তোমাকে ডাকবার সাহসও আমার হয় নি ।

এই ক্ষুণ্ণ অভিমান জ্যাঠাইমার অগোচর রহিল না ; কিন্তু আর জবাব দিলেন না, অন্ধকারে চুপ করিয়া বসিয়া রহিলেন । খানিক পরে রমেশ চলিয়া যাইবার উপক্রম করিতেই বলিলেন, তবে একটু দাঁড়াও বাছা, তোমার ভাঁড়ার ঘরের চাবিটা এনে দিই, বলিয়া ঘরের ভিতর হইতে চাবি আনিয়া রমেশের পায়ের কাছে ফেলিয়া দিলেন । রমেশ কিছুক্ষণ স্তব্ধভাবে দাঁড়াইয়া থাকিয়া অবশেষে গভীর একটা নিশ্বাস ফেলিয়া চাবিটা তুলিয়া লইয়া আশ্বে আশ্বে চলিয়া গেল । ঘণ্টা-কয়েকমাত্র পূর্বে সে মনে মনে বলিয়াছিল, আর আমার ভয় কি, আমার জ্যাঠাইমা আছেন ; কিন্তু একটা রাত্রিও কাটিল না, তাহাকে আবার নিশ্বাস ফেলিয়া বলিতে হইল, না, আমার কেউ নেই—জ্যাঠাইমাও আমাকে ত্যাগ করেছেন ।



বাহিরে এইমাত্র শ্রাদ্ধ শেষ হইয়া গিয়াছে। আসন হইতে উঠিয়া রমেশ অভ্যাগতদের সহিত পরিচিত হইবার চেষ্টা করিতেছে—বাড়ির ভিতরে আহারের জন্য পাতা পাতিবার আয়োজন হইতেছে, এমন সময় একটা গোলযোগ হাঁকাহাঁকি শুনিয়া রমেশ ব্যস্ত হইয়া ভিতরে আসিয়া উপস্থিত হইল। সঙ্গে সঙ্গে অনেকেই আসিল। ভিতরে রন্ধনশালার কপাটের একপাশে একটি পঁচিশ-ছাব্বিশ বছরের বিধবা মেয়ে জড়সড় হইয়া পিছন ফিরিয়া দাঁড়াইয়া আছে এবং আর একটি প্রোঢ়া-রমণী তাঁহাকে আগ্লাইয়া দাঁড়াইয়া ক্রোধে চোখ-মুখ রক্তবর্ণ করিয়া চীৎকারে অগ্নিস্ফুলিঙ্গ বাহির করিতেছে। বিবাদ বাধিয়াছে পরাণ হালদারের সহিত। রমেশকে দেখিবামাত্র প্রোঢ়া চোঁচাইয়া প্রশ্ন করিল, হাঁ বাবা, তুমি ত গাঁয়ের একজন জমিদার, বলি, যত দোষ কি এই ক্ষেস্তি বাম্নির মেয়ের? মাথার ওপর আমাদের কেউ নেই ব'লে কি যতবার খুসী শান্তি দেবে?

গোবিন্দকে দেখাইয়াই বলিল, ঐ উনি মুখ্যো-বাড়ির গাছ-পিত্তিষ্ঠের সমস্ত জরিমানা ব'লে ইন্সুলের নামে দশ টাকা আমার কাছে আদায় করেন নি কি? গাঁয়ের বোল আনা শেতলা-পূজোর জন্তে দুজোড়া পাঠার দাম ধ'রে নেন্ নি কি? তবে? কতবার ঐ এক কথা নিয়ে ষাঁটাষাঁটি করতে চান শুনি?

রমেশ ব্যাপারটা কি, কিছুতেই বুঝিতে পারিল না। গোবিন্দ গাঙুলী বসিয়াছিলেন, মীমাংসা করিতে উঠিয়া দাঁড়াইলেন। একবার রমেশের

দিকে একবার প্রোঁটার দিকে চাহিয়া গভীর গলায় কহিলেন, যদি আমার নামটাই করুলে ক্ষ্যান্তমাসি, তবে সত্যি কথা বলি বাছা ! খাতিরে কথা কইবার লোক এই গোবিন্দ গাঙুলী নয়, সে দেশগুহ লোক জানে ! তোমার মেয়ের প্রাশ্চিত্যও হয়েছে, সামাজিক জরিমানাও আমরা করেছি—সব মানি ; কিন্তু তাকে যজ্ঞিতে কাঠি দিতে ত আমরা হকুম দিই নি। মরুলে ওকে পোড়াতে আমরা কাঁধ দেব, কিন্তু—

ক্ষ্যান্তমাসি চীৎকার করিয়া উঠিল, মলে তোমার নিজের মেয়েকে কাঁধে ক'রে পুড়িয়ে এসো বাছা—আমার মেয়ের ভাবনা তোমাকে ভাবতে হবে না ! বলি, হাঁ গোবিন্দ, নিজের গায়ে হাত দিয়ে কি কথা কও না ? তোমার ছোটভাজ যে ঐ ভাঁড়ার ঘরে বসে পান সাজচে, সে আর বছর মাস-দেড়েক ধ'রে কোন্ কান্দীবাস ক'রে অমন হন্দের রোগা শলতেটির মত হ'য়ে ফিরে এসেছিল, শুনি ? সে বড়লোকের বড় কথা বুঝি ? বেশি বাঁটিয়ে না বাপু, আমি সব জারিজুরি ভেঙে দিতে পারি। আমরাও ছেলেমেয়ে পেটে ধরেচি, আমরা চিন্তে পারি। আমাদের চোখে ধুলো দেওয়া যায় না।

গোবিন্দ ক্ষাপার মত বাঁপাইয়া পড়িলেন—তবে রে হারামজাদা মাগী—

কিন্তু হারামজাদা মাগী একটুও ভয় পাইল না, বরং এক পা আগাইয়া আসিয়া হাত-মুখ ঘুরাইয়া কহিল, মারবি না কি রে ? ক্ষেস্তি বাম্নিকে বাঁটালে ঠগ্ বাছতে গাঁ উজোড় হয়ে যাবে তা বলে দিচ্ছি। আমার মেয়ে ত রান্নাঘরে ঢুকতে যায় নি ; দোর গোড়ায় আস্তে না আস্তে হালদার ঠাকুরপো যে খামকা অপমান ক'রে বসল, বলি তার বেয়ানের তাঁতি অপবাদ ছিল না কি ? আমি ত আর আজকের নই গো, বলি, আরও বলব, না এতেই হবে ?

রমেশ কাঠ হইয়া দাঁড়াইয়া রহিল। ভৈরব আচার্য্য ব্যস্ত হইয়া ক্যান্ডার হাতটা প্রায় ধরিয়া ফেলিয়া সাম্ননয়ে কহিল, এতেই হবে মাসি, আর কাজ নেই। নে, স্কুমারী, ওঠ মা, চল বাছা আমার সঙ্গে ও-ঘরে গিয়ে বসবি চল।

পরান হালদার চাদর কাঁধে লইয়া সোজা খাড়া হইয়া উঠিয়া বলিলেন, বেশে মাগীদের বাড়ি থেকে একেবারে তাড়িয়ে না দিলে এখানে আমি জলগ্রহণ কয় না তা বলে দিচ্ছি। গোবিন্দ! কালীচরণ! তোমাদের মামাকে চাও ত উঠে এসো বল্‌চি। বেণী ঘোষাল যে তখন বলেছিল, মামা, যেয়ো না ওখানে! এমন সব খান্‌কী নটীর কাণ্ডকারখানা জানলে কি জাতজন্ম খোঁয়াতে এ বাড়ির চৌকাঠ মাড়াই? কালী! উঠে এসো।

মাতুলের পুনঃপুনঃ আহ্বানেও কিন্তু কালীচরণ ঘাড় হেঁট করিয়া বসিয়া রহিল। সে পাটের ব্যবসা করে। বছর-চারেক পূর্বে কলিকাতাবাসী তাহার এক গণমান্ত খরিদদার বন্ধু তাহার বিধবা ছোটভগিনীকে লইয়া প্রস্থান করিয়াছিল। ঘটনাটি গোপন ছিল না। হঠাৎ স্বশ্রববাড়ি যাওয়া এবং তথা হইতে তীর্থযাত্রা ইত্যাদি প্রসঙ্গে কিছুদিন চাপা ছিল মাত্র। পাছে এই দুর্ঘটনার ইতিহাস এত লোকের সমক্ষে আবার উঠিয়া পড়ে এই ভয়ে কালী মুখ তুলিতে পারিল না; কিন্তু গোবিন্দর গায়ের জ্বালা আদৌ কমে নাই। তিনি আবার উঠিয়া দাঁড়াইয়া জোর গলায় কহিলেন, যে যাই বলুক না কেন, এ অঞ্চলের সমাজপতি হ'লেন বেণী ঘোষাল, পরান হালদার, আর বহু মুখ্যো মহাশয়ের কণ্ঠ। তাঁদের আমরা ত কেউ ফেলতে পারব না। রমেশ বাবাজী সমাজের অমতে এই ছোটো মাগীকে কেন বাড়ি ঢুকতে দিয়েছেন তার জবাব না দিলে কেউ আমরা এখানে জলটুকু পর্য্যন্ত মুখে দিতে পারব না।

দেখিতে দেখিতে পাঁচ-সাত-দশজন চাদর কাঁধে ফেলিয়া একে একে

উঠিয়া দাঁড়াইল। ইহারা পাড়াগাঁয়েরই লোক ; সামাজিক ব্যাপারে কোথায় কোন্‌ চাল সর্বাপেক্ষা লাভজনক ইহা তাহাদের অবদিত নহে।

নিমজ্জিত ব্রাহ্মণ-সজ্জনেরা যাহার যা খুসী বলিতে লাগিল। ভৈরব এবং দীপ্ত ভট্টচাষ, কাঁদ কাঁদ হইয়া বার বার ক্ষ্যাস্তমাসি ও তাহার মেয়ের, একবার গাঙুলী একবার হালদার মহাশয়ের হাতে-পায়ে ধরিবার উপক্রম করিতে লাগিল—চারিদিক হইতে সমস্ত অস্থুষ্ঠান ও ক্রিয়া-কর্ম যেন লগুও হইবার সূচনা প্রকাশ করিল ; কিন্তু রমেশ একটি কথাও কহিতে পারিল না। একে ক্ষুধায় তৃষ্ণায় নিতান্ত কাতর, তাহাতে অকস্মাৎ এই অভাবনীয় কাণ্ড। সে পাংশুমুখে কেমন যেন একরকম হতবুদ্ধির মত শুক হইয়া চাহিয়া রহিল।

রমেশ !

অকস্মাৎ এক মুহূর্তে সমস্ত লোকের সচকিত দৃষ্টি এক হইয়া বিস্বেশ্বরীর মুখের উপর গিয়া পড়িল। তিনি ভাঁড়ার হইতে বাহির হইয়া কপাটের সম্মুখে আসিয়া দাঁড়াইয়াছিলেন। তাঁহার মাথার উপর আঁচল ছিল কিন্তু মুখখানি অনাবৃত। রমেশ দেখিল, জ্যাঠাইমা আপনিই কখন আসিয়াছেন—তাহাকে ত্যাগ করেন নাই। বাহিরের লোক দেখিল ইনিই বিস্বেশ্বরী, ইনিই ঘোষাল-বাড়ির গিন্নীমা।

পল্লীগ্রামে সহরের কড়াপর্দা নাই। তত্রাচ বিস্বেশ্বরী বড়বাড়ির বধু বলিয়াই হোক কিংবা অল্প যে-কোন কারণেই হোক, যথেষ্ট বয়ঃপ্রাপ্তি সত্ত্বেও সাধারণতঃ কাহারো সাক্ষাতে বাহির হইতেন না। সুতরাং সকলেই বড় বিস্মিত হইল। যাহারা শুধু শুনিয়াছিল, কিন্তু ইতিপূর্বে কখনো চোখে দেখে নাই তাহারা তাঁহার আশ্চর্য্য চোখ দুটির পানে চাহিয়া একেবারে অবাক হইয়া গেল। বোধ করি, তিনি হঠাৎ ক্রোধবশেই বাহির হইয়া পড়িয়াছিলেন। সকলে মুখ তুলিবামাত্রই তিনি তৎক্ষণাৎ থামের পার্শ্বে

সরিয়া গেলেন। সুস্পষ্ট তীব্র আহবানে রমেশের বিহ্বলতা ঘুচিয়া গেল সে সম্মুখে অগ্রসর হইয়া আসিল। জ্যাঠাইমা আড়াল হইতে তেমনি সুস্পষ্ট উচ্চকণ্ঠে বলিলেন, গাঙুলীমশায়কে ভয় দেখাতে মানা ক'রে দে রমেশ। আর হালদারমশায়কে আমার নাম করে বল্ যে, আমি সবাইকে আদর ক'রে বাড়িতে ডেকে এনেচি—সুকুমারীকে অপমান করবার কোন প্রয়োজন ছিল না। আমার কাজ-কর্মের বাড়িতে হাঁকা-হাঁকি, চোঁচা-মোঁচি, গালি-গালাজ করতে আমি নিষেধ কর্চি। যার অসুবিধে হবে তিনি আর কোথাও গিয়ে বসুন।

বড়গিন্নীর কড়া হুকুম সকলে নিজের কানে শুনিতে পাইল। রমেশের মুখ ফুটিয়া বলিতে হইল না—হইলে সে পারিত না। ইহার ফল কি হইল তাহা সে দাঁড়াইয়া দেখিতেও পারিল না। জ্যাঠাইমাকে সমস্ত দায়িত্ব নিজের মাথায় লইতে দেখিয়া সে কোনমতে চোখের জল চাপিয়া ক্ষতপদে একটা ঘরে গিয়া ঢুকিল; তৎক্ষণাৎ তাহার দুই চোখ ছাপাইয়া দর দর করিয়া জল গড়াইয়া পড়িতে লাগিল। আজ সারাদিন সে নিজের কাজে বড় ব্যস্ত ছিল, কে আসিল, না আসিল তাহার খোঁজ লইতে পারে নাই; কিন্তু আর যেই আসুক, জ্যাঠাইমা যে আসিতে পারেন ইহা তাহার স্তূদুর কল্পনার অতীত ছিল। যাহারা উঠিয়া দাঁড়াইয়াছিল তাহারা আশ্বে আশ্বে বসিয়া পড়িল। শুধু গোবিন্দ গাঙুলী ও পরাণ হালদার আড়ষ্ট হইয়া দাঁড়াইয়া রহিলেন। কে একজন তাহাদিগকে উদ্দেশ করিয়া ভিড়ের ভিতর হইতে অক্ষুটে কহিল, বসে পড় না খুড়ো? যোলখানা লুচি, চারজোড়া সন্দেশ কে কোথায় খাইয়ে-দাইয়ে সঙ্গে দেয় বাবা!

পরাণ হালদার ধীরে ধীরে বাহির হইয়া গেলেন; কিন্তু আশ্চর্য্য, গোবিন্দ গাঙুলী সত্যই বসিয়া পড়িলেন। তবে মুখখানা তিনি বরাবর ভারি করিয়া রাখিলেন এবং আহারের জন্ত পাতা পড়িলে তত্ত্বাবধানের ছুতা করিয়া সকলের সঙ্গে পংক্তি ভোজনে উপবেশন করিলেন না। যাহারা তাঁহার এই

ব্যবহার লক্ষ্য করিল তাহারা সকলেই মনে মনে বুঝিল, গোবিন্দ সহজে কাহাকেও নিষ্কৃতি দিবেন না। অতঃপর আর কোন গোলযোগ ঘটিল না। ব্রাহ্মণেরা যাহা ভোজন করিলেন তাহা চোখে না দেখিলে প্রত্যয় করা শক্ত এবং প্রত্যেকেই খুদি, পটল, জাড়া, বুড়ি প্রভৃতি বাটার অনুপস্থিত বালক-বালিকার নাম করিয়া যাহা বাধিয়া লইলেন তাহাও যৎকিঞ্চিৎ নহে। সন্ধ্যার পর কাজ-কর্ম প্রায় সারা হইয়া গিয়াছে, রমেশ সদর-দরজার বাহিরে একটা পেয়ারা গাছের তলায় অন্তমনস্কের মত দাঁড়াইয়াছিল, মনটা তাহার তাল ছিল না। দেখিল দীক্ষু ভট্টাচার্য্য ছেলেদের লইয়া লুচি মণ্ডার গুরুভারে ঝুঁকিয়া পড়িয়া একরূপ অলক্ষ্যে বাহির হইয়া যাইতেছেন। সর্বপ্রথমে খেঁদির নজর পড়ায় সে অপরাধীর মত থতমত খাইয়া দাঁড়াইয়া পড়িয়া শুষ্ককণ্ঠে কহিল, বাবা, বাবু দাঁড়িয়ে—

সবাই বেন একটু জড়সড় হইয়া পড়িল। ছোট মেয়েটির এই একটি কথা হইতেই রমেশ সমস্ত ইতিহাসটি বুঝিতে পারিল; পলাইবার পথ থাকিলে সে নিজেই পলাইত; কিন্তু সে উপায় ছিল না বলিয়া আগাইয়া আসিয়া সহাস্ত্রে কহিল, খেঁদি, এসব কার জন্তে নিয়ে যাচ্ছিস্ রে?

তাহাদের ছোট-বড় পুটুলিগুলির ঠিক সহুত্তর খেঁদি দিতে পারিবে না আশঙ্কা করিয়া দীক্ষু নিজেই একটুখানি শুষ্কভাবে হাসিয়া বলিলেন, পাড়ার ছোটলোকদের ছেলে-পিলেরা আছে ত বাবা, এঁটো-কাঁটাগুলো নিয়ে গেলে তাদের দুখানা চারখানা দিতে পারিব। সে যাই হোক বাবা, কেন যে দেশশুদ্ধ লোক ঠুঁকে গিন্নীমা বলে ডাকে তা আজ বুঝলুম।

রমেশ তাহার কোন উত্তর না করিয়া সঙ্গে সঙ্গে ফটকের দ্বার পর্য্যন্ত আসিয়া হঠাৎ প্রশ্ন করিল, আচ্ছা, ভট্টাচার্য্যমশায় আপনি ত এদিকের সমস্তই জানেন, এ গাঁয়ে এত রেবা-রৈষি কেন বলতে পারেন?

দীক্ষু মুখে একটা আওয়াজ করিয়া বার দুই ঘাড় নাড়িয়া বলিলেন, হয় রে বাবাজী, আমাদের কুঁয়াপুত ত পদে আছে। যে কাণ্ড এ কদিন

ধ'রে খেঁদির মামার বাড়িতে দেখে এলুম ! বিশ ঘর বামুন-কায়েতের বাস নেই, গাঁয়ের মধ্যে কিন্তু চারটে দল ! হরনাথ বিশ্বেস—ছুটো বিলিতি আমড়া পেড়েছিল ব'লে তার আপনার ভায়েকে জেলে দিয়ে তবে ছাড়লে ! সমস্ত গ্রামই বাবা এই রকম—তা ছাড়া মামলায় মামলায় একেবারে শতচ্ছিন্ন !—খেঁদি, হরিধনের হাতটা একবার বদলে নে মা ।

রমেশ আবার জিজ্ঞাসা করিল, এর কি কোন প্রতিকার নেই, ভট্টাচািয়ামশাই ?

প্রতিকার আর কি ক'রে হবে বাবা—এ যে ঘোর কলি ! ভট্টাচা একটা নিখাস ফেলিয়া কহিলেন, তবে একটা কথা ব'লতে পারি বাবাজী । আমি ভিক্ষে-সিক্ষে করতে অনেক বায়গাতেই ত যাই—অনেকে অনুগ্রহ করেন । আমি বেশ দেখেছি, তোমাদের ছেলে-ছোকরাদের দয়া-ধর্ম আছে—নেই কেবল বুড়ো ব্যাটারদের । এরা একটু বাগে পেলে আর এক-জনের গলায় পা দিয়ে জিভ্ বার না ক'রে আর ছেড়ে দেয় না । বলিয়া দীন্স যেমন ভঙ্গি করিয়া জিভ্ বাহির করিয়া দেখাইলেন, তাহাতে রমেশ হাসিয়া ফেলিল । দীন্স কিন্তু হাসিতে যোগ দিলেন না, কহিলেন, হাসির কথা নয়, বাবাজী, অতি সত্য কথা । আমি নিজেও প্রাচীন হয়েছি—কিন্তু—তুমি যে অন্ধকারে অনেক দূর এগিয়ে এলে বাবাজী !

তা হোক ভট্টাচািয়ামশাই, আপনি বলুন !

কি আর বলব বাবা, পাড়ারগাঁ মাত্রই এই রকম । এই গোবিন্দ গাঙ্গুলী—এ ব্যাটার পাপের কথা মুখে আনলে প্রায়শ্চিত্ত করতে হয় । ক্ষ্যান্তবামনি ত আর মিথ্যে বলে নি—কিন্তু সবাই ওকে ভয় করে ! জাল করতে, মিথ্যে সাক্ষী, মিথ্যে মোকদ্দমা সাজাতে ওর জুড়ি নেই । বেণীবাবু হাতধরা—কাজেই কেউ একটি কথা কইতে সাহস করে না, বরঞ্চ ওই-ই পাঁচজনের জাত-মেরে বেড়ায় ।

রমেশ অনেকক্ষণ পর্য্যন্ত আর কোন প্রশ্ন না করিয়া চুপ করিয়া সঙ্গে সঙ্গে চলিতে লাগিল—এই আমার কথা তুমি দেখে নিয়ো বাবা, ক্ষেস্তি-বাম্নি সহজে নিস্তার পাবে না। গোবিন্দ গাঙুলী, 'পরান হালদার দু-দুটো ভীমরুলের চাকে খোঁচা দেওয়া কি সহজ কথা! কিন্তু যাই বল বাবা, সাহস আছে। আর সাহস থাকবে নাই বা কেন! মুড়ী বেচে খায়, সব ঘরে যাতায়াত করে, সকলের সব কথা টের পায়। ওকে ঘাঁটালে কেলেঙ্কারীর সীমা-পরিসীমা থাকবে না তা বলে দিচ্ছি। অনাচার আর কোন ঘরে নেই বল? বেগীবাবুকেও—

রমেশ সভয়ে বাধা দিয়া বলিল, থাক, বড়দার কথায় আর কাজ নেই—

দীর্ঘ অপ্রতিভ হইয়া উঠিলেন। কহিলেন, বাবা আমি দুঃখী মানুষ, কারো কথায় আমার কাজ নেই। কেউ যদি বেগীবাবুর কানে তুলে দেয় ত আমার ঘরে আগুন—

রমেশ আবার বাধা দিয়া কহিল, ভট্টাচাৰ্য্যমশায়, আপনার বাড়ি কি আরো দূরে?

না বাবা, বেশি দূর নয়, এই বাঁধের পাশেই আমার কুঁড়ে—কোন দিন যদি—

আস্ব বই কি, নিশ্চয় আস্ব! বলিয়া রমেশ ফিরিতে উত্তত হইয়া কহিল, আবার কাল সকালেই ত দেখা হবে—কিন্তু তার পরেও মাঝে মাঝে পায়ের ধূলা দেবেন, বলিয়া রমেশ ফিরিয়া গেল।

দীর্ঘজীবী হও—বাপের মত হও! বলিয়া দীর্ঘ ভট্টাচাৰ্য্য অন্তরের ভিতর হইতে আশীৰ্বচন করিয়া ছেলেপুলে লইয়া চলিয়া গেলেন।



এ-পাড়ার একমাত্র মধু পালের দোকান নদীর পাশে হাটের একধারে। দশ-বার দিন হইয়া গেল অথচ সে বাকি দশ টাকা লইয়া যায় নাই বলিয়া রমেশ কি মনে করিয়া নিজেই একদিন সকাল-বেলা দোকানের উদ্দেশে বাহির হইয়া পড়িল। মধু পাল মহা সমাদর করিয়া ছোটবাবুকে বারান্দার উপর মোড়া পাতিয়া বসাইল এবং ছোটবাবুর আসিবার হেতু শুনিয়া গভীর আশ্চর্য্যে অবাক হইয়া গেল। যে ধারে, সে উপষাচক হইয়া ঘর বহিয়া ঋণশোধ করিতে আসে তাহা মধু পাল এতটা বয়সে কখনও চোখে ত দেখেই নাই, কানেও শোনে নাই। কথায় কথায় অনেক কথা হইল। মধু কহিল, দোকান কেমন করে চলবে বাবু? দু'আনা চার আনা, এক টাকা পাঁচ সিকে ক'রে প্রায় পঞ্চাশ ঘাট টাকা বাকি পড়ে গেছে। এই দিগ্বে যাচি ব'লে দুমাসেও আদায় হবার যো নেই! এ কি বাঁড়ুঘো মশাই যে! কবে এলেন? প্রাতঃপেন্নাম হই।

বাঁড়ুঘোমশায়ের বাঁ হাতে একটা গাডু, পায়ের নখে গোড়ালিতে কাদার দাগ, কানে পৈতে জড়ানো, ডান হাতে কচু পাতায় মোড়া চারিটি কুচোচিংড়ি। তিনি ফৌস করিয়া একটা নিখাস ফেলিয়া বলিলেন, কাল রাত্তিরে এলুম, তামাক খা দিকি মধু, বলিয়া গাডু রাখিয়া হাতের চিংড়ি মেলিয়া ধরিয়া বলিলেন, সৈকুবি জেলেনীর আক্কেল দেখলি মধু, খপ্ ক'রে হাতটা আমার ধ'রে ফেল্লে? কালে কালে কি হ'ল বল্ দেখি রে, এই কি এক পয়সার চিংড়ি? বামুনকে ঠকিয়ে ক'কাল খাবি মাগী, উচ্ছন্ন যেতে হবে না?

মধু বিস্ময় প্রকাশ করিয়া কহিল, হাত ধ'রে ফেল্লে আপনার?

ভুঙ্ক বাঁড়ুঘোমশাই একবার চারিদিকে দৃষ্টিপাত করিয়া উত্তেজিত

হইয়া কহিলেন, আড়াইটি পয়সা শুধু বাকি, তাই ব'লে খামকা হাটগুরু লোকের সাম্নে হাত ধরবে আমার ? কে না দেখলে বল্। মাঠ থেকে বসে এসে গাছুটি মেজে নদীতে হাত-পা ধুয়ে মনে করলুম হাটটা একবার ঘুরে যাই। মাগী এক চুবড়ি মাছ নিয়ে ব'সে—আমাকে স্বচ্ছন্দে বল্লে কি না, কিচ্ছু নেই ঠাকুর, যা ছিল সব উঠে গেছে ! আরে আমার চোখে ধূলো দিতে পারিস্ ? ডালাটা ফস করে তুলে ফেলতেই দেখি না—অম্নি ফস্ ক'রে হাতটা চেপে ধ'রে ফেল্লে। তোর সেই আড়াইটে—আর আজকের একটা—এই সাড়ে-তিনটা পয়সা নিয়ে আমি গাঁ-ছেড়ে পালাব ? কি বলিস্ মধু ?

মধু সায় দিয়া কহিল, তাও কি হয় !

তবে তাই বল্ না ! গাঁয়ে কি শাসন আছে ! নইলে ষষ্ঠে জেলের ধোপা-নাপ্তে বন্ধ ক'রে চাল কেটে তুলে দেওয়া যায় না !

হঠাৎ রমেশের প্রতি চাহিয়া প্রশ্ন করিলেন, বাবুটি কে মধু ?

মধু সগর্বে কহিল, আমাদের ছোটবাবুর ছেলে যে ! সেদিনের দশ টাকা বাকি ছিল ব'লে বাড়ি ব'য়ে দিতে এসেছেন।

বাঁড়ুবোমশায় কুচোচিংড়ির অভিযোগ ভুলিয়া দুই চক্ষু বিস্ফারিত করিয়া কহিলেন, অ্যা রমেশ বাবাজী ? বেঁচে থাক বাবা—হাঁ, এসে শুনলুম একটা কাজের মত কাজ করেচ বটে ! এমন খাওয়া-দাওয়া এ অঞ্চলে কখনও হয় নি ; কিন্তু বড় দুঃখ রইল চোখে দেখতে পেলুম না। পাঁচ শালার ধান্নায় প'ড়ে কলকাতায় চাকরি করতে গিয়ে হাড়ীর হাল। আরে ছ্যাঃ, সেখানে মানুষ থাকতে পারে !

রমেশ এই লোকটার মুখের দিকে চুপ করিয়া চাহিয়া রহিল ; কিন্তু দোকান-গুরু সকলে তাঁহার কলিকাতা-প্রবাসের ইতিহাস শুনিবার জন্ত মহা কৌতূহলী হইয়া উঠিল। তামাক সাজিয়া মধু দোকানি বাঁড়ুবোম

হাতে হাঁকাটা তুলিয়া দিয়া প্রশ্ন করিল, তার পরে ? একটু চাকরি-বাকরি হ'য়েছিল ত ?

হবে না ? এ কি ধান দিয়ে লেখাপড়া শেখা আমার ? হ'লে হবে কি—সেখানে কে থাকতে পারে বল। যেমনি ধোঁয়া—তেমনি কাদা। বাইরে বেরিয়ে গাড়ী-বোড়া চাপা না প'ড়ে যদি ঘরে কিম্বতে পারিস্ ত জান্‌বি তোর বাপের পুণ্য !

মধু কখনও কলিকাতায় যায় নাই। মেদিনীপুর সহরটা একবার সাক্ষ্য দিতে গিয়া দেখিয়া আসিয়াছিল মাত্র। সে ভারি আশ্চর্য্য হইয়া কহিল, বলেন কি !

বাঁদুয্যে ঈষৎ হাসিয়া কহিলেন, তোর রমেশবাবুকে জিজ্ঞেসা কর না সত্যি কি মিথ্যে ! না মধু, খেতে না পাই বুকে হাত দিয়ে প'ড়ে ম'রে থাক্‌ব সে ভাল, কিন্তু বিদেশ যাবার নামটি যেন কেউ আমার কাছে আর না করে। বললে বিবেশ্ কর্‌বি নে, সেখানে সুবনি-কলমি শাক, চালতা, আমড়া, খোড়, মোচা পর্য্যন্ত কিনে খেতে হয় ! পার্‌বি খেতে ? এই একটি মাস না খেয়ে খেয়ে যেন রোগা ইঁদুরটি হ'য়ে গেছি ! দিবারাত্রি পেট ফুট-কাট্ করে, বুক জ্বালা করে, প্রাণ আই-টাই করে, পালিয়ে এসে তবে হাঁক ছেড়ে বাঁচি। না বাবা, নিজের গাঁয়ে ব'সে জোটে এক বেলা এক সন্ধ্যা থাবো ; না জোটে ছেলেমেয়ের হাত ধ'রে ভিক্ষে কর্‌ব ; বামুনের ছেলের তাতে কিছু আর লজ্জার কথা নেই, কিন্তু না লক্ষ্মী মাথায় থাকুক—বিদেশ কেউ যেন না যায়।

তাঁহার কাহিনী শুনিয়া সকলে বখন সভয়ে নির্ঝাক হইয়া গিয়াছে, তখন বাঁদুয্যে উঠিয়া আসিয়া মধুর তেলের ভাঁড়ের ভিতর উড়খি ডুবাইয়া এক ছটাক তেল বাঁ হাতের তেলোয় লইয়া অন্ধেকটা দুই নাক ও কানের গর্ভে ঢালিয়া দিয়া বাকিটা মাথায় মাখিয়া ফেলিলেন ও কহিলেন,

বেলা হয়ে গেল অমনি ডুবটা দিয়ে একেবারে ঘরে যাই। এক পয়সার মুগ দে দেখি মধু, পয়সাটা বিকেল-বেলা দিয়ে যাবো।

আবার বিকেল-বেলা? বলিয়া মধু অগ্রসরমুখে মুগ দিতে তাহার দোকানে উঠিল। বাঁড়ুয্যে গলা বাড়াইয়া দেখিয়া বিশ্বম্ভ-বিরক্তির স্বরে কহিয়া উঠিলেন, তোরা সব হলি কি মধু? এ যে গালে চড় মেরে পয়সা নিস্ দেখি? বলিয়া আগাইয়া আসিয়া নিজেই এক খাম্চা মুগ তুলিয়া ঠোঙায় দিয়া সেটা টানিয়া লইলেন। গাছু হাতে করিয়া রমেশের প্রতি চাহিয়া মুহূ হাসিয়া বলিলেন, ঐ ত একই পথ—চল না বাবাজী, গল্প করতে করতে যাই।

চলুন, বলিয়া রমেশ উঠিয়া দাঁড়াইল। মধু দোকানি অনতিদূরে দাঁড়াইয়া করুণ-কণ্ঠে কহিল, বাঁড়ুয্যোমশাই, সেই ময়দার পয়সা পাঁচ আনা কি অমনি—

বাঁড়ুয্যে রাগিয়া উঠিলেন—হাঁ রে মধু, হুবেলা চোখোচোখি হবে—তোদের কি চোখের চামড়া পর্যাস্ত নেই? পাঁচ ব্যাটা-বেটীর মতলবে কলকাতায় যাওয়া-আসা করতে পাঁচ-পাঁচটা টাকা আমার গলে গেল—আর এই কি তোদের তাগাদা করবার সময় হ'ল! কারো সর্বনাশ, কারো পোষ মাস—দেখলে বাবা রমেশ, এদের ব্যাপারটা একবার দেখলে?

মধু এতটুকু হইয়া অক্ষুটে বলিতে গেল, অনেক দিনের—

হ'লেই বা অনেক দিনের? এমন করে সবাই মিলে পিছনে লাগলে ত আর গায়ে বাস করা যায় না, বলিয়া বাঁড়ুয্যে একরকম রাগ করিয়াই নিজের জিনিস-পত্র লইয়া চলিয়া গেলেন।

রমেশ ফিরিয়া আসিয়া বাড়ি ঢুকিতেই এক ভদ্রলোক শশব্যস্তে হাতের হাঁকাটা একপাশে রাখিয়া দিয়া একেবারে পায়ের কাছে আসিয়া তাহাকে প্রণাম করিল। উঠিয়া কহিল, আমি বনমালী পাড়ুই—

আপনাদের ইস্কুলের হেডমাষ্টার। দুদিন এসে সাক্ষাৎ পাই নি ; তাই বলি—

রমেশ সমাদর করিয়া পাড়ুই মহাশয়কে চেয়ারে বসাইতে গেল ; কিন্তু সে সমস্ত্রমে দাঁড়াইয়া রহিল। কহিল, আজ্ঞে, আমি যে আপনার ভৃত্য।

লোকটা বয়সে প্রাচীন এবং আর যাই হোক একটা বিদ্যালয়ের শিক্ষক। তাহার এই অতি বিনীত, কুণ্ঠিত ব্যবহারে রমেশের মনের মধ্যে একটা অশ্রদ্ধার ভাব জাগিয়া উঠিল। সে কিছুতেই আসন গ্রহণে স্বীকৃত হইল না, খাড়া দাঁড়াইয়া নিজের বক্তব্য কহিতে লাগিল। এদিকের মধ্যে এই একটা অতি ছোট রকমের ইস্কুল, মুখ্যো ও ঘোষালদের যত্নে প্রতিষ্ঠিত হইয়াছিল। প্রায় ত্রিশ-চল্লিশ জন ছাত্র পড়ে। দুই-তিন ক্রোশ দূর হইতেও কেহ কেহ আসে। বৎকিঞ্চিৎ গভর্নমেন্ট সাহায্যও আছে তথাপি ইস্কুল আর চলিতে চাহিতেছে না ; ছেলেবয়সে এই বিদ্যালয়ে রমেশও কিছুদিন পড়িয়াছিল তাহার স্মরণ হইল। পাড়ুই মহাশয় জানাইল যে, ঢাল ছাওয়া না হইলে আগামী বর্ষায় বিদ্যালয়ের ভিতর আর কেহ আসিতে পারিবে না ; কিন্তু সে না হয় পরে চিন্তা করিলে চলিবে ; উপস্থিত প্রধান দুর্ভাবনা হইতেছে যে তিন মাস হইতে শিক্ষকেরা কেহ মাহিনা পায় নাই—সুতরাং ঘরের থাইয়া বস্ত্রমহিম তাড়াইয়া বেড়াইতে আর কেহ পারিতেছে না।

ইস্কুলের কথায় রমেশ একেবারে সজাগ হইয়া উঠিল। হেডমাষ্টার মহাশয়কে বৈঠকখানায় লইয়া গিয়া একটি একটি করিয়া সমস্ত সংবাদ গ্রহণ করিতে লাগিল। মাষ্টার-পণ্ডিত চারিজন এবং তাহাদের হাড়-ভাঙা খাটুনির ফলে গড়ে দুইজন করিয়া ছাত্র প্রতি বৎসর মাইনার পরীক্ষায় পাশ করিয়াছে। তাহার নাম-ধাম বিবরণ পাড়ুই মহাশয় মুখস্থর মত আবৃত্তি করিয়া দিলেন। ছেলেদের নিকট যাহা আদায় হয় তাহাতে নিচের দুজন শিক্ষকের কোন মতে ও গভর্নমেন্টের সাহায্যে

আর একজনের সম্বলান হয় ; শুধু একজনের মাহিনাটাই গ্রামের ভিতর এবং বাহিরে চাঁদা তুলিয়া সংগ্রহ করিতে হয়। এই চাঁদা সাধিব্যার ভারও মাষ্টারদের উপরেই—তাঁহারা গত তিন-চারি মাস কাল ক্রমাগত ঘুরিয়া ঘুরিয়া প্রত্যেক বাটাতে আট-দশ বার করিয়া হাঁটা-হাঁটি করিয়া সাত টাকা চারি আনার বেশি আদায় করিতে পারেন নাই।

কথা শুনিয়া রমেশ স্তম্ভিত হইয়া রহিল। পাঁচ-ছয়টা গ্রামের মধ্যে এই একটা বিদ্যালয় এবং পাঁচ-ছয়টা গ্রামময় তিন-মাসকাল ক্রমাগত ঘুরিয়া মাত্র সাত টাকা চারি আনা আদায় হইয়াছে। রমেশ প্রশ্ন করিল, আপনার মাহিনা কত ?

মাষ্টার কহিল, রসিদ দিতে হয় ছাব্বিশ টাকার, পাই তের টাকা পনের আনা। কথাটা রমেশ ঠিক বুঝিতে পারিল না—তাহার মুখপানে সহিয়া রহিল। মাষ্টার তাহা বুঝাইয়া বলিল, আজ্ঞে গভর্নমেন্টের হুকুম কি না, তাই ছাব্বিশ টাকার রসিদ লিখে দিয়ে সব-ইন্স্পেক্টরবাবুকে দেখাতে হয়—নইলে সরকারী সাহায্য বন্ধ হ'য়ে যায়। সবাই জানে, আপনি কোন ছাত্রকে জিজ্ঞাসা করলেই জানতে পারবেন আমি মিথ্যে বল্চি নে।

রমেশ অনেকক্ষণ চুপ করিয়া থাকিয়া জিজ্ঞাসা করিল, এতে ছাত্রদের কাছে আপনার সম্মান-হানি হয় না ?

মাষ্টার লজ্জিত হইল। কহিল, কি করব রমেশবাবু। বেণীবাবু এ কয়টি টাকাও দিতে নারাজ।

তিনিই কর্তা বুঝি ?

মাষ্টার একবার একটুখানি দ্বিধা করিল ; কিন্তু তাহার না বলিলেই নয়। তাই সে ধীরে ধীরে জানাইল যে, তিনিই সেক্রেটারী বটে ; কিন্তু তিনি একটি পয়সাও কখনো খরচ করেন না। যত মুখ্যো-মহাশয়ের কল্যাণ—সতী-লক্ষ্মী তিনি—তাঁর দয়া না থাকিলে ইস্কুল অনেক দিন উঠিয়া

বাইত। এ বৎসরই নিজের খরচে চাল ছাইয়া দিবেন আশা দিয়াও হঠাৎ কেন যে সমস্ত সাহায্য বন্ধ করিয়া দিয়াছেন তাহার কারণ কেহই বলিতে পারে না।

রমেশ কৌতূহলী হইয়া রমার সম্বন্ধে আরও কয়েকটি প্রশ্ন করিয়া শেষে জিজ্ঞাসা করিল, তাঁর একটি ভাই এ ইন্সুলে পড়ে না?

মাষ্টার কহিল, যতীন ত? পড়ে বৈকি।

রমেশ বলিল, আপনার ইন্সুলের বেলা হ'য়ে যাচ্ছে, আজ আপনি যান, কাল আমি আপনাদের ওখানে যাব।

যে আজ্ঞে, বলিয়া হেডমাষ্টার আর একবার রমেশকে প্রণাম করিয়া জোর করিয়া তাহার পায়ের ধূলা মাথায় লইয়া বিদায় হইল।

## ৬

বিশ্বেশ্বরীর সেদিনের কথাটা সেইদিনই দশখানা গ্রামে পরিব্যাপ্ত হইয়া গিয়াছিল। বেগী লোকটা নিজে কাহারও মুখের উপর রক্ত কথা বলিতে পারিত না; তাই সে গিয়া রমার মাসিকে ডাকিয়া আনিয়াছিল। সেকালে নাকি তরুণ দাঁত ফুটাইয়া এক বিরাট অশ্বখ গাছ জালাইয়া ছাই করিয়া দিয়াছিল। এই মাসিটিও সেদিন সকাল-বেলায় ঘরে চড়িয়া যে বিষ উৎসর্গ করিয়া গেলেন তাহাতে বিশ্বেশ্বরীর রক্তমাংসের বেহটা কাঠের নয় বলিয়াই হোক, কিংবা একাল সেকাল নয় বলিয়াই হোক জলিয়া ভস্মরূপে পরিণত হইয়া গেল না। সমস্ত অপমান বিশ্বেশ্বরী নীরবে সহ্য করিলেন। কারণ ইহা যে তাঁহার পুত্রের দ্বারাই সংঘটিত হইয়াছিল সে কথা তাঁহার অগোচর ছিল না। পাছে রাগ করিয়া একটা কথার জবাব দিতে গেলেই এই জ্রীলোকের মুখ দিয়া সর্বত্র

তাহার নিজের ছেলের কথাই বাহিরে প্রকাশ হইয়া পড়ে এবং তাহা রমেশের কর্ণগোচর হয়, এই নিদারুণ লজ্জার ভয়েই সমস্ত সময়টা তিনি কাঠ হইয়া বসিয়াছিলেন।

তবে পাড়াগায়ে কিছুই ত চাপা থাকিবার যো নেই। রমেশ শুনিতে পাইল। জ্যাঠাইমার জ্ঞাত তাহার প্রথম হইতেই বার বার মনের ভিতরে উৎকর্ষা ছিল এবং এই লইয়া মাতা-পুত্রে যে একটা কলহ হইবে সে আশঙ্কাও করিয়াছিল ; কিন্তু বেণী যে বাহিরের লোককে ঘরে ডাকিয়া আনিয়া নিজের মাকে এমন করিয়া অপমান ও নির্ধ্যাতন করিবে এই কথাটা সহসা তাহার কাছে একটা স্মৃষ্টিছাড়া কাণ্ড বলিয়া মনে হইল এবং পরমুহূর্তেই তাহার ক্রোধের বহি যেন ব্রহ্মরজ্জ ভেদ করিয়া জলিয়া উঠিল। ভাবিল ও-বাড়িতে ছুটিয়া গিয়া বা মুখে আসে তাই বলিয়া বেণীকে গালাগালি করিয়া আসে ; কারণ যে লোক মাকে এমন করিয়া অপমান করিতে পারে তাহাকেও অপমান করা সম্বন্ধে কোনরূপ বাচ-বিচার করিবার আবশ্যকতা নাই ; কিন্তু পরক্ষণেই মনে হইল তাহা হয় না। কারণ জ্যাঠাইমার অপমানের মাত্রা তাহাতে বাড়িবে বই কমিবে না। সে দিন দীঘল কাছে এবং কাল মাষ্টারের মুখে শুনিয়া রমার প্রতি তাহার ভারি একটা প্রজ্জ্বল ভাব জাগিয়াছিল। চতুর্দিকে পরিপূর্ণ মুচতা ও সহস্র প্রকার কদর্যা ক্ষুদ্রতার ভিতরে এক জ্যাঠাইমার ক্ষমতাকু ছাড়া সমস্ত গ্রামটাই আধারে ডুবিয়া গিয়াছে বলিয়া যখন তাহার নিশ্চয় বিশ্বাস হইয়াছিল, তখন এই মুখ্যো বাটীর পানে চাহিয়া একটুখানি আলোর আভাস—তাহা যত তুচ্ছ এবং ক্ষুদ্র হোক—তাহার মনের মধ্যে বড় আনন্দ দিয়াছিল ; কিন্তু আজ আবার এই ঘটনায় তাহার বিরুদ্ধে সমস্ত মন ঘুণায় ও বিতৃষ্ণায় ভরিয়া গেল। বেণীর সঙ্গে যোগ দিয়া এই দুই মাসি ও বোনঝিতে মিলিয়া যে এই অস্তায় করিয়াছে তাহাতে বিন্দুমাত্র সংশয় রহিল না ; কিন্তু এই দুইটা জীলোকের বিরুদ্ধেই বা



সে কি করিবে এবং বেগীকেই বা কি করিয়া শান্তি দিবে তাহাও কোনমতে ভাবিয়া পাইল না।

এমন সময়ে একটা কাণ্ড ঘটিল। মুখুয্যে ও ঘোষালদের কয়েকটা বিষয় এখন পর্য্যন্ত ভাগ হয় নাই। আচার্য্যদের বাটির পিছনে ‘গড়’ বলিয়া পুষ্করিণীটাও এইরূপ উভয়ের সাধারণ সম্পত্তি। এক সময়ে ইহা বেশ বড়ই ছিল; ক্রমশঃ সংস্কার অভাবে বুজিয়া গিয়া এখন সামান্য একটা ডোবার পরিণত হইয়াছিল। ভাল মাছ ইহাতে ছাড়া হইত না, ছিলও না। কই, মাগুর প্রভৃতি যে সকল মাছ আপনি জন্মায়, তাহাই কিছু ছিল। ভৈরব হাঁপাইতে হাঁপাইতে আসিয়া উপস্থিত হইল। বাহিরে চণ্ডীমণ্ডপের পাশের ঘরে গমস্তা গোপাল সরকার খাতা লিখিতেছিল, ভৈরব ব্যস্ত হইয়া কহিল, সরকারমশাই, লোক পাঠান নি? গড় থেকে মাছ ধরানো হচ্ছে যে!

সরকার কলম কানে গুঁজিয়া মুখ তুলিয়া প্রশ্ন করিল, কে ধরাচ্ছে?

আবার কে? বেগীবাবুর চাকর দাঁড়িয়ে আছে, মুখুয্যেদের খোঁটা দরওয়ানটাও আছে দেখলুম; নেই কেবল আপনাদের লোক। শীগ্গির পাঠান।

গোপাল কিছুমাত্র চাঞ্চল্য প্রকাশ করিল না, কহিল, আমাদের বাবু মাছ মাংস খান না।

ভৈরব কহিল, নাই খেলেন; কিন্তু ভাগের ভাগ নেওয়া চাই ত।

গোপাল বলিল, আমরা পাঁচজন ত চাই, বাবু বেঁচে থাকলে তিনিও তাই চাইতেন; কিন্তু রমেশবাবু একটু আলাদা ধরনের, বলিয়া ভৈরবের মুখে বিশ্বাসের চিহ্ন দেখিয়া, সহাস্তে একটুখানি স্নেহ করিয়া কহিল, এ ত তুচ্ছ দুটো শিঙি-মাগুর মাছ, আচার্য্যমশায়। সেদিন হাটের উত্তরদিকে সেই প্রকাণ্ড তেঁতুলগাছটা কাটিয়ে গুরা দ্বারে ভাগ করে নিলেন, আমাদের কাঠের একটা কুচোও দিলেন না। আমি ছুটে

এসে বাবুকে জানাতে তিনি বই থেকে একবার একটু মুখ তুলে হেসে আবার পড়তে লাগলেন। জিজ্ঞেস করলুম, কি করব বাবু! আমার রমেশবাবু আর মুখটা একবার তোলবারও ফুরসৎ পেলেন না। তারপর পীড়াপীড়ি করতে বইখানা মুড়ে রেখে একটা হাই তুলে বললেন, কাঠ? তা আর কি তেঁতুল গাছ নেই? শোন কথা! বললুম, থাকবে না কেন? কিন্তু ত্রায়া-অংশ ছেড়ে দেবই বা কেন, আর কে কোথায় এমন দেয়? রমেশবাবু বইখানা আবার মেলে ধ'রে মিনিট-পাঁচেক চুপ ক'রে থেকে বললেন, সে ঠিক; কিন্তু হু'খানা তুচ্ছ কাঠের জন্ত ত আর ঝগড়া করা যায় না!

ভৈরব অতিশয় বিস্ময়াপন্ন হইয়া কহিল, বলেন কি!

গোপাল সরকার য়ুহ হাসিয়া বার-দুই মাথা নাড়িয়া কহিল, বলি ভালো আচায্যিমশাই বলি ভালো! আমি সেই দিন থেকে বুঝেছি আর মিছে কেন! ছোটতরফের মা-লক্ষ্মী তারিণী ঘোষালের সঙ্গেই অন্তর্জ্ঞান হয়েচেন।

ভৈরব খানিকক্ষণ চুপ করিয়া থাকিয়া বলিল, কিন্তু পুকুরটা যে আমার বাড়ির পিছনেই—আমার একবার জানান চাই!

গোপাল কহিল, বেশ ত ঠাকুর, একবার জানিয়েই এসো না। দিবা-রাত্রি বই নিয়ে থাকলে, আর সরিকদের এত ভয় কমলে কি বিষয়-সম্পত্তি রক্ষে হয়? য়ুহ মুখুয্যের কথা—জীলোক! সে পর্য্যন্ত শুনে হেসে কুটিপাটি! গোবিন্দ গাঙুলীকে ডেকে নাকি সেদিন তামাসা করে বলেছিল, রমেশবাবুকে ব'লো একটা মাসহারা নিয়ে বিষয়টা আমার হাতে দিতে! এর চেয়ে লজ্জা আর আছে? বলিয়া গোপাল রাগে দুঃখে মুখখানা বিকৃত করিয়া নিজের কাজে মন দিল।

বাটীতে জীলোক নাই। সর্ব্বত্রই অব্যাহত দ্বার। ভৈরব ভিতরে আসিয়া দেখিল, রমেশ সামনের বারান্দায় একখানা ভাঙা ইজিচেয়ারের

উপর পড়িয়া আছে। রমেশকে তাহার কর্তব্যকর্মে উত্তেজিত করিবার জন্য সে সম্পত্তি-রক্ষা সম্বন্ধে সামান্য একটু ভূমিকা করিয়া কথাটা পাড়িয়া-মাত্র রমেশ বন্দুকের গুলি খাইয়া ঘুমন্ত বাঘের মত গর্জিয়া উঠিয়া বলিল, কি—রোজ রোজ চালাকি না কি ! ভজুয়া ?

তাহার এই অভাবনীয় এবং সম্পূর্ণ অপ্রত্যাশিত উগ্রতায় ভৈরব ব্রত হইয়া উঠিল ; এই চালাকিটা যে কাহার তাহা সে ঠাহর করিতে পারিল না। ভজুয়া রমেশের গোরখপুর জেলার চাকর। অত্যন্ত বলবান এবং বিশ্বাসী। লাঠালার্ঠি করিতে সে রমেশেরই শিষ্য, নিজের হাত পাকাইবার জন্য রমেশ নিজে শিখিয়া ইহাকে শিখাইয়াছিল। ভজুয়া উপস্থিত হইবামাত্র রমেশ তাহাকে খাড়া হুকুম করিয়া দিল—সমস্ত মাছ কাড়িয়া আনিতে এবং যদি কেহ বাধা দেয় তাহার চুল ধরিয়া টানিয়া আনিতে, যদি আনা না সম্ভব হয়, অন্ততঃ তাহার এক পাটি দাঁত যেন ভাঙিয়া দিয়া সে আসে। ভজুয়া ত এই চায়। সে তাহার তেলেপাকানো লাঠি আনিতে নিঃশব্দে ঘরে ঢুকিল। ব্যাপার দেখিয়া ভৈরব ভয়ে কাঁপিয়া উঠিল। সে বাঙলা দেশের তেলে-জলে মানুষ। হাঁকাহাঁকি, চোঁচামেটিকে মোটে ভয় করে না ; কিন্তু ঐ যে অতি দৃঢ়কায়, বেঁটে হিন্দুস্থানীটা কথা কহিল না, শুধু ঘাড়টা একবার হেলাইয়া চলিয়া গেল, ইহাতে ভৈরবের তালু পর্য্যন্ত দৃশ্টিস্তায় শুকাইয়া উঠিল। তাহার মনে পড়িল, যে কুকুর ডাকে না, সে ঠিক কামড়ায়। ভৈরব বাস্তবিক শুভানুধ্যায়ী তাই সে জানাইতে আসিয়াছিল, যদি সময় মত অকুস্থানে উপস্থিত হইয়া শকার বকার চীৎকার করিয়া ছুটা কৈ-মাগুর ঘরে আনিতে পারা যায়। ভৈরব নিজেও ইহাতে সাহায্য করিবে মনে করিয়া আসিয়াছিল ; কিন্তু কৈ, কিছুই ত তাহার হইল না। গালি-গালাজের ধার দিয়া কেহ গেল না। মনিব যদি বা একটা ছ্কার দিলেন, ভৃত্যটা তাহার ঠোটটুকু পর্য্যন্ত নাড়িল না, লাঠি আনিতে গেল। ভৈরব পরীষ লোক ; কোজদারীতে জড়াইবার মত তাহার সাহসও নাই, সঙ্কল্পও

ছিল না। মুহূর্তকাল পরেই সুদীর্ঘ বংশদণ্ড হাতে ভজুয়া ঘরের বাহির হইল এবং সেই লাঠি মাথায় ঠেঁকাঠিয়া দূর হইতে রমেশকে নমস্কার করিয়া প্রস্থানের উপক্রম করিতেই ভৈরব অকস্মাৎ কানিয়া উঠিয়া রমেশের হুই হাত চাপিয়া ধরিল—ওরে ভোজো, যাস্ নে! বাবা রমেশ, রক্ষে কর বাবা, আমি গরীব মানুষ, একদণ্ডও বাঁচব না।

রমেশ বিরক্ত হইয়া হাত ছাড়াইয়া লইল। তাহার বিস্ময়ের সীমা পরিসীমা নাই। ভজুয়া অবাক হইয়া ফিরিয়া আসিয়া দাঁড়াইল। ভৈরব কঁাদ কঁাদ স্বরে বলিতে লাগিল, এ কথা ঢাকা থাকবে না! বেনীবাবুর কোপে পড়ে তাহ'লে একটা দিনও বাঁচব না। আমার ঘর-দোর পর্য্যন্ত জ্বলে যাবে বাবা, ব্রহ্মা-বিষ্ণু এলেও রক্ষে করতে পারবে না।

রমেশ ঘাড় হেঁট করিয়া স্তব্ধ হইয়া বসিয়া রহিল। গোলমাল শুনিয়া গোপাল সরকার খাতা ফেলিয়া ভিতরে আসিয়া দাঁড়াইয়াছিল। সে আন্তে আন্তে বলিল, কথাটা ঠিক বাবু!

রমেশ তাহারও কোন জবাব দিল না, শুধু হাত নাড়িয়া ভজুয়াকে তাহার নিজের কাজে যাইতে আদেশ করিয়া নিজেও নিঃশব্দে ঘরে চলিয়া গেল। তাহার হৃদয়ের মধ্যে যে কি ভীষণ ঝঞ্ঝার আকারেই এই ভৈরব আচাৰ্য্যের অপরিসীম ভীতি ও কাতরোক্তি প্রবাহিত হইতে লাগিল তাহা শুধু অন্তর্ধামীই দেখিলেন।

হ্যাঁ রে যতীন, খেলা কম্বছিস্, ইস্কুল যাবি নে ?

আমাদের যে আজ কাল দুদিন ছুটি দিদি ।

মাসি শুনিতে পাইয়া কুৎসিত মুখ আরও বিস্তী করিয়া বলিলেন, মুখপোড়া ইস্কুলের মাসের মধ্যে পনের দিন ছুটি ! তুই তাই ওর পিছনে টাকা খরচ করিস্, আমি হ'লে আগুন ধরিয়ে দিতুম ! বলিয়া নিজের কাজে চলিয়া গেলেন । ষোল আনা মিথ্যাবাদিনী বলিয়া যাহারা মাসির অত্যাতি প্রচার করিত তাহারা ভুল করিত । এমনি এক-আধটা সত্য কথা বলিতেও তিনি পারিতেন এবং আবশ্যক হইলে করিতেও পশ্চাৎপদ হইতেন না ।

রমা ছোট ভাইটিকে কাছে টানিয়া লইয়া আন্তে আন্তে জিজ্ঞাসা করিল, ছুটি কেন রে যতীন ?

যতীন দিদির কোল ঘেঁসিয়া দাঁড়াইয়া কহিল, আমাদের ইস্কুলের চাল ছাওয়া হচ্ছে যে ! তার পর চুণকাম হবে—কত বই এসেচে, চার-পাঁচটা চেয়ার টেবিল, একটা আলমারী, একটা খুব বড় ঘড়ি—একদিন তুমি গিয়ে দেখে এসো না দিদি !

রমা অত্যন্ত আশ্চর্য হইয়া কহিল, বলিস্ কি রে !

হাঁ দিদি, সত্যি । রমেশবাবু এসেচেন না—তিনি সব ক'রে দিচ্ছেন । বলিয়া বালক আরও কি কি বলিতে যাইতেছিল, কিন্তু স্ন্যুখে মাসিকে আসিতে দেখিয়া রমা তাড়াতাড়ি তাহাকে লইয়া নিজের ঘরে চলিয়া গেল । আদর করিয়া কাছে বসাইয়া প্রশ্ন করিয়া করিয়া এই ছোট-ভাইটির মুখ হইতে সে রমেশের স্কুল সম্বন্ধে অনেক তথ্য সংগ্রহ করিল । প্রত্যহ দুই-এক ঘণ্টা করিয়া তিনি নিজে পড়াইয়া যান তাহাও শুনিল । হঠাৎ জিজ্ঞাসা করিল, হাঁ রে যতীন, তোকে তিনি চিনতে পারেন ?

বালক সগর্বে মাথা নাড়িয়া বলিল, হাঁ—

কি ব'লে তুই তাঁকে ডাকিস্ ?

এইবার যতীন একটু মুস্থিলে পড়িল। কারণ এতটা বনিষ্ঠতার সৌভাগ্য এবং সাহস আজও তাহার হয় নাই। তিনি উপস্থিত হইবামাত্র দৌর্দণ্ড-প্রতাপ হেড্‌মাষ্টার পর্য্যন্ত বেরূপ তটস্থ হইয়া পড়েন, তাহাতে ছাত্রমহলে ভয় এবং বিস্ময়ের পরিসীমা ছিল না। ডাকা তদূরের কথা—ভরসা করিয়া ইহার। কেহ তাঁহার মুখের দিকে চাহিতেই পারে না ; কিন্তু দিদির কাছে স্বীকার করাও ত সহজ নহে। ছেলেরা মাষ্টারদিগকে ছোটবাবু বলিয়া ডাকিতে শুনিয়াছিল। তাই সে বুদ্ধি খরচ করিয়া কহিল, আমরা ছোটবাবু বলি ; কিন্তু তাহার মুখের ভাব দেখিয়া বুদ্ধিতে কিছু বাকি রহিল না। সে তাইকে আরও একটু বুকের কাছে টানিয়া লইয়া সহাস্ত্রে কহিল, ছোটবাবু কি রে ! তিনি যে তোর দাদা হন। বেণীবাবুকে যেমন বড়দা ব'লে ডাকিস্, এঁকে তেমনি ছোটদা ব'লে ডাকতে পারিস্ নে ?

বালক বিস্ময়ে আনন্দে চঞ্চল হইয়া উঠিল—আমার দাদা হন তিনি ? সত্যি বল্চ দিদি ?

তাইত হয় রে, বলিয়া রমা আবার একটু হাসিল। আর যতীনকে ধরিয়া রাখা শক্ত হইয়া উঠিল। খবরটা সঙ্গীদের মধ্যে এখনি প্রচার করিয়া দিতে পারিলেই সে বাঁচে ; কিন্তু ইঙ্কল যে বন্ধ। এই দুটা দিন তাহাকে কোনমতে বৈধা ধরিয়া থাকিতেই হইবে। তবে যে সকল ছেলেরা কাছাকাছি থাকে, অন্ততঃ তাহাদিগকে না বলিয়াই বা সে থাকে কি করিয়া ? সে আর একবার ছটকট করিয়া বলিল, এখন যাব দিদি ?

এত বেলা, কোথায় যাবি রে ? বলিয়া রমা তাহাকে ধরিয়া রাখিল। যাইতে না পারিয়া যতীন খানিকক্ষণ অগ্রসন্নমুখে চুপ করিয়া থাকিয়া জিজ্ঞাসা করিল, এত দিন তিনি কোথায় ছিলেন দিদি ?

রমা দ্বিধাশরে কহিল, এত দিন লেখাপড়া শিখতে বিদেশে ছিলেন।

তুই বড় হ'লে তোকেও এমনি বিদেশে গিয়ে থাকতে হবে। আমাকে ছেড়ে পার্শ্বি থাকতে যতীন ? বলিয়া তাইটিকে সে আর একবার বুকের কাছে আকর্ষণ করিল। বালক হইলেও সে তাহার দিদির কণ্ঠস্বরের কি রকম একটা পরিবর্তন অনুভব করিয়া বিস্মিতভাবে মুখপানে চাহিয়া রহিল। কারণ রমা তাহার এই তাইটিকে প্রাণতুল্য ভালোবাসিলেও তাহার কথায় এবং ব্যবহারে এরূপ আবেগ উচ্ছ্বাস কখনও প্রকাশ পাইত না।

যতীন প্রশ্ন করিল, ছোটদার সমস্ত পড়া শেষ হয়ে গেছে দিদি ?

রমা তেমনি স্নেহ-কোমলকণ্ঠে জবাব দিল, হ্যাঁ তাই, তাঁর সব পড়া সাজ হ'য়ে গেছে।

যতীন আবার জিজ্ঞাসা করিল, কি ক'রে তুমি জানলে ?

প্রত্যুত্তরে রমা শুধু একটা নিশ্বাস ফেলিয়া মাথা নাড়িল। বস্তুতঃ এ সম্বন্ধে সে কিংবা গ্রামের আর কেহ কিছুই জানিত না। তাহার অনুমান যে সত্য হইবেই তাহাও নয়, কিন্তু কেমন করিয়া তাহার যেন নিশ্চয় বোধ হইয়াছিল, যে ব্যক্তি পরের ছেলের লেখাপড়ার জন্ত এই অত্যন্তকালের মধ্যেই এরূপ সচেতন হইয়া উঠিয়াছে সে কিছুতেই নিজে মূর্খ নয়।

যতীন এ লইয়া আর জিদ করিল না। কারণ ইতিমধ্যে হঠাৎ তাহার মাথার মধ্যে আর একটা প্রশ্নের আবির্ভাব হইতেই চট করিয়া জিজ্ঞাসা করিয়া বসিল, আচ্ছা দিদি, ছোটদা কেন আমাদের বাড়ি আসেন না ? বড়দা ত রোজ আসেন।

প্রশ্নটা ঠিক যেন একটা আকস্মিক তীক্ষ্ণ ব্যথার মত রমার সর্বাঙ্গে বিদ্যুৎবেগে প্রবাহিত হইয়া গেল ; কিন্তু তথাপি হাসিয়া কহিল, তুই তাঁকে ডেকে আনতে পারিস্ নে ?

এখনি যাব দিদি ? বলিয়া তৎক্ষণাৎ যতীন উঠিয়া দাঁড়াইল।

ওরে, কি পাগলা ছেলে রে তুই, বলিয়া রমা চক্ষের পলকে তাহার ভ্রম-ব্যাকুল দুই বাহু বাড়াইয়া তাহাকে জড়াইয়া ধরিল। ঋণশ্রদ্ধার যতীন,

কথখনো এমন কাজ করিস্ নে ভাই, কথখনো না, বলিয়া ভাইটিকে সে যেন প্রাণপণ বলে বুকের উপর চাপিয়া ধরিয়া রাখিল। তাহার অতি ক্রত হৃদস্পন্দন স্পষ্ট অমৃভব করিয়া যতীন বালক হইলেও এবার বড় বিন্দ্রয়ে দ্বিদির মুখপানে চাহিয়া চূপ করিয়া রহিল। একে ত এমন ধারা করিতে কখনও সে পূর্বে দেখে নাই, তা ছাড়া ছোটবাবুকে ছোটদাদা বলিয়া জানিয়া যখন তাহার নিজের মনের গতি সম্পূর্ণ অন্তপথে গিয়াছে, তখন দ্বিদি কেন যে তাঁহাকে এত ভয় করিতেছে তাহা সে কোনমতেই ভাবিয়া পাইল না। এমন সময়ে মাসির তীক্ষ্ণ আহ্বান কানে আসিতেই রমা যতীনকে ছাড়িয়া দিয়া তাড়াতাড়ি উঠিয়া দাঁড়াইল। অনতিকাল পরে তিনি স্বয়ং আসিয়া দ্বারের সম্মুখে দাঁড়াইয়া বলিলেন, আমি বলি বুঝি রমা ঘাটে চান্ কর্তে গেছে। বলি একাধাণী বলে কি এতটা বেলা পর্যন্ত মাথায় একটু তেল-জলও দিতে হবে না? মুখ শুকিয়ে যে একেবারে কালিবর্ণ হয়ে গেছে।

রমা জোর করিয়া একটুখানি হাসিয়া বলিল, তুমি যাও মাসি, আমি এখনি যাচ্ছি।

যাবি আর কখন? বেরিয়ে দেখ গে যা, বেগীরা মাছ ভাগ করতে এসেচে।

মাছের নামে যতীন ছুটিয়া চলিয়া গেল। মাসির অলঙ্কো রমা আঁচল দিয়া মুখখানা একবার জোর করিয়া মুছিয়া লইয়া তাঁহার পিছনে পিছনে বাহিরে আসিয়া উপস্থিত হইল। প্রাঙ্গণের উপর মহা কোলাহল। মাছ নিত্যস্ত কম ধরা পড়ে নাই—একটা বড় বুড়ির প্রায় একঝুড়ি। ভাগ করিবার জন্য বেগী নিজেই হাজির হইয়াছেন। পাড়ার ছেলে-মেয়েরা আর কোথাও নাই—সঙ্গে সঙ্গে আসিয়া বিরিয়া দাঁড়াইয়া গোলমাল করিতেছে।

কাসির শব্দ শোনা গেল। পরক্ষণেই—কি মাছ পড়ল হে বেগী! বলিয়া লাঠি হাতে ধর্ম্মদাস প্রবেশ করিলেন।



তুই বড় হ'লে তাকেও এমনি বিদেশে গিয়ে থাকতে হবে। আমাকে ছেড়ে পারবি থাকতে যতীন ? বলিয়া তাইটিকে সে আর একবার বুকের কাছে আকর্ষণ করিল। বালক হইলেও সে তাহার দিদির কণ্ঠস্বরের কি রকম একটা পরিবর্তন অনুভব করিয়া বিস্মিতভাবে মুখপানে চাহিয়া রহিল। কারণ রমা তাহার এই তাইটিকে প্রাণতুল্য ভালোবাসিলেও তাহার কথায় এবং ব্যবহারে এরূপ আবেগ উচ্ছ্বাস কখনও প্রকাশ পাইত না।

যতীন প্রশ্ন করিল, ছোটদার সমস্ত পড়া শেষ হয়ে গেছে দিদি ?

রমা তেমনি স্নেহ-কোমলকণ্ঠে জবাব দিল, হ্যাঁ ভাই, তাঁর সব পড়া সাজ হ'য়ে গেছে।

যতীন আবার জিজ্ঞাসা করিল, কি ক'রে তুমি জানলে ?

প্রত্যুত্তরে রমা শুধু একটা নিশ্বাস ফেলিয়া মাথা নাড়িল। বস্তুতঃ এ সম্বন্ধে সে কিংবা গ্রামের আর কেহ কিছুই জানিত না। তাহার অনুমান যে সত্য হইবেই তাহাও নয়, কিন্তু কেমন করিয়া তাহার যেন নিশ্চয় বোধ হইয়াছিল, যে ব্যক্তি পরের ছেলের লেখাপড়ার জন্ত এই অত্যন্তকালের মধ্যেই এরূপ সচেতন হইয়া উঠিয়াছে সে কিছুতেই নিজে মূর্থ নয় !

যতীন এ লইয়া আর জিদ করিল না। কারণ ইতিমধ্যে হঠাৎ তাহার মাথার মধ্যে আর একটা প্রশ্নের আবির্ভাব হইতেই চট্ করিয়া জিজ্ঞাসা করিয়া বসিল, আচ্ছা দিদি, ছোটদা কেন আমাদের বাড়ি আসেন না ? বড়দা ত রোজ আসেন।

প্রশ্নটা ঠিক যেন একটা আকস্মিক তীক্ষ্ণ ব্যথার মত রমার সর্ব্বাঙ্গে বিদ্যুৎবেগে প্রবাহিত হইয়া গেল ; কিন্তু তথাপি হাসিয়া কহিল, তুই তাঁকে ডেকে আনতে পারিস্ নে ?

এখনি যাব দিদি ? বলিয়া তৎক্ষণাৎ যতীন উঠিয়া দাঁড়াইল।

ওরে, কি পাগলা ছেলে রে তুই, বলিয়া রমা চক্কর পলকে তাহার ভ্রম-ব্যাকুল তুই বাহ বাড়াইয়া তাহাকে জড়াইয়া ধরিল। ঋণশ্রদ্ধার যতীন,

কখনো এমন কাজ করিস্ নে ভাই, কখনো না, বলিয়া ভাইটিকে সে যেন প্রাণপণ বলে বুকের উপর চাপিয়া ধরিয়া রাখিল। তাহার অতি ক্রত হৃদস্পন্দন স্পষ্ট অল্পভব করিয়া যতীন বালক হইলেও এবার বড় বিস্ময়ে দ্বিদির মুখপানে চাহিয়া চূপ করিয়া রহিল। একে ত এমন ধারা করিতে কখনও সে পূর্বে দেখে নাই, তা ছাড়া ছোটবাবুকে ছোটদাদা বলিয়া জানিয়া যখন তাহার নিজের মনের গতি সম্পূর্ণ অন্তর্গত গিয়াছে, তখন দ্বিদি কেন যে তাঁহাকে এত ভয় করিতেছে তাহা সে কোনমতেই ভাবিয়া পাইল না। এমন সময়ে মাসির তীক্ষ্ণ আহ্বান কানে আসিতেই রমা যতীনকে ছাড়িয়া দিয়া তাড়াতাড়ি উঠিয়া দাঁড়াইল। অনতিকাল পরে তিনি স্বয়ং আসিয়া দ্বারের সম্মুখে দাঁড়াইয়া বলিলেন, আমি বলি বুঝি রমা ঘাটে চান্ করতে গেছে। বলি একাদশী বলে কি এতটা বেলা পর্য্যন্ত মাথায় একটু তেল-জলও দিতে হবে না? মুখ শুকিয়ে যে একেবারে কালিবর্ণ হয়ে গেছে।

রমা জোর করিয়া একটুখানি হাসিয়া বলিল, তুমি যাও মাসি, আমি এখনি যাচ্ছি।

যাবি আর কখন? বেরিয়ে দেখ গে যা, বেগীরা মাছ ভাগ করতে এসেচে।

মাছের নামে যতীন ছুটিয়া চলিয়া গেল। মাসির অলঙ্কো রমা আঁচল দিয়া মুখখানা একবার জোর করিয়া মুছিয়া লইয়া তাঁহার পিছনে পিছনে বাহিরে আসিয়া উপস্থিত হইল। প্রাঙ্গণের উপর মহা কোলাহল। মাছ নিত্যন্ত কম ধরা পড়ে নাই—একটা বড় বুড়ির প্রায় একঝুড়ি। ভাগ করিবার জন্ত বেগী নিজেই হাজির হইয়াছেন। পাড়ার ছেলে-মেয়েরা আর কোথাও নাই—সঙ্গে সঙ্গে আসিয়া বিরিয়া দাঁড়াইয়া গোলমাল করিতেছে।

মাসির শব্দ শোনা গেল। পরক্ষণেই—কি মাছ পড়ল হে বেগী! বলিয়া লাঠি হাতে ধর্ম্মদাস প্রবেশ করিলেন।

তেনন আর কই পড়ল, বলিয়া বেগী মুখখানা অগ্রসর করিল। জেলেকে ডাকিয়া কহিল, আর দেবী কস্‌চিস কেন রে? শীগ্‌গির করে ছুঁতাগ করে ফেল না। জেলে ভাগ করিতে প্রবৃত্ত হইল।

কি হচ্ছে গো রমা? অনেক দিন আসতে পারি নি! বলি, মায়ের আমার খবরটা একবার নিয়ে যাই, বলিয়া গোবিন্দ গাঙুলী বাড়ি ঢুকিলেন।

আম্বন, বলিয়া রমা মুখ টিপিয়া একটুখানি হাসিল।

এত ভিড় কিসের গো? বলিয়া গাঙুলী অগ্রসর হইয়া আসিয়া হঠাৎ যেন আশ্চর্য্য হইয়া গেলেন—বাস্! তাই ত গা—মাছ বড় মন্দ ধরা পড়ে নি দেখচি। বড় পুকুরে জাল দেওয়া হ'ল বুঝি?

এ সকল প্রশ্নের উত্তর দেওয়া সকলেই বাহ্যিক মনে করিয়া মৎস্য-বিভাগের প্রতি ঝুঁকিয়া রহিল এবং অল্পক্ষণের মধ্যেই তাহা সমাধা হইয়া গেল। বেগী নিজের অংশের প্রায় সমস্তটুকু চাকরের মাথায় তুলিয়া দিয়া শীবরের প্রতি একটা চোখের ইঙ্গিত করিয়া গৃহে প্রত্যাগমনের উদ্যোগ করিল এবং মুখ্যোদের প্রয়োজন অল্প বলিয়া রমার অংশ হইতে উপস্থিত সকলেই যোগ্যতানুসারে কিছু কিছু সংগ্রহ করিয়া ঘরে কিরিবার উপক্রম করিতেছে, এমন সময় সকলেই আশ্চর্য্য হইয়া চাহিয়া দেখিল রমেশ ঘোষালের সেই বেঁটে হিন্দুস্থানী চাকরটা তাহার মাথার সমান উঁচু বাঁশের লাঠি হাতে একেবারে উঠানের মাঝখানে আসিয়া দাঁড়াইয়াছে। এই লোকটার চেহারা এমনি ভয়মনের মত যে সকলের আগে সে চোখে পড়েই এবং একবার পড়িলেই মনে থাকে। গ্রামের ছেলে বুড়া সবাই তাহাকে চিনিয়া লইয়াছিল; এমন কি, তাহার সম্বন্ধে নানাবিধ আজগুবি গল্পও ধীরে ধীরে প্রচারিত এবং প্রতিষ্ঠিত হইতে আরম্ভ করিয়াছিল। লোকটা এত লোকের মাঝখানে রমাকেই যে কি করিয়া কত্রী বলিয়া চিনিল তাহা সেই জানে, দূর হইতে মন্ত একটা সেলাম করিয়া, মাজী

বলিয়া সম্বোধন করিল এবং কাছে আসিয়া দাঁড়াইল। তাহার চেহারা যেমনই হোক কণ্ঠস্বর সত্যই ভয়ানক—অত্যন্ত মোটা এবং ভাঙা। আর একটা সেলাম করিয়া হিন্দি-বাঙলা-মেশানো ভাষায় সংক্ষেপে জানাইল সে রমেশবাবুর ভৃত্য এবং মাছের তিনভাগের এক ভাগ গ্রহণ করিতে আসিয়াছে। রমা বিশ্বয়ের প্রভাবেই হোক, বা তাহার সম্মত প্রার্থনার বিরুদ্ধে কথা খুঁজিয়া না পাওয়ার জন্তই হোক—সহসা উত্তর করিতে পারিল না। লোকটা চকিতে ঘাড় ফিরাইয়া বেগীর ভৃত্যকে উদ্দেশ্য করিয়া গম্ভীর গলায় বলিল, এই যাও মাং।

চাকরটা ভয়ে চার পা পিছাইয়া আসিয়া দাঁড়াইল। আধ মিনিট পর্য্যন্ত কোথাও একটু শব্দ নাই; তখন বেগী সাহস করিল। যেখানে ছিল সেইখান হইতে বলিল, কিসের ভাগ?

ভজুয়া তৎক্ষণাৎ তাহাকে একটা সেলাম দিয়া সসম্মমে কহিল, বাবুজী, আপকো নহি পুছি।

মাসি অনেক দূরে রকের উপর হইতে তীক্ষ্ণকণ্ঠে বন্ বন্ করিয়া বলিলেন, কি রে বাপু মারবি না কি!

ভজুয়া এক মুহূর্ত তাহার প্রতি চাহিয়া রহিল; পরক্ষণেই তাহার ভাঙা গলার ভয়ঙ্কর হাসিতে বাড়ি ভরিয়া উঠিল। খানিক পরে হাসি থামাইয়া যেন একটু লজ্জিত হইয়াই পুনরায় রমার প্রতি চাহিয়া কহিল, মাসী? তাহার কথায় এবং ব্যবহারে অতিশয় সম্মমের ভিতর যে অবজ্ঞা লুকান ছিল রমা ইহাই কল্পনা করিয়া মনে মনে বিরক্ত হইয়া উঠিয়াছিল। এবার কথা কহিল। বলিল, কি চায় তোর বাবু?

রমার বিরক্তি লক্ষ্য করিয়া ভজুয়া হঠাৎ যেন কুণ্ঠিত হইয়া পড়িল। তাই যতদূর সাধ্য সেই কর্কশকণ্ঠ কোমল করিয়া তাহার প্রার্থনার পুনরাবৃত্তি করিল; কিন্তু করিলে কি হয়—মাছ ভাগ হইয়া যে বিলি হইয়া গিয়াছে। এতগুলো লোকের সম্মুখে রমা হীন হইতেও পারে না।

তাই কটুকণে কহিল, তোর বাবুর এতে কোন অংশ নেই। বল্ গে যা, যা পারে তাই করুক গে!

বহৎ আচ্ছা মাজী। বলিয়া ভজুয়া তৎক্ষণাৎ একটা দীর্ঘ সেলাম করিয়া বেণীর ভৃত্যকে হাত নাড়িয়া যাইতে ইঙ্গিত করিয়া দিল এবং দ্বিতীয় কথা না কহিয়া নিজের প্রস্থানের উপক্রম করিল। তাহার ব্যবহারে বাড়িগুরু সকলেই যখন অত্যন্ত আশ্চর্য্য হইয়া গিয়াছে, তখন ইঠাৎ সে ফিরিয়া পাড়াইয়া রমার মুখের দিকে চাহিয়া হিন্দি-বাঙলায় মিশাইয়া নিজের কঠোর কণ্ঠস্বরের জন্ত ক্ষমা চাহিল এবং কহিল, মাজী, লোকের কথা শুনিয়া পুরুষদার হইতে মাছ কাড়িয়া আনিবার জন্ত বাবু আমাকে হুকুম করিয়াছিলেন। বাবুজী কিংবা আমি কেহই আমরা মাছ-মাংস ছুঁই না বটে, কিঙ্—, বলিয়া সে নিজেরই প্রশস্ত বুকের উপর করাঘাত করিয়া কহিল, বাবুজীর হুকুমে এই জীউ হয়ত পুরুষদারেই আজ দিতে হইত; কিন্তু রামজী রক্ষা করিয়াছেন; বাবুজীর রাগ পড়িয়া গেল। আমাকে ডাকিয়া বলিলেন, ভজুয়া, যা, মাজীকে জিজ্ঞাসা ক'রে আয়—ও-পুকুরে আমার ভাগ আছে কি না, বলিয়া সে অতি সন্ত্রমের সহিত লাঠিগুরু দুই হাত রমার প্রতি উত্থিত করিয়া নিজের মাথায় ঠেকাইয়া নমস্কার করিয়া বলিল, বাবুজী বলে দিলেন—আর যে যাই বলুক ভজুয়া, আমি নিশ্চয় জানি মাজীর জবান থেকে কখনও ঝুটাবাত বার হবে না—সে কখনও পরের জিনিস ছোবে না, বলিয়া সে আন্তরিক সন্ত্রমের সহিত বারংবার নমস্কার করিয়া বাহির হইয়া গেল।

যাইবামাত্র বেণী মেয়েলি সরু গলায় আঁক্ষ লন করিয়া কহিল, এমন করে উনি বিষয় রক্ষে করবেন। এই তোমাদের কাছে প্রতিজ্ঞে করছি আমি, আজ থেকে গড়ের একটা শামুক-গুগলিতেও ওকে হাত দিতে দেব না, বুঝলে না রমা, বলিয়া আঁক্ষ দে আটখানা হইয়া হিঃ—হিঃ— করিয়া টানিয়া টানিয়া হাসিতে লাগিল।

রমার কানে কিন্তু ইহার একটা কথাও প্রবেশ করিল না। মাজীর মুখ হইতে কখনো বুটাবাং বাহির হইবে না—ভজুয়ার এই বাক্যটা তখন তাহার দুই কানের ভিতর লক্ষ করতালির সমবেত ঝামঝম শব্দে যেন মাথাটা হেঁচিয়া ফেলিতেছিল। তাহার গোরবর্ণ মুখখানি পলকের জ্ঞান রাঙা হইয়াই এমনি শাদা হইয়া গিয়াছিল যেন কোথাও এক ফোঁটা রক্তের চিহ্ন পর্য্যন্ত নাই। শুদ্ধ এই জ্ঞানটা তাহার ছিল যেন এ মুখের চেহারাটা কাহারও চোখে না পড়ে। তাই সে মাথার আঁচলটা আর একটু টানিয়া দিয়া ক্ষুণ্ণপদে অদৃশ্য হইয়া গেল।

৮

জ্যাঠাইমা !

কে, রমেশ ? আয় বাবা, ঘরে আয়। বলিয়া আহ্বান করিয়া বিস্বেশ্বরী তাড়াতাড়ি একখানি মাজুর পাতিয়া দিলেন। ঘরে পা দিয়াই রমেশ চমকিত হইয়া উঠিল। কারণ জ্যাঠাইমার কাছে যে স্ত্রীলোকটি বসিয়াছিল তাহার মুখ দেখিতে না পাইলেও বুঝিল—এ রমা। তাহার ভারি একটা চিত্তজ্বালার সহিত মনে হইল ইহার। মাসিকে মাঝখানে রাখিয়া অপমান করিতেও ত্রুটি করে না, আবার নিতান্ত নির্লজ্জার মত নিভূতে কাছে আসিয়াও বসে। এদিকে রমেশের আকস্মিক অভ্যাগনে রমারও অবস্থাসঙ্কট কম হয় নাই। কারণ শুধু যে সে এ গ্রামের মেয়ে তাই নয়; রমেশের সহিত তাহার সম্বন্ধটাও এইরূপ যে, নিতান্ত অপরিচিতার মত ঘোমটা টানিয়া দিতেও লজ্জা করে, না দিয়াও সে স্বস্তি পায় না। তা ছাড়া মাছ লইয়া এই যে সেদিন একটা কাণ্ড ঘটয়া গেল। তাই সব দিক্ বাঁচাইয়া যতটা পারা যায় সে আড় হইয়া বসিয়াছিল। রমেশ আর সে দিকে চাহিল না। ঘরে যে আর কেহ আছে তাহা

একেবারে অগ্রাহ্য করিয়া দিয়া ধীরে-স্থিরে মাহুরের উপর উপবেশন করিয়া কহিল, জ্যাঠাইমা !

জ্যাঠাইমা বলিলেন, হঠাৎ এমন দুপুর-বেলা যে রমেশ ?

রমেশ কহিল, দুপুর-বেলা না এলে তোমার কাছে যে একটু বসতে পাই নে। তোমার কাজ ত কম নয় !

জ্যাঠাইমা তাহার প্রতিবাদ না করিয়া শুধু একটুখানি হাসিলেন। রমেশ মূহু হাসিয়া বলিল, বহুকাল আগে ছেলে-বেলায় একবার তোমার কাছে বিদায় নিয়ে গিয়েছিলুম। আবার আজ একবার নিতে এলুম। এই হয়ত শেষ নেওয়া জ্যাঠাইমা।

তাহার মুখের হাসি সত্ত্বেও কণ্ঠস্বরে ভারাক্রান্ত হৃদয়ের এমনই একটা গভীর অবসাদ প্রকাশ পাইল যে, উভয়েই বিস্মিত-ব্যথায় চমকিয়া উঠিলেন।

বালাই বাট্ ! ও-কি কথা বাপ, বলিয়া বিস্বেখরীর চোখছুটি যেন ছল্ ছল্ করিয়া উঠিল।

রমেশ শুধু একটু হাসিল।

বিস্বেখরী স্নেহাঙ্গুরে প্রশ্ন করিলেন, শরীরটা কি এখানে ভাল থাক্চে না বাবা ?

রমেশ নিজের সুদীর্ঘ এবং অত্যন্ত বলশালী দেহের পানে বার-দুই দৃষ্টিপাত করিয়া বলিল, এ যে খোঁটার দেশের ডালকটির দেহ জ্যাঠাইমা, এ কি এত শীঘ্র খারাপ হয় ? তা নয়, শরীর আমার বেশ ভালই আছে, কিন্তু এখানে আমি আর একদণ্ড টিকতে পাচ্ছি নে, সমস্ত প্রাণটা যেন আমার থেকে থেকে খাবি খেয়ে উঠছে।

শরীর খারাপ হয় নাই শুনিয়া বিস্বেখরী নিশ্চিন্ত হইয়া হাসিমুখে জিজ্ঞাসা করিলেন, এই তোমার জন্মস্থান—এখানে টিকতে পারছিস্ নে কেন বল দেখি ?

রমেশ মাথা নাড়িয়া বলিল, সে আমি বলতে চাই নে। আমি জানি তুমি নিশ্চয়ই সমস্ত জানো।

বিশ্বেশ্বরী ক্ষণকাল মৌন থাকিয়া একটু গম্ভীর হইয়া বলিলেন, সব না জানলেও কতক জানি বটে; কিন্তু সেই জন্তেই ত বলি, তোর আর কোথাও গেলে চলবে না রমেশ।

রমেশ কহিল, কেন চলবে না জ্যাঠাইমা? কেউ ত এখানে আমাকে চায় না?

জ্যাঠাইমা বলিলেন, চায় না বলেই ত তোকে কোথাও পালিয়ে যেতে আমি দেব না! এই যে ডাল-রুটি খাওয়া দেহের বড়াই করছিলি রে, সে কি পালিয়ে যাবার জন্তে?

রমেশ চুপ করিয়া রহিল। আজ কেন যে তাহার সমস্ত চিন্তা জুড়িয়া গ্রামের বিরুদ্ধে বিদ্রোহের আগুন জলিয়া উঠিয়াছিল তাহার একটু বিশেষ কারণ ছিল। গ্রামের যে পথটা বরাবর ষ্টেশনে গিয়া পৌছিয়াছিল, তাহার একটা যায়গা আট-দশ বৎসর পূর্বে রুটির জলশ্রোতে ভাঙিয়া গিয়াছিল। সেই অবধি ভাঙনটা ক্রমাগত দীর্ঘতর এবং গভীরতর হইয়া উঠিয়াছে। প্রায়ই জল জমিয়া থাকে—স্থানটা উত্তীর্ণ হইতে সকলকেই একটু দুর্ভাবনায় পড়িতে হয়। অল্প সময়ে কোনমতে পা টিপিয়া, কাপড় তুলিয়া, অতি সস্তর্পণে ইহার পার হয়, কিন্তু বর্ষাকালে আর কষ্টের অবধি থাকে না। কোন বছর বা দুটো বাঁশ ফেলিয়া দিয়া, কোন বছর বা একটা ভাঙা তালের ডোঙা উপুড় করিয়া দিয়া, কোনমতে তাহারই সাহায্যে ইহার আছাড় খাইয়া, হাত-পা ভাঙিয়া ওপারে গিয়া হাজির হয়; কিন্তু এত দুঃখ সত্ত্বেও গ্রামবাসীরা আজ পর্য্যন্ত তাহার সংস্কারের চেষ্টামাত্র করে নাই। মেরামত করিতে টাকা-কুড়ি ব্যয় হওয়া সম্ভব। এই টাকাটা রমেশ নিজে না দিয়া চাঁদা তুলিবার চেষ্টায় আট-দশদিন পরিশ্রম করিয়াছে; কিন্তু আট-দশটা পয়সা কাহারো কাছে রাহিব



করিতে পারে নাই। শুধু তাই নয়—আজ সকালে ঘুরিয়া আসিবার সময় পথের ধারে শ্রাক্রাদের দোকানের ভিতরে এই প্রসঙ্গ হঠাৎ কানে বাওয়ায় সে বাহিরে দাঁড়াইয়া শুনিতে পাইল, কে একজন আর একজনকে হাসিয়া বলিতেছে, একটা পয়সা কেউ তোরা দিস্ নে। দেখ্‌চিস্ নে ওর নিজের গরজটাই বেশি ! জুতো পায়ে মস্‌মসিয়ে চলা চাই কি না ! না দিলে ও আপনি সারিয়ে দেবে তা দেখিস্। তা ছাড়া এতকাল যে ও ছিল না, আমাদের ইষ্টিশান বাওয়া কি আটকে ছিল !

কে আর একজন কহিল, সবুর কর না হে ! চাটুয্যোমশায় বল্‌ছিলেন, ওর মাথায় হাত বুলিয়ে শীতলাঠাকুরের ঘরটাও ঠিকঠাক করে নেওয়া হবে। খোসামোদ ক'রে দুটো বাবু বাবু করতে পারলেই বাস।—তখন হইতে সারা-সকাল-বেলাটা এই দুটো কথা তাহাকে যেন আগুন দিয়া পোড়াইতেছিল।

জ্যাঠাইমা ঠিক এই স্থানটাতেই যা দিলেন। বলিলেন, সে ভাঙনটা যে সারাবার চেষ্টা কর্‌ছিলি তার কি হ'ল ?

রমেশ বিরক্ত হইয়া কহিল, সে হবে না জ্যাঠাইমা—কেউ একটা পয়সা চাঁদা দেবে না !

বিশ্বেশ্বরী হাসিয়া বলিলেন, দেবে না বলে হবে না রে ! তোর দাদামশায়ের ত তুই অনেক টাকা পেয়েছিস্—ওই কটা টাকা তুই ত নিজেই দিতে পারিস্।

রমেশ একেবারে আগুন হইয়া উঠিল, কহিল, কেন দেব ? আমার ভারি দুঃখ হচ্ছে যে, না বুঝে অনেকগুলো টাকা এদের ইস্কুলের জন্য খরচ করে ফেলেছি। এ গাঁয়ের কারো কিছু কর্‌তেই নেই। রমার দিকে একবার কটাঞ্চে চাহিয়া লইয়া বলিল, এদের দান করলে এরা বোকা মনে করে ; ভাল করলে গরজ ঠাওরায় ; ক্ষমা করাও মহাপাপ ; ভাবে—ভয়ে পেছিয়ে গেল !

জ্যাঠাইমা খুব হাসিয়া উঠিলেন, কিন্তু রমার চোখ-মুখ একেবারে রক্তবর্ণ হইয়া উঠিল।

রমেশ রাগ করিয়া কহিল, হাসলে যে জ্যাঠাইমা !

না হেসে করি কি বল ত বাছা ? বলিয়া সহসা একটা নিশ্বাস ফেলিয়া বলিলেন, বরং আমি বলি, তোরই এখানে থাকা সবচেয়ে দরকার। রাগ করে যে জন্মভূমি ছেড়ে চলে যেতে চাচ্ছিলাম রমেশ ! বল দেখি তোর রাগের যোগ্য লোক এখানে আছে কে ? একটু থামিয়া কতকটা যেন নিজের মনেই বলিতে লাগিলেন, আহা, এরা যে কত দুঃখী, কত দুর্বল—তা যদি জানিস্ রমেশ, এদের ওপর রাগ করতে তোর আপনি লজ্জা হবে। ভগবান যদি দয়া করে তোকে পাঠিয়েছেন—তবে এদের মাঝখানেই তুই থাক বাবা।

কিন্তু এরা যে আমাদের চায় না জ্যাঠাইমা !

জ্যাঠাইমা বলিলেন, তাই থেকেই কি বুঝতে পারিস্ নে বাবা, এরা তোর রাগ অভিমানের কত অযোগ্য ? আর শুধু এরাই নয়—যে গ্রামে ইচ্ছে ঘুরে আয় দেখবি সমস্তই এক।

সহসা রমার প্রতি দৃষ্টিপাত করিয়া বলিয়া উঠিলেন, তুমি যে সেই থেকে ঘাড় হেঁট করে চুপ করে বসে আছ না ?—হাঁ রমেশ, তোরা দু-ভাই-বোন কি কথাবার্তা বলিস্ নে ?—না মা, সে ক'রো না। ওর বাপের সঙ্গে তোমাদের যা হয়ে গেছে সে ঠাকুরপোর মৃত্যুর সঙ্গেই শেষ হয়ে গেছে। সে নিয়ে তোমরা দুজন মনান্তর করে থাকলে ত কিছুতেই চলবে না।

রমা মুখ নীচু করিয়াই আস্তে আস্তে বলিল, আমি মনান্তর রাখতে চাই নে জ্যাঠাইমা ! রমেশদা—

অকস্মাৎ তাহার মৃদুকণ্ঠ রমেশের গম্ভীর উত্তপ্ত কণ্ঠস্বরে ঢাকিয়া গেল। সে উঠিয়া দাঁড়াইয়া বলিল, এর মধ্যে তুমি কিছুতে থেকে না জ্যাঠাইমা ! সেদিন কোন গতিকে ওঁর মাসির হাতে প্রাণে বেঁচেছ ; আজ আবার উনি

গিয়ে যদি তাঁকে পাঠিয়ে দেন—একেবারে তোমাকে চিবিয়ে ধেয়ে ফেলে তবে তিনি বাড়ি ফিঙ্গবেন, বলিয়াই কোনরূপ বাদ প্রতিবাদের অপেক্ষা-মাত্র না করিয়াই দ্রুতপদে বাহির হইয়া গেল।

বিশ্বেশ্বরী চোঁচাইয়া ডাকিলেন, যাস্ নে রমেশ, কথা শুনে যা।

রমেশ ঘরের বাহির হইতে বলিল, না, জ্যাঠাইমা—যারা অহঙ্কারের স্পর্ধায় তোমাকে পর্য্যন্ত পায়ের তলায় মাড়িয়ে চলে তাদের হয়ে একটি কথাও তুমি বলো না, বলিয়া তাঁহার দ্বিতীয় অহুরোধের পূর্বেই চলিয়া গেল।

বিশ্ববলের মত রমা কয়েক মুহূর্ত্ত বিশ্বেশ্বরীর মুখের পানে চাহিয়া থাকিয়া কাঁদিয়া ফেলিল—এ কলঙ্ক আমার কেন জ্যাঠাইমা? আমি কি মাসিকে শিথিয়ে দিই, না তার জন্তে আমি দায়ী?

জ্যাঠাইমা তাহার হাতখানা নিজের হাতের মধ্যে টানিয়া লইয়া সম্বোধে বলিলেন, শিথিয়ে যে দাও না এ কথা সত্যি; কিন্তু তাঁর জন্তে দায়ী তোমাকে কতকটা হ'তে হয় বই কি মা!

রমা অন্ত হাতে চোখ মুছিতে মুছিতে রুদ্ধ অভিমানে সতেজে অস্বীকার করিয়া বলিল, কেন দায়ী? কথ'খনো না। আমি যে এর বিন্দুবিসর্গও জান্তাম না জ্যাঠাইমা! তবে কেন আমাকে উনি মিথ্যে দোষ দিয়ে অপমান করে গেলেন।

বিশ্বেশ্বরী ইহা লইয়া আর তর্ক করিলেন না। ধীরভাবে বলিলেন, সকলে ত ভেতরের কথা জানতে পারে না মা; কিন্তু তোমাকে অপমান করবার ইচ্ছে ওর কখনো নেই এ কথা তোমাকে আমি নিশ্চয় বলতে পারি। তুমি ত জান না মা, কিন্তু আমি গোপাল সরকারের মুখে শুনে টের পেয়েছি তোমার ওপর ওর কত শ্রদ্ধা, কত বিশ্বাস; সেদিন তেঁতুল-গাছটা কাটিয়ে ছবরে যখন ভাগ ক'রে নিলে, তখন ও কারো কথায় কান দেয় নি যে ওর তাতে অংশ ছিল। তাদের মুখের ওপর হেসে

বলেছিল, চিন্তার কারণ নেই—রমা যখন আছে তখন আমার ভাষা অংশ আমি পাবই ; সে কখনো পরের জিনিস আত্মসাৎ করবে না। আমি ঠিক জানি মা, এত বিবাদ-বিসংবাদের পরেও তোমার ওপর ওর সেই বিশ্বাসই ছিল যদি না সেদিন গড়পুকুরের—

কথাটার মাঝখানেই বিশ্বেশ্বরী সহসা থামিয়া গিয়া নির্নিমেষ চক্ষে কিছুক্ষণ ধরিয়া রমার আনত গুরু মুখের পানে চাহিয়া থাকিয়া অবশেষে বলিলেন, আজ একটা কথা বলি মা তোমাকে, বিষয়-সম্পত্তি রক্ষা করার দাম যতই হোক রমা এই রমেশের প্রাণটার দাম তার চেয়ে অনেক বেশি। কারো কথায়, কোন বস্তুর লোভেতেই মা সেই জিনিসটিকে তোমরা চারিদিক থেকে যা মেরে নষ্ট করে ফেলো না। দেশের যে ক্ষতি তাতে হবে, আমি নিশ্চয় বলছি তোমাকে, কোন কিছু দিয়েই আর তার পূরণ হবে না।

রমা স্থির হইয়া বসিয়া রহিল, একটা কথারও প্রতিবাদ করিল না। বিশ্বেশ্বরীও আর কিছু বলিলেন না। খানিক পরে রমা অম্পষ্ট মৃদুকণ্ঠে কহিল, বেলা গেল, আজ বাড়ি যাই জ্যাঠাইমা, বলিয়া প্রণাম করিয়া পায়ের ধূলা মাথায় লইয়া চলিয়া গেল।

যত রাগ করিয়াই রমেশ চলিয়া আসুক, বাড়ি পৌছাইতে না পৌছাইতে তাহার সমস্ত উত্তাপ যেন জল হইয়া গেল। সে বার বার করিয়া বলিতে লাগিল—এই সোজা কথাটা না বুঝিয়া কি কষ্টই না পাইতেছিলাম। বাস্তবিক রাগ করি কাহার উপর। যাহারা এতই সঙ্কীর্ণভাবে স্বার্থপর যে, যথার্থ মঙ্গল কোথায় তাহা চোখ মেলিয়া দেখিতে জানে না, শিক্ষার অভাবে যাহারা এমনি অন্ধ যে, কোনমতে প্রতিবেশীর বলক্ষয় করাটাকেই নিজেদের বল-সঞ্চয়ের শ্রেষ্ঠ উপায় বলিয়া মনে করে, যাহাদের ভাল করিতে গেলে সংশয়ে কটকিত হইয়া উঠে, তাহাদের উপর অভিমান করার মত ভ্রম আর ত কিছু হইতে পারে না। তাহার মনে পড়িল, দূরে সহরে বসিয়া সে বই পড়িয়া, কানে গল্প শুনিয়া, কল্পনা করিয়া, কতবার ভাবিয়াছে আমাদের বাঙালী জাতির আর কিছু যদি না থাকে ত নিভৃত গ্রামগুলিতে সেই শান্তি স্বচ্ছন্দতা আজও আছে যাহা বহুজনাঙ্কীর্ণ সহরে নাই। সেখানে স্বল্পে সন্তুষ্ট সরল গ্রামবাসীরা সহানুভূতিতে গলিয়া যায়, একজনের দুঃখে আর একজন বুক দিয়া আসিয়া পড়ে, একজনের সুখে আর একজন অনাহুত উৎসব করিয়া যায়। শুধু সেইখানে, সেই সব হৃদয়ের মধ্যেই এখনো বাঙালীর সত্যকার ঐশ্বর্য্য অক্ষয় হইয়া আছে। হায় রে! এ কি ভয়ানক ভ্রান্তি! তাহার সহরের মধ্যেও যে এমন বিরোধ, এত পরশ্রীকাতরতা চোখে পড়ে নাই। নগরের সজীব চঞ্চল পথের ধারে যখনই কোন পাপের চিহ্ন তাহার চোখে পড়িয়া গিয়াছে তখনই সে মনে করিয়াছে, কোনমতে তাহার জন্মভূমি সেই ছোট গ্রামখানিতে গিয়া পড়িলে সে এই সকল দৃশ্য হইতে চিরদিনের মত রেহাই পাইয়া বাঁচিবে। সেখানে যাহা সকলের

বড়—সেই ধর্ম আছে এবং সামাজিক চরিত্রও আজিও সেখানে অক্ষুণ্ণ হইয়া বিরাজ করিতেছে। হা ভগবান! কোথায় সেই চরিত্র? কোথায় সেই জীবন্ত ধর্ম আমাদের এই সমস্ত প্রাচীন নিভৃত গ্রামগুলিতে। ধর্মের প্রাণটাই যদি আকর্ষণ করিয়া লইয়াছ, তাহার মৃতদেহটাকে ফেলিয়া রাখিয়াছ কেন? এই বিবর্ণ বিকৃত শবদেহটাকেই হতভাগ্য গ্রাম্য-সমাজ যে যথার্থ ধর্ম বলিয়া প্রাণপণে জড়াইয়া ধরিয়া তাহারি বিষাক্ত পুতিগন্ধময় পিচ্ছিলতায় অহর্নিশ অধঃপথেই নামিয়া চলিতেছে। অথচ সর্বাপেক্ষা মর্মান্তিক পরিহাস এই যে, জাতি ধর্ম নাই বলিয়া সহরের প্রতি ইহাদের অবজ্ঞা অশ্রদ্ধার অন্ত নাই।

রমেশ বাড়িতে পা দিতেই দেখিল, প্রাঙ্গণের একধারে একটি প্রোচা স্ত্রীলোক একটি এগার-বারো বছরের ছেলেকে লইয়া জড়সড় হইয়া বসিয়াছিল, উঠিয়া দাঁড়াইল। কিছু না জানিয়া শুধু ছেলেটির মুখ দেখিয়াই রমেশের বুকের ভিতরটা যেন কাঁদিয়া উঠিল। গোপাল সরকার চণ্ডীমণ্ডপের বারান্দায় বসিয়া লিখিতেছিল; উঠিয়া আসিয়া কহিল, ছেলেটি দক্ষিণ পাড়ার দ্বারিক ঠাকুরের ছেলে! আপনার কাছে কিছু ভিক্ষের জন্তে এসেছে।

ভিক্ষার নাম শুনিয়াই রমেশ জলিয়া উঠিয়া বলিল, আমি কি শুধু ভিক্ষে দিতে বাড়ি এসেছি সরকারমশায়? গ্রামে কি আর লোক নেই?

গোপাল সরকার একটু অপ্রতিভ হইয়া বলিল, সে ঠিক কথা বাবু; কিন্তু কর্তা ত কখনও কারকে ফেরাতেন না; তাই দায়ে পড়লেই এই বাড়ির দিকেই লোকে ছুটে আসে।

ছেলেটির পানে চাহিয়া প্রোচাটিকেই উদ্দেশ্য করিয়া বলিল, হাঁ কামিনীর মা, এদের দোষও ত কম নয় বাছা! জ্যান্ত থাকতে প্রায়শ্চিত্ত ক'রে দিলে না, এখন মড়া যখন ওঠে না, তখন টাকার জন্তে ছুটে বেড়াচ্ছে! যরে ষটিটা-বাটিটাও কি নেই বাপু?

কামিনীর মা জাতিতে সদগোপ । এই ছেলোটর প্রতিবেশী- মাথা নাড়িয়া বলিল, বিচ্ছেদ না হয় বাপু, গিয়ে দেখবে চল । আর কিছু থাকলেও কি মরা-বাপ ফেলে একে ভিক্ষে করতে আনি ? চোখে না দেখলেও শুনেচ ত সব ? এই ছমাস ধ'রে আমার যথাসর্ব্ব্ব এই জন্তেই ঢেলে দিয়েছি । বলি, ঘরের পাশে বামুনের ছেলে-মেয়ে না ধেতে পেয়ে মরবে !

রমেশ এই ব্যাপারটা কতক যেন অনুমান করিতে পারিল । গোপাল সরকার তখন বুঝাইয়া কহিল, এই ছেলোটর বাপ—দ্বারিক চক্রবর্ত্তী ছয় মাস হইতে কাসরোগে শয্যাগত থাকিয়া আজ ভোর-বেলায় মরিয়াছে ; প্রায়শ্চিত্ত হয় নাই বলিয়া কেহ শব স্পর্শ করিতে চাহিতেছে না—এখন সেইটা করা নিতান্ত প্রয়োজন । কামিনীর মা গত ছয়মাস কাল তাহার সর্ব্ব্ব্ব এই নিঃস্ব ব্রাহ্মণ-পরিবারের জন্ত ব্যয় করিয়া ফেলিয়াছে । আর তাহারও কিছু নাই । সেই জন্ত ছেলোটিকে লইয়া আপনার কাছে আসিয়াছে ।

রমেশ খানিকক্ষণ চুপ করিয়া থাকিয়া জিজ্ঞাসা করিল, বেলা ত প্রায় দুটো বাজে । যদি প্রায়শ্চিত্ত না হয় মড়া প'ড়েই থাকবে ?

সরকার হাসিয়া কহিল, উপায় কি বাবু ? অশান্তর কাজ ত আর হতে পারে না । আর এতে পাড়ার লোককেই বা দোষ দেবে কে বলুন—যা হোক, মড়া প'ড়ে থাকবে না ; যেমন ক'রে হোক, কাজটা ওদের করতেই হবে । তাই ত ভিক্ষে—হাঁ কামিনীর মা, আর কোথাও গিয়েছিলে ?

ছেলেটি মুঠা খুলিয়া একটি সিকি ও চারিটি পয়সা দেখাইল । কামিনীর মা কহিল, সিকিটি মুখ্যোরা দিয়েচে, আর পয়সা চারিটি হালদার মশাই দিয়েচেন ; কিন্তু যেমন ক'রে হোক ন সিকের কমে ত হবে না ! তাই, বাবু যদি—

রমেশ তাড়াতাড়ি কহিল, তোমরা বাড়ি যাও বাপু, আর কোথাও যেতে হবে না। আমি এখনি সকল বন্দোবস্ত ক'রে লোক পাঠিয়ে দিচ্ছি। তাদের বিদায় করিয়া দিয়া রমেশ গোপাল সরকারের মুখের প্রতি অত্যন্ত ব্যথিত দুই চক্ষু তুলিয়া প্রশ্ন করিল, এমন গরীব এ গাঁয়ে আর কয় ঘর আছে জানেন আপনি ?

সরকার কহিল, দু-তিন ঘর আছে, বেশি নাই। এদেরও মোটা ভাত-কাপড়ের সংস্থান ছিল বাবু, শুধু একটা চালুদা গাছ নিয়ে মামলা ক'রে স্বারিক চক্কোত্তি আর সনাতন হাজরা, দুঘরই বছর-পাঁচেক আগে শেষ হ'য়ে গেল। গলাটা একটু খাটো করিয়া কহিল, এতদূর গড়াত না বাবু, শুধু আমাদের বড়বাবু আর গোবিন্দ গাঙ্গুলী দুজনকেই নাচিয়ে তুলে এতটা ক'রে তুললেন !

তার পর ?

সরকার কহিল, তার পর আমাদের বড়বাবুর কাঁছেই দুঘরের গলা পর্যন্ত এতদিন বাঁধা ছিল। গত বৎসর উনি স্নদে-আসলে সমস্তই কিনে নিয়েছেন ! হাঁ, চাষার মেয়ে বটে ওই কামিনীর মা ! অসময়ে বামুনের যা করলে এমন দেখতে পাওয়া যায় না।

রমেশ একটা দীর্ঘনিশ্বাস ফেলিয়া চুপ করিয়া রহিল। তারপর গোপাল সরকারকে সমস্ত বন্দোবস্ত করিয়া দিবার জন্ত পাঠাইয়া দিয়া মনে মনে বলিল, তোমার আদেশই মাথায় তুলে নিলাম জ্যাঠাইমা। মরি এখানে সেও চের ভাল, কিন্তু এ দুর্ভাগা গ্রামকে ছেড়ে আর কোথাও যেতে চাইব না।



মাস-তিনেক পরে একদিন সকালবেলা তারকেখরের যে পুষ্করিণীটিকে দ্ব্যপুকুর বলে তাহারই সিঁড়ির উপর একটি রমণীর সহিত রমেশের একেবারে মুখোমুখি দেখা হইয়া গেল। ক্ষণকালের জন্য সে এমনি অভিভূত হইয়া অভদ্রভাবে তাহার অনাবৃত মুখের পানে চাহিয়া দাঁড়াইয়া রহিল যে, তাহার তৎক্ষণাৎ পথ ছাড়িয়া সরিয়া যাইবার কথা মনেই হইল না। মেয়েটির বয়স বোধ করি কুড়ির অধিক নয়। স্নান করিয়া উপরে উঠিতেছিল, তাড়াতাড়ি হাতের জলপূর্ণ বাটিটি নামাইয়া রাখিয়া সিন্ধু বসনতলে দুই বাহু বুকের উপর জড় করিয়া মাথা হেঁট করিয়া মৃদুকণ্ঠে কহিল, আপনি এখানে যে ?

রমেশের বিশ্বয়ের অবশি ছিল না ; কিন্তু তাহার বিহ্বলতা ঘুচিয়া গেল। একপাশে সরিয়া দাঁড়াইয়া জিজ্ঞাসা করিল, আপনি কি আমাকে চেনেন ?

মেয়েটি কহিল, চিনি। আপনি কখন তারকেখরে এলেন ?

রমেশ কহিল, আজই ভোর বেলা। আমার মামার বাড়ি থেকে মেয়েদের আসবার কথা ছিল কিন্তু তাঁরা আসেন নি।

এখানে কোথায় আছেন ?

রমেশ কহিল, কোথাও না ! আমি আর কখনো এখানে আসি নি ; কিন্তু আজকের দিনটা কোনমতে কোথাও অপেক্ষা ক'রে থাকতেই হবে। যেখানে হোক একটা আশ্রয় খুঁজে নেব।

সঙ্গে চাকর আছে ত ?

না, আমি একাই এসেছি !

বেশ যা হোক, বলিয়া মেয়েটি হাসিয়া মুখ তুলিতেই আবার দুজনের চোখোচোখি হইল। সে চোখ নামাইয়া লইয়া মনে মনে বোধ

করি একটু ইতস্ততঃ করিয়া শেষে কহিল, তবে আমার সঙ্গেই আসুন ; বলিয়া ষাটিট তুলিয়া লইয়া অগ্রসর হইতে উত্তত হইল।

রমেশ বিপদে পড়িল। কহিল, আমি যেতে পারি, কেন না, এতে দোষ থাকলে আপনি কখনই ডাকতেন না। আপনাকে আমি যে চিনি না, তাও নয় ; কিন্তু কিছুতেই স্বরণ করতে পারছি নে। আপনার পরিচয় দিন।

তবে মন্দিরের বাইরে একটু অপেক্ষা করুন আমি পূজোটা সেয়ে নিই। পথে যেতে যেতে আমার পরিচয় দেব, বলিয়া মেয়েটি মন্দিরের দিকে চলিয়া গেল। রমেশ মুগ্ধের মত চাহিয়া রহিল। এ কি ভীষণ উদ্দাম যৌবনশ্রী ইহার আর্জ বসন বিদীর্ণ করিয়া বাহিরে আসিতে চাহিতেছিল। তাহার মুখ, গঠন, প্রতি পদক্ষেপ পর্য্যন্ত রমেশের পরিচিত ; অথচ বহুদিনরুদ্ধ স্মৃতির কবাট কোনমতেই তাহাকে পথ ছাড়িয়া দিল না।

আধঘণ্টা পরে পূজা সারিয়া মেয়েটি আবার যখন বাহিরে আসিল রমেশ আর একবার তাহার মুখ দেখিতে পাইল ; কিন্তু তেমনই অপরিচয়ের দূর্ভেদ্য প্রাকারের বাহিরে দাঁড়াইয়া রহিল। পথে চলিতে চলিতে রমেশ জিজ্ঞাসা করিল, সঙ্গে আপনার আত্মীয় কেউ নেই ?

মেয়েটি উত্তর দিল, না। দাসী আছে সে বাসায় কাজ করচে। আমি প্রায়ই এখানে আসি, সমস্ত চিনি।

কিন্তু আমাকে নিয়ে যাচ্ছেন কেন ?

মেয়েটি খানিকক্ষণ চুপ করিয়া পথ চলিবার পরে বলিল, নইলে আপনার থাওয়া-দাওয়ার ভারি কষ্ট হ'ত। আমি রমা।

\* \* \* \*

সন্মুখে বসিয়া আহার করাইয়া পান দিয়া বিশ্রামের জন্ত নিজের হাতে সতরঞ্চি পাতিয়া রমা কক্ষান্তরে চলিয়া গেল। সেই শয্যায় শুইয়া

পড়িয়া চক্ষু মুদিয়া রমেশের মনে হইল, তাহার এই তেইশ বর্ষব্যাপী জীবনটা এই একটা বেলার মধ্যে যেন আগাগোড়া বদলাইয়া গেল। ছেলে-বেলা হইতেই তাহার বিদেশে পরাশ্রয়ে কাটিয়াছে। খাওয়াটার মধ্যে ক্ষুণ্ণিত্বের অধিক আর কিছু যে কোন অবস্থাতেই থাকিতে পারে ইহা সে জানিত না। তাই আজিকার এই অচিস্তনীয় পরিতৃপ্তির মধ্যে তাহার সমস্ত মন বিস্ময়ে, মাধুর্য্যে একেবারে ডুবিয়া গেল। রমা বিশেষ কিছু এইখানে তাহার আহারের জন্ত সংগ্রহ করিতে পারে নাই। নিতান্ত সাধারণ ভোজ্য ও পেয় দিয়া তাহাকে খাওয়াইতে হইয়াছে। এই জন্ত তাহার বড় ভাবনা ছিল পাছে তাহার খাওয়া না হয় এবং পরের কাছে নিন্দা হয়। হায় রে পর! হায় রে তাদের নিন্দা! খাওয়া না হইবার দুর্ভাবনা যে তাহার নিজেরই কত আপনার এবং সে যে তাহার অন্তরের অন্তরতম গহবর হইতে অকস্মাৎ জাগিয়া উঠিয়া তার সর্ববিধ দ্বিধা সঙ্কোচ সজোরে ছিনাইয়া লইয়া, এই খাওয়ার যায়গায় তাহাকে ঠেলিয়া পাঠাইয়া দিয়াছিল, এ কথা কেমন করিয়া আজ সে তাহার নিজের কাছে লুকাইয়া রাখিবে। আজ ত কোন লজ্জার বাধাই তাহাকে দূরে রাখিতে পারিল না। এই আহার্য্যের স্বল্পতার ত্রুটি শুধু যত্ন দিয়া পূর্ণ করিয়া লইবার জন্তই সে স্নুমুখে আসিয়া বসিল। আহার নির্বিঘ্নে সমাধা হইয়া গেলে গভীর পরিতৃপ্তির যে নিশ্বাসটুকু রমার নিজের বুকের ভিতর হইতে বাহির হইয়া আসিল, তাহা রমেশের নিজের চেয়ে যে কত বেশি তাহা আর কেহ যদি না জানিল, যিনি সব জানেন তাহার কাছে ত গোপন রহিল না।

দিবানিদ্ৰা রমেশের অভি্যাস ছিল না। তাহার স্নুমুখের ছোট জানালার বাহিরে নববর্ষার ধূসর শ্রামল-মেঘে মধ্যাহ্ন-আকাশ ভরিয়া উঠিয়াছিল; অর্দ্ধ-নিমীলিত চক্ষু সে তাহাই দেখিতেছিল। তাহার আত্মীয়গণের আসা না আসার কথা আর তাহার মনেই ছিল না। হঠাৎ

রমার মুহূর্ত্ত তাহার কানে গেল। সে দরজার বাহিরে দাঁড়াইয়া বলিতেছিল, আজ যখন বাড়ি যাওয়া হবে না তখন এইখানেই থাকুন !

রমেশ তাড়াতাড়ি উঠিয়া বসিয়া বলিল, কিন্তু যার বাড়ি তাঁকে এখনো ত দেখতে পেলাম না। তিনি না বললে থাকি কি ক'রে ?

রমা সেইখানে দাঁড়াইয়া প্রত্যুত্তর করিল, তিনিই বলছেন থাকতে ! এ বাড়ি আমার।

রমেশ বিস্মিত হইয়া প্রশ্ন করিল, এ স্থানে বাড়ি কেন ?

রমা বলিল, এ স্থানটা আমার খুব ভাল লাগে। প্রায়ই এসে থাকি। এখন লোক নেই বটে, কিন্তু এমন সময় সময় হয় যে, পা বাড়াবার যায়গা থাকে না।

রমেশ কহিল, বেশ ত, তেমন সময় নাই এলে ?

রমা নীরবে একটু হাসিল। রমেশ পুনরায় জিজ্ঞাসা করিল, তারকনাথ ঠাকুরের উপর বোধ করি তোমাদের খুব ভক্তি, না ?

রমা বলিল, তেমন ভক্তি আর হয় কই ? কিন্তু যতদিন বেঁচে আছি তেঁষ্ঠা করতে হবে ত !

রমেশ আর কোন প্রশ্ন করিল না। রমা সেইখানেই চোকাঠ ঘেঁষিয়া বসিয়া পড়িয়া অল্প কথ্য পাড়িল, জিজ্ঞাসা করিল, রাত্রে আপনি কি খান ?

রমেশ হাসিয়া কহিল, যা জোটে তাই খাই। আমার খেতে বসবার আগের মুহূর্ত্ত পর্য্যন্ত কখনো খাবার কথা মনে হয় না। তাই বামুনঠাকুরের বিবেচনার উপরেই আমাকে সন্তুষ্ট থাকতে হয়।

রমা কহিল, এত বৈরাগ্য কেন ?

ইহা প্রচ্ছন্ন বিজ্ঞপ কিংবা সরল পরিহাস মাত্র, তাহা রমেশ ঠিক বুঝিতে পারিল না। সংক্ষেপে জবাব দিল, না। এ শুধু আলস্য।

কিন্তু পরের কাজে ত আপনার আলস্য দেখি নে ?

রমেশ কহিল, তার কারণ আছে। পরের কাজে আলস্ত করলে ভগবানের কাছে জবাবদিহিতে পড়তে হয়। নিজের কাজেও হয়ত হয়, কিন্তু নিশ্চয়ই অত নয়।

রমা একটুখানি মৌন থাকিয়া কহিল, আপনার টাকা আছে তাই আপনি পরের কাজে মন দিতে পারেন, কিন্তু যাদের নেই?

রমেশ বলিল, তাদের কথা জানি নে রমা! কেন না, টাকা থাকারও কোন পরিমাণ নেই, মন দেবারও কোন ধরা-বাঁধা ওজন নেই। টাকা থাকা না-থাকার হিসেব তিনিই জানেন যিনি ইহ-পরকালের তার নিয়েছেন।

রমা ক্ষণকাল চুপ করিয়া থাকিয়া কহিল, কিন্তু পরকালের চিন্তা করবার বয়স ত আপনার হয় নি। আপনি আমার চেয়ে শুধু তিন বছরের বড়।

রমেশ হাসিয়া বলিল, তার মানে তোমার আরও হয় নি। ভগবান তাই করুন, তুমি দীর্ঘজীবী হয়ে থাক; কিন্তু আমি নিজের সম্বন্ধে আজই যে আমার শেষ দিন নয় এ কথা কখনও মনে করি নে।

তাহার কথার মধ্যে যেটুকু প্রচ্ছন্ন আঘাত ছিল তাহা বোধ করি রুখা হয় নাই। একটুখানি স্থির থাকিয়া রমা হঠাৎ জিজ্ঞাসা করিয়া উঠিল, আপনাকে সন্ধ্যা-আহ্নিক করতে ত দেখলুম না। মন্দিরের মধ্যে কি আছে না আছে তা না হয় নাই দেখলেন, কিন্তু খেতে বসে গণ্ডুস করাটাও কি ভুলে গেছেন?

রমেশ মনে মনে হাসিয়া বলিল, ভুলি নি বটে, কিন্তু ভুললেও কোন ক্ষতি বিবেচনা করি নে; কিন্তু এ কথা কেন?

রমা বলিল, পরকালের ভাবনাটা আপনার খুব বেশি কি না তাই জিজ্ঞাসা কর্চি।

রমেশ ইহার জবাব দিল না, তাহার পর কিছুক্ষণ দুইজনে চুপ

করিয়া রহিল। রমা আস্তে আস্তে বলিল, দেখুন আমাকে দীর্ঘজীবী হ'তে বলা শুধু অভিশাপ দেওয়া। আমাদের হিন্দুর ঘরে বিধবার দীর্ঘ-জীবন কোন আত্মীয় কোন দিন কামনা করে না। বলিয়া আবার একটু-খানি চুপ করিয়া থাকিয়া কহিল, আমি মরবার জন্ত পা বাড়িয়ে দাঁড়িয়ে আছি তা সত্যি নয় বটে, কিন্তু বেশি দিন বেঁচে থাকবার কথা মনে হ'লেও আমাদের ভয় হয়; কিন্তু আপনার সম্বন্ধেও ত সে কথা খাটে না! আপনাকে জোর ক'রে কোনও কথা বলা আমার পক্ষে প্রগল্ভতা; কিন্তু সংসারে ঢুকে যখন পরের জন্ত মাথাব্যথা হওয়াটা নিজেরই নিতান্ত ছেলেমানুষী ব'লে মনে হবে তখন আমার এই কথাটি স্মরণ করবেন।

প্রত্যুত্তরে রমেশ শুধু একটা নিশ্বাস ফেলিল। খানিক পরে রমার নতই ধীরে ধীরে বলিল, কিন্তু তোমাকে স্মরণ ক'রেই বল্চি, আজ আমার এ কথা কোন মতেই মনে হচ্ছে না। আমি তোমার ত কেউ নই রমা, বরং তোমার পথের কাঁটা। তবু প্রতিবেশী ব'লে আজ তোমার কাছে যে যত্ন পেলুম, সংসারে ঢুকে এ যত্ন যারা আপনার লোকের কাছে নিত্য পায়, আমার ত মনে হয় পরের দুঃখ-কষ্ট দেখলে তারা পাগল হ'য়ে ছোটে। এইমাত্র আমি একা ব'সে চুপ করে ভাবছিলুম আমার সমস্ত জীবনটি যেন তুমি এই একটা বেলার মধ্যে আগাগোড়া বদলে দিয়েচ। এমন ক'রে আমাকে কেউ কখনো খেতে বলে নি, এত যত্ন ক'রে আমাকে কেউ কোন দিন খাওয়ায় নি। খাওয়ার মধ্যে যে এত আনন্দ আছে আজ তোমার কাছে থেকে এই প্রথম জানলাম রমা।

কথা শুনিয়া রমার সর্কান্ন কাঁটা দিয়া বারংবার শিহরিয়া উঠিল; কিন্তু সে তৎক্ষণাৎ স্থির হইয়া বলিল, এ তুলতে আপনার বেশি দিন লাগবে না। যদি বা একদিন মনেও পড়ে, অতি তুচ্ছ ব'লেই মনে পড়বে।

রমেশ কোনও উত্তর করিল না। রমা কহিল, দেশে গিয়ে যে নিন্দে করবেন না এই আমার ভাগ্য।

রমেশ আবার একটা নিশ্বাস ফেলিয়া ধীরে ধীরে বলিল, না রমা, নিন্দেও করব না, সুখ্যাতি ক'রেও বেড়াব না। আজকের দিনটা আমার নিন্দা-সুখ্যাতির বাইরে।

রমা কোন প্রত্যুত্তর না করিয়া খানিকক্ষণ স্থির হইয়া বসিয়া থাকিয়া নিজের ঘরে উঠিয়া চলিয়া গেল। সেখানে নির্জন ঘরের মধ্যে তাহার দুই চক্ষু বাহিয়া বড় বড় অশ্রুর ফোঁটা টপ্ টপ্ করিয়া ঝরিয়া পড়িতে লাগিল।

১১

দুই দিন অবিশ্রান্ত বৃষ্টিপাত হইয়া অপরাহ্ন-বেলায় একটু ধরণ করিয়াছে। চণ্ডীমণ্ডপে গোপাল সরকারের কাছে বসিয়া রমেশ জমিদারীর হিসাব-পত্র দেখিতেছিল; অকস্মাৎ প্রায় কুড়িজন কৃষক আসিয়া কাঁদিয়া পড়িল—ছোটবাবু, এ যাত্রা রক্ষে করুন, আপনি না বাঁচালে ছেলে-পুলের হাত ধ'রে আমাদের পথে ভিক্ষে করতে হবে!

রমেশ অবাক হইয়া কহিল, ব্যাপার কি?

চাষারা কহিল, একশ বিঘের মাঠ ডুবে গেল, জল বারক'রে না দিলে সমস্ত ধান নষ্ট হ'য়ে যাবে বাবু, গায়ে একটা ঘরও থেতে পাবে না!

কথাটা রমেশ বুঝিতে পারিল না। গোপাল সরকার তাহাদের দুই-একটা প্রশ্ন করিয়া ব্যাপারটা রমেশকে বুঝাইয়া দিল। একশ বিঘার মাঠটাই এ গ্রামের একমাত্র ভরসা। সমস্ত চাষীদেরই কিছু কিছু জমি জাহাতে আছে। ইহার পূর্বধারে সরকারী প্রকাণ্ড বাঁধ, পশ্চিম ও উত্তরধারে উচ্চ গ্রাম, শুধু দক্ষিণধারের বাঁধটা ঘোষাল ও মুখুষ্যদের। এই দিক দিয়া জল নিকাশ করা যায় বটে, কিন্তু বাঁধের গায়ে একটা

জলার মত আছে। বৎসরে দু'শ টাকার মাছ বিক্রী হয় বলিয়া জমিদার বেণীবাবু তাহা কড়া পাহারায় আটকাইয়া রাখিয়াছেন। চাষারা আজ সকাল হইতে তাঁহাদের কাছে হত্যা দিয়া পড়িয়া থাকিয়া এইমাত্র কাঁদিতে কাঁদিতে উঠিয়া এখানে আসিয়াছে।

রমেশ আর শুনিবার জন্য অপেক্ষা করিল না, দ্রুতপদে প্রস্থান করিল। এ বাড়িতে আসিয়া যখন প্রবেশ করিল তখন সন্ধ্যা হয়। বেণী তাকিয়া ঠেস দিয়া তামাক খাইতেছে এবং কাছে হালদার মহাশয় বসিয়া আছেন; বোধ করি এই কথাই হইতেছিল। রমেশ কিছুমাত্র ভূমিকা না করিয়াই কহিল, জলার বাঁধ আটকে রাখলে ত আর চন্বে না, এখনি সেটা কাটিয়া দিতে হবে।

বেণী হঁকটা হালদারের হাতে দিয়া মুখ তুলিয়া বলিল, কোন্ বাঁধটা ?

রমেশ উত্তেজিত হইয়াই আসিয়াছিল, ক্রুদ্ধভাবে কহিল, জলার বাঁধ আর কটা আছে বড়দা ? না কাটালে সমস্ত গায়ের ধান হেজে যাবে। জল বার ক'রে দেবার লকুম দিন।

বেণী কহিল, সেই সঙ্গে দু-তিনশ টাকার মাছ বেরিয়ে যাবে সে খবরটা রেখে কি ? এ টাকাটা দেবে কে ? চাষারা না ভূমি ?

রমেশ রাগ সামলাইয়া বলিল, চাষারা গরীব; তারা দিতে ত পারবেই না, আর আমিই বা কেন দেব সে বুঝতে পারি নে !

বেণী জবাব দিল, তা হ'লে আমরাই বা কেন এত লোকসান করতে বাব সে ত আমি বুঝতে পারি নে।

হালদারের দিকে চাহিয়া বলিল, খুড়ো, এমনি ক'রে ভায়া আমার জমিদারী রাখবেন। ওহে রমেশ, হারামজাদারা সকাল থেকে এতক্ষণ এইখানে পড়েই মড়াকান্না কাঁদছিল। আমি সব জানি। তোমার সদরে কি দরওয়ান নেই ? তার পায়ের নাগরা-জুতো নেই ? যাও, ঘরে



গিয়ে সেই ব্যবস্থা কর গে ; জল আপনি নিকেশ হ'য়ে যাবে । বলিয়া বেণী হালদারের সঙ্গে একযোগে হিঃ—হিঃ—করিয়া নিজের রসিকতায় নিজে হাসিতে লাগিল ।

রমেশের আর সহ্য হইতেছিল না, তথাপি সে প্রাণপণে নিজেকে সংবরণ করিয়া বিনীতভাবে বলিল, ভেবে দেখুন বড়দা, আমাদের তিন ঘরের দুশ টাকার লোকসান বাঁচাতে গিয়ে গরীবদের সারা বছরের অন্ন মারা যাবে । যেমন ক'রে হোক, পাঁচ-সাত হাজার টাকা তাদের ক্ষতি হবেই ।

বেণী হাতটা উল্টাইয়া বলিল, হ'ল হ'লই । তাদের পাঁচ হাজারই বাক্ আর পঞ্চাশ হাজারই বাক্, আমার গোটা সদরটা কোপালেও ত দুটো পয়সা বার হবে না যে ও-শালাদের জন্তে দু-দুশ টাকা উড়িয়ে দিতে হবে ?

রমেশ শেষ চেষ্টা করিয়া বলিল, এরা সারা বছর খাবে কি ?

যেন ভারি হাসির কথা ! বেণী একবার এপাশ একবার ওপাশ হেলিয়া ছলিয়া, মাথা নাড়িয়া, হাসিয়া, থুথু ফেলিয়া, শেষে স্থির হইয়া কহিল, খাবে কি ? দেখবে, ব্যাটারা যে বার জমি বন্ধক রেখে আমাদের কাছেই টাকা ধার করতে ছুটে আসবে । ভায়া, মাথাটা একটু ঠাণ্ডা ক'রে চল, কর্তারা এমনি ক'রেই বাড়িয়ে গুছিয়ে এই যে এক-আধ টুকরা উচ্ছিষ্ট ফেলে রেখে গেছেন এই আমাদের নেড়ে-চেড়ে গুছিয়ে-গাছিয়ে থেয়ে-দেয়ে আবার ছেলেদের জন্তে রেখে যেতে হবে ! ওরা খাবে কি ? ধার-কৰ্জ্জ ক'রে খাবে । নইলে আর ব্যাটারাদের ছোটলোক বলেছে কেন ?

স্বণায়, লজ্জায়, ক্রোধে, ক্ষোভে রমেশের চোখ-মুখ উত্তপ্ত হইয়া উঠিল, কিন্তু কণ্ঠস্বর শাস্ত রাখিয়াই বলিল, আপনি যখন কিছুই করবেন না ব'লে স্থির ক'রেছেন, তখন এখানে দাঁড়িয়ে তর্ক ক'রে লাভ নেই ! আমি

রমার কাছে চল্লুম, তার মত হ'লে আপনার একার অমতে কিছুই হবে না।

বেণীর মুখ গম্ভীর হইল ; বলিল, বেশ, গিয়ে দেখ গে তার আমার মত ভিন্ন নয়। সে সোজা মেয়ে নয় ভায়া, তাকে ভোলানো সহজ নয়। আর তুমি ত ছেলেমানুষ, তোমার বাপকেও সে চোখের জলে নাকের জলে করে তবে ছেড়ে ছিল। কি বল খুড়ো ?

খুড়োর মতামতের জন্ত রমেশের কৌতূহল ছিল না ; বেণীর এই অত্যন্ত অপমানকর প্রশ্নের উত্তর দিবারও তাহার প্রবৃত্তি হইল না ; সে নিরুত্তরে বাহির হইয়া গেল।

প্রান্তরে তুলসীমূলে সন্ধ্যা-প্রদীপ দিয়া প্রণাম সাঙ্গ করিয়া রমা মুখ তুলিয়াই বিশ্বয়ে অবাক হইয়া গেল। ঠিক সন্মুখেই রমেশ দাঁড়াইয়া। তাহার মাথার আঁচল গলায় জড়ানো। ঠিক যেন সে এইমাত্র রমেশকেই নমস্কার করিয়া মুখ তুলিল। ক্রোধের উত্তেজনায় ও উৎকণ্ঠায় মাসির সেই প্রথম দিনের নিষেধ-বাক্য রমেশের স্মরণ ছিল না ; তাই সে সোজা ভিতরে আসিয়া উপস্থিত হইয়াছিল এবং রমাকে তদবস্থায় দেখিয়া নিঃশব্দে অপেক্ষা করিতেছিল। দু'জনের মাস-খানেক পর দেখা।

রমেশ কহিল, তুমি নিশ্চয়ই সমস্ত শুনেচ। জল বার ক'রে দেবার জন্তে তোমার মত নিতে এসেছি।

রমার বিশ্বাসের ভাব কাটিয়া গেল ; সে মাথায় আঁচল তুলিয়া দিয়া কহিল, সে কেমন ক'রে হবে ? তা ছাড়া বড়দার মত নেই।

নেই জানি। তাঁর একলার অমতে কিছুই আসে যায় না।

রমা একটুখানি ভাবিয়া কহিল, জল বার করে দেওয়া উচিত বটে ; কিন্তু মাছ আটকে রাখার কি বন্দোবস্ত করবেন ?

রমেশ কহিল, অত জলে কোন বন্দোবস্ত হওয়া সম্ভব নয়। এ বছর

সে টাকাটা আমাদের ক্ষতি স্বীকার করতে হবে। না হলে গ্রাম মারা যায়।

রমা চুপ করিয়া রহিল।

রমেশ কহিল, তা হ'লে অনুমতি দিলে ?

রমা মূহু কণ্ঠে বলিল, না, অত টাকা লোকসান আমি করতে পারিব না।

রমেশ বিস্ময়ে হতবুদ্ধি হইয়া গেল। সে কিছুতেই একরূপ উত্তর আশা করে নাই। বরং কেমন করিয়া তাহার যেন নিশ্চিত ধারণা জন্মিয়াছিল, তাহার একান্ত অনুরোধ রমা কিছুতেই প্রত্যাখ্যান করিতে পারিবে না।

রমা মুখ তুলিয়াই বোধ করি রমেশের অবস্থাটা অনুভব করিল। কহিল, তা ছাড়া, বিষয় আমার ভাইয়ের, আমি অভিভাবক মাত্র।

রমেশ কহিল, না, অর্ধেক তোমার।

রমা বলিল, শুধু নামে। বাবা নিশ্চয় জানুতেন সমস্ত বিষয় যতীনই পাবে ; তাই অর্ধেক আমার নামে দিয়ে গেছেন।

তথাপি রমেশ মিনতির কণ্ঠে কহিল, রমা, এ কটা টাকা ? তোমাদের অবস্থা এ দিকের মধ্যে সকলের চেয়ে ভাল। তোমার কাছে এ ক্ষতি ক্ষতিই নয়, আমি মিনতি করে জানাচ্ছি রমা, এর জন্তে এত লোকের অন্নকষ্ট ক'রে দিয়ো না ! বথার্থ বল্চি, তুমি যে এত নিষ্ঠুর হ'তে পার আমি তা স্বপ্নেও ভাবি নি।

রমা তেমনি মূহূভাবেই জবাব দিল, নিজের ক্ষতি করতে পারি নি ব'লে যদি নিষ্ঠুর হই, না হয় তাই। ভাল, আপনার যদি এতই দয়া, নিজেই না হয় ক্ষতিপূরণ ক'রে দিন না।

তাহার মূহূষ্মরে বিদ্রূপ কল্পনা করিয়া রমেশ জলিয়া উঠিল। কহিল, রমা, মাহুষ খাঁটি কি না, চেনা যায় শুধু টাকার সম্পর্কে। এই যায়গায় নাকি ফাঁকি চলে না তাই এইখানেই মাহুষের বথার্থ রূপ প্রকাশ পেয়ে

উঠে। তোমারও আজ তাই পেলে ; কিন্তু তোমাকে আমি এমন ক'রে ভাবি নি। চিরকাল ভেবেছি তুমি এর চেয়ে অনেক উচুতে ; কিন্তু তুমি তা নও। তোমাকে নিষ্ঠুর বলাও ভুল। তুমি নীচ, অতি ছোটো।

অসহ্য বিশ্বয়ে রমা দুই চক্ষু বিস্ফারিত করিয়া কহিল, কি আমি ?

রমেশ কহিল, তুমি অত্যন্ত হীন এবং নীচ। আমি যে কত ব্যাকুল হ'য়ে উঠেছি সে তুমি টের পেয়েচ ব'লেই আমার কাছে ক্ষতিপূরণের দাবী করলে ; কিন্তু বড়দাও মুখ ফুটে এ কথা বলতে পারেন নি ; পুরুষমানুষ হয়ে তাঁর মুখে যা বেধেচে, স্ত্রীলোক হ'য়ে তোমার মুখে তা বাধে নি। আমি এর চেয়েও বেশি ক্ষতিপূরণ করতে পারি, কিন্তু একটা কথা আজ তোমাকে ব'লে দিচ্ছি রমা, সংসারে যত পাপ আছে, নান্নয়ের দয়ার উপর জুলুম করাটা সব চেয়ে বেশি। আজ তুমি তাই ক'রে আমার কাছে টাকা আদায়ের চেষ্টা করেছ।

রমা বিহ্বল হতবুদ্ধির ভ্রায় ক্যাল ক্যাল করিয়া চাহিয়া রহিল, একটা কথাও তাহার মুখ দিয়া বাহির হইল না। রমেশ তেমনি শান্ত, তেমনি দৃঢ়কণ্ঠে কহিল, আমার দুর্বলতা কোথায় সে তোমার অগোচর নেই বটে, কিন্তু সেখানে পাক দিয়ে আর এক বিন্দু রস পাবে না তা ব'লে দিখে যাচ্ছি। আমি কি করুব, তাও এই সঙ্গে জানিয়ে দিয়ে বাই। এখনি জোর ক'রে বাঁধ কাটিয়ে দেব—তোমরা পার আটকাবার চেষ্টা কর গে, বলিয়া রমেশ চলিয়া যায় দেখিয়া রমা কিরিয়া ডাকিল। আহ্বান শুনিয়া রমেশ নিকটে আসিয়া দাঁড়াইতে রমা কহিল, আমার বাড়িতে দাঁড়িয়ে আমাকে যত অপমান করলেন আমি তার একটারও জবাব দিতে চাই নে, কিন্তু এ কাজ আপনি কিছুতেই করবেন না।

রমেশ প্রশ্ন করিল, কেন ?

রমা কহিল, কারণ এত আপমানের পরেও আমার আপনার সঙ্গে বিবাদ করতে ইচ্ছে করে না।

তাহার মুখ যে কিরূপ অস্বাভাবিক পাণ্ডুর হইয়া গিয়াছিল এবং কথা কহিতে ঠোট কাঁপিয়া গেল তাহা সন্ধ্যার অন্ধকারেও রমেশ লক্ষ্য করিতে পারিল ; কিন্তু মনস্তত্ত্ব আলোচনার অবকাশ এবং প্রবৃত্তি তাহার ছিল না ; তৎক্ষণাৎ উত্তর দিল, কলহ বিবাদের অভিরূচি আমারও নেই একটু ভাবলেই তা টের পাবে ; কিন্তু তোমার সন্তাবের মূল্যও আর আমার কাছে কিছুমাত্র নেই । যাই হোক, বাগ্‌বিতণ্ডার আবশ্যক নেই, আমি চল্লুম ।

মাসি উপরে ঠাকুর-ঘরে আবদ্ধ থাকায় এ সকলের কিছুই জানিতে পারেন নাই । নীচে আসিয়া দেখিলেন, রমা দাসীকে সঙ্গে লইয়া বাহির হইতেছে । আশ্চর্য্য হইয়া প্রশ্ন করিলেন, এই জল-কাদায় সন্ধ্যার পর কোথায় যাস্ রমা ?

একবার বড়দার ওখানে বাব মাসি !

দাসী কহিল, পথে আর এতটুকু কাদা পাবার যো নেই দিদিমা ! ছোটবাবু এমনি রাত্তা বাঁধিয়ে দিয়েছেন যে সিঁদূর পড়লে কুড়িয়ে নেওয়া যায় । ভগবান তাঁকে বাঁচিয়ে রাখুন, গরীব-দুঃখী সাপের হাত থেকে রেহাই পেয়ে বেঁচেছে ।

তখন রাত্রি বোধ করি এগারোটা । বেণীর চণ্ডীমণ্ডপ হইতে অনেক-গুলি লোকের চাপা-গলার আওয়াজ আসিতেছিল । আকাশে মেঘ কতকটা কাটিয়া গিয়া ত্রয়োদশীর অস্বচ্ছ জ্যোৎস্না বারান্দার উপর আসিয়া পড়িয়াছিল । সেইখানে খুঁটিতে ঠেস্ দিয়া একজন ভীষণাকৃতি প্রৌঢ় মুসলমান চোখ বুজিয়া বসিয়াছিল । তাহার সমস্ত মুখের উপর কাঁচা রক্ত জমাট বাঁধিয়া গিয়াছে—পরনের বস্ত্র রক্তে রাঙা, কিন্তু সে চুপ করিয়া আছে । বেণী চাপা গলায় অনুন্নয় করিতেছে, কথা শোন্ আকবর, থানায় চল্ । সাত বছর যদি না তাকে দিতে পারি ত ঘোষালবংশের ছেলে নই

আমি। পিছনে চাহিয়া কহিল, রমা তুমি একবার বল না, চুপ ক'রে রইলে কেন ?

কিন্তু রমা 'তেমনি কাঠের মত নীরবে বসিয়া রহিল।

আকবর আলি একবার চোখ খুলিয়া সোজা হইয়া বসিয়া বলিল, সাবাস ! হ্যাঁ—মায়ের দুধ খেয়েছিল বটে ছোটবাবু ! লাঠি ধরলে বটে !

বেণী ব্যস্ত এবং ক্রুদ্ধ হইয়া কহিল, সেই কথা বলতেই ত বল্চি আকবর ! কার লাঠিতে তুই জখম হলি ? সেই ছোড়ার, না তার সেই হিন্দুস্থানী চাকরটার ?

আকবরের ওষ্ঠপ্রান্তে ঈষৎ হাসি প্রকাশ পাইল। কহিল, সেই বেঁটে হিন্দুস্থানীটার ? সে ব্যাটা লাঠির জানে কি বড়বাবু ? কি বলিস্ রে গহর, তোর পয়লা চোটেই সে বসেছিল না রে ?

আকবরের দুই ছেলে অদূরে জড়সড় হইয়া বসিয়াছিল। তাহারাও অনাহত ছিল না। গহর মাথা নাড়িয়া সায় দিল, কথা কহিল না। আকবর কহিতে লাগিল, আগার হাতে চোট পেলে সে ব্যাটা বাঁচত না। গহরের লাঠিতেই বাপ করে ব'সে পড়ল, বড়বাবু !

রমা উঠিয়া আসিয়া অনতিদূরে দাঁড়াইল। আকবর তাহাদের পিরপুরের প্রজা ! সাবেক দিনের লাঠির জোরে অনেক বিষয় হস্তগত করিয়া দিয়াছে। তাই আজ সন্ধ্যার পর ক্রোধে ও অভিমানে ক্ষিপ্তপ্রায় হইয়া রমা তাহাকে ডাকাইয়া আনিয়া বাঁধ পাহারা দিবার জন্ত পাঠাইয়া দিয়াছিল এবং ভাল করিয়া একবার দেখিতে চহিয়াছিল রমেশ শুধু সেই হিন্দুস্থানীটার গায়ের জোরে কেমন করিয়া কি করে ! সে নিজেই যে এত বড় লাঠিয়াল, এ কথা রমা স্বপ্নেও কল্পনা করে নাই।

আকবর রমার মুখের প্রতি চাহিয়া কহিল, তখন ছোটবাবু সেই ব্যাটার লাঠি তুলে নিয়ে বাঁধ আটক ক'রে দাঁড়াল দিদিঠাকুরাণ, তিন

বাপ-ব্যাটায় মোরা হটাতে নাহ্লাম ! আধারে বাঘের মত তেনার চোথ জ্বলতি লাগল। কইলেন, আকবর, বড়োনাহুষ তুই, সরে যা। বাঁধ কেটে না দিলে সারাগাঁয়ের লোক নারা পড়বে, তাই কাটতেই হবে। তোর অপনার গাঁয়েও ত জমি-জমা আছে, সম্ভবে দেখ্ রে, সে বরবাদ হ'য়ে গেলে তোর ক্যামন লাগে ?

মুই সেলাম ক'রে কইলাম, আল্লার কিরে ছোটবাবু তুমি একটিবার পথ ছাড়। তোমার আড়ালে দাঁড়িয়ে ঐ যে কয় সম্মুন্দি ময়ে কাপড় জড়িয়ে ঝপাঝপ্ কোদাল মার্চে, ওদের মুণ্ডু কটা ফাঁক করে দিয়ে যাই।

বেণী রাগ সাম্লাইতে না পারিয়া কথার মাঝখানে চোঁচাইয়া কহিল, বেইমান ব্যাটা—তাকে সেলাম বাজিয়ে এসে এখানে চালাকি মারা হচ্ছে—

তাহারা তিন বাপ-ব্যাটাই একেবারে একসঙ্গে হাত তুলিয়া উঠিল। আকবর কর্কশ কণ্ঠে কহিল, থবরদার বড়বাবু, বেইমান কয়ো না ; মোরা মোছলমানের ছালে, সব সহিতে পারি—ও পারি না।

কপালে হাত দিয়া খানিকটা রক্ত মুছিয়া ফেলিয়া রমাকে উদ্দেশ্য করিয়া কহিল, অ্যাংরে বেইমান কয় দিনি ? বরের মধ্য ব'সে বেইমান কইচ বড়বাবু, চোখে দেখলি জান্তে পারতে ছোটবাবু কি !

বেণী মুখ বিকৃত করিয়া কহিল, ছোটবাবু কি ! তাই থানায় গিয়ে জানিয়ে আয় না ! বলবি, তুই বাঁধ পাহারা দিচ্ছিলি, ছোটবাবু চড়াও হ'য়ে তোকে মেরেছে !

আকবর জিভ কাটিয়া বলিল, তোবা তোবা, দিনকে রাত কয়তি বল বড়বাবু ?

বেণী কহিল, না হয় আর কিছু বলবি। আজ গিয়ে জখম দেখিয়ে আয় যা—কাল ওয়ারেন্ট বার ক'রে একেবারে হাজতে পূরব। রমা

তুমি ভাল ক'রে আর একবার বুঝিয়ে বল না। এমন সুবিধে যে আর কখনো পাওয়া যাবে না।

রমা কথা কহিল না, শুধু আকবরের মুখের প্রতি একবার চাহিল। আকবর ঘাড় নাড়িয়া বলিল, না দিদিঠাকুরাণ, ও পারব না।

বেণী ধমক দিয়া কহিল, পারবি নে কেন ?

এবার আকবরও চোঁচাইয়া কহিল, কি কও বড়বাবু, সরম নেই মোর ? পাঁচখানা গায়ের লোকে মোরে সর্দার কয় না ? দিদিঠাকুরাণ, তুমি হুকুম করলে আসামী হ'য়ে জ্যান্ খাটতে পারি, ফৈরিদি হব কোন্ কালানুয়ে ?

রমা মৃদুকণ্ঠে একবারমাত্র কহিল, পারবে না আকবর ?

আকবর সবেগে মাথা নাড়িয়া বলিল, না দিদিঠাকুরাণ, আর সব পারি, সদরে গিয়ে গায়ের চোট দেখাতে পারি না। ওঠ্ রে গহর, এইবার ঘরকে যাই। মোরা নালিশ করতে পারব না, বলিয়া তাহারা উঠিবার উপক্রম করিল।

বেণী ক্রুদ্ধ নিরাশায় তাহাদের দিকে চাহিয়া দুই চোখে অগ্নিবর্ষণ করিয়া মনে মনে অকথা গালিগালাজ করিতে লাগিল এবং রমার একান্ত নিরুত্থম স্তব্ধতার কোন অর্থ বুঝিতে না পারিয়া তুষের আগুনে পুড়িতে লাগিল। সর্বপ্রকার অহুন্নয়, বিনয়, ভৎসনা, ক্রোধ উপেক্ষা করিয়া আকবর আলি ছেলেদের লইয়া যখন বিদায় হইয়া গেল, রমার বুক চিরিয়া একটা গভীর দীর্ঘশ্বাস বাহির হইয়া, অकारণে তাহার দুই চক্ষু অশ্রু-প্লাবিত হইয়া উঠিল এবং আজিকার এতবড় অপমান ও তাহার সম্পূর্ণ পরাজয়েও কেন যে কেবলি মনে হইতে লাগিল তাহার বুকের উপর হইতে একটা অতি গুরুভার পাষণ নামিয়া গেল ; ইহার কোন হেতুই সে খুঁজিয়া পাইল না। বাড়ি ফিরিয়া সারারাত্রি তাহার ঘুম হইল না, সেই যে তারকেশ্বরে সুস্থখে বসিয়া খাওয়াইয়াছিল, নিরন্তর তাহাই চোখের উপর



ভাসিয়া বেড়াইতে লাগিল এবং যতই মনে হইতে লাগিল সেই সুন্দর স্কুমার দেহের মধ্যে এত মায়া এবং তেজ কি করিয়া এমন স্বচ্ছন্দে শান্ত হইয়া ছিল, ততই তাহার চোখের জলে সমস্ত মুখ ভাসিয়া যাইতে লাগিল।

১২

ছেলে-বেলায় এক দিন রমেশ রমাকে ভালোবাসিয়াছিল। নিতান্ত ছেলেমানুষী ভালোবাসা তাহাতে সন্দেহ নাই ; কিন্তু সে যে কত গভীর সেদিন তারকেশ্বরে ইহা সে প্রথম অনুভব করিয়াছিল এবং সর্বাপেক্ষা বেশি করিয়াছিল যে দিন সন্ধ্যার অন্ধকারে রমার সমস্ত সম্বন্ধ সে একেবারে ভূমিসাৎ করিয়া দিয়া চলিয়া আসিয়াছিল। তার পরে সেই নিদারুণ রাত্রির ঘটনার দিন হইতে রমার দিকটাই একেবারে রমেশের কাছে মহামরুর ছায়া শূন্য ধুধু করিতেছিল ; কিন্তু সে যে তাহার সমস্ত কাজকর্ম, শোয়া-বসা, এমন কি চিন্তা-অধ্যায়ন পর্য্যন্ত এমন বিশ্বাস করিয়া দিবে তাহা রমেশ কল্পনাও করে নাই। তাহাতে গৃহ-বিচ্ছেদ এবং সর্বব্যাপী অনাগ্রীয়তায় প্রাণ যখন তাহার এক মুহূর্তও আর গ্রামের মধ্যে তিষ্ঠিতে চাহিতেছিল না, তখন নিম্নলিখিত ঘটনায় সে আর একবার সোজা হইয়া বসিল।

খালের ও-পারে পিরপুর গ্রাম তাহাদেরই জমিদারী। এখানে মুসল-মানের সংখ্যাই অধিক। এক দিন তাহারা দল বাঁধিয়া রমেশের কাছে উপস্থিত হইল : এই বলিয়া নালিশ জানাইল যে, যদিও তাহারা তাহাদেরই প্রজা, তথাচ তাহাদের ছেলে-পুলকে মুসলমান বলিয়া গ্রামের স্কুলে ভর্তি হইতে দেওয়া হয় না। কয়েকবার চেষ্টা করিয়া তাহারা বিফল মনোরথ হইয়াছে, মাষ্টার মহাশয়ের কোন মতেই তাহাদের ছেলেদের গ্রহণ করেন

না। রমেশ বিস্মিত ক্রুদ্ধ হইয়া কহিল, এমন অজ্ঞায় অত্যাচার ত কখনও শুনি নি? তোমাদের ছেলেদের আজই নিয়ে এসো আমি নিজে দাঁড়িয়ে থেকে ভর্তি ক'রে দেবো।

তাহারা জানাইল, যদিচ তাহারা প্রজা বটে, কিন্তু খাজনা দিয়াই জমি ভোগ করে। সে জন্ত হিঁদুর মত জমিদারকে তাহারা ভয় করে না; কিন্তু এক্ষেত্রে বিবাদ করিয়াও লাভ নাই। কারণ ইহাতে বিবাদই হইবে যথার্থ উপকার কিছুই হইবে না। বরঞ্চ তাহারা নিজেদের মধ্যে একটা ছোট রকমের স্কুল করিতে ইচ্ছা করে এবং ছোটবাবু একটু সাহায্য করিলেই হয়। কলহ-বিবাদে রমেশ নিজেও ক্লান্ত হইয়া পড়িয়াছিল, সুতরাং ইহাকে আর বাড়াইয়া না তুলিয়া ইহাদের পরামর্শ সূয়ুক্তি বিবেচনা করিয়া সাং দিল এবং তখন হইতে এই নূতন বিদ্যালয় প্রতিষ্ঠা করিতেই ব্যাপৃত হইল। ইহাদের সম্পর্কে আসিয়া রমেশ শুধু যে নিজেকে স্তম্ভ বোধ করিল তাহা নহে, এই একটা বৎসর ধরিয়া তাহার যত বলক্ষয় হইয়াছিল তাহা ধীরে ধীরে যেন ভরিয়া আসিতে লাগিল। রমেশ দেখিল কুঁয়াপুরের হিন্দু প্রতিবেশীর মত ইহারা প্রতি কথায় বিবাদ করে না; করিলেও তাহারা প্রতি হাত এক নম্বর কড়ু করিয়া দিবার জন্ত সদরে ছুটিয়া যায় না। বরঞ্চ মুকুন্দিদের বিচারফলই, সন্তুষ্ট অসন্তুষ্ট যে ভাবেই হোক গ্রহণ করিতে চেষ্টা করে। বিশেষতঃ বিপদের দিনে পরস্পরের সাহায্যার্থে এক্রূপ সর্কাস্তঃকরণে অগ্রসর হইয়া আসিতে রমেশ ভদ্র অভদ্র কোন হিন্দু গ্রামবাসীকেই দেখে নাই।

একে ত জাতিভেদের উপর রমেশের কোন দিনই আস্থা ছিল না, তাহাতে এই দুই গ্রামের অবস্থা পাশাপাশি তুলনা করিয়া তাহার অশ্রদ্ধা শতগুণে বাড়িয়া গেল। সে স্থির করিল, হিন্দুদিগের মধ্যে ধর্ম ও সামাজিক অসমতাই এই হিংসা-দ্বেষের কারণ। অথচ মুসলমান মাত্রই ধর্ম সম্বন্ধে পরস্পর সমান, তাই একতার বন্ধন ইহাদের মত হিন্দুদের

নাই এবং হইতেও পারে না। আর জাতিভেদ নিবারণ করিবার কোন উপায় যখন নাই, এমন কি ইহার প্রসঙ্গ উত্থাপন করাও যখন পল্লীগ্রামে একরূপ অসম্ভব, তখন কলহ বিবাদে লাঘব করিয়া সখ্য ও প্রীতি সংস্থাপনে প্রযত্ন করাও পণ্ডশ্রম! সুতরাং এই একটা বৎসর ধরিয়া সে নিজের গ্রামের জন্ত যে দুখা চেষ্টা করিয়া মরিয়াছিল সে জন্ত তাহার অত্যন্ত অনুশোচনা বোধ হইতে লাগিল। তাহার নিশ্চিত বিশ্বাস জন্মিল, ইহারা এমনি খাওয়া-খায়ি করিয়াই চিরদিন কাটাইয়াছে এবং এমনি করিয়াই চিরদিন কাটাইতে বাধ্য। ইহাদের ভালো কোন দিন কোনমতেই হইতে পারে না; কিন্তু কথাটা পাকা করিয়া লওয়া ত চাই।

নানা কারণে অনেকদিন হইতে তাহার জ্যাঠাইমার সঙ্গে দেখা হয় নাই। সেই মারামারির পর হইতে কতকটা ইচ্ছা করিয়াই সে সেদিকে যায় নাই। আজ ভোরে উঠিয়া সে একেবারে তাঁর ঘরের দোরগোড়ায় আসিয়া দাঁড়াইল। জ্যাঠাইমার বুদ্ধি ও অভিজ্ঞতার উপর তাহার এমন বিশ্বাস ছিল যে সেকথা তিনি নিজেও জানিতেন না। রমেশ একটুখানি আশ্চর্য হইয়াই দেখিল, জ্যাঠাইমা এত প্রত্যাষেই স্নান করিয়া প্রস্তুত হইয়া সেই অস্পষ্ট আলোকে ঘরের মেঝেয় বসিয়া চোখে চশমা আঁটিয়া একখানি বই পড়িতেছেন। তিনিও বিস্মিত কম হইলেন না। বইখানি বন্ধ করিয়া তাহাকে আদর করিয়া ঘরে ডাকিয়া বসাইলেন এবং মুখপানে চাহিয়া জিজ্ঞাসা করিলেন, এত সকালে যে রে?

রমেশ কহিল, অনেক দিন তোমাকে দেখতে পাই নি জ্যাঠাইমা। আমি পিরপুরে একটা ইন্স্কুল কর্চ্চি।

বিশ্বেশ্বরী বলিলেন, শুনেচি; কিন্তু আমাদের ইন্স্কুলে আর পড়াতে বাস্ নে কেন বল ত?

রমেশ কহিল, সেই কথাই বলতে এসেচি জ্যাঠাইমা। এদের মঙ্গলের চেষ্টা করা শুধু পণ্ডশ্রম। যারা কেউ কারো ভালো দেখতে পারে না,

অভিমান অহঙ্কার যাদের এত বেশি, তাদের মধ্যে খেটে মরায় লাভ কিছুই নেই, শুধু মাঝ থেকে নিজেরই শত্রু বেড়ে ওঠে। বরং যাদের মঙ্গলের চেষ্টায় সত্যিকার মঙ্গল হবে আমি সেইখানে পরিশ্রম করব।

জ্যাঠাইমা কহিলেন, এ কথা ত নতুন নয় রমেশ ! পৃথিবীতে ভালো করবার ভার যে কেউ নিজের উপর নিয়েচে চিরদিনই তার শত্রুসংখ্যা বেড়ে উঠেছে। সেই ভয়ে যারা পেঁছিয়ে দাঁড়ায় তুইও তাদের দলে গিয়ে যদি মিশিস, তা হ'লে ত চলবে না বাবা ! এ গুরুভার ভগবান তোকেই বইতে দিয়েছেন, তোকেই ব'য়ে বেড়াতে হবে ; কিন্তু হাঁ রে রমেশ, তুই নাকি ওদের হাতের জল খাস ?

রমেশ হাসিয়া কহিল, ওই ছাথ জ্যাঠাইমা, এর মধ্যেই তোমার কানে উঠেচে। এখনো খাই নি বটে, কিন্তু খেতে ত আমি কোন দোষ দেখি নে। আমি তোমাদের জাতিভেদ মানি নে।

জ্যাঠাইমা আশ্চর্য্য হইয়া প্রশ্ন করিলেন, মানিস্ নে কি রে ? এ কি মিছে কথা, না জাতিভেদ নেই যে তুই মান'বি নে ?

রমেশ কহিল, ঠিক ওই কথাটাই জিজ্ঞাসা করতে আজ তোমার কাছে এসেছিলাম জ্যাঠাইমা। জাতিভেদ আছে তা মানি, কিন্তু একে ভাল ব'লে মানি নে !

কেন ?

রমেশ হঠাৎ উত্তেজিত হইয়া কহিল, কেন সে কি তোমাকে বলতে হবে ? এর থেকেই যত মনোমালিন্দ, যত বাদাবাদি, এ কি তোমার জানা নেই ? সমাজে যাকে ছোটজাত ক'রে রাখা হয়েছে সে যে বড়কে হিংসা করবে, এই ছোট হয়ে থাকার বিরুদ্ধে বিদ্রোহ করবে, এর থেকে মুক্ত হ'তে চাইবে—সে ত খুব স্বাভাবিক। হিন্দুরা সংগ্রহ করতে চায় না, জানে না—জানে শুধু অপচয় করতে। নিজেকে এবং নিজের জাতকে রক্ষা করবার এবং বাড়িয়ে তোলবার যে একটা সাংসারিক নিয়ম আছে

আমরা তাকে স্বীকার করি না বলেই প্রতিদিন ক্ষয় পেয়ে যাচ্ছি। এই যে মানুষ গণনা করার একটা নিয়ম আছে তার ফলাফলটা যদি পড়ে দেখতে জ্যাঠাইমা তা হ'লে ভয় পেয়ে যেতে। মানুষকে ছোট ক'রে অপমান করবার ফল হাতে হাতে টের পেতে। দেখতে পেতে কেমন ক'রে হিন্দুরা প্রতিদিন কমে আসচে এবং মুসলমানেরা সংখ্যায় বেড়ে উঠচে। তবু ত হিন্দুর হ'স হয় না।

বিশ্বেশ্বরী হাসিয়া বলিলেন, তোর এত কথা শুনে এখনো ত আমার হ'স হ'চ্ছে না রমেশ ! যারা তোদের মানুষ গুণে বেড়ায় তারা যদি গুণে বলতে পারে এতগুলো ছোটজাত গুরুমাত্র ছোট থাকবার ভয়েই জাত দিয়েচে তা হ'লে হয়ত আমার হ'স হতেও পারে। হিন্দু যে কমে আসচে সে কথা মানি ; কিন্তু তার অন্য কারণ আছে। সেটাও সমাজের ত্রুটি নিশ্চয় ; কিন্তু ছোটজাতের জাত দেওয়া-দেওয়ি তার কারণ নয়। শুধু ছোট ব'লে কোন হিন্দুই কোন দিন জাত দেয় না।

রমেশ সন্দ্বিগ্ন-কণ্ঠে কহিল, কিন্তু পণ্ডিতেরা তাই ত অশ্রুমান করেন জ্যাঠাইমা !

জ্যাঠাইমা বলিলেন, অশ্রুমানের বিরুদ্ধে ত তর্ক চলে না বাবা ! কেউ যদি এমন খবর দিতে পারে, অমুক গাঁয়ের এতগুলো ছোটজাত এই জন্তেই এ বৎসর জাত দিয়েচে তা' হ'লেও না হয় পণ্ডিতদের কথায় কান দিতে পারি ; কিন্তু আমি নিশ্চয় জানি এ সংবাদ কেউ দিতে পারবে না।

রমেশ তথাপি তর্ক করিয়া কহিল, কিন্তু যারা ছোটজাত তারা যে অস্তান্ত বড় জাতকে হিংসা ক'রে চলবে এ ত আমার কাছে ঠিক কথা ব'লেই মনে হয় জ্যাঠাইমা !

রমেশের তীব্র উত্তেজনায় বিশ্বেশ্বরী আবার হাসিয়া উঠিলেন ; বলিলেন, ঠিক কথা নয় বাবা, একটুও ঠিক কথা নয়। এ তোমাদের সহরে নয়। পাড়াগাঁয়ে জাত ছোট কি বড় সে জন্তে কারো এতটুকুও মাথাব্যথা নেই

ছোটভাই যেমন ছোট ব'লে বড়ভাইকে হিংসা করে না, দু-এক বছর পরে জন্মাবার জন্তে যেমন তার মনে এতটুকু ক্ষোভ নেই, পাড়ারগায়েও ঠিক তেমনি। এখানে কায়েত বামুন হয় নি বলে একটুও দুঃখ করে না, কৈবর্তও কায়েতের সমান হবার জন্তে একটুও চেষ্টা করে না। বড়-ভাইকে একটা প্রণাম কস্মতে ছোটভাইয়ের যেমন লজ্জায় মাথা কাটা যায় না, তেমনি কায়েত বামুনের একটুখানি পায়ের ধূলো নিতে একটুও কুণ্ঠিত হয় না। সে নয় বাবা, জাতিভেদ-টোদ হিংসে বিঘেষের হেতুই নয়। অন্ততঃ বাঙালীর যা মেরুদণ্ড—সেই পল্লীগ্রামে নয়।

রমেশ মনে মনে আশ্চর্য্য হইয়া কহিল, তবে কেন এমন হয় জ্যাঠাই-মা ? ও-গাঁয়ে ত এত ঘর মুসলমান আছে তাদের মধ্যে ত এমন বিবাদ নেই। একজন আর একজনকে বিপদের দিনে এমন ক'রে ত চেপে ধরে না। সেদিন অর্থাভাবে দ্বারিক ঠাকুরের প্রায়শ্চিত্ত হয় নি বলে কেউ তার মৃতদেহটাকে ছুঁতে পর্য্যন্ত যায় নি সে ত তুমি জান।

বিশ্বেশ্বরী বলিলেন, জানি বাবা সব জানি ; কিন্তু জাতিভেদ তার কারণ নয়। কারণ এই যে মুসলমানদের মধ্যে এখনো সত্যকার একটা ধর্ম্ম আছে, কিন্তু আমাদের মধ্যে তা নেই। যাকে যথার্থ ধর্ম্ম বলে, পল্লীগ্রাম থেকে সে একেবারে লোপ পেয়েচে। আছে শুধু কতকগুলো আচার-বিচারের কুসংস্কার, আর তার থেকে নিরর্থক দলাদলি।

রমেশ হতাশভাবে একটা নিশ্বাস ফেলিয়া কহিল, এর কি প্রতিকারের কোন উপায় নেই জ্যাঠাইমা ?

বিশ্বেশ্বরী বলিলেন, আছে বই কি বাবা ! প্রতিকার আছে শুধু জ্ঞানে। যে পথে তুই পা দিয়েছিস্ শুধু সেই পথে। তাই ত তোকে কেবলি বলি, তুই তোর জন্মভূমিকে কিছুতে ছেড়ে যাস্ নে।

প্রত্যুত্তরে রমেশ কি একটা বলিতে যাইতেছিল, বিশ্বেশ্বরী বাধা দিয়া বলিলেন, তুই বলবি মুসলমানদের মধ্যেও ত অজ্ঞান অত্যন্ত বেশি ; কিন্তু

তাদের সজীব-ধর্ম্মই তাদের সব দিকে শুধরে রেখেচে । একটা কথা বলি রমেশ, পিরপুরে খবর নিলে শুনতে পাবি জাফর ব'লে একটা বড়লোককে তারা সবাই একঘরে ক'রে রেখেছে । সে তার বিধবা সংমাকে খেতে দেয় না ব'লে ; কিন্তু আমাদের এই গোবিন্দ গাঙুলী সেদিন তার বিধবা বড় ভাজকে নিজের হাতে মেরে আধমারা ক'রে দিলে, কিন্তু সমাজ থেকে তার শাস্তি হওয়া চুলোয় যাক, সে নিজেই একটা সমাজের মাথা হ'য়ে ব'সে আছে । এ সব অপরাধ আমাদের মধ্যে শুধু ব্যক্তিগত পাপ-পুণ্য ; এর সাজা ভগবান ইচ্ছা হয় দেবেন, না হয় না-দেবেন, কিন্তু পল্লী-সমাজ তাতে ক্রক্ষেপ করে না ।

এই নূতন তথ্য শুনিয়া একদিকে রমেশ যেমন অবাক হইয়া গেল, অন্যদিকে তাহার মন ইহাকেই স্থির-সত্য বলিয়া গ্রহণ করিতে দ্বিধা করিতে লাগিল । বিস্বেখরী তাহা যেন বুঝিয়াই বলিলেন, ফলটাকেও উপায় ব'লে তুল করিস্ নে বাবা ! যে জন্তে তোর মন থেকে সংশয় ঘুচতে চাইচে না, সেই জাতের ছোট-বড় নিয়ে মারামারি করাটা উন্নতির একটা লক্ষণ, কারণ নয় রমেশ । সেটা সকলের আগে না হ'লেই নয়, মনে ক'রে যদি তাকে দিয়েই নাড়াচাড়া করতে যাস্ এদিক ওদিক ছুদিক নষ্ট হ'য়ে যাবে । কথাটা সত্যি কি না যদি যাচাই করতে চাস্ রমেশ, সহরের কাছাকাছি দু-চারখানা গ্রাম ঘুরে এসে তাদের সঙ্গে তোর এই কুঁয়াপুরকে মিলিয়ে দেখিস্ । আপনি টের পাবি ।

কলিকাতার অতি নিকটবর্ত্তী দু-একখানা গ্রামের সহিত রমেশের ঘনিষ্ঠ পরিচয় ছিল । তাহারই মোটামুটি চেহারাটা সে মনে মনে দেখিয়া লইবার চেষ্টা করিতেই অকস্মাৎ তাহার চোখের উপর হইতে যেন একটা কালো পর্দা উঠিয়া গেল এবং গভীর সন্ধ্যা ও বিস্ময়ে চূপ করিয়া সে বিস্বেখরীর মুখের পানে চাহিয়া রহিল । তিনি কিন্তু সেদিকে কিছুমাত্র লক্ষ্য না করিয়া নিজের পূর্ব্বাহ্নবৃত্তিরূপে ধীরে ধীরে বলিতে লাগিলেন,

তাই ত তোকে বার বার বলি, বাবা, তুই যেন তোর জন্মভূমিকে ত্যাগ ক'রে যাস্ নে। তোর মত বাইরে থেকে যারা বড় হ'তে পেরেচে তারা যদি তোর মতই গ্রামে ফিরে আস্ত, সমস্ত সম্বন্ধ বিচ্ছিন্ন ক'রে চ'লে না যেত, পল্লীগ্রামের এমন ছরবস্থা হ'তে পারত না। তারা কখনই গোবিন্দ গাঙুলীকে মাথায় তুলে নিয়ে তোকে দূরে সরিয়ে দিতে পারত না।

রমেশের রমার কথা মনে পড়িল। তাই আবার অভিমানের স্বরে কহিল, দূরে স'রে যেতে আমারও আর দুঃখ নেই জ্যাঠাইমা।

বিশ্বেশ্বরী এই সুরটা লক্ষ্য করিলেন, কিন্তু হেতু বুঝিলেন না। কহিলেন, না রমেশ, সে কিছুতেই হ'তে পারবে না। যদি এসেচিস্, যদি কাজ সুরু করেচিস্, মাঝ পথে ছেড়ে দিলে তোর জন্মভূমি তোকে ক্ষমা করবে না।

কেন জ্যাঠাইমা, জন্মভূমি শুধু ত আমার একার নয় ?

জ্যাঠাইমা উদ্দীপ্ত হইয়া বলিলেন, তোর একার বই কি বাবা, শুধু তোরই মা। দেখতে পাস্ নে, মা মুখ ফুটে সন্তানের কাছে কোন দিনই কিছু দাবী করেন নি। তাই এত লোক থাকতে কারো কানেই তাঁর কান্না গিয়ে পৌছতে পারে নি, কিন্তু তুই আসবামাত্রই গুনতে পেয়েছিলি।

রমেশ আর তর্ক করিল না। কিছুক্ষণ হিরভাবে বসিয়া থাকিয়া নিঃশব্দে প্রগাঢ় শ্রদ্ধাভরে বিশ্বেশ্বরীর পায়ের ধূলা মাথায় লইয়া ধীরে ধীরে বাহির হইয়া গেল।

ভক্তি, করুণা ও কর্তব্যের একান্ত নিষ্ঠায় হৃদয় পরিপূর্ণ করিয়া লইয়া রমেশ বাড়ী ফিরিয়া আসিল। তখন সবেমাত্র সূর্যোদয় হইয়াছে। তাহার ঘরের পূর্বদিকে মুক্ত জানালার সম্মুখে দাঁড়াইয়া সে শুদ্ধ হইয়া আকাশের পানে চাহিয়াছিল, সহসা শিশুকণ্ঠের আহ্বানে সে চমকিয়া মুখ ফিরাইতে দেখিল রমার ছোটভাই যতীন দ্বারের বাহিরে দাঁড়াইয়া লজ্জায় আরক্ত-মুখে ডাকিতেছে, ছোড়া !



রমেশ কাছে গিয়া হাত ধরিয়া তাহাকে ভিতরে আনিয়া জিজ্ঞাসা করিল, কাকে ডাক্চ যতীন ?

আপনাকে ।

আমাকে ? আমাকে ছোড়না বলতে তোমাকে কে বলে দিলে ?

দিদি !

দিদি ? তিনি কি কিছু বলতে তোমাকে পাঠিয়েছেন ?

যতীন মাথা নাড়িয়া কহিল, কিছু না । দিদি বললেন, আমাকে সঙ্গে ক'রে তোর ছোড়দার বাড়িতে নিয়ে চল—ঐ যে ওখানে দাঁড়িয়ে আছেন, বলিয়া সে দরজার দিকে চাহিল ।

রমেশ বিস্মিত ও ব্যস্ত হইয়া আসিয়া দেখিল রমা একটা থামের আড়ালে দাঁড়াইয়া আছে । সরিয়া আসিয়া সবিনয়ে কহিল, আজ আমার এ কি সৌভাগ্য ; কিন্তু আমাকে ডেকে না পাঠিয়ে, নিজে কষ্ট ক'রে এলে কেন ? এস, ঘরে এসো ।

রমা একবার ইতস্ততঃ করিল, তার পর যতীনের হাত ধরিয়া রমেশের অনুসরণ করিয়া তাহার ঘরের চৌকাঠের কাছে আসিয়া বসিয়া পড়িল । কহিল, আজ একটা জিনিস ভিক্ষে চাইতে আপনার বাড়িতেই এসেচি—বলুন, দেবেন ? বলিয়া সে রমেশের মুখের পানে স্থিরদৃষ্টিতে চাহিয়া রহিল । সেই চাহনিতে রমেশের পরিপূর্ণ হৃদয়ের সপ্তস্বর অকস্মাৎ যেন উদ্গাদ-শব্দে বাজিয়া উঠিয়া একেবারে ভাঙিয়া ঝরিয়া পড়িল । কিছুক্ষণ পূর্বেই তাহার মনের মধ্যে যে সকল সঙ্কল্প, আশা ও আকাঙ্ক্ষা অপক্লপ দীপ্তিতে নাচিয়া ফিরিতেছিল সমস্তই একেবারে নিবিয়া অন্ধকার হইয়া গেল । তথাপি প্রশ্ন করিল, কি চাই বল ?

তাহার অস্বাভাবিক গুরুতা রমার দৃষ্টি এড়াইল না । সে তেমনি মুখের প্রতি চোখ রাখিয়া কহিল, আগে কথা দিন ।

রমেশ ক্ষণকাল চুপ করিয়া থাকিয়া, মাথা নাড়িয়া কহিল, তা পারি নে। তোমাকে কিছুমাত্র প্রশ্ন না ক'রেই আমার কথা দেবার শক্তি তুমি নিজের হাতেই ভেঙে দিয়েছ রমা !

রমা আশ্চর্য্য হইয়া কহিল, আমি !

রমেশ বলিল, তুমি ছাড়া এ শক্তি আর কার ছিল না। রমা, আজ তোমাকে একটা সত্য কথা বলব। ইচ্ছা হয় বিশ্বাস ক'রো, না হয় ক'রো না ; কিন্তু জিনিসটা যদি একেবারে ম'রে নিঃশেষ হ'য়ে না যেত হয়ত কোন দিনই এ কথা তোমাকে শোনাতে পারিতাম না, বলিয়া একটুখানি চুপ করিয়া পুনরায় কহিল, আজ নাকি আর কোন-পক্ষেরই লেশমাত্র ক্ষতি বৃদ্ধির সম্ভাবনা নেই, তাই আজ জানাচ্ছি, তোমাকে অদেয় আমার সেদিন পর্য্যন্ত কিছুই ছিল না ; কিন্তু কেন জান ?

রমা মাথা নাড়িয়া জানাইল, না ; কিন্তু সমস্ত অন্তঃকরণটা তাহার কেমন একটা লজ্জাকর আশঙ্কায় কণ্টকিত হইয়া উঠিল।

রমেশ কহিল, কিন্তু শুনে রাগ ক'রো না, কিছুমাত্র লজ্জাও পেয়ো না। মনে ক'রো এ কোন পুরাকালের একটা গল্প শুনচ মাত্র।

রমা মনে মনে প্রাণপণে বাধা দিবার ইচ্ছা করিল, কিন্তু মাথা তাহার এমনি ঝুঁকিয়া পড়িল যে কিছুতেই সোজা করিয়া তুলিতে পারিল না। রমেশ তেমনি শান্ত, মৃদু ও নির্লিপ্ত কণ্ঠে বলিয়া উঠিল, তোমাকে ভালোবাসতাম রমা ! আজ আমার মনে হয় তেমন ভালোবাসা বোধ করি কেউ কখনো বাসে নি ; ছেলে-বেলায় মার মুখে শুনতাম আমাদের বিয়ে হবে। তার পরে যে দিন সমস্ত আশা ভেঙে গেল সে দিন আমি কেঁদে ফেলেছিলাম, আজও আমার তা মনে পড়ে।

কথাগুলো জলন্ত সীসার মত রমার দুই কানের মধ্যে প্রবেশ করিয়া দগ্ধ করিয়া ফেলিতে লাগিল এবং একান্ত অপরিচিত অহুভূতির অসহ্য তীব্র বেদনায় তাহার বুকের এক প্রান্ত হইতে অপর প্রান্ত পর্য্যন্ত কাটিয়া

কুচি কুচি করিয়া দিতে লাগিল ; কিন্তু নিষেধ করিবার কোন উপায় খুঁজিয়া না পাইয়া নিতান্ত নিরুপায় পাথরের মূর্তির মত স্তব্ধ হইয়া বসিয়া রমা রমেশের বিষাক্ত-মধুর কথাগুলো একটির পর একটি ক্রমাঘয়ে শুনিয়া যাইতে লাগিল ।

রমেশ কহিতে লাগিল, তুমি ভাব্চ, তোমাকে এ সব কাহিনী শোনানো অত্যাশ্চর্য ! আমার মনেও সেই সন্দেহ ছিল ব'লেই সে দিন তারকেশ্বরে যখন একটি দিনের যত্নে আমার জীবনের ধারা বদলে দিয়ে গেলে তখনও চুপ ক'রে ছিলাম ; কিন্তু সে চুপ ক'রে থাকটা আমার পক্ষে সহজ ছিল না ।

রমা কিছুতেই আর সহ্য করিতে পারিল না । কহিল, তবে আজকেই বা বাড়িতে পেয়ে আমাকে অপমান করছেন কেন ?

রমেশ কহিল, অপমান ! কিছু না । এর মধ্যে মান-অপমানের কোন কথাই নেই । এ যাদের কথা হ'চ্ছে, সে রমাও কোন দিন তুমি ছিলে না, সে রমেশও আমি আর নেই । যাই হোক, শোন ! সে দিন আমার কেন জানি নে, অসংশয়ে বিশ্বাস হয়েছিল তুমি যা ইচ্ছে বল, যা খুসী কর, কিন্তু আমার অমঙ্গল তুমি কিছুতেই সহিতে পারবে না । বোধ করি ভেবেছিলাম সেই যে ছেলে-বেলায় একদিন আমাকে ভালোবাসতে, আজও তা একেবারে ভুলতে পার নি । তাই ভেবেছিলাম, কোন কথা তোমাকে না জানিয়ে, তোমার ছাওয়ায় ব'সে আমার সমস্ত জীবনের কাজগুলো ধীরে ধীরে ক'রে যাব । তার পরে সে রাত্রে আকবরের নিজের মুখে যখন শুন্তে পেলাম, তুমি নিজে—ও কি বাইরে এত গোলমাল কিসের ?

বাবু—

গোপাল সরকারের ব্রহ্ম ব্যাকুল কণ্ঠস্বরে রমেশ ঘরের বাহিরে আসিতেই সে কহিল, বাবু, পুলিশের লোক ভজুয়াকে গ্রেপ্তার করেছে ।

কেন ?

গোপালের ভয়ে ঠোঁট কাঁপিতেছিল ; কোনমতে কহিল, পরশু রাতিরে রাধানগরের ডাকাতিতে সে নাকি ছিল।

রমেশ ঘরের দিকে চাহিয়া কহিল, আর এক মুহূর্ত থেকো না রমা, থিড়কি দিয়ে বেরিয়ে যাও ; খানাতল্লাসি করতে ছাড়বে না।

রমা নীলবর্ণ-মুখে উঠিয়া দাঁড়াইয়া বলিল, তোমার কোন ভয় নেই ত ?

রমেশ কহিল, বলতে পারি নে। কত দূর কি দাঁড়িয়েছে সে ত এখনো জানি নে।

একবার রমার ওষ্ঠাধর কাঁপিয়া উঠিল, একবার তাহার মনে পড়িল, পুলিশে সে দিন তাহার নিজের অভিযোগ করা—তার পরই সে হঠাৎ কাঁদিয়া ফেলিয়া বলিল, আমি যাব না।

রমেশ বিস্ময়ে মুহূর্তকাল অবাক থাকিয়া বলিল, ছি—এখানে থাকতে নেই রমা, শীগ্গির বেরিয়ে যাও, বলিয়া আর কোন কথা না শুনিয়া যতীনের হাত ধরিয়া জোর করিয়া টানিয়া এই ছুটি ভাই বোনকে থিড়কির পথে বাহির করিয়া দিয়া দ্বার রুদ্ধ করিয়া দিল।

আজ দুই মাস হইতে চলিল, কয়েকজন ডাকাতির আসামীর সঙ্গে ভজুয়া হাজতে। সে দিন থানাতল্লাসিতে রমেশের বাড়িতে সন্দেহজনক কিছুই পাওয়া যায় নাই এবং ভৈরব আচার্য্য সাক্ষ্য দিয়াছিল, সে রাত্রে ভজুয়া তাঁহার সঙ্গে তাঁহার মেয়ের পাত্র দেখিতে গিয়াছিল, তথাপি তাহাকে জামিনে খালাস দেওয়া হয় নাই।

বেণী আসিয়া কহিল, রমা অনেক চাল ভেবে তবে কাজ করতে হয় দিদি, নইলে কি শত্রুকে সহজে জয় করা যায়! সে দিন মনিবের হুকুমে যে ভজুয়া লাঠি হাতে ক'রে বাড়ি চড়াও হ'য়ে মাছ আদায় করতে এসেছিল, সে কথা যদি না তুমি থানায় লিখিয়ে রাখতে আজ কি তা হ'লে ঐ ব্যাটাকে এমন কায়দায় পাওয়া যেত? অমনি ঐ সঙ্গে রমেশের নামটাও যদি আরও দুকথা বাড়িয়ে-গুছিয়ে লিখিয়ে দিতিস্ বোন—আমার কথাটায় তখন তোরা ত কেউ কান দিলি নে!

রমা এমনি গ্লান হইয়া উঠিল যে বেণী দেখিতে পাইয়া কহিল, না না, তোমাকে সাক্ষী দিতে যেতে হবে না। আর তাই যদি হয় তাতেই বা কি! জমিদারী করতে গেলে কিছুতেই হটলে ত চলে না।

রমা কোন কথা কহিল না।

বেণী কহিতে লাগিল, কিন্তু তাকে ত সহজে ধরা চলে না! তবে সেও এবার কম চাল চালচে না দিদি! এই যে নূতন একটা ইন্সুল করেছে এ নিয়ে আমাদের অনেক কষ্ট পেতে হবে! এমনিই ত মোচলমান প্রজারা জমিদার ব'লে মানতে চায় না, তার ওপর যদি লেখাপড়া শেখে তা হ'লে জমিদারী থাকা না-থাকা সমান হবে তা এখন থেকে ব'লে রাখচি।

জমিদারীর ভাল-মন্দ সম্বন্ধে রমা বরাবরই বেণীর পরামর্শ মতই চলে ;

ইহাতে দুজনের কোন মতভেদ পর্য্যন্ত হয় না। আজ প্রথম রমা তর্ক করিল। কহিল, রমেশদার নিজের ক্ষতিও ত কম নয় ?

বেগীর নিজের এ সম্বন্ধে খটকা অল্প ছিল না। সে ভাবিয়া চিন্তিয়া যাহা স্থির করিয়াছিল তাহাই কহিল, কি জান রমা, এতে নিজের ক্ষতি ভাববার বিষয়ই নয়—আমরা দুজনে জন্ম হলেই ও খুসী। দেখচ না এসে পর্য্যন্ত কি রকম টাকা ছড়াচ্ছে ? চারিদিকে ছোটলোকদের মধ্যে ছোটবাবু, ছোটবাবু, একটা রব উঠে গেছে। যেন ঐ একটা মাহুষ, আর আমরা দু'ঘর কিছুই নয় ; কিন্তু বেশি দিন এ চলবে না। এই যে পুলিশের নজরে তাকে খাড়া ক'রে দিয়েচ বোন, এতেই তাকে শেষ পর্য্যন্ত শেষ হ'তে হবে তা ব'লে দিচ্চি, বলিয়া বেগী মনে মনে একটু আশ্চর্য্য হইয়াই লক্ষ্য করিল, সংবাদটা শোনাইয়া তাহার কাছে যেরূপ উৎসাহ ও উত্তেজনা আশা করা গিয়াছিল তাহার কিছুই পাওয়া গেল না। বরঞ্চ মনে হইল, সে হঠাৎ যেন একেবারে বিবর্ণ হইয়া গিয়া প্রশ্ন করিল, আমি লিখিয়ে দিয়েছিলাম রমেশদা জানতে পেরেছেন ?

বেগী কহিল, ঠিক জানি নে ; কিন্তু জানতে পারবেন। ভজুয়ার মোকদ্দমায় সব কথাই উঠবে।

রমা আর কোন কথা কহিল না। চুপ কবিয়া ভিতরে ভিতরে সে যেন একটা বড় আঘাত সামলাইতে লাগিল—তাহার কেবলই মনে উঠিতে লাগিল, রমেশকে বিপদে ফেলিতে সেই যে সকলের অগ্রণী এই সংবাদটা আর রমেশের অগোচর রহিবে না। খানিক পরে মুখ তুলিয়া জিজ্ঞাসা করিল, আজকাল গুর নাম বুঝি সকলের মুখেই বড়দা ?

বেগী কহিল, শুধু আমাদের গ্রামেই নয়, গুন্ডি ওর দেখাদেখি আরও পাঁচ-ছটা গ্রামে ইস্কুল কর্‌বার, রাস্তা তৈরী কর্‌বার আয়োজন হচ্ছে ! আজকাল ছোটলোকেরা সবাই বলাবলি কর্‌তে সাহেবদের দেশে গামে গ্রামে একটা দু'টো স্কুল আছে বলেই ওদের এত উন্নতি। রমেশ প্রচার

ক'রে দিয়েচে যেখানে নূতন ইস্কুল হবে, সেখানেই ও দু'শ ক'রে টাকা দেবে। ওর দাদামশায়ের যত টাকা পেয়েচে সমস্তই ও এইতে ব্যয় করবে। মোচলমানেরা ত ওকে একটা পীর পয়গম্বর ব'লে ঠিক ক'রে বসে আছে।

রমার নিজের বুকের ভিতর এই কথাটা একবার বিদ্যুতের মত আলো করিয়া খেলিয়া গেল, যদি তাহার নিজের নামটাও এর সঙ্গে যুক্ত হইয়া থাকিতে পারিত; কিন্তু মুহূর্তের জন্ত। পরক্ষণেই দ্বিগুণ আধারে তাহার সমস্ত অন্তরটা আচ্ছন্ন হইয়া গেল।

বেণী কহিতে লাগিল, কিন্তু আমিও অল্পে ছাড়ব না। সে যে আমাদের সমস্ত প্রজা এমনি ক'রে বিগড়ে তুলবে আর জমিদার হয়ে আমরা চোখ মেলে মুখ বুজে দেখব, সে যেন কেউ স্বপ্নেও না ভাবে। এই ব্যাটা ভৈরব আচাৰ্য্য এবার ভজুয়ার হ'য়ে সাক্ষী দিয়ে কি ক'রে তার মেয়ের বিয়ে দেয় সে আমি একবার ভালো ক'রে দেখব! আরও একটা ফন্দি আছে—দেখি, গোবিন্দখুড়ো কি বলে! তার পর দেশে ডাকাতি ত লেগেই আছে। এবার চাকরকে যদি জেলে পূরতে পারি ত তার মনিবকে পূরতেও আমাদের বেশি বেগ পেতে হবে না। সেই যে প্রথম দিনটিতেই তুমি বলেছিলে রমা, শত্রুতা করতে উনিও কম করবেন না, সে যে এমন সত্যি হ'য়ে দাঁড়াবে তা আমিও মনে করি নি।

রমা কোন কথাই কহিল না। নিজের প্রতিজ্ঞা ও ভবিষ্যদ্বাণী এমন বর্ণে বর্ণে সত্য হওয়ার বার্তা পাইয়াও যে নারীর মুখ অহঙ্কারে উজ্জ্বল হইয়া উঠে না, বরঞ্চ নিবিড় কালিমায় আচ্ছন্ন হইয়া যায়, সে যে তাহার কি অবস্থা সে কথা বুঝিবার শক্তি বেণীর নাই। তা না থাকুক, কিন্তু জিনিসটা এতই স্পষ্ট যে কাহারই দৃষ্টি এড়াইবার সম্ভাবনা ছিল না— তাহারও এড়াইল না। মনে মনে একটু বিশ্বয়াপন্ন হইয়াই বেণী রামাঘরে যাইয়া মাসির সহিত দুই একটা কথা কহিয়া বাড়ি ফিরিতেছিল, রমা হাত নাড়িয়া তাহাকে কাছে ডাকিয়া মৃদুস্বরে কহিল, আচ্ছা বড়না,

রমেশদা যদি জেলেই যান সে কি আমাদের নিজেদের ভারী কলঙ্কের কথা নয় ?

বেণী অধিকতর আশ্চর্য্য হইয়া জিজ্ঞাসা করিল, কেন ?

রমা কহিল, আমাদের আত্মীয়, আমরা যদি না বাঁচাই সমস্ত লোক আমাদেরই ত ছি ছি কর্বে ।

বেণী জবাব দিল, যে যেমন কাজ কর্বে সে তার ফল ভুগ্বে, আমাদের কি ?

রমা তেমনি মৃদুকণ্ঠে কহিল, কিন্তু রমেশদা সত্যিই ত আর চুরি ডাকাতি ক'রে বেড়ান না বরং পরের ভালর জন্যই নিজের সর্বস্ব দিচ্ছেন, সে কথা ত কারো কাছে চাপা থাক্বে না । তার পর আমাদের নিজেদেরও ত গাঁয়ের মধ্যে মুখ বার কর্তে হবে ?

বেণী হি হি করিয়া খুব খানিকটা হাসিয়া লইয়া কহিল, তোর হ'ল কি বল ত বোন ?

রমা এই লোকটার সঙ্গে রমেশের মুখখানা মনে মনে একবার দেখিয়া লইয়া আর যেন সোজা করিয়া মাথা তুলিতেই পারিল না । কহিল, গাঁয়ের লোক ভয়ে মুখের সাম্নে কিছু না বলুক আড়ালে বলবেই ; তুমি বল্বে আড়ালে রাজার মাকেও ডা'ন বলে ; কিন্তু ভগবান ত আছেন ! নিরপরাধীকে মিছে ক'রে শাস্তি দেওয়ালে তিনি ত রেহাই দেবেন না ।

বেণী কৃত্রিম ক্ষোভ প্রকাশ করিয়া কহিল, হা রে আমার কপাল ! সে ছোঁড়া বুঝি ঠাকুর-দেবতা কিছু মানে ? শীতলা ঠাকুরের ঘরটা প'ড়ে যাচ্ছে—মেরামত করবার জন্তে তার কাছে লোক পাঠাতে সে হাঁকিয়ে দিয়ে বলেছিল, যারা তোমাদের পাঠিয়েছে তাদের বল গে বাজে খরচ করবার টাকা আমার নেই । শোন কথা ! এটা তার কাছে বাজে খরচ ? আর কাজের খরচ হচ্ছে মোচলমানদের ইস্কুল ক'রে দেওয়া ! তা ছাড়া বাম্বুনের ছেলে—সন্ধ্যা-আহ্নিক কিছু করে না ! শুনি মোচলমানের হাতে



জল পর্য্যন্ত থায়। ছ'পাতা ইংরাজী প'ড়ে আর কি তার জ্ঞাত-জন্ম আছে দিদি—কিছুই নেই। শান্তি তার গেছে কোথা, সমস্তই তোলা আছে। সে একদিন সবাই দেখতে পাবে।

রমা আর বাদানুবাদ না করিয়া মৌন হইয়া রহিল বটে, কিন্তু রমেশের অনাচার এবং ঠাকুর-দেবতায় অশ্রদ্ধার কথা স্মরণ করিয়া মনটা তাহার আবার তাহার প্রতি বিমুখ হইয়া উঠিল। বেণী নিজের মনে কথা কহিতে কহিতে চলিয়া গেল। রমা অনেকক্ষণ পর্য্যন্ত একভাবে দাঁড়াইয়া থাকিয়া নিজের ঘরে গিয়া মেঝের উপর ধপ্ করিয়া বসিয়া পড়িল। সে দিন তাহার একাদশী। খাবার হাজ্জামা নাই মনে করিয়া আজ সে যেন স্বস্তিবোধ করিল।

বর্ষা শেষ হ'য়া আগামী পূজার আনন্দ এবং ম্যালেরিয়াভীতি বাঙলার পল্লী-জননীর আকাশে, বাতাসে এবং আলোকে ঊকিঝুঁকি মারিতে লাগিল, রমেশও জ্বরে পড়িল। গত বৎসর এই রাক্ষসীর আক্রমণকে সে উপেক্ষা করিয়াছিল ; কিন্তু এ বৎসর আর পারিল না। তিন দিন জ্বরভোগের পর আজ সকালে উঠিয়া খুব ধানিকটা কুইনিন্ গিলিয়া লইয়া জানালার বাহিরে পীতাভ-রৌদ্রের পানে চাহিয়া ভাবিতেছিল গ্রামের এই সমস্ত অনাবশ্যক ডোবা ও জঙ্গলের বিরুদ্ধে গ্রামবাসীকে সচেতন করা সম্ভব কি না। এই তিন দিন মাত্র জ্বরভোগ করিয়াই সে স্পষ্ট বুঝিয়াছিল, যা হোক কিছু একটা করিতেই হইবে। মাহুষ হইয়া সে যদি নিশ্চেষ্টভাবে থাকিয়া প্রতি বৎসর মাসের পর মাস মাহুষকে এই রোগভোগ করিতে দেয় ভগবান তাকে ক্ষমা করিবেন না। কয়েকদিন পূর্বে এই প্রসঙ্গে আলোচনা করিয়া সে এইটুকু বুঝিয়াছিল ইহার ভীষণ অপকারিতা সম্বন্ধে গ্রামের লোকেরা যে একেবারেই অজ্ঞ তাহা নহে ; কিন্তু পরের ডোবা বুজাইয়া এবং জমির জঙ্গল কাটিয়া কেহই বরের থাইয়া বনের মোষ তাড়াইয়া বেড়াইতে রাজী নহে। যাহার নিজের ডোবা ও জঙ্গল আছে সে এই বলিয়া তর্ক করে যে এ সকল তাহার নিজের কৃত নহে—বাপ পিতামহের দিন হইতেই আছে। সুতরাং যাহাদের গরজ তাহারা পরিষ্কার-পরিচ্ছন্ন করিয়া লইতে পারে তাহাতে আপত্তি নাই কিন্তু নিজে সে এজ্ঞ পয়সা এবং উত্তম ব্যয় করিতে অপারগ। রমেশ সন্ধান লইয়া জানিয়াছিল এমন অনেক গ্রাম পাশাপাশি আছে যেখানে একটা গ্রাম ম্যালেরিয়ায় উজাড় হইতেছে, অথচ আর একটায় ইহার প্রকোপ নাই বলিলেই হয়। ভাবিতেছিল, একটুকু স্মৃষ্ হইলেই এইরূপ

একটা গ্রাম সে নিজের চোখে গিয়া পরীক্ষা করিয়া আসিবে এবং তাহার পরে নিজের কর্তব্য স্থির করিবে। কারণ তাহার নিশ্চিত ধারণা জন্মিয়াছিল এই ম্যালেরিয়াহীন, গ্রামগুলির জল নিকাশের স্বাভাবিক সুবিধা কিছু আছেই, যাহা এমনি কাহারও দৃষ্টি আকর্ষণ করিয়াও চেষ্টা করিয়া চোখে আঙ্গুল দিয়া দেখাইয়া দিলে লোক দেখিতে পাইবে। অন্ততঃ তাহার নিতান্ত অনুরক্ত পিরপুরের মুসলমান প্রজারা চক্ষু মেলিবেই। তাহার ইন্জিনিয়ারিং শিক্ষা এতদিন পরে এমন একটা মহৎ কাজে লাগাইবার সুযোগ উপস্থিত হইয়াছে মনে করিয়া সে মনে মনে প্রফুল্ল হইয়া উঠিল।

ছোটবাবু ?

অকস্মাৎ কান্নার স্বরে আহবান শুনিয়া রমেশ মহাবিস্ময়ে মুখ ফিরাইয়া দেখিল ভৈরব আচার্য্য ঘরের মেঝের উপর উপুড় হইয়া পড়িয়া স্ত্রীলোকের শ্রায় ফুলিয়া ফুলিয়া কাঁদিতেছে। তাহার সাত-আট বৎসরের একটি কণ্ঠা সঙ্গে আসিয়াছিল ; বাপের সঙ্গে যোগ দিয়া তাহার চাৎকারে ঘর ভরিয়া উঠিল। দেখিতে দেখিতে বাড়ির লোক যে যেখানে ছিল দোর-গোড়ায় আসিয়া ভিড় করিয়া দাঁড়াইল। রমেশ কেমন যেন এক রকম হতবুদ্ধি হইয়া গেল। এই লোকটার কে মরিল, কি সর্বনাশ হইল, তাহাকে জিজ্ঞাসা করিবে, কেমন করিয়া কান্না থামাইবে কিছু যেন ঠাহর পাইল না। গোপাল সরকার কাজ ফেলিয়া ছুটিয়া আসিয়াছিল। সে কাছে আসিয়া ভৈরবের একটা হাত ধরিয়া টানিতেই ভৈরব উঠিয়া বসিয়া দুই বাহু দিয়া গোপালের গলা জড়াইয়া ধরিয়া ভয়ানক আর্তনাদ করিয়া উঠিল। এই লোকটা অতি অল্পতেই মেয়েদের মত কাঁদিয়া ফেলে স্মরণ করিয়া রমেশ ক্রমশঃ যখন অধীর হইয়া উঠিতেছিল, এমন সময় গোপালের বহুবিধ সাঙ্ঘনা বাক্যে ভৈরব অবশেষে চোখ মুছিয়া কতকটা প্রকৃতিস্থ হইয়া বসিল এবং এই মহা-

শোকের হেতু বিবৃত করিতে প্রস্তুত হইল। বিবরণ শুনিয়া রমেশ স্তব্ধ হইয়া বসিয়া রহিল। এত বড় অত্যাচার কোথাও কোনকালে সংঘটিত হইয়াছে বলিয়া সে কল্পনা করিতেও পারিল না। ব্যাপারটা এই— ভৈরবের সাক্ষ্যে ভজুয়া নিষ্কৃতি পাইলে তাহাকে পুলিশের সম্মুখে-দৃষ্টির বহির্ভূত করিতে রমেশ তাহাকে তাহার দেশে পাঠাইয়া দিয়াছিল। আসামী পরিগ্রাণ পাইল বটে, কিন্তু সাক্ষী ফাঁদে পড়িল। কেমন করিয়া যেন বাতাসে নিজের বিপদের বার্তা পাইয়া ভৈরব কাল সদরে গিয়া সন্ধান লইয়া অবগত হইয়াছে যে, দিন পাঁচ-ছয় পূর্বে বেণীর খুঁড়খুঁড় রাধানগরের সনৎ মুখুয্যে ভৈরবের নামে সূদে-আসলে এগারশ ছাব্বিশ টাকা সাত আনার ডিগ্রী করিয়াছে এবং তাহার বাস্তবতাটা ক্রোক করিয়া নীলাম করিয়া লইয়াছে। ইহা একতরফা ডিগ্রী নহে। যথারীতি শমন বাহির হইয়াছে; কে তাহা ভৈরবের নামে দস্তখত করিয়া গ্রহণ করিয়াছে এবং ধাৰ্য্য দিনে আদালতে হাজির হইয়া নিজেকে ভৈরব বলিয়া স্বীকার করিয়া কবুল-জবাব দিয়া আসিয়াছে। ইহার ঋণ মিথ্যা, আসামী মিথ্যা, ফরিয়াদী মিথ্যা। এই সৰ্ব্বব্যাপী মিথ্যার আশ্রয়ে সবল দুর্বলের যথাসৰ্বস্ব আত্মসাৎ করিয়া তাহাকে পথের ভিখারি করিয়া বাহির করিয়া দিবার উদ্যোগ করিয়াছে। অথচ সরকারের আদালতে এই অত্যাচারের প্রতিকারের উপায় সহজ নহে। আইনমত সমস্ত মিথ্যা ঋণ বিচারালয়ে গচ্ছিত না করিয়া কথাটি কহিবার জো নাই। মাথা খুঁড়িয়া মরিলেও কেহ তাহাতে কর্ণপাত করিবে না; কিন্তু এত টাকা দরিদ্র ভৈরব কোথায় পাইবে যে, তাহা জমা দিয়া এই মহা-অত্যাচার বিবৃদ্ধে ন্যায়বিচার প্রার্থনা করিয়া আত্মরক্ষা করিবে। সুতরাং রাজার আইন, আদালত, জজ, ম্যাজিষ্ট্রেট সমস্ত মাথার উপর থাকিলেও দরিদ্র প্রতিদ্বন্দ্বীকে নিঃশেষে মরিতে হইবে, অথচ সমস্তই যে বেণী ও গোবিন্দ গাও লির কাজ তাহাতে কাহারও সন্দেহমাত্র নাই এবং এই অত্যাচারে যত

বড় দুর্গতিই ভৈরবের অদৃষ্টে ঘটুক গ্রামের সকলেই চুপি চুপি জন্মনা করিয়া ফিরিবে, কিন্তু একটি লোকও মাথা উঁচু করিয়া প্রকাশে প্রতিবাদ করিবে না, কারণ তাহারা কাহারো সাতেও থাকে না পাঁচেও থাকে না এবং পরের কথায় কথা কহা তাহারা ভালোই বাসে না। সে যাই হোক, রমেশ কিন্তু আজ নিঃসংশয়ে বুঝিল পল্লীবাসী দরিদ্র প্রজার উপর অসঙ্কোচে অত্যাচার করিবার সাহস ইহারা কোথায় পায় এবং কেমন করিয়া দেশের আইনকেই ইহারা কস্যের ছুরির মত ব্যবহার করিতে পারে। সুতরাং অর্থবল কুটবুদ্ধি একদিকে যেমন তাহাদিগকে রাজার শাসন হইতে অব্যাহতি দেয়, মৃত-সমাজও তেমনি অগ্নাদিকে তাহাদের দুষ্কৃতির কোন দণ্ডবিধান করে না। তাই ইহারা সহস্র অগ্নায় করিয়াও সত্যধর্মবিহীন মৃত পল্লী-সমাজের মাথায় পা দিয়া এমন নিরুপদ্রবে এবং যথেষ্টাচারে বাস করে।

আজ তাহার জ্যাঠাইমার কথাগুলো বারংবার মনে পড়িতে লাগিল। সে দিন সেই যে তিনি মর্মান্তিক হাসি হাসিয়া বলিয়াছেন, রমেশ, চুলোয় যাক্ গে তোদের জাত-বিচারের ভাল-মন্দ ঝগড়া-ঝাঁটি ; বাবা শুধু আলো জ্বলে দে রে, শুধু আলো জ্বলে দে! গ্রামে গ্রামে লোক অন্ধকারে কাণা হ'য়ে গেল ; একবার কেবল তাদের চোখ মেলে দেখবার উপায়টা ক'রে দে বাবা ! তখন আপনি দেখতে পাবে তারা কোন্টা কালো, কোন্টা ধলো। তিনি আরও বলিয়াছিলেন, যদি ফিরেই এসেছিঁ বাবা, তবে চ'লে আর যাস্ নে। তোরা মুখ ফিরিয়ে থাকিস বলেই তোদের পল্লী-জননীর এই সর্বনাশ। সত্যই ত ! সে চলিয়া গেলে ত ইহার প্রতিকারের লেশমাত্র উপায় থাকিত না !

রমেশ নিশ্বাস ফেলিয়া মনে মনে কহিল, হায় রে, এই আমাদের গর্বের ধন—বাঙলার শুদ্ধ শাস্ত্র, জ্ঞাননিষ্ঠ পল্লী-সমাজ ! একদিন হয়ত যখন ইহার প্রাণ ছিল তখন দুষ্টের শাসন করিয়া আশ্রিত নর-

নারীকে সংসার যাত্রা-পথে নির্বিঘ্নে বহন করিয়া চলিবারও ইহার শক্তি ছিল।

কিন্তু আজ ইহা মৃত ; তথাপি অন্ধ পল্লীবাসীরা এই গুরুভার বিকৃত শব্দেহটাকে পরিত্যাগ না করিয়া মিথ্যা মমতায় রাত্রি-দিন মাথায় বহিয়া বহিয়া এমন দিনের পর দিন ক্লান্ত, অবসন্ন ও নির্জীব হইয়া উঠিতেছে— কিছুতেই চক্ষু চাহিয়া দেখিতেছে না। যে বস্তু আর্ন্তকে রক্ষা করে না শুধু বিপন্ন করে, তাহাকেই সমাজ বলিয়া কল্পনা করার মহাপাপ তাহাদিগকে নিয়ত রসাতলের পথেই টানিয়া নামাইতেছে।

রমেশ আরও কিছুক্ষণ স্থিরভাবে বসিয়া থাকিয়া সহসা যেন ধাক্কা পাইয়া উঠিয়া পড়িল এবং তৎক্ষণাৎ সমস্ত টাকাটার একথানা চেক লিখিয়া গোপাল সরকারের হাতে দিয়া কহিল, আপনি সমস্ত বিষয়ে নিজের ভাল ক’রে জেনে টাকাটা জমা দিয়ে দেবেন এবং যেমন ক’রে হোক পুনর্বিচারের সমস্ত বন্দোবস্ত ঠিক ক’রে আসবেন। এমন ভয়ঙ্কর অত্যাচার করবার সাহস তাদের আর যেন কোন দিন না হয়।

চেক হাতে করিয়া গোপাল সরকার ও ভৈরব উভয়ে কিছুক্ষণ যেন বিহ্বলের মত চাহিয়া রহিল। রমেশ পুনর্বার যখন নিজের বক্তব্য ভাল করিয়া বুঝাইয়া কহিল এবং সে যে তামাসা করিতেছে না তাহা নিঃসন্দেহে যখন বুঝা গেল, অকস্মাৎ ভৈরব ছুটিয়া আসিয়া পাগলের স্ত্রায় রমেশের দুই পা চাপিয়া ধরিয়া কাঁদিয়া চৈতাইয়া আশীর্বাদ করিয়া এমন কাণ্ড করিয়া তুলিল যে রমেশের অপেক্ষা অল্পবলশালী লোকের পক্ষে নিজেকে মুক্ত করিয়া লওয়া সে দিন একটা কঠিন কাজ হইত! কথাটা গ্রামময় প্রচারিত হইতে বিলম্ব ঘটিল না। সকলেই বুঝিল বেণী এবং গোবিন্দ এবার সহজে নিষ্কৃতি পাইবে না। ছোটবাবু যে তাঁহার চিরশত্রুকে হাতে পাইবার জন্তই এত টাকা হাতছাড়া করিয়াছে তাহা সকলেই বলাবলি করিতে লাগিল ; কিন্তু এ কথা কাহারও কল্পনা করাও সম্ভবপর ছিল

না যে, দুর্বল ভৈরবের পরিবর্তে ভগবান তাহারই মাথার উপর এই গভীর দুষ্কৃতির গুরুভার তুলিয়া দিলেন যে তাহা স্বচ্ছন্দে বহিতে পারিবে।

তার পর মাস-থানেক গত হইয়াছে। ম্যালেরিয়ার বিরুদ্ধে মনে মনে যুদ্ধ ঘোষণা করিয়া রমেশ এই একটা মাস তাহার যত্নতন্ত্র লইয়া এমনি উৎসাহের সহিত নানাস্থানে মাপ-জোখ করিয়া ফিরিতেছিল যে, আগামী-কালই যে ভৈরবের মোকদ্দমা তাহা তুলিয়াই গিয়াছিল। আজ সন্ধ্যার প্রাক্কালে অকস্মাৎ সে কথা মনে পড়িয়া গেল রত্ননচৌকির সানাইয়ের সুরে। চাকরের কাছে সংবাদ পাইয়া রমেশ আশ্চর্য হইয়া গেল যে আজ ভৈরব আচার্য্যের দৌহিত্রের অন্নপ্রাশন। অথচ সে ত কিছুই জানে না। শুনিতে পাইল ভৈরব আয়োজন মন্দ করে নাই। গ্রামগুরু সমস্ত লোককেই নিমন্ত্রণ করিয়াছে; কিন্তু রমেশকে কেহ নিমন্ত্রণ করিতে আসিয়াছিল কি না সে খবর বাড়িতে কেহই দিতে পারিল না। শুধু তাহাই নয়। তাহার স্মরণ হইল এতবড় একটা মামলা ভৈরবের মাথার উপর আসন্ন হইয়া থাকা সত্ত্বেও সে প্রায় কুড়ি-পঁচিশ দিনের মধ্যে একবার সাক্ষাৎ পর্য্যন্ত করিতে আসে নাই! ব্যাপার কি; কিন্তু এমন কথা তাহার মনে উদয় হইয়াও হইল না যে সংসারের সমস্ত লোকের মধ্যে ভৈরব তাহাকেই বাদ দিতে পারে। তাই নিজের এই অদ্ভুত আশঙ্কায় নিজেই লজ্জিত হইয়া রমেশ তখনই একটা চাদর কাঁধে ফেলিয়া একেবারে সোজা আচার্য্য বাড়ির উদ্দেশে বাহির হইয়া পড়িল। বাহির হইতেই দেখিতে পাইল বেড়ার ধারে দুই-তিনটা গ্রামের কুকুর জড় হইয়া এঁটো কলাপাতা লইয়া বিবাদ করিতেছে এবং অনতিদূরে রত্ননচৌকি-ওয়ালারা আগুন জ্বালাইয়া তামাক খাইতেছে এবং বাগভাণ্ড উত্তপ্ত করিতেছে। ভিতরে প্রবেশ করিয়া দেখিল উঠানে শত ছিদ্রযুক্ত সামিয়ানা খাটানো এবং সমস্ত গ্রামের সম্মল পাঁচ-

ছয়টা কেরোসিনের বহু পুরাতন বাতি মুখুয্যে ও ঘোষালবাটী হইতে চাহিয়া আনিয়া জ্বালানো হইয়াছে। তাহারা স্বল্প-আলোক এবং অপর্যাপ্ত ধূম উল্লীর্ণ করিয়া সমস্ত স্থানটাকে দুর্গন্ধে পরিপূর্ণ করিয়া দিয়াছে। খাওয়ান সমাধা হইয়া গিয়াছিল—বেশি লোক আর ছিল না। পাড়ার মুকুবিরা তখন যাই যাই করিতেছিলেন এবং ধর্মদাস হরিহর রায়কে আরও একটুখানি বসিতে পীড়াপীড়ি করিতেছিলেন। গোবিন্দ গাঙুলী একটুখানি সরিয়া বসিয়া কে একজন চাষার ছেলের সহিত নিরিবিবি আলাপে রত ছিলেন। এমনি সময়ে রমেশ দুঃস্বপ্নের মত একেবারে প্রাঙ্গণের বৃকের মাঝখানে আসিয়া দাঁড়াইল। তাহাকে দেখিবামাত্র ইহাদের মুখও যেন এক মুহূর্তে মসীবর্ণ হইয়া গেল। শত্রুপক্ষীয় এই দুইটা লোককে এই বাটীতেই এমন ভাবে যোগ দিতে দেখিয়া রমেশের মুখও উজ্জ্বল হইয়া উঠিল না। কেহই তাহাকে অভ্যর্থনা করিয়া বসাইতে অগ্রসর হইল না—এমন কি একটা কথা পর্য্যন্ত কহিল না। ভৈরব নিজে সেখানে ছিল না। থানিক পরে সে বাটীর ভিতর হইতে কি একটা কাজে—বলি গোবিন্দদা, বলিয়া বাহির হইয়াই উঠানের মাঝখানে যেন ভূত দেখিতে পাইল এবং পরক্ষণেই ছুটিয়া বাটীর ভিতরে ঢুকিয়া পড়িল। রমেশ শুষ্কমুখে একাকী যখন বাহির হইয়া আসিল তখন প্রচণ্ড বিস্ময়ে তাহার মন অসাড় হইয়া গিয়াছিল। পিছনে ডাক শুনি, বাবা রমেশ !

ফিরিয়া দেখিল দীঘু হনু হনু করিয়া আসিতেছে। কাছে আসিয়া কহিল, চল বাবা বাড়ি চল।

রমেশ একটুখানি হাসিবার চেষ্টা করিল মাত্র।

চলিতে চলিতে দীঘু বলিতে লাগিল, তুমি ওর যে উপকার করেচ বাবা, সে ওর বাপ-মা কর্তৃত্ব না। এ কথা সবাই জানে কিন্তু উপায় নেই। কাচ্চাবাচ্চা নিয়ে আমাদের সকলেরই ঘর কর্তৃত্ব হয়; তাই



তোমাকে নেমন্তন্ন কর্তে গেলে—বুঝলে না বাবা—ভৈরবকেও নেহাৎ দোষ দেওয়া যায় না—তোমরা সব আজকালকার সহরের ছেলে—জাত-টাত তেমন ত কিছু মানতে চাও না—তাইতেই বুঝলে না বাবা—হুদিন পরে ওর ছোটমেয়েটিও প্রায় বারো বছরের হ'ল ত—পার কর্তে হবে ত বাবা ? আমাদের সমাজের কথা জান সবই বাবা—বুঝলে না বাবা—

রমেশ অধীরভাবে কহিল, আজ্ঞে হাঁ, বুঝেছি ।

রমেশের বাড়ির সদর-দরজার কাছে দাঁড়াইয়া দীর্ঘ খুসি হইয়া কহিল, বুঝবে বই কি বাবা, তোমরা ত আর অবুঝ নও । ও ব্রাহ্মণকেই বা দোষ দিই কি করে—আমাদের বুড়োমানুষের পরকালের চিন্তাটা—

আজ্ঞে হাঁ, সে ত ঠিক কথা ; বলিয়া রমেশ তাড়াতাড়ি ভিতরে প্রবেশ করিল । গ্রামের লোকে তাহাকে একঘরে করিয়াছে তাহা বুঝিতে তাহার আর বাকি রহিল না । নিজের ঘরের মধ্যে আসিয়া ক্ষোভে, অপমানে তাহার দুই চক্ষু জ্বালা করিয়া উঠিল । আজ এইটা তাহাকে সবচেয়ে বেশি বাজিল যে বেণী ও গোবিন্দকেই ভৈরব আজ সমাদরে ডাকিয়া আনিয়াছে এবং গ্রামের লোক সমস্ত জানিয়া শুনিয়াও ভৈরবের এই ব্যবহারটা শুধু মাপ করে নাই, সমাজের খাতিরে রমেশকে সে যে আহ্বান পর্য্যন্ত করে নাই, তাহার এই কাজটাকে প্রশংসার চক্ষে দেখিতেছে ।

হা ভগবান ! সে একটা চোকির উপর বসিয়া পড়িয়া দীর্ঘকাল ফেলিয়া বলিল, এ কৃত্রিম জাতের এ মহাপাতকের প্রায়শ্চিত্ত হবে কিসে ! এত বড় নিষ্ঠুর অপমান কি ভগবান তুমিই ক্ষমা কর্তে পার্বে ?

এমনি একটা আশঙ্কা যে রমেশের মাথায় একেবারেই আসে নাই তাহা নহে। তথাপি পরদিন সন্ধ্যার সময় গোপাল সরকার সদর হইতে ফিরিয়া আসিয়া যখন সত্য সত্যই জানাইল যে, ভৈরব আচার্য্য তাহাদের মাথার উপরেই কাঁটাল ভাঙিয়া ভক্ষণ করিয়াছে, অর্থাৎ সে মোকদ্দমায় হাজির হয় নাই এবং তাহা এক-তরফা হইয়া ডিস্‌মিস্ হইয়া গিয়া তাহাদের প্রদত্ত জমার টাকাটা বেণী প্রভৃতির হস্তগত হইয়াছে, তখন এক মুহূর্ত্তেই রমেশের ক্রোধের শিখা বিদ্যুৎদ্বিগে তাহার পদতল হইতে ব্রহ্মরজ্জ পর্য্যন্ত জ্বলিয়া উঠিল। সেদিন ইহাদের জাল ও জুয়াচুরি দমন করিতে যে মিথ্যাঞ্চল সে ভৈরবের হইয়া জমা দিয়াছিল, মহা-পাপিষ্ঠ ভৈরব তাহার দ্বারাই নিজের মাথা বাঁচাইয়া লইয়া পুনরায় বেণীর সহিতই সখ্য স্থাপন করিয়াছে। তাহার এই কৃতঘ্নতা কল্যাকার অপমানকেও বহু উর্দ্ধে ছাপাইয়া আজ রমেশের মাথার ভিতর প্রজ্বলিত হইতে লাগিল। রমেশ যেমন ছিল তেমনি খাড়া উঠিয়া বাহির হইয়া গেল। আত্মসংবরণের কথাটা তাহার মনেও হইল না। প্রভুর রক্তচক্ষু দেখিয়া ভীত হইয়া গোপাল জিজ্ঞাসা করিল, বাবু কি কোথাও যাচ্ছেন ?

আসছি, বলিয়া রমেশ দ্রুতপদে চলিয়া গেল। ভৈরবের বহির্বাটীতে ঢুকিয়া দেখিল কেহ নাই। ভিতরে প্রবেশ করিল। তখন আচার্য্যগৃহিণী সন্ধ্যাদীপ-হাতে প্রাঙ্গণের তুলসী মূলে আসিতেছিলেন ; অকস্মাৎ রমেশকে স্তম্ভুখে দেখিয়া একেবারে জড়জড় হইয়া গেলেন। সে কখনও

আসে না, আজ কেন আসিয়াছে তাহা মনে করিতেই ভয়ে তাঁহার হৃৎপিণ্ড কণ্ঠের কাছে ঠেলিয়া আসিল।

রমেশ তাঁহাকেই প্রশ্ন করিল, আচাখ্যিমশাই কই ?

গৃহিণী অব্যক্তস্বরে যাহা বলিলেন তাহা শোনা গেল না বটে, কিন্তু বুঝা গেল তিনি ঘরে নাই। রমেশের গায়ে একটা জামা অবধি ছিল না। সন্ধ্যার অস্পষ্ট আলোকে তাহার মুখও ভাল দেখা যাইতেছিল না। এমন সময়ে ভৈরবের বড়মেয়ে লক্ষ্মী ছেলে-কোলে গৃহের বাহির হইয়াই এই অপরিচিত লোকটাকে দেখিয়া মাকে জিজ্ঞাসা করিল, কে মা ?

তাহার জননী পরিচয় দিতে পারিলেন না, রমেশও কথা কহিল না।

লক্ষ্মী ভয় পাইয়া চোঁচাইয়া ডাকিল, বাবা, কে একটা লোক উঠানে এসে দাঁড়িয়েচে, কথা কয় না।

কে রে ? বলিয়া সাড়া দিয়া তাহার পিতা ঘরের বাহিরে আসিয়াই একেবারে কাঁঠ হইয়া গেল। সন্ধ্যার স্নান-ছায়াতেও সেই দীর্ঘ, ঋজু-দেহ চিনিতে তাহার বাকি রহিল না।

রমেশ কঠোরস্বরে ডাকিল—নেমে আসুন, বলিয়া তৎক্ষণাৎ নিজেই উঠিয়া গিয়া বজ্রমুষ্টিতে ভৈরবের একটা হাত ধরিয়া ফেলিল। কহিল, কেন এমন কাজ করলেন ?

ভৈরব কাঁদিয়া উঠিল, মেরে ফেল্লে রে লক্ষ্মী, বেণীবাবুকে খবর দে।

সঙ্গে সঙ্গে বাড়িস্থল্ল ছেলে-মেয়ে চোঁচাইয়া কাঁদিয়া উঠিল এবং চোখের পলকে সন্ধ্যার নীরবতা বিদীর্ণ করিয়া বহুকণ্ঠের গগনভেদী কান্নার রোলে সমস্ত পাড়া ত্রস্ত হইয়া উঠিল।

রমেশ তাহাকে একটা প্রচণ্ড ঝাঁকানি দিয়া কহিল, চুপ্! বলুন, কেন এ কাজ করলেন ?

ভৈরব উত্তর দিবার চেষ্টামাত্র না করিয়া একভাবে চীৎকার করিয়া

গলা ফাটাইতেই লাগিল এবং নিজেকে মুক্ত করিবার জন্ত টানা হেঁচড়া করিতে লাগিল ।

দেখিতে দেখিতে পাড়ার মেয়ে-পুরুষে প্রাঙ্গণ পরিপূর্ণ হইয়া গেল এবং তামাসা দেখিতে আরও বহু লোক ভিড় করিয়া ভিতরে ঢুকিতে ঠেলাঠেলি করিতে লাগিল ; কিন্তু ক্রোধাক্ত রমেশ সে দিকে লক্ষ্য করিল না । শত চক্ষুর কোতূহলো দৃষ্টির সম্মুখে দাঁড়াইয়া সে উন্মত্তের মত ভৈরবকে ধরিয়া একভাবে নাড়া দিতে লাগিল । একে রমেশের গায়ের জোর অতিরঞ্জিত হইয়া প্রবাদের মত দাঁড়াইয়াছিল, তাহাতে তাহার চোখের পানে চাহিয়া এই একবাড়ি লোকের মধ্যে এমন সাহস কাহারও হইল না যে হতভাগ্য ভৈরবকে ছাড়াইয়া দেয় । গোবিন্দ বাড়ি ঢুকিয়াই ভিড়ের মধ্যে মিশিয়া গেলেন । বেণী উকি মারিয়াই সরিতেছিল, ভৈরব দেখিতে পাইয়া কাঁদিয়া উঠিল—বড়বাবু—বড়বাবু—

বড়বাবু কিন্তু কর্ণপাতও করিল না, চোখের নিমিষে কোথায় মিলাইয়া গেল ।

সহসা জনতার মধ্যে একটুখানি পথের মত হইল এবং পরক্ষণেই রমা দ্রুতপদে আসিয়া রমেশের হাত চাপিয়া ধরিল । কহিল, হয়েছে—এবার ছেড়ে দাও ।

রমেশ তাহার প্রতি অগ্নিদৃষ্টি নিক্ষেপ করিয়া কহিল, কেন ?

রমা দাঁতে দাঁত চাপিয়া অশ্রুট-ক্রুদ্ধকণ্ঠে বলিল, এত লোকের মাঝখানে তোমার লজ্জা করে না কিন্তু আমি যে লজ্জায় মরে যাই !

রমেশ প্রাঙ্গণপূর্ণ লোকের পানে চাহিয়া তৎক্ষণাৎ ভৈরবের হাত ছাড়িয়া দিল ।

রমা তেমনি মূহূৰ্ত্তে কহিল, বাড়ি যাও ।

রমেশ বিরুদ্ধি না করিয়া বাহির হইয়া গেল । হঠাৎ এ যেন একটা ভোজবাজি হইয়া গেল ; কিন্তু সে চলিয়া গেলে রমার প্রতি তাহার এই

নিরতিশয় বাধ্যতায় সবাই যেন কি এক রকম মুখ চাওয়া-চাওয়ি করিতে লাগিল এবং এমন জিনিসটার এত আড়ম্বরে আরম্ভ হইয়া এভাবে শেষ হইয়া যাওয়াটা পাড়ার লোকের কাহারই যেন মনঃপুত হইল না।

লোকজন চলিয়া গেল। গোবিন্দ গাঙুলী আত্মপ্রকাশ করিয়া একটা আঙুল তুলিয়া মুখখানা অতিরিক্ত গম্ভীর করিয়া কহিল, বাড়ি চড়াও হ'য়ে যে আধমরা ক'রে দিবে গেল এর কি কর্বে সেই পরামর্শ করো।

ভৈরব দুই হাঁটু বৃকের কাছে জড় করিয়া বসিয়া হাঁপাইতেছিল, নিরুপায়ভাবে বেগীর মুখপানে চাহিল। রমা তখনও যায় নাই। বেগীর অভিপ্রায় অনুমান করিয়া তাড়াতাড়ি কহিল, কিন্তু এ পক্ষের দোষও ত কম নেই বড়দা? তা ছাড়া হয়েছেই বাকি যে এই নিয়ে হৈ চৈ করতে হবে?

বেগী ভয়ানক আশ্চর্য্য হইয়া কহিল, বল কি রমা!

ভৈরবের বড়মেয়ে তখনও একটা খুঁটি আশ্রয় করিয়া দাঁড়াইয়া কাঁদিতেছিল। সে দলিতা ফণিনীর মত একেবারে গর্জ্জাইয়া উঠিল, তুমি ত ওর হ'য়ে বলবেই রমাদিদি! তোমার বাপকে কেউ ঘরে ঢুকে মেরে গেলে কি করতে বল ত?

তাহার গর্জ্জনে রমা প্রথমটা চমকিয়া গেল। সে যে পিতার মুক্তির জন্য কৃতজ্ঞ নয়—তা না হয় নাই হইল; কিন্তু তাহার তীব্রতার ভিতর হইতে এমন একটা কটু শ্লেষের ঝাঁজ আসিয়া রমার গায়ে লাগিল যে সে পরমুহর্ত্তেই জলিয়া উঠিল; কিন্তু আত্মসংবরণ করিয়া কহিল, আমার বাপ ও তোমার বাপে অনেক তফাৎ লক্ষ্মী, তুমি সে তুলনা ক'রো না; কিন্তু আমি কারও হয়েছেই কোন কথা বলি নি, ভালর জন্তেই বলেছিলাম।

লক্ষ্মী পাড়াগায়ের মেয়ে ঝগড়ায় অপটু নহে! সে তাড়িয়া আসিয়া বলিল, বটে! ওর হ'য়ে কৌদল করতে তোমার লজ্জা করে না? বড়-

লোকের মেয়ে ব'লে কেউ ভয়ে কথা কয় না—নইলে কে না শুনেচে ?  
তুমি ব'লে তাই মুখ দেখাও আর কেউ হ'লে গলায় দড়ি দিত !

বেণী লক্ষ্মীকে একটা তাড়া দিয়া বলিল, তুই থাম্ না লক্ষ্মী ! কাজ কি  
ও-সব কথায় ?

লক্ষ্মী কহিল, কাজ নেই কেন ? যার জন্তে বাবাকে এত দুঃখ পেতে  
হ'ল তার হ'য়েই উনি কৌদল কয়বেন ? বাবা যদি মারা যেতেন !

রমা নিমিষের জন্ত স্তম্ভিত হইয়া গিয়াছিল মাত্র । বেণীর কৃত্রিম  
ক্রোধের স্বর তাহাকে আবার প্রজ্বলিত করিয়া দিল । সে লক্ষ্মীর প্রতি  
চাহিয়া কহিল, লক্ষ্মী, ঠুর মত লোকের হাতে মরতে পাওয়া ভাগ্যের কথা ;  
আজ মারা পড়লে তোমার বাবা স্বর্গে যেতে পারত ।

লক্ষ্মীও জ্বলিয়া উঠিয়া কহিল, ওঃ, তাহাতেই বুঝি তুমি মরেচ  
রমাদিদি ?

রমা আর জবাব দিল না । তাহার দিক হইতে মুখ ফিরাইয়া লইয়া  
বেণীর প্রতি চাহিয়া জিজ্ঞাসা করিল, কিন্তু কথাটা কি তুমিই বল ত  
বড়দা ? বলিয়া সে একদৃষ্টে চাহিয়া রহিল । তাহার দৃষ্টি যেন অন্ধকার  
ভেদ করিয়া বেণীর বুকের ভিতর পর্য্যন্ত দেখিতে লাগিল ।

বেণী ক্ষুব্ধভাবে বলিল, কি ক'রে জানব বোন ? লোকে কত কথা  
বলে—তাতে কান দিলে ত চলে না ।

লোকে কি বলে ?

বেণী পরম তাচ্ছিল্যভাবে কহিল, বললেই বা রমা, লোকের কথাতে  
আর গায়ে ফোঁস্কা পড়ে না ; বলুক না ।

তাহার এই কপট সহানুভূতি রমা টের পাইল । এক মুহূর্ত্ত চুপ  
করিয়া থাকিয়া বলিল, তোমার গায়ে হয়ত কিছুতেই ফোঁস্কা পড়ে না ;  
কিন্তু সকলের গায়ে ত গণ্ডারের চামড়া নেই ; কিন্তু লোককে এ কথা  
বলাচ্ছে কে ? তুমি ?

আমি ?

রমা ভিতরের দুর্নিবার ক্রোধ সংবরণ করিয়া বলিল, তুমি ছাড়া আর কেউ নয়। পৃথিবীতে কোন দুষ্কর্মই ত তোমার বাকি নেই—চুরি-জুয়োচুরি, জাল, ঘরে-আগুন দেওয়া সবই হ'য়ে গেছে এটাই বা বাকি থাকে কেন ?

বেণী হতবুদ্ধি হইয়া হঠাৎ কথা কহিতেই পারিল না।

রমা কহিল, মেয়েমানুষের এর বড় সর্বনাশ যে আর নেই সে বোঝবার তোমার সাধ্য নেই ; কিন্তু জিজ্ঞাসা করি এ কলঙ্ক রটিয়ে তোমার লাভ কি ?

বেণী ভীত হইয়া বলিল, আমার লাভ কি হবে ! লোকে যদি তোমাকে রমেশের বাড়ি থেকে ভোর-বেলা বার হ'তে দেখে—আমি করব কি ?

রমা সে কথায় কর্ণপাত না করিয়া বলিতে লাগিল, এত লোকের সামনে আমি আর কিছু বলতে চাই নে ; কিন্তু তুমি মনে ক'রো না বড়দা, তোমার মনের ভাব আমি টের পাই নি ; কিন্তু এ নিশ্চয় জেনো—আমি মরবার আগে তোমাকেও জ্যান্ত রেখে যাব না।

আচার্য্যগৃহিণী এতক্ষণ নিঃশব্দে নিকটে কোথাও দাঁড়াইয়াছিলেন ; সরিয়া আসিয়া রমার একটা বাহু ধরিয়া ঘোমটার ভিতর হইতে মৃদুস্বরে বলিলেন, পাগল হয়েচ মা, এখানে তোমাকে না জানে কে ? নিজের কঠোর উদ্দেশে বলিলেন, লক্ষ্মি, মেয়েমানুষ হ'য়ে মেয়েমানুষের নামে এ অপবাদ দিস্ নে রে, ধর্ম্ সইবে না। আজ ইনি তোদের যে উপকার করেছেন তোরা মানুষের মেয়ে হ'লে তা টের পেতিস্, বলিয়া টানিয়া রমাকে ঘরে লইয়া গেলেন। আচার্য্যগৃহিণীর স্বামীর উদ্দেশে এই কঠোর শ্লেষ এবং নিরপেক্ষ সত্যবাদিতায় উপস্থিত সকলেই যেন কুণ্ঠিত হইয়া সরিয়া পড়িল।

এই ঘটনার কার্য-কারণ যত বড় এবং যাই হোক, নিজের কদাকার অসংযমে রমেশের শিক্ষিত ভদ্র-অন্তঃকরণ সম্পূর্ণ দুইটা দিন এমনি সঙ্কুচিত হইয়া রহিল যে সে বাটার বাহির হইতেই পারিল না। তথাপি এত লোকের মধ্য হইতে রমা যে স্বেচ্ছায় তাহার লজ্জার অংশ লইতে আসিয়া-ছিল এই চিন্তাটা তাহার সমস্ত লজ্জার কালোমেঘের গায়ে দিগন্তলুপ্ত অতি দ্রব্য বিদ্যাৎ ক্ষুরণের মত ক্ষণে ক্ষণে যেন সৌন্দর্য্য ও মাধুর্য্যের দীপ্তরেখা আঁকিয়া দিতেছিল ! তাই তাহার মানির মধ্যেও পরিতৃপ্তির আনন্দ ছিল ! এই দুঃখ ও সূত্থের বেদনা লইয়া সে যখন আরও কিছুদিন তাহার নির্জন-গৃহের মধ্যে অজ্ঞাতবাসের সঙ্কল্প করিতেছিল তখন তাহাকে উপলক্ষ করিয়া বাহিরে যে আর একজনের মাথার উপর নিরবচ্ছিন্ন লজ্জা ও অপমানের পাহাড় ভাঙিয়া পড়িতেছিল তাহা সে স্বপ্নেও ভাবে নাই !

কিন্তু লুকাইয়া থাকিবার সুযোগ তাহার ঘটিল না। আজ বৈকালে পিরপুরের মুসলমান প্রজারা তাহাদের পঞ্চায়েতের বৈঠকে উপস্থিত হইবার জন্ত তাহাকে ডাকিতে আসিল। এ বৈঠকের আয়োজন রমেশ নিজেই কিছুদিন পূর্বে করিয়া আসিয়াছিল। সেইমত তাহারা আজ একত্র হইয়া ছোটবাবুর জন্তই অপেক্ষা করিয়া বসিয়া আছে বলিয়া যখন সংবাদ দিয়া গেল তখন তাহাকে যাইবার জন্ত উঠিতে হইল। কেন তাহা বলিতেছি।

রমেশ সন্ধান লইয়া জানিয়াছিল প্রত্যেক গ্রামেই কৃষকদিগের মধ্যে দরিদ্রের সংখ্যা অত্যন্ত অধিক ; অনেকেরই এক কোঁটা জমি-যায়গা নাই ; পরের জমিতে খাজনা দিয়া বাস করে এবং পরের জমিতে ‘জন’ খাটিয়া উদরার্নের সংস্থান করে। দুদিন কাজ না পাইলে কিংবা অসুখে-বিসুখে কাজ করিতে না পারিলেই সপরিবারে উপবাস করে। খোঁজ করিয়া আরও অবগত হইয়াছিল যে ইহাদের অনেকেরই একদিন সঙ্গতি ছিল শুধু ঋণের দায়েই সমস্ত গিয়াছে। ঋণের ব্যবস্থাও সোজা নয়। মহাজনেরা জমি বাঁধা রাখিয়া ঋণ দেয় এবং সুদের হার এত অধিক যে, একবার যে



কোন কৃষক সামাজিক ক্রিয়া-কর্মের দায়েই হোক বা অনাবুষ্টি অতিবৃষ্টির জন্মই হোক ঋণ করিতে বাধ্য হয়, সে আর সামলাইয়া উঠিতে পারে না। প্রতি বৎসরেই তাহাকে সেই মহাজনের দ্বারে গিয়া হাত পাতিতে হয়। এ বিষয়ে হিন্দু-মুসলমানের একই অবস্থা। কারণ মহাজনেরা প্রায় হিন্দু। রমেশ শহরে থাকিতে এ সম্বন্ধে বই পড়িয়া যাহা জানিয়াছিল গ্রামে আসিয়া তাহাই চোখে দেখিয়া প্রথমটা একেবারে অভিভূত হইয়া পড়িল। তাহার অনেক টাকা ব্যাঙ্কে পড়িয়াছিল। এই টাকা এবং আরও কিছু টাকা সংগ্রহ করিয়া এই সকল দুর্ভাগাদের মহাজনের কবল হইতে উদ্ধার করিতে সে কোমর বাঁধিয়া লাগিল; কিন্তু দুই-একটা কাজ করিয়াই ধাক্কা খাইয়া দেখিল যে এই সকল দরিদ্রদিগকে সে যতটা অসহায় এবং রূপাপাত্র বলিয়া ভাবিয়াছিল অনেক সময়েই তাহা ঠিক নয়। ইহারা দরিদ্র নিরুপায় অল্পবুদ্ধিজীবী বটে, কিন্তু বজ্জাতি-বুদ্ধিতে ইহারা কম নহে। ধার করিয়া শোধ না দিবার প্রবৃত্তি ইহাদের যথেষ্ট প্রবল। অধিকাংশ ক্ষেত্রেই সরলও নয় সাধুও নয়। মিথ্যা বলিতে ইহারা অধোবদন হয় না এবং ফাঁকি দিতে জানে। প্রতিবেশীর দ্বী-কন্ঠার সম্বন্ধে সৌন্দর্য্যচর্চার সখও মন্দ নাই। পুরুষের বিবাহ হওয়া কঠিন ব্যাপার; অথচ নানা বয়সের বিধবায় প্রতি গৃহস্থ ভারাক্রান্ত। নৈতিক স্বাস্থ্যও অতিশয় দূষিত। সমাজ ইহাদিগের আছে—তাহার শাসনও কম নয়, কিন্তু পুলিশের সহিত চোরের যে সম্বন্ধ সমাজের সহিত ইহারা ঠিক সেই সম্বন্ধ পাতাইয়া রাখিয়াছে। অথচ সর্বসমেত ইহারা এমন পীড়িত, এত দুর্বল, এমন নিঃস্ব যে রাগ করিয়া বসিয়া থাকাও অসম্ভব। বিদ্রোহী বিপথগামী সন্তানের প্রতি পিতার মনোভাব যা হয় রমেশের অন্তরটা ঠিক তেমনি করিতেছিল বলিয়াই আজিকার সন্ধ্যায় সে পিরপুরের নূতন স্কুল-ঘরে পঞ্চায়েৎ আহ্বান করিয়াছিল। কিছুক্ষণ হইল সন্ধ্যার ঝাপ্সা ঘোর কাটিয়া গিয়া দশমীর জ্যোৎস্নায় জানালার বাহিরে মুক্ত প্রান্তরের

এদিক-ওদিক ভরিয়া গিয়াছিল। সেই দিকে চাহিয়া রমেশ যাইবার জন্ত প্রস্তুত হইয়াও যাই যাই করিয়া বিলম্ব করিতেছিল। এমন সময় রমা আসিয়া তাহার দোরগোড়ায় দাঁড়াইল। সে স্থানটায় আলো ছিল না, রমেশ বাটার দাসী মনে করিয়া কহিল, কি চাও ?

আপনি কি বাহিরে যাচ্ছেন ?

রমেশ চমকাইয়া উঠিল—এ কি রমা ? এমন সময়ে যে !

যে হেতু তাহাকে সন্ধ্যার আশ্রয় গ্রহণ করিতে হইয়াছিল তাহা বলা বাহুল্য ; কিন্তু যে জন্ত সে আসিয়াছিল সে অনেক কথা। অথচ কি করিয়া যে আরম্ভ করিবে ভাবিয়া না পাইয়া রমা স্থির হইয়া রহিল। রমেশও কথা কহিতে পারিল না। খানিকক্ষণ চুপ করিয়া থাকিয়া রমা প্রশ্ন করিল, আপনার শরীর এখন কেমন আছে ?

ভাল নয়। আবার রোজ রাত্রেই জ্বর হচ্ছে।

তা হ'লে কিছু দিন বাইরে ঘুরে এলে ত ভাল হয়।

রমেশ হাসিয়া কহিল, ভাল ত হয় জানি কিন্তু যাই কি ক'রে ?

তাহার হাসি দেখিয়া রমা বিরক্ত হইল। কহিল, আপনি বলবেন আপনার অনেক কাজ কিন্তু এমন কি কাজ আছে যা নিজের শরীরের চেয়েও বড় ?

রমেশ পূর্বের মতই হাসিয়া জবাব দিল, নিজের দেহটা যে ছোট জিনিস তা আমি বলি নে ; কিন্তু এমন কাজ মানুষের আছে যা এই দেহটার চেয়ে অনেক বড়—কিন্তু সে ত তুমি বুঝবে না রমা।

রমা মাথা নাড়িয়া কহিল, আমি বুঝতেও চাই নে ; কিন্তু আপনাকে আর কোথাও যেতেই হবে। সরকারমশাইকে ব'লে দিয়ে যান আমি তাঁর কাজকর্ম দেখবো।

রমেশ বিস্মিত হইয়া কহিল, তুমি আমার কাজকর্ম দেখবে ? কিন্তু—  
কিন্তু কি ?

কিন্তু কি জানো রমা, আমি তোমাকে বিশ্বাস করতে পারব কি ?

রমা অসঙ্কোচে তৎক্ষণাৎ কহিল, ইতরে পারে না কিন্তু আপনি পারবেন ।

তাহার দৃঢ় কণ্ঠের এই অভাবনীয় উক্তিতে রমেশ বিশ্বাসে শুরু হইয়া গেল । ক্ষণেক মোন থাকিয়া বলিল, আচ্ছা, ভেবে দেখি ।

রমা মাথা নাড়িয়া কহিল, না, ভাববার সময় নেই, আজই আপনাকে আর কোথাও যেতে হবে ! না গেলে—বলিতে বলিতেই সে স্পষ্ট অনুভব করিল রমেশ বিচলিত হইয়া উঠিয়াছে । কারণ অকস্মাৎ এমন করিয়া না পলাইলে বিপদ যে কি ঘটিতে পারে তাহা অনুমান করা কঠিন নয় । রমেশ ঠিকই অনুমান করিল ; কিন্তু আত্মসংবরণ করিয়া কহিল, ভাল, তাই যদি যাই তাতে তোমার লাভ কি ? আমাকে বিপদে ফেলতে তুমি নিজেও ত কম চেষ্টা কর নি যে আজ আর একটা বিপদে সতর্ক করতে এসেচ ! সে সব কাণ্ড এত পুরানো হয় নি যে তোমার মনে নেই । বরং খুলে বল আমি গেলে তোমার নিজের কি সুবিধে হয়, আমি চ'লে যেতে হয়ত রাজি হতেও পারি, বলিয়া সে যে-উত্তরের প্রত্যাশায় রমার অস্পষ্ট মুখের প্রতি চাহিয়া রহিল, তাহা পাইল না ।

কত বড় অভিমান যে রমার বুক জুড়িয়া উচ্ছ্বসিত হইয়া উঠিল তাহাও জানা গেল না ; রমেশের নির্ভুর বিজ্রপের আঘাতে মুখ যে তাহার কিরূপ বিবর্ণ হইয়া রহিল, তাহাও অন্ধকারে লক্ষ্য হইল না । কিছুক্ষণ স্থির হইয়া রমা আপনাকে সামলাইয়া লইল । পরে কহিল, আচ্ছা, খুলেই বল্চি । আপনি গেলে আমার লাভ কিছুই নেই কিন্তু না গেলে অনেক ক্ষতি । আমাকে সাক্ষী দিতে হবে ।

রমেশ শুরু হইয়া কহিল, এই ? কিন্তু সাক্ষী না দিলে ?

রমা একটুখানি থামিয়া কহিল, না দিলে ? না দিলে দুদিন পরে আমার মহামায়ার পূজোয় কেউ আসবে না, আমার যতীনের উপনয়নে

কেউ থাকে না—আমার বার-ব্রত—একুপ দুর্ঘটনার সম্ভাবনা স্মরণমাত্র রমা শিহরিয়া উঠিল।

রমেশের আর না গুনিলেও চলিত কিছু থাকিতে পারিল না।  
কহিল, তার পরে ?

রমা ব্যাকুল হইয়া বলিল, তারও পরে ? না তুমি যাও—আমি মিনতি করুচি রমেশদা, আমাকে সব দিকে নষ্ট ক'রো না ; তুমি যাও—যাও এ দেশ থেকে।

কিছুক্ষণ পর্যন্ত উভয়েই নীরব হইয়া রহিল। ইতিপূর্বে যেখানে যে কোন অবস্থায় হোক রমাকে দেখিলেই রমেশের বুকের রক্ত অশাস্ত হইয়া উঠিত। মনে মনে শত যুক্তি প্রয়োগ করিয়া, নিজের অন্তরকে সহস্র কটুক্তি করিয়াও তাহাকে শাস্ত করিতে পারিত না। হৃদয়ের এই নীরব বিরুদ্ধতায় সে দুঃখ পাইত, লজ্জা অনুভব করিত, ক্রুদ্ধ হইয়া উঠিত কিন্তু কিছুতেই তাহাকে বশে আনিতে পারিত না। বিশেষ করিয়া আজ এইমাত্র নিজেরই গৃহের মধ্যে সেই রমাকে অকস্মাৎ একাকিনী উপস্থিত হইতে দেখিয়া কল্যাকার কথা স্মরণ করিয়াই তাহার হৃদয়-চাক্ষু্য একেবারে উদ্দাম হইয়া উঠিয়াছিল। রমার শেষ কথায় এতদিন পরে আজ সেই হৃদয় স্থির হইল। রমার ভয়-ব্যাকুল নির্বন্ধতায় অথও স্বার্থপরতার চেহারা এতই স্পষ্ট হইয়া উঠিল যে তাহার অন্ধ হৃদয়ের ও আজ চোখ খুলিয়া গেল।

রমেশ গভীর একটা নিশ্বাস ফেলিয়া কহিল, আচ্ছা তাই হবে ; কিন্তু আজ আর সময় নেই। কারণ আমার পালাবার হেতুটা যত বড়ই তোমার কাছে হোক আজ রাত্রিটা আমার কাছে তার চেয়েও গুরুতর। তোমার দাসীকে ডাকো, আমাকে এখনি বার হতে হবে।

রমা আশ্বে আশ্বে বলিল, আজ কি কোনমতেই যাওয়া হ'তে পারে না ?

না। তোমার দাসী গেল কোথায় ?

কেউ আমার সঙ্গে আসে নি।

রমেশ আশ্চর্য্য হইয়া বলিল, সে কি কথা ! এখানে একা এলে কোন্ সাহসে ? একজন দাসী পর্য্যন্ত সঙ্গে আনো নি !

রমা তেমনি মৃদুস্বরে কহিল, তাতেই বা কি হত ? সেও ত আমাকে তোমার হাত থেকে রক্ষা করতে পারত না।

তা না পারুক, লোকের মিথ্যা দুর্নাম থেকে ত বাঁচাতে পারত। রাত্রি কম হয় নি রাণি !

সেই বহুদিনের বিস্মৃত নাম ! রমা সহসা বলিতে গেল, দুর্নামের বাকি নেই রমেশদা, কিন্তু আপনাকে সংবরণ করিয়া শুধু কহিল, তাতেও ফল হ'ত না রমেশদা। অন্ধকার রাত্রি নয়—আমি বেশ যেতে পার্ব, বলিয়া আর কোন কথার জন্ত অপেক্ষা না করিয়া ধীরে ধীরে বাহির হইয়া গেল।

## ১৬

প্রতি বৎসর রমা ঘটা করিয়া দুর্গোৎসব করিত এবং প্রথম পূজার দিনেই গ্রামের সমস্ত চাষাভূষা প্রভৃতিকে পরিতোষপূর্ব্বক ভোজন করাইত। ব্রাহ্মণ-বাটাতে মায়ের প্রসাদ পাইবার জন্ত এমন হুড়াহুড়ি পড়িয়া যাইত যে রাত্রি একপ্রহর পর্য্যন্ত ভাঁড়ে-পাতায় এঁটোতে-কাঁটাতে বাড়িতে পা ফেলিবার যায়গা থাকিত না। শুধু হিন্দু নয়, পিরপুরের প্রজারাও ভিড় করিতে ছাড়িত না। এবারেও সে নিজে অসুস্থ থাকা সত্ত্বেও আয়োজনের ক্রটি করে নাই। চণ্ডীমণ্ডপে প্রতিমা ও পূজার সাজ-সরঞ্জাম। নীচে উৎসবের প্রশস্ত প্রাঙ্গণ। সপ্তমীপূজা যথাসময়ে সমাধা হইয়া গিয়াছে। ক্রমে মধ্যাহ্ন অপরাহ্নে গড়াইয়া তাহাও শেষ হইতে

বসিয়াছে। আকাশে সপ্তমীর থণ্ড-চন্দ্র পরিস্ফুট হইয়া উঠিতে লাগিল; কিন্তু মুখুয্যে-বাড়ির মস্ত উঠান জন-কয়েক ভদ্রলোক ব্যতীত একেবারে শূন্য খাঁ খাঁ করিতেছে। বাড়ির ভিতরে অগ্নের স্তূপ ক্রমে জমাট বাধিয়া কঠিন হইতে লাগিল, ব্যঞ্জনের রাশি শুকাইয়া বিবর্ণ হইয়া উঠিতে লাগিল, কিন্তু এখন পর্য্যন্ত একজন চাষাও মায়ের প্রসাদ পাইতে বাড়িতে পা দিল না।

ইস্! এত আহাৰ্য্য-পেয় নষ্ট ক'রে দিচ্ছে দেশের ছোটলোকদের দল? এত বড় স্পর্ধা! বেণী ছঁকা হাতে একবার ভিতরে একবার বাহিরে হাঁকাহাঁকি দাপাদাপি করিয়া বেড়াইতে লাগিল—বেটাদের শেখাবো—চাল কেটে তুলে দেবো—এমন করবো তেমন করবো ইত্যাদি। গোবিন্দ, ধর্মদাস, হালদার প্রভৃতি এঁরা রুষ্ঠমুখে অবিশ্রান্ত ঘুরিয়া ঘুরিয়া আন্দাজ করিতে লাগিলেন, কোন্ শালার কারসাজিতে এই কাণ্ডটা ঘটয়াছে! হিন্দু-মুসলমানে একমত হইয়াছে, এও ত বড় আশ্চর্য্য! এদিকে অন্তরে মাসি ত একেবারে দুর্ব্বার হইয়া উঠিয়াছেন। সেও এক মহামারি ব্যাপার! এই তুমুল হাঙ্গামার মধ্যে শুধু একজন নীরব হইয়া আছে—সে নিজে রমা। একটি কথাও সে কাহারও বিরুদ্ধে কহে নাই, কাহাকেও দোষ দেয় নাই, একটা আক্ষেপ বা অভিযোগের কণামাত্রও এখন পর্য্যন্ত তাহার মুখ দিয়া বাহির হয় নাই। এ কি সেই রমা? সে যে অতিশয় পীড়িত তাহাতে লেশমাত্র সন্দেহ নাই; কিন্তু সে নিজে স্বীকার করে না—হাসিয়া উড়াইয়া দেয়। রোগে রূপ নষ্ট করে—সে যাক; কিন্তু সে অভিমান নাই, সে রাগ নাই, সে জিদ নাই। স্নান চোখ দুটি যেন ব্যথায় ও করুণায় ভরা। একটু লক্ষ্য করিলে মনে হয় যেন ঐ দুটি সজল আবরণের নিচে রোদনের সমুদ্র চাপা দেওয়া আছে—মুক্তি পাইলে বিশ্ব-সংসার ভাসাইয়া দিতে পারে। চণ্ডীমণ্ডপের ভিতরের দ্বার দিয়া রমা প্রতিমার পার্শ্বে আসিয়া দাঁড়াইল। তাহাকে

দেখিবামাত্র শুভানুধ্যায়ীর দল একেবারে তার-স্বরে ছোটলোকের চৌদ্দপুরুষের নাম ধরিয়া গালিগালাজ করিতে লাগিল। রমা শুনিয়া নিঃশব্দে একটুখানি হাসিল। বোটা হইতে টানিয়া ছিঁড়িলে মানুষের হাতের মধ্যে ফুল যেমন করিয়া হাসে—ঠিক্ তেমনি। তাহাতে রাগ-দ্বेष আশা-নিরাশা ভাল-মন্দ কিছুই প্রকাশ পাইল না। সে হাসি সার্থক কি নিরর্থক তাহাই বা কে জানে।

বেণী রাগিয়া কহিল, না না, এ হাসির কথা নয়, এ বড় সর্ব্বনেশে কথা! একবার যখন জানবো এর মূলে কে—বলিয়া দুই হাতের নথ এক করিয়া কহিল, তখন এই এম্নি করে ছিঁড়ে ফেলবো!

রমা মনে মনে শিহরিয়া উঠিল। বেণী কহিতে লাগিল, হারামজাদা ব্যাটারা এ বুঝিস্ নে, যে যার জোরে তোরা জোর করিস্ সেই রমেশ নিজে যে জেলের ঘানি টান্চে। তোদের মান্তে কতটুকু সময় লাগে?

রমা কোন কথা কহিল না। যে কাজের জন্ত আসিয়াছিল তাহা শেষ করিয়া নিঃশব্দে চলিয়া গেল।

দেড়মাস হইল রমেশ অবৈধ প্রবেশ করিয়া, ভৈরবকে ছুরি মারার অপরাধে জেল খাটিতেছে! মোকদ্দমায় বাদীর পক্ষে বিশেষ পরিশ্রম করিতে হয় নাই—নূতন ম্যাজিষ্ট্রেটসাহেব কি করিয়া পূর্ব্বাহ্নেই জ্ঞাত হইয়াছিলেন এ প্রকার অপরাধ আসামীর পক্ষে খুবই সম্ভব এবং স্বাভাবিক। এমন কি, সে ডাকাতি প্রভৃতির সহিত সংশ্লিষ্ট কি না সে বিষয়েও তাঁহার যথেষ্ট সংশয় আছে। থানার কেতাব হইতেও তিনি বিশেষ সাহায্য পাইয়াছেন। তাহাতে লেখা আছে ঠিক এই ধরণের অপরাধ সে পূর্ব্বেও করিয়াছে এবং আরও অনেক প্রকার সন্দেহজনক ব্যাপার তাহার নামের সহিত জড়িত আছে। ভবিষ্যতে পুলিশ যেন তাহার প্রতি বিশেষ দৃষ্টি রাখে তিনি এ মন্তব্য প্রকাশ করিতেও ছাড়েন

নাই। বেশি সাক্ষ্য-প্রমাণের প্রয়োজন হয় নাই তবে রমাকে সাক্ষ্য দিতে হইয়াছিল। সে কহিয়াছিল, রমেশ বাড়ি ঢুকিয়া আচার্য্য মহাশয়কে মারিতে আসিয়াছিল তাহা সে জানে; কিন্তু ছুরি মারিয়াছিল কি না জানে না, হাতে তাহার ছুরি ছিল কি না তাহাও তাহার স্মরণ হয় না।

কিন্তু এই কি সত্য? জেলার বিচারালয়ে হলফ করিয়া রমা এই সত্য বলিয়া আসিল; কিন্তু যে বিচারালয়ে হলফ করার প্রথা নাই সেখানে সে কি জবাব দিবে! তাহার অপেক্ষা কে অধিক নিঃসংশয়ে জানিত রমেশ ছুরিও মারে নাই, হাতে তাহার অস্ত্র থাকা ত দূরের কথা একটা তৃণ পর্য্যন্ত ছিল না। সে আদালতে ও-কথা ত কেহ তাহাকে জিজ্ঞাসা পর্য্যন্ত করিবে না—সে কি স্মরণ করিতে পারে এবং কি পারে না; কিন্তু এখানকার আদালতে সত্য বলিবার যে তাহার এতটুকু পথ ছিল না! বেণী প্রভৃতির হাত-ধরা পল্লী-সমাজ সত্য চাহে নাই। সুতরাং সত্যের মূল্যে তাহাকে যে মিথ্যার অপবাদে গাঢ় কালি নিজের মুখময় মাখিয়া এই সমাজের বাহিরে আসিয়া দাঁড়াইতে হইবে—এমন ত অনেককেই হইয়াছে—এ কথা সে যে নিঃসংশয়ে জানিত। তা ছাড়া এতবড় গুরুদণ্ডের কথা রমা স্বপ্নেও কল্পনা করে নাই। বড় জোর দুশ-একশ জরিমানা হইবে ইহাই জানিত। বরঞ্চ বার বার সতর্ক করা সত্ত্বেও রমেশ যখন তাহার কাজ ছাড়িয়া কোনমতেই পলাইতে স্বীকার করে নাই তখন রাগ করিয়া রমা মনে মনে এ কামনাও করিয়াছিল, হোক জরিমানা। একবার শিক্ষা হইয়া যাক; কিন্তু সে শিক্ষা যে এমন করিয়া হইবে, রমেশের রোগক্লিষ্ট পাখুর মুখের প্রতি চাহিয়াও বিচারকের দয়া হইবে না—একেবারে ছয়মাস সশ্রম কারাবাসের হুকুম করিয়া দিবে—তাহা সে ভাবে নাই। সেই সময়ে রমা নিজে রমেশের দিকে চাহিয়া দেখিতে পারে নাই। পরের মুখে শুনিয়াছিল রমেশ একদণ্ডে তাহারই মুখের পানে চাহিয়াছিল



এবং কিছুতেই তাহাকে জেরা করিতে দেয় নাই এবং জেলের হুকুম হইয়া গেলে গোপাল সরকারের প্রার্থনার উত্তরে মাথা নাড়িয়া কহিয়াছিল, না ! ম্যাজিষ্ট্রেট আমাকে সারাজীবন কারারুদ্ধ করিবার হুকুম দিলেও আমি আপিল ক'রে খালাস পেতে চাই নে। বোধ করি জেল এর চেয়ে ভাল।

ভালই ত। তাহাদের চিরাহুগত ভৈরব আচার্য্য মিথ্যা নালিশ করিয়া যখন তাহার ঋণ শোধ করিল এবং রমা সাক্ষ্য-মঞ্চে দাঁড়াইয়া স্মরণ করিতে পারিল না তাহার হাতে ছুরি ছিল কি না, তখন আপিল করিয়া মুক্তি চাহিবে সে কিসের জ্ঞা ! তাহার সে দুর্জয় অভিমান বিরাট পাষণথণ্ডের মত রমার বুকের উপর চাপিয়া বসিয়া আছে—কোথাও তাহাকে সে নড়াইয়া রাখিবার স্থান পাইতেছে না ! সে কি গুরুভার ! সে মিথ্যা বলিয়া আসে নাই, এ কৈফিয়ৎ তাহার অন্তর্ধানী ত কোনমতেই মঞ্জুর করিল না। মিথ্যা বলে নাই বটে, কিন্তু সত্য প্রকাশ করে নাই। সত্য গোপনের অপরাধ যে এত বড়, সে যে এমন করিয়া তাহাকে অহরহ দণ্ড করিয়া ফেলিবে এ যদি সে একবারও জানিতে পারিত। রহিয়া রহিয়া তাহার কেবলই মনে পড়ে ভৈরবের যে অপরাধে রমেশ আত্মহারা হইয়াছিল, সে অপরাধ কত বড় ! অথচ তাহার একটিমাত্র কথায় সে সমস্ত মার্জনা করিয়া, দ্বিগুণিত না করিয়া চলিয়া গিয়াছিল। তাহার ইচ্ছাকে এমন করিয়া শিরোধার্য্য করিয়া কে কবে তাহাকে এত সম্মানিত করিয়াছিল। নিজের ঘরের মধ্যে পড়িয়া পড়িয়া আজকাল একটা সত্যের সে যেন দেখা পাইতেছিল ! যে সমাজের ভয়ে সে এত বড় গর্হিত কন্ড করিয়া বসিল সে সমাজ কোথায় ? বেণী প্রভৃতি কয়েকজন সমাজপতির স্বার্থ ও ক্রুর হিংসার বাহিরে কোথাও কি তাহার অস্তিত্ব আছে ? গোবিন্দর এক বিধবা ভ্রাতৃবধূর কথা কে না জানে ? বেণীর সহিত তাহার সংস্রবের কথা গ্রামের মধ্যে কাহারও অবিদিত নাই। অথচ সমাজের আশ্রয়ে সে নিষ্কণ্টকে বসিয়া আছে এবং সেই বেণীই সমাজপতি।

তাহারই সামাজিক শৃঙ্খল সর্বোচ্চে শতপাকে জড়াইয়া রাখাই চরম সার্থকতা। ইহাই হিঁদুয়ানী ; কিন্তু যে ভৈরব এত অনর্থের মূল, রমা নিজের দিকে চাহিয়া তাহার উপরেও আর রাগ করিতে পারিল না। মেয়ে তাহার বারো বছরের হইয়াছে—অতি শীঘ্র বিবাহ দিতে না পারিলে একঘরে হইতে হইবে এবং বাড়িগুদ্ধ লোকের জাতি যাইবে! এ প্রমাদের আশঙ্কামাত্রেই ত প্রত্যেক হিন্দুর হাত-পা পেটের ভিতরে ঢুকিয়া যায়! সে নিজে তাহার এত স্নবিধা থাকা সত্ত্বেও যে সমাজের ভয় কাটাইতে পারে নাই—গরীব ভৈরব কাটাইবে কি করিয়া! বেগীর বিরুদ্ধতা করা তাহার পক্ষে কি ভয়ানক মারাত্মক ব্যাপার এ কথা ত কোনমতেই সে অস্বীকার করিতে পারে না।

বুদ্ধ সনাতন হাজরা বাটীর সম্মুখ দিয়া যাইতেছিল, গোবিন্দ দেখিতে পাইয়া ডাকাডাকি, অগ্নয়-বিনয় শেষকালে একরকম জোর করিয়া ধরিয়া আনিয়া বেণীবাবুর সাম্নে হাজির করিয়া দিল। বেণী গরম হইয়া কহিল, এত দেমাক কবে থেকে হ'ল রে সনাতন? বলি, তোদের ঘাড়ে কি আজকাল আর একটা করে মাথা গজিয়েচে রে?

সনাতন কহিল, দুটো করে মাথা আর কার থাকে বড়বাবু? আপনাদের থাকে না ত আমাদের মত গরীবের!

কি বল্লি রে! বলিয়া হাঁক দিয়া বেণী ক্রোধে নির্ঝাক্ হইয়া গেল; ইহারই সর্বস্ব যেদিন বেণীর হাতে বাঁধা ছিল তখন এই সনাতন দুবেলা আসিয়া বড়বাবুর পদলেহন করিয়া যাইত—আজ তাহারই মুখে এই কথা!

গোবিন্দ রসান দিয়া কহিল, তোদের বুকের পাটা শুধু দেখু'চি আমরা! মায়ের প্রসাদ পেতেও কেউ তোরা এলি নি, বলি, কেন বল ত রে?

বুড়ো একটুখানি হাসিয়া কহিল, আর বুকের পাটা! যা কন্সবার সে ত আপনারা আমার করেচেন। সে যাক্ কিন্তু মায়ের প্রসাদই বলুন আর যাই বলুন কোন কৈবর্তই আর বামুন-বাড়িতে পাত পাত্বে

না। এত পাপ যে মা বসুমতী কেমন ক'রে সহ্যেচেন তাই আমরা কেবল বলাবলি করি, বলিয়া একটা নিশ্বাস ফেলিয়া সনাতন রমার প্রতি চাহিয়া কহিল, একটু সাবধানে থেকো দিদিঠাক্করণ, পিরপুরের মোচলমান ছোঁড়ারা একেবারে ক্ষেপে রয়েছে। ছোটবাবু ফিরে এলে যে কি কাণ্ড হবে তা ঐ মা দুর্গাই জানেন। এর মধ্যেই দু-তিন বার তারা বড়বাবুর বাড়ির চারপাশে ঘুরে ফিরে গেছে—সামনে পায় নি, তাই রক্ষে, বলিয়া সে বেগীর দিকে চাহিল। চক্ষের নিমিষে বেগীর ত্রুন্ধ মুখ ভয়ে বিবর্ণ হইয়া গেল।

সনাতন কহিতে লাগিল, ঠাকুরের স্তম্ভে মিথ্যে বল্চি নে বড়বাবু, একটু সামলে-সুমলে থাকবেন। রাত-বিরেতে বার হবেন না—কোথায় ওত পেতে ব'সে থাকবে বলা যায় না ত!

বেগী কি একটা বলিতে গেল, কিন্তু মুখ দিয়া কথা বাহির হইল না। তাহার মত ভীত লোক বোধ করি সংসারে ছিল না।

এতক্ষণে রমা কথা কহিল। স্নেহাঙ্গ কৰুণকণ্ঠে প্রশ্ন করিল, সনাতন, ছোটবাবুর জন্তেই বুঝি তোমাদের সব এত রাগ?

সনাতন প্রতিমার দিকে একবার দৃষ্টিপাত করিয়া কহিল, মিথ্যে ব'লে আর নরকে যাব কেন দিদিঠাক্করণ, তাই বটে! মোচলমানদের রাগটাই সব চেয়ে বেশি। তারা ছোটবাবুকে হিঁহুদের পয়গছর মনে করে। তার সাক্ষী দেখুন আপনারা—জাফর আলি, আঙুল দিয়ে যার জল গলে না, সে ছোটবাবুর জেলের দিন তাদের ইস্কুলের জন্তে একটি হাজার টাকা দান করেছে! শুনি, মসজিদে তাঁর নাম ক'রে নাকি নেমাজ পড়া পর্য্যন্ত হয়।

রমার শুষ্ক স্নান মুখখানি অব্যক্ত আনন্দে উদ্ভাসিত হইয়া উঠিল। সে চুপ করিয়া প্রদীপ্ত নির্মিমেঘ চোখে সনাতনের মুখের পানে চাহিয়া রহিল। বেগী অকস্মাৎ সনাতনের হাত চাপিয়া ধরিয়া কহিল, তোকে একবার দারোগার কাছে গিয়ে বলতে হবে সনাতন! তুই যা চাইবি তাই

তোকে দেবো, ছবিবে জমি ছাড়িয়ে নিতে চাস্ ত তাই পাবি, ঠাকুরের সামনে দাঁড়িয়ে দিকি কস্চি সনাতন, বামুনের কথাটা রাখ্ ।

সনাতন বিস্মিতের মত কিছুক্ষণ বেগীর মুখপানে চাহিয়া থাকিয়া কহিল, আর কটা দিনই বা বাঁচ'ব বড়বাবু ! লোভে পড়ে যদি এ কাজ করি মরলে আমাকে তোলা চুলোয় যাক্ পা দিয়ে কেউ ছোবে না । সে দিন-কাল আর নেই বড়বাবু, সে দিন-কাল আর নেই ! ছোটবাবু সব উল্টে দিয়ে গেছে ।

গোবিন্দ কহিল, বামুনের কথা তাহলে রাখবি নে বল্ ?

সনাতন মাথা নাড়িয়া বলিল, না । বললে তুমি রাগ করবে গাঙুলী-মশাই, কিন্তু সেদিন পিরপুরের নতুন ইস্কুল-ঘরে ছোটবাবু বলেছিলেন, গলায় গাছ-কতক স্মৃতো ঝোলানো থাকলেই বামুন হয় না । আমি ত আর আজকের নয় ঠাকুর, সব জানি । যা করে তুমি বেড়াও সে কি বামুনের কাজ ? তোমাকেই জিজ্ঞাসা কস্চি দিদিঠাকুরণ, তুমিই বল দেখি ?

রমা নিরুত্তরে মাথা হেঁট করিল । সনাতন উৎসাহিত হইয়া মনের আক্রোশ মিটাইয়া বলিতে লাগিল, বিশেষ ক'রে ছোড়াদের দল । ছোটবাবুর জেল হওয়া থেকে এই দুটো গাঁয়ের যত ছোকরা সন্ধ্যার পর সবাই গিয়ে জোটে জাফর আলির বাড়িতে । তারা ত চারিদিকে স্পষ্ট বলে বেড়াচ্ছে জমিদার ত ছোটবাবু ! আর সব চোর-ডাকাত । তা ছাড়া খাজনা দিয়ে বাস কর'ব—ভয় কারুকে কর'ব না ! আর বামুনের মত থাকে ত বামুন, না থাকে আমরাও যা তারাও তাই ।

বেগী আতঙ্কে পরিপূর্ণ হইয়া শুষ্কমুখে প্রশ্ন করিল, সনাতন, আমার ওপর তাদের এত রাগ কেন বলতে পারিস্ ?

সনাতন কহিল, রাগ ক'রো না বড়বাবু, কিন্তু আপনি যে সকল নষ্টের গোড়া তাদের জানুতে বাকি নেই ।

বেণী চুপ করিয়া বসিয়া রহিল। ছোটলোক সনাতনের মুখে এমন কথাটা শুনিয়াও সে রাগ করিল না, কারণ রাগ করিবার মত মনের অবস্থা তাহার ছিল না—তাহার বুকের ভিতর টিপ্ টিপ্ করিতেছিল।

গোবিন্দ কহিল, তাহ'লে জাফরের বাড়িতেই আড্ডা বল্? সেখানে তারা কি করে বলতে পারিস্?

সনাতন তাহার মুখপানে চাহিয়া কি যেন চিন্তা করিল। শেষে কহিল, কি করে জানি নে, কিন্তু ভাল চাও ত সে সব মতলব ক'রো না ঠাকুর। তারা হিন্দু-মুসলমান ভাই সম্পর্ক পাতিয়েছে—এক মন এক প্রাণ। ছোটবাবুর জেল হওয়া থেকে সব রাগে বারুদ হয়ে আছে, তার মধ্যে গিয়ে চকমকি ঠুকে আশুন জ্বালতে যেও না ঠাকুর!

সনাতন চলিয়া গেল, বহুক্ষণ পর্য্যন্ত কাহারও কথা কহিবার প্রবৃত্তি রহিল না। রমা উঠিয়া যাইবার উপক্রম করিতে বেণী বলিয়া উঠিল, ব্যাপার শুন্লে রমা?

রমা মুচকিয়া হাসিল, কথা কহিল না। হাসি দেখিয়া বেণীর গা জলিয়া গেল, কহিল, শালা ভৈরবের জন্তই এতকাণ্ড। আর তুমি যদি না যাবে সেখানে, না তাকে ছাড়িয়ে দেবে, এ সব কিছু হ'ত না। তুমি ত হাস্বেই রমা, মেয়েমানুষ বাড়ির বার হ'তে ত হয় না, কিন্তু আমাদের উপায় কি হবে বল ত? সত্যিই যদি একদিন আমার মাথাটা ফাটিয়ে দেয়? মেয়েমানুষের সঙ্গে কাজ করতে গেলেই এই দশা হয়, বলিয়া বেণী ভয়ে, ক্রোধে, জ্বালায় মুখখানা কি এক রকম করিয়া বসিয়া রহিল।

রমা স্তম্ভিত হইয়া রহিল। বেণীকে সে ভালমতেই চিনিত, কিন্তু এত বড় নির্লজ্জ অভিযোগ সে তাহার কাছেও প্রত্যাশা করিতে পারিত না। কোন উত্তর না দিয়া কিছুক্ষণ দাঁড়াইয়া থাকিয়া সে অন্তত চলিয়া গেল। বেণী তখন হাঁক-ডাক করিয়া গোটা-দুই আলো এবং পাঁচ-ছয়

জন লোক সঙ্গে করিয়া আশে-পাশে সতর্ক দৃষ্টি রাখিয়া ব্রহ্ম ভীত পদে প্রস্থান করিল।

১৭

বিশ্বেশ্বরী ঘরে ঢুকিয়া অশ্রুভরা রোদনের কণ্ঠে প্রশ্ন করিলেন, আজ কেমন আছিস মা রমা ?

রমা তাঁহার মুখের পানে চাহিয়া একটুখানি হাসিয়া বলিল, আজ ভাল আছি জ্যাঠাইমা।

বিশ্বেশ্বরী তাহার শিয়রে আসিয়া বসিলেন এবং নিঃশব্দে মাথায় মুখে হাত বুলাইতে লাগিলেন। আজ তিনমাসকাল রমা শয্যাগত। বুক জুড়িয়া কাসি এবং ম্যালেরিয়ার বিষে সর্বাত্মক সমাচ্ছন্ন। গ্রামের প্রাচীন কবিরাজ প্রাণপণে ইহার বৃথা চিকিৎসা করিয়া মরিতেছে। সে বুড়া ত জানে না কিসের অবিশ্রাম আক্রমণে তাহার সমস্ত স্নায়ু-শিরা অহর্নিশ পুড়িয়া থাক হইয়া যাইতেছে। শুধু বিশ্বেশ্বরীর মনের মধ্যে একটা সংশয়ের ছায়া ধীরে ধীরে গাঢ় হইয়া উঠিতেছিল। রমাকে তিনি কতবার মতই স্নেহ করিতেন, সেখানে কোন ফাঁকি ছিল না; তাই সেই অত্যন্ত স্নেহই রমার সম্বন্ধে তাঁহার সত্য দৃষ্টিকে অসামান্যরূপে তীক্ষ্ণ করিয়া দিতেছিল। অপরে যখন ভুল বুঝিয়া, ভুল আশা করিয়া, ভুল ব্যবস্থা করিতে লাগিল, তাঁহার তখন বুক ফাটিয়া যাইতে লাগিল। তিনি দেখিতেছিলেন রমার চোখ দুটি গভীর কোটরপ্রবিষ্ট, কিন্তু দৃষ্টি অতিশয় তীব্র। যেন বহু দূরের কিছু একটা অত্যন্ত কাছে করিয়া দেখিবার একাগ্র বাসনায় এরূপ অসাধারণ তীক্ষ্ণ হইয়া উঠিয়াছে। তিনি ধীরে ধীরে ডাকিলেন, রমা !

কেন জ্যাঠাইমা ?

আমি ত তোমার মায়ের মত রমা—

রমা বাধা দিয়া বলিল, মত কেন জ্যাঠাইমা, তুমি ত আমার মা !

বিশ্বেশ্বরী হেঁট হইয়া রমার ললাট চুখন করিয়া বলিলেন, তবে সত্যি ক'রে বল দেখি মা, তোমার কি হ'য়েছে ?

অসুখ করেছে জ্যাঠাইমা !

বিশ্বেশ্বরী লক্ষ্য করিলেন, তাহার এমন পাণ্ডুর মুখখানি যেন পলকের জন্ত রাঙা হইয়া উঠিল।

তখন গভীর স্নেহে তাহার রুক্ষ চুলগুলি একবার নাড়িয়া দিয়া কহিলেন, সে ত এই দুটো চামড়ার চোখেই দেখতে পাই মা ! যা এতে ধরা যায় না, তেমন যদি কিছু থাকে এ সময়ে মায়ের কাছে লুকোস্ নে রমা ! লুকোলে ত অসুখ সারবে না মা ?

জানালায় বাহিরে প্রভাত-রৌদ্র তখনও প্রথর হইয়া উঠে নাই এবং মৃদু-মন্দ বাতাসে শীতের আভাস দিতেছিল। সেই দিকে চাহিয়া রমা চুপ করিয়া রহিল। খানিক পরে কহিল, বড়দা কেমন আছেন জ্যাঠাইমা ?

বিশ্বেশ্বরী বলিলেন, ভাল আছে ! মাথার ঘা সারতে এখনও বিলম্ব হবে বটে, কিন্তু পাঁচ-ছয় দিনের মধ্যে হাসপাতাল থেকে বাড়ি আস্তে পারবে।

রমার মুখে বেদনার চিহ্ন অনুভব করিয়া বলিলেন, দুঃখ ক'রো না মা, এই তার প্রয়োজন ছিল। এতে তার ভালই হবে, বলিয়া তিনি রমার মুখে বিশ্বাসের আভাস অনুভব করিয়া কহিলেন, ভাবচ, মা হ'য়ে সন্তানের এত বড় দুর্ঘটনায় এমন কথা কি করে বল্চি ? কিন্তু তোমাকে সত্যি বল্চি মা, এতে আমি ব্যথা বেশি পেয়েচি, কি আনন্দ বেশি পেয়েচি তা বলতে পারি নে ! কেন না, আমি জানি যারা অধর্মকে ভয় করে না, লজ্জার ভয় যাদের নেই, প্রাণের ভয়টা যদি না তাদের তেমনি বেশি থাকে, তা হ'লে সংসার ছারখার হ'য়ে যায়। তাই কেবলই মনে

হয় রমা, এই কলুর-ছেলে বেগীর যে মঙ্গল ক'রে দিয়ে গেল, পৃথিবীতে কোন আত্মীয়-বন্ধুই ওর সে ভাল করতে পায়ত না। কয়লাকে ধুয়ে তার রঙ বদলান যায় না, তাকে আগুনে পোড়াতে হয়।

রমা জিজ্ঞাসা করিল, বাড়িতে তখন কি কেউ ছিল না।

বিশ্বেশ্বরী কহিলেন, থাকবে না কেন, সবাই ছিল; কিন্তু সে ত খামকা মেরে বসে নি, নিজে জেলে যাবে ব'লে ঠিক করে তবে তেল বেচতে এসেছিল। তার নিজের রাগ একটুও ছিল না মা, তাই তার বাকের এক ঘায়েই বেগী যখন অজ্ঞান হ'য়ে পড়ে গেল তখন চূপ ক'রে দাঁড়িয়ে রইল—আর আঘাত করলে না। তা ছাড়া সে বলে গেছে এর পরেও বেগী সাবধান না হ'লে সে নিজে আর কখনো ফিরুক, না ফিরুক এই মারই তার শেষ মার নয়।

রমা আন্তে আন্তে বলিল, তার মানে আরও লোক পিছনে আছে, কিন্তু আমাদের দেশে ছোটলোকদের এত সাহস ত কোনদিন ছিল না জ্যাঠাইমা, কোথা থেকে এ তারা পেলেন?

বিশ্বেশ্বরী মুহূ হাসিয়া কহিলেন, সে কি তুই নিজে জানিস্ নে মা, কে দেশের এই ছোটলোকদের বুক এমন ক'রে ভ'রে দিয়ে গেছে? আগুন জলে উঠে শুধু শুধু নেবে না রমা। তাকে জোর ক'রে নেবালেও সে আশে-পাশের জিনিস তাতিয়ে দিয়ে যায়। সে আমার ফিরে এসে দীর্ঘজীবী হ'য়ে যেখানে খুসি সেখানে থাক, বেগীর কথা মনে ক'রে আমি কোনদিন দীর্ঘশ্বাস ফেলব না; কিন্তু বলা সত্ত্বেও বিশ্বেশ্বরী যে জোর করিয়াই একটা নিশ্বাস চাপিয়া ফেলিলেন তাহা রমা টের পাইল। তাই তাঁহার হাতখানি বুকের উপর টানিয়া লইয়া স্থির হইয়া রহিল। একটুখানি সামলাইয়া লইয়া বিশ্বেশ্বরী পুনশ্চ কহিলেন, রমা, এক সম্ভান যে কি সে শুধু মায়েই জানে। বেগীকে যখন তারা অচৈতন্য অবস্থায় ধরাধরি ক'রে গাড়ীতে তুলে হাসপাতালে নিয়ে গেল তখন যে আমার কি হ'য়েছিল সে



তোমাকে আমি বোঝাতে পারব না ; কিন্তু তবুও আমি কারকে একটা অভিসম্পাত বা কোন লোককে আমি দোষ দিতে পর্য্যন্ত পারি নি । এ কথা ত ভুলতে পারি নি মা, যে কোন সন্তান ব'লে ধর্ম্মের শাসন ত মায়ের মুখ চেয়ে চুপ ক'রে থাকবে না ।

রমা একটুখানি ভাবিয়া কহিল, তোমার সঙ্গে তর্ক করচি নে জ্যাঠাইমা, কিন্তু এই যদি হয়, তবে রমেশদা কোন্ পাপে এ দুঃখভোগ করুচেন ? আমরা যা ক'রে তাঁকে জেলে পুরে দিয়ে এসেছি সে ত কারো কাছেই চাপা নেই ।

জ্যাঠাইমা বলিলেন, না মা তা নেই । নেই বলেই বেগী আজ হাসপাতালে । আর তোমার—, বলিয়া তিনি সহসা থামিয়া গেলেন । যে কথা তাঁহার জিহ্বাগ্রে আসিয়া পড়িল তাহা জোর করিয়া ভিতরে ঠেলিয়া দিয়া কহিলেন, কি জানিস মা, কোন কাজই কোন দিন শুধু শুধু শূণ্যে মিলিয়ে যায় না । তার শক্তি কোথাও না কোথাও গিয়ে কাজ করেই ; কিন্তু কি ক'রে করে তা সকল সময়ে ধরা পড়ে না ব'লেই আজ পর্য্যন্ত এ সমস্তার মীমাংসাটা হ'তে পারুলে না, কেন একজনের পাপে আর একজন প্রায়শ্চিত্ত করে ; কিন্তু কর্ত্তে যে হয় রমা, তাতে ত লেশমাত্র সন্দেহ নাই !

রমা নিজের ব্যবহার স্মরণ করিয়া নীরবে নিশ্বাস ফেলিল । বিশ্বেশ্বরী বলিতে লাগিলেন, এর থেকে আমারও চোখ ফুটেছে রমা, ভাল করুব বললেই ভাল করা যায় না । গোড়ার অনেকগুলো ছোট-বড় সিঁড়ি উত্তীর্ণ হবার ধৈর্য্য থাকা চাই । একদিন রমেশ হতাশ হয়ে আমাকে বলতে এসেছিল, জ্যাঠাইমা, আমার কাজ নেই এদের ভাল করে, আমি যেখান থেকে চলে এসেছি সেইখানেই চলে যাই । তখন আমি বাধা দিয়ে বলেছিলাম, না রমেশ, কাজ যদি সুরু করেছিস বাবা, তবে ছেড়ে দিয়ে পালাস নে । আমার কথা সে ত কখনও ঠেলতে পারে না ; তাই

যে দিন তার জেলের হুকুম শুন্তে পেলাম সে দিন মনে হ'ল ঠিক যেন আমিই তাকে ধরে-বৈধে এই শাস্তি দিলাম ; কিন্তু তার পরে বেণীকে যেদিন হাসপাতালে নিয়ে গেল সেই দিন প্রথম টের পেলাম—না না, তারও জেল খাটবার প্রয়োজন ছিল ; তা ছাড়া ত জানিনি মা, বাইরে থেকে ছুটে এসে ভাল করতে যাওয়ার বিড়ম্বনা এত—সে কাজ এমন কঠিন ! আগে যে মিলতে হয় সকলের সঙ্গে, ভালতে মন্দতে এক না হ'তে পারলে যে কিছুতেই ভাল করা যায় না—সে কথা ত মনে ভাবি নি । প্রথম থেকেই সে তার শিক্ষা সংস্কার, মস্ত জোর, মস্ত প্রাণ নিয়ে এতই উচুতে এসে দাঁড়াল যে শেষ পর্য্যন্ত কেউ তার নাগালই পেলে না ; কিন্তু সে ত আমার চোখে পড়ল না মা, আমি তাকে যেতেও দিলাম না, রাখতেও পারলাম না ।

রমা কি একটা বলিতে গিয়া চাপিয়া গেল । বিবেচনায় তাহা অনুমান করিয়া কহিলেন, না রমা, অনুতাপ আমি সে জ্ঞাত করি নে ; কিন্তু তুই শুনে রাগ করিস্ নে মা, এইবার তাকে তোরা নাবিয়ে এনে সকলের সঙ্গে যে মিলিয়ে দিলি তাতে তাদের অধর্ম্ম যতই বড় হোক, সে কিন্তু ফিরে এসে এবার যে ঠিক সত্যটির দেখা পাবে এ কথা আমি বড়-গলা ক'রেই বলে যাচ্ছি ।

রমা কথাটা বুঝিতে না পারিয়া কহিল, কিন্তু এতে তিনি কেন নেবে যাবেন জ্যাঠাইমা ? আমাদের অত্মায় অধর্ম্মের ফলে যত বড় বাতনাই তাঁকে ভোগ করতে হোক, আমাদের দুষ্কৃতি আমাদেরই নরকের অন্ধকূপে ঠেলে দেবে, তাঁকে স্পর্শ করবে কেন ?

বিবেচনায় স্থানভাবে একটুখানি হাসিয়া বলিলেন, করবে বই কি মা । নইলে পাপ আর এত ভয়ঙ্কর কেন ? উপকারের প্রত্যাশা করেই যদি নাই করে, এমন কি উল্টে অপকারই করে তাতেই বা কি এসে যায় মা, যদি না তার কৃতঘ্নতায় দাতাকে নাবিয়ে আনে ! তুই বল্চিস্ মা, কিন্তু

তোদের কুঁয়াপুর রমেশকে কি আর তেমনটি পাবে? সে ফিরে এলে তোরা স্পষ্ট দেখতে পাবি, সে যে হাত দিয়ে দান ক'রে বেড়াতো ভৈরব তার সেই দান হাতটাই মুচড়ে ভেঙে দিয়েচে।

তার পর একটু থামিয়া নিজেই বলিলেন, কিন্তু কে জানে! হয়ত ভালই হয়েছে। তার বলিষ্ঠ সমগ্র হাতের অপৰ্য্যাপ্ত দান গ্রহণ করবার শক্তি যখন গ্রামের লোকের ছিল না তখন এই ভাঙা হাতটাই বোধ করি এবার তাদের সত্যিকার কাজে লাগবে, বলিয়া তিনি গভীর একটা নিশ্বাস মোচন করিলেন।

তাঁহার হাতখানি রমা নীরবে কিছুক্ষণ নাড়াচাড়া করিয়া ধীরে ধীরে বড় করণকণ্ঠে কহিল, আচ্ছা জ্যাঠাইমা, মিথ্যে সাক্ষী দিয়ে নিরপরাধীকে দণ্ডভোগ করানোর শাস্তি কি?

বিশ্বেশ্বরী জানালার বাহিরে চাহিয়া রমার বিপর্য্যস্ত রুক্ষ চুলের রাশির মধ্যে অঙ্গুলি চালনা করিতে করিতে হঠাৎ দেখিলেন তাহার নিমীলিত চুই চোখের প্রান্ত বহিয়া অশ্রু গড়াইয়া পড়িতেছে। সম্মুখে মুছাইয়া দিয়া কহিলেন, কিন্তু তোমার ত হাত ছিল না মা! মেয়েমানুষের এত বড় কলঙ্কের ভয় দেখিয়ে যে কাপুরুষেরা তোমার ওপর এই অত্যাচার করেছে সমস্ত গুরুদণ্ডই তাদের। তোমাকে ত এর একটি কিছুই বইতে হবে না মা, বলিয়া তিনি আবার তাহার চক্ষু মুছাইয়া দিলেন। তাঁহার একটুমাত্র আশ্বাসেই রমার রুদ্ধ-অশ্রু এইবার প্রস্রবণের আয় বরিয়া পড়িতে লাগিল। কিছুক্ষণ পরে সে কহিল, কিন্তু তাঁরা যে তাঁর শত্রু! তাঁরা বলেন, শত্রুকে যেমন ক'রে হোক নিপাত করতে দোষ নেই; কিন্তু আমার ত সে কৈফিয়ৎ নেই জ্যাঠাইমা!

তোমারই বা কেন নেই মা? প্রশ্ন করিয়া তিনি দৃষ্টি অবনত করিতেই অকস্মাৎ তাঁহার চোখের উপর যেন বিদ্যুৎ খেলিয়া গেল। যে সংশয় মুখ ঢাকিয়া একদিন তাহার মনের মধ্যে অকারণে আনাগোনা করিয়া

বেড়াইত, সে যেন তাহার মুখোস ফেলিয়া দিয়া একেবারে সোজা হইয়া মুখোমুখি দাঁড়াইল। আজ তাহাকে চিনিতে পারিয়া ক্ষণকালের জন্ত বিস্বেশ্বরী বেদনায় বিশ্বয়ে স্তম্ভিত হইয়া গেলেন। রমার হৃদয়ের ব্যথা আজ তাঁহার অগোচর রহিল না।

রমা চোখ বুজিয়াছিল, বিস্বেশ্বরীর মুখের ভাব দেখিতে পাইল না। ডাকিল, জ্যাঠাইমা ?

জ্যাঠাইমা চকিত হইয়া তাহার মাথাটা একটুখানি নাড়িয়া দিয়া সাড়া দিলেন।

রমা কহিল, একটা কথা আজ তোমার কাছে স্বীকার করব জ্যাঠাইমা। পিরপুরের জাফর আলির বাড়িতে সন্ধ্যার পর গ্রামের ছেলেরা জড় হ'য়ে রমেশদার কথামতো সৎ-আলোচনাই করত ; বদমাইসের দল ব'লে তাদের পুলিশে ধরিয়ে দেবার একটা মতলব চলছিল—আমি লোক পাঠিয়ে তাদের সাবধান ক'রে দিয়েছি। কারণ পুলিশ ত এই চায়। একবার তাদের হাতে পেলে ত আর রক্ষা রাখত না।

শুনিয়া বিস্বেশ্বরী শিহরিয়া উঠিলেন—বলিস্ কি রে ? নিজের গ্রামের মধ্যে পুলিশের এই উৎপাত বেগী মিছে ক'রে ডেকে আনতে চেয়েছিল ?

রমা কহিল, আমার মনে হয় বড়দার এই শাস্তি তারই ফল। আমাকে মাপ করতে পারবে জ্যাঠাইমা ?

বিস্বেশ্বরী হেঁট হইয়া নীরবে রমার ললাট চুঘন করিলেন। বলিলেন, তোর মা হ'য়ে এ যদি না আমি মাপ করতে পারি, কে পারবে রমা ? আমি আশীর্বাদ করি এর পুরস্কার ভগবান তোমাকে যেন দেন।

রমা হাত দিয়া চোখ মুছিয়া ফেলিয়া কহিল, আমার এই একটা সাঙ্ঘনা জ্যাঠাইমা, তিনি ফিরে এসে দেখবেন তাঁর স্নেহের ক্ষেত্র প্রস্তুত হ'য়ে আছে। যা তিনি চেয়েছিলেন তাঁর সেই দেশের চাষাভূষা এবার

ঘুম-ভেঙে উঠে বসেছে। তাঁকে চিনেছে, তাঁকে ভালোবেসেছে! এই ভালোবাসার আনন্দে তিনি আমার অপরাধ কি ভুলতে পারবেন না জ্যাঠাইমা?

বিশ্বেশ্বরী কথা কহিতে পারিলেন না। শুধু তাঁহার চোখ হইতে এক ফোঁটা অশ্রু গড়াইয়া রমার কপালের উপর পড়িল। তার পর বল্কল পর্য্যন্ত উভয়েই স্তব্ধ হইয়া রহিলেন।

রমা ডাকিল, জ্যাঠাইমা?

বিশ্বেশ্বরী বলিলেন, কেন মা?

রমা কহিল, শুধু একটি যায়গায় আমরা দূরে যেতে পারি নি। তোমাকে আমরা দুজনেই ভালোবেসেছিলাম।

বিশ্বেশ্বরী আবার নত হইয়া তাহার ললাট চুশন করিলেন।

রমা কহিল, সেই জোরে আমি একটি দাবী তোমার কাছে রেখে যাবো। আমি যখন আর থাকিব না, তখনও আমাকে যদি তিনি ক্ষমা কর্তে না পারেন শুধু এই কথাটি আমার হ'য়ে তাঁকে ব'লো জ্যাঠাইমা, যত মন্দ ব'লে আমাকে তিনি জান্তেন তত মন্দ আমি ছিলাম না। আর যত দুঃখ তাঁকে দিয়েছি, তার অনেক বেশি দুঃখ যে আমিও পেয়েছি—তোমার মুখের এই কথাটি হয়ত তিনি অবিশ্বাস করবেন না।

বিশ্বেশ্বরী উপড় হইয়া পড়িয়া বুক দিয়া রমাকে চাপিয়া ধরিয়া কাঁদিয়া ফেলিলেন। বলিলেন, চল্ না আমরা কোন তীর্থে গিয়ে থাকি! যেখানে বেগী নেই, রমেশ নেই—যেখানে চোখ তুললেই ভগবানের মন্দিরের চূড়া চোখে পড়ে—সেইখানেই যাই। আমি সব বুঝতে পেরেছি রমা। যদি যাবার দিন তোর এগিয়ে এসে থাকে মা, তবে এ বিষ বৃকে পূরে জলে পুড়ে সেখানে গেলে ত চলবে না। আমরা বামুনের মেয়ে সেখানে যাবার দিনটিতে আমাদের তার মতই গিয়ে উপস্থিত হ'তে হবে।

রমা অনেকক্ষণ চুপ করিয়া পড়িয়া থাকিয়া একটা উচ্ছ্বসিত দীর্ঘশ্বাস আয়ত্ত করিতে করিতে শুধু কহিল, আমিও তেমনি ক'রেই যেতে চাই জ্যাঠাইমা ।

১৮

কারা-প্রাচীরের বাহিরে যে তাহার সমস্ত দুঃখ ভগবান এমন করিয়া সার্থক করিয়া দিবার আয়োজন করিয়া রাখিয়াছিলেন বোধ করি উন্নত বিকারেও ইহা রমেশের আশা করা সম্ভবপর ছিল না । ছয় মাস সশ্রম কারাবাসের পর মুক্তিলাভ করিয়া সে জেলের বাহিরে পা দিয়াই দেখিল অচিস্তনীয় ব্যাপার । স্বয়ং বেণী ঘোষাল মাথায় চাদর জড়াইয়া সর্বাগ্রে দণ্ডায়মান । তাহার পশ্চাতে উভয় বিদ্যালয়ের মাষ্টার পণ্ডিত ও ছাত্রের দল এবং কয়েকজন হিন্দু-মুসলমান প্রজা । বেণী সজোরে আলিঙ্গন করিয়া কঁাদ কঁাদ গলায় কহিল, রমেশ, তাই রে নাড়ীর টান যে এমন টান এবার তা টের পেয়েছি । যত্ন মুখু্যের মেয়ে যে আচাখ্যা হারামজাদাকে হাত ক'রে এমন শত্রুতা করবে, লজ্জা-সরমের মাথা থেয়ে নিজে এসে মিথ্যে সাক্ষী দিয়ে এত দুঃখ দেবে সে কথা জেনেও যে আমি তখন জান্তে চাইনি, ভগবান তার শাস্তি আমাকে ভালোমতেই দিয়েছেন ! জেলের মধ্যে তুই বরং ছিলি ভাল রমেশ, বাইরে এই ছটা মাস আমি যে তুষের আগুনে জলে পুড়ে গেছি ।

রমেশ কি করিবে কি বলিবে ভাবিয়া না পাইয়া হতবুদ্ধি হইয়া চাহিয়া রহিল ; হেড মাষ্টার পাড়ুই মহাশয় একেবারে ভুলুষ্ঠিত হইয়া রমেশের পায়ের ধূলা মাথায় লইলেন । তাহার পিছনের দলটি তখন অগ্রসর হইয়া কেহ আশীর্বাদ, কেহ সেলাম, কেহ প্রণাম করিবার ঘটায় সমস্ত পথটা যেন চষিয়া ফেলিতে লাগিল । বেণীর কান্না আর মানা মানিল না । অশ্র

গদগদকণ্ঠে কহিল, দাদার ওপর অভিমান রাখিস্ নে ভাই, বাড়ি চল, মা কেঁদে কেঁদে দুচক্ষু অন্ধ করবার যোগাড় করছেন।

ঘোড়ার গাড়ী দাঁড়াইয়াছিল ; রমেশ বিনাবাক্যব্যয়ে তাহাতে চড়িয়া বসিল। বেণী সম্মুখের আসনে স্থান গ্রহণ করিয়া মাথার চাদর খুলিয়া ফেলিল। যা শুকাইয়া গেলেও আঘাতের চিহ্ন জাজ্বল্যমান। বেণী একটি দীর্ঘনিশ্বাস ফেলিয়া ডান হাত উল্টাইয়া কহিল, কাকে আর দোষ দেব ভাই, আমার নিজেরই কৰ্ম্মফল—আমারই পাপের শাস্তি ; কিন্তু সে আর শুনে কি হবে ? বলিয়া মুখের উপর গভীর বেদনার আভাস ফুটাইয়া চুপ করিয়া রহিল। তাহার নিজের মুখের এই সরল স্বীকারোক্তিতে রমেশের চিত্ত আর্দ্র হইয়া গেল। সে মনে করিল কিছু একটা হইয়াছেই। তাই সে কথা শুনিবার জন্ত আর পীড়াপীড়ি করিল না ; কিন্তু বেণী যে জন্ত ভূমিকাটি করিল তাহা ফাঁসিয়া যাইতেছে দেখিয়া সে নিজেই মনে মনে ছট্ফট্ করিতে লাগিল। মিনিট-দুই নিঃশব্দে কাটার পরে, সে আবার একটা নিশ্বাসের দ্বারা রমেশের মনোযোগ আকর্ষণ করিয়া ধীরে ধীরে কহিল, আমার এই একটা জন্মগত দোষ যে কিছুতেই মনে এক মুখে আর করতে পারি নে। মনের ভাব আর পাঁচ-জনের মত ঢেকে রাখতে পারি নি ব'লে কত শান্তিই যে ভোগ করতে হয় তবু ত আমার চৈতন্য হ'ল না।

রমেশ চুপ করিয়া শুনিতেছে দেখিয়া বেণী কণ্ঠস্বর আরও মৃদু ও গম্ভীর করিয়া কহিতে লাগিল, আমার দোষের মধ্যে সে দিন মনের কষ্ট আর চাপতে না পেরে কঁাদতে কঁাদতে ব'লে ফেলেছিলাম, রমা, আমরা তোর এমন কি অপরাধ করেছিলাম যে এই সর্বনাশ আমাদের কর্ণলি ! জেল হয়েছে শুন্লে যে মা একেবারে প্রাণ-বিসর্জন কর্ণবেন। আমরা ভায়ে ভায়ে বিষয় নিয়ে ঝগড়া করি—যা করি কিন্তু তবু ত সে আমার ভাই ! তুই একটা আঘাতে আমার ভাইকে মার্লি, মাকে মার্লি ; কিন্তু

নির্দোষীর ভগবান আছেন, বলিয়া সে গাড়ীর বাহিরে আকাশের পানে চাহিয়া আর একবার যেন নালিশ জানাইল ।

রমেশ যদিও এ অভিযোগে যোগ দিল না কিন্তু মন দিয়া শুনিতে লাগিল । বেণী একটু থামিয়া কহিল, রমেশ, রমার সেই উগ্রমূর্ত্তি মনে হ'লে এখনো হৃদকম্প হয়, দাঁতে দাঁতে ঘ'ষে বললে, রমেশের বাপ আমার বাপকে জেলে দিতে যায় নি ? পায়ে ছেড়ে দিত বুঝি ? মেয়েমানুষের এত দর্প সহ হ'ল না রমেশ । আমিও রেগে ব'লে ফেললাম, আচ্ছা ফিরে আসুক সে তার পরে এর বিচার হবে !

এতক্ষণ পর্য্যন্ত রমেশ বেণীর কথাগুলো মনের মধ্যে ঠিকমত গ্রহণ করিতে পারিতেছিল না । কবে তাহার পিতা রমার পিতাকে জেলে দিবার আয়োজন করিয়াছিলেন, তাহা সে জানে না ; কিন্তু ঠিক এই কথাটি সে দেশে পা দিয়াই রমার মাসির মুখে শুনিয়াছিল তাহার মনে পড়িল । তখন পরের ঘটনা শুনিবার জন্ত সে উৎকর্ণ হইয়া উঠিল ।

বেণী তাহা লক্ষ্য করিয়া কহিল, খুন করা তার অভ্যাস আছে ত ! আকবর লেঠেলকে পাঠিয়েছিল মনে নেই ? কিন্তু তোমার কাছে ত চালাকি খাটে নি, বরঞ্চ তুমিই উল্টে শিথিয়ে দিয়েছিলে ; কিন্তু আমাকে দেখে ত ? এই ক্ষীগঞ্জীবী—' বলিয়া বেণী একটুখানি চিন্তা করিয়া লইয়া তুপু কলুর ছেলের কলিত বিবরণ নিজের অন্ধকার অন্তরের ভিতর হইতে বাহির করিয়া আপনার ভাষায় ধীরে ধীরে গ্রথিত করিয়া বিবৃত করিল ।

রমেশ রুদ্ধনিশ্বাসে কহিল, তার পর ?

বেণী মলিনমুখে একটুখানি হাসিয়া কহিল, তারপরে কি আর মনে আছে ভাই ! কে কিসে ক'রে যে আমাকে হাসপাতালে নিয়ে গিয়েছিল, সেখানে কি হ'ল কে দেখলে কিছুই জানি নে । দশ দিন পরে জ্ঞান হয়ে



দেখলাম হাসপাতালে পড়ে আছি। এ-যাত্রা যে রক্ষে পেয়েচি সে কেবল মায়ের পুণ্যে—এমন না কি আর আছে রমেশ!

রমেশ একটি কথাও কহিতে পারিল না, কাঠের মূর্তির মত শক্ত হইয়া বসিয়া রহিল। শুধু কেবল তাহার দশ অঙ্গুলি জড় হইয়া বজ্র-কঠিন মুঠায় পরিণত হইল। তাহার মাথায় ক্রোধ ও ঘৃণায় যে ভীষণ বহ্নি জ্বলিতে লাগিল, তাহার পরিমাণ করিবারও কাহারও সাধ্য রহিল না। বেণী যে কত মন্দ তাহা সে জানিত। তাহার অসাধ্য যে কিছুই নাই ইহাও তাহার অপরিজ্ঞাত ছিল না; কিন্তু সংসারে কোন মানুষই যে এত অসত্য এমন অসঙ্কোচে এরূপ অনর্গল উচ্চারণ করিয়া যাইতে পারে তাহা কল্পনা করিবার মত অভিজ্ঞতা তাহার ছিল না। তাই রমার সমস্ত অপরাধই সত্য বলিয়া বিশ্বাস করিল।

সে দেশে ফিরিয়া আসায় গ্রামময় যেন একটা উৎসব বাধিয়া গেল। প্রতিদিন সকালে, দুপুরে এবং রাত্রি পর্য্যন্ত এত জনসমাগম, এত কথা, এত আত্মীয়তার ছড়াছড়ি পড়িয়া গেল যে, কারাবাসের যেটুকু মানি তাহার মধ্যে অবশিষ্ট ছিল দেখিতে দেখিতে তাহা উবিয়া গেল। তাহার অবর্ত্তমানে গ্রামের মধ্যে যে খুব বড় একটা সামাজিক স্রোত ফিরিয়া গিয়াছে তাহাতে কোন সংশয় নাই, কিন্তু এই কয়টা মাসের মধ্যেই এতবড় পরিবর্তন কেমন করিয়া সম্ভব হইল ভাবিতে গিয়া তাহার চোখে পড়িল বেণীর প্রতিকূলতায় যে শক্তি পদে পদে প্রতিহত হইয়া কাজ করিতে পারিতেছিল না অথচ সঞ্চিত হইতেছিল তাহাই এখন তাহার অমূল্য দ্বিগুণ বেগে প্রবাহিত হইয়াছে। বেণীকে সে আজ আরও একটু ভাল করিয়া চিনিলা। এই লোকটাকে এরূপ অনিষ্টকারী জানিয়াও সমস্ত গ্রামের লোক যে তাহার কতদূর বাধ্য তাহা আজ সে যেন দেখিতে পাইল এমন কোন দিন নয়। ইহারই বিরোধ হইতে পরিত্রাণ পাইয়া রমেশ মনে মনে হাঁফ ছাড়িয়া বাঁচিল। শুধু তাই নয়, রমেশের উপর অত্যন্ত অত্যাচারের জন্ত গ্রামের

সকলেই মৰ্মাহত সে কথা একে একে সবাই তাহাকে জানাইয়া গিয়াছে। ইহাদের সমবেত সহায়ভূতি ভাল করিয়া, বেণীকে স্বপক্ষে পাইয়া আনন্দ উৎসাহে হৃদয় তাহার বিস্তারিত হইয়া উঠিল। ছয়মাস পূর্বে যে সকল কাজ আরম্ভ করিয়াই তাহাকে ত্যাগ করিয়া যাইতে হইয়াছিল, আবার পূর্ণোত্তমে তাহাতে লাগিয়া পড়িবে সঙ্কল্প করিয়া রমেশ কিছু দিনের জন্ত নিজেও এই সকল আমোদ-আহ্লাদে গা ঢালিয়া সৰ্বত্র ছোট-বড় সকল বাড়িতে সকলের কাছে সকল বিষয়ের খোঁজ-খবর লইয়া সময় কাটাইতে লাগিল। শুধু একটা বিষয় হইতে সে সৰ্ব্বপ্রযত্নে নিজেকে পৃথক করিয়া রাখিতেছিল—তাহা রমার প্রসঙ্গ। সে পীড়িত তাহা পথেই শুনিয়াছিল; কিন্তু সে পীড়া যে এখন কোথায় উপস্থিত হইয়াছিল, তাহার কোন সংবাদ গ্রহণ করিতে চাহে নাই। তাহার সমস্ত সম্বন্ধ হইতে আপনাকে সে চিরদিনের মত বিচ্ছিন্ন করিয়া লইয়াছে ইহাই তাহার ধারণা। গ্রামে আসিয়াই মুখে মুখে শুনিয়াছিল শুধু একা রমাই যে তাহার সমস্ত দুঃখের মূল তাহা সবাই জানে। সুতরাং এইখানে বেণী যে মিথ্যা কথা কহে নাই তাহাতে আর সন্দেহ রহিল না। দিন পাঁচ-ছয় পরে বেণী আসিয়া রমেশকে চাপিয়া ধরিল। পিরপুরের একটা বড় বিষয়ের অংশ-বিভাগ লইয়া বহুদিন হইতে রমার সহিত তাহার প্রচ্ছন্ন মনোবিবাদ ছিল এই সুযোগে সেটা হস্তগত করিয়া লওয়া তাহার উদ্দেশ্য।

বেণী বাহিরে যাই বলুক সে মনে মনে রমাকে ভয় করিত। এখন সে শয্যাগত, মামলা-মোকদ্দমা করিতে পারিবে না; উপরন্তু তাহাদের মুসলমান প্রজারাও রমেশের কথা ঠেলিতে পারিবে না। পরে যাই হোক আপাততঃ বেদখল করিবার এমন অবসর আর মিলিবে না বলিয়া সে একেবারে জিদ ধরিয়া বসিল। রমেশ আশ্চর্য্য হইয়া অস্বীকার করিতেই বেণী বহু প্রকারে যুক্তি প্রয়োগ করিয়া শেষে কহিল, হবে না কেন? বাগে পেয়ে সে কবে তোমাকে রেয়াৎ করেছে যে তার অসুখের কথা তুমি

ভাবতে যাচ্ছ ? তোমাকে যখন সে জেলে দিয়েছিল তখন তোমার অস্ত্রখই বা কোন্‌ কম ছিল তাই !

কথাটা সত্য । রমেশ অস্বীকার করিতে পারিল না । তবু কেন যে তাহার মন কিছুতেই তাহার বিপক্ষতা করিতে চাহিল না বেণীর সহস্র কটু উত্তেজনা সত্ত্বেও রমার অসহায় পীড়িত অবস্থা মনে করিতেই তাহার সমস্ত বিরুদ্ধ-শক্তি সঙ্কুচিত হইয়া বিন্দুবৎ হইয়া গেল ; তাহার স্পষ্ট হেতু সে নিজেও খুঁজিয়া পাইল না । রমেশ চুপ করিয়া রহিল । বেণী কাজ হইতেছে জানিলে ধৈর্য্য ধরিতে জানে । সে তখনকার মত আর পীড়া-পীড়ি না করিয়া চলিয়া গেল ।

এবার আর একটা জিনিস রমেশের বড় দৃষ্টি আকর্ষণ করিয়াছিল । বিশ্বেশ্বরীর কোন দিনই সংসারে যে বিশেষ আসক্তি ছিল না তাহা সে পূর্বেও জানিত, কিন্তু এবার ফিরিয়া আসিয়া সেই অনাসক্তিতা যেন বিতৃষ্ণায় পরিণত হইয়াছে বলিয়া তাহার মনে হইতেছিল । কারাগার হইতে অব্যাহতি লাভ করিয়া বেণীর সমভিব্যবহারে যেদিন সে গৃহে প্রবেশ করিয়াছিল সে দিন বিশ্বেশ্বরী আনন্দ প্রকাশ করিয়াছিলেন, সহজ-কণ্ঠে বারংবার অসংখ্য আশীর্বাদ করিয়াছিলেন তথাপি কি যেন একটা তাহাতে ছিল যাহাতে সে ব্যথাই পাইয়াছিল । আজ হঠাৎ কথায় কথায় শুনিল, বিশ্বেশ্বরী কানী-বাস সঙ্কল্প করিয়া যাত্রা করিতেছেন, আর ফিরিবেন না ; শুনিয়া সে চমকিয়া গেল । কৈ সে ত কিছুই জানে না ! নানা-কাজে পাঁচ-ছয় দিনের মধ্যে তাঁহার সহিত সাক্ষাৎ হয় নাই ; কিন্তু যেদিন হইয়াছিল সেদিন ত তিনি কোন কথা বলেন নাই । যদিচ সে জানিত তিনি নিজে হইতে আপনার বা পরের কথা আলোচনা করিতে কোনদিন ভালোবাসেন না, কিন্তু আজিকার সংবাদটার সহিত সে দিনের স্মৃতিটা পাশাপাশি চোখের সামনে তুলিয়া ধরিবামাত্র তাঁহার এই একান্ত বৈরাগ্যের অর্থ দেখিতে পাইল । আর তাহার লেশমাত্র সংশয় রহিল না, জ্যাঠাইমা

সত্যই বিদায় লইতেছেন ! এ যে কি, তাঁহার অবিদ্যমানতা যে কি অভাব মনে করিতেই তাহার দুই চক্ষু অশ্রুপূর্ণ হইয়া উঠিল। আর মুহূর্ত্ত বিলম্ব না করিয়া সে এ বাটীতে আসিয়া উপস্থিত হইল। বেলা তখন নটা-দশটা। ঘরে ঢুকিতে গিয়া দাসী জানাইল তিনি মুখুণ্ডো-বাড়ি গেছেন।

রমেশ আশ্চর্য্য হইয়া প্রশ্ন করিল, এমন সময়ে যে ?

এই দাসীটি বহুদিনের পুরাণো। সে মৃদু হাসিয়া কহিল, মার আবার সময়-অসময়। তা ছাড়া আজ তাঁদের ছোটবাবুর পৈতে কি না।

যতীনের উপনয়ন ?

রমেশ আরও আশ্চর্য্য হইয়া কহিল, কৈ এ কথা ত কেউ জানে না !

দাসী কহিল, তাঁরা কাউকে বলেন নি ! বল্লেও ত কেউ গিয়ে থাকে না—রমাদিদিকে কর্ত্তা সব একঘরে ক'রে রেখেছেন কি না।

রমেশের বিশ্বয়ের অবধি রহিল না। সে একটুখানি চুপ করিয়া থাকিয়া কারণ জিজ্ঞাসা করিতেই দাসী সলজ্জে ঘাড়টা ফিরাইয়া বলিল, কি জানি ছোটবাবু—রমাদিদির কি বড় বিস্ত্রী অথ্যাতি বেরিয়েচে কি না—আমরা গরীব-দুঃখী মানুষ সে সব জানি নে ছোটবাবু ! বলিতে বলিতে সে সরিয়া পড়িল।

কিছুক্ষণ চুপ করিয়া থাকিয়া রমেশ গৃহে ফিরিয়া আসিল। সে যে বেগীর ক্রুদ্ধ প্রতিশোধ তাহা জিজ্ঞাসা না করিয়াও সে বুঝিল ; কিন্তু ক্রোধ কি জন্ত এবং কিসের প্রতিহিংসা কামনা করিয়া সে কোন্ বিশেষ কদর্যা-ধারায় রমার অথ্যাতিককে প্রবাহিত করিয়া দিয়াছে এ সকল ঠিকমত অনুমান করাও তাহার দ্বারা সম্ভবপর ছিল না।

সেই দিন অপরাহ্নে একটা অচিন্তনীয় ঘটনা ঘটিল। আদালতের বিচার উপেক্ষা করিয়া কৈলাস নাপিত এবং সেখ মতিলাল সাক্ষীসাবুদ সঙ্গে লইয়া রমেশের শরণাপন্ন হইল। রমেশ অকৃত্রিম বিশ্বাসের সহিত প্রশ্ন করিল, আমার বিচার তোমরা মান্বে কেন বাবু !

বাদী-প্রতিবাদী উভয়েই জবাব দিল, মান্বে না কেন বাবু, হাকিমের চেয়ে আপনার বিজ্ঞাবুদ্ধিই কোন্ কম ? আর হাকিম হজুর যা কিছু তা আপনারা পাঁচজন ভদ্রলোকেই ত হয়ে থাকেন ! কাল যদি আপনি সরকারী চাকরী নিয়ে হাকিম হ'য়ে ব'সে বিচার ক'রে দেন সেই বিচারত আমাদের মাথা পেতে নিতে হবে। তখন ত মান্বে না বললে চল্বে না।

কথা শুনিয়া রমেশের বুক গর্ষে আনন্দে ক্ষীত হইয়া উঠিল। কৈলাস কহিল, আপনাকে আমরা দুজনেই দুকথা বুঝিয়ে বলতে পারব ; কিন্তু আদালতে সেটি হবে না। তা ছাড়া গাঁটের কড়ি মুটোভরে উকিলকে না দিতে পারলে সুবিধে কিছুতেই হয় না বাবু ! এখানে একটি পয়সা খরচ নেই, উকিলকে খোসামোদ করতে হবে না, পথ হাঁটাহাঁটি করে মরতে হবে না। না বাবু, আপনি যা হুকুম করবেন, ভাল হোক মন্দ হোক, আমরা তাতেই রাজী হয়ে আপনার পায়ের ধুলো মাথায় নিয়ে ঘরে ফিরে যাব। ভগবান সুবুদ্ধি দিলেন আমরা দুজনে তাই আদালত থেকে ফিরে এসে আপনার চরণেই শরণ নিলাম।

একটা ছোট নালা লইয়া উভয়ের বিবাদ। দলিল-পত্র সামান্য যাহা কিছু ছিল রমেশের হাতে দিয়া কাল সকালে আসিবে বলিয়া উভয়ে লোক জন লইয়া প্রস্থান করিবার পর রমেশ স্থির হইয়া বসিয়া রহিল। ইহা তাহার কল্পনার অতীত। সুদূর-ভবিষ্যতেও সে কখনো এত বড় আশা মনে ঠাই দেয় নাই। তাহার মীমাংসা ইহারা পরে গ্রহণ করুক বা না করুক,

কিন্তু আজ যে ইহারা সরকারী আদালতের বাহিরে বিবাদ নিষ্পত্তি করিবার অভিপ্রায়ে পথ হইতে ফিরিয়া তাহার কাছে উপস্থিত হইয়াছে ইহাই তাহার বুক ভরিয়া আনন্দশ্রোত ছুটাইয়া দিল। যদিও, বেশী কিছু নয়, সামান্য দুইজন গ্রামবাসীর অতি তুচ্ছ বিবাদের কথা, কিন্তু তুচ্ছ কথার স্তূত্র ধরিয়াই তাহার চিত্তের মাঝে অনন্ত সম্ভাবনার আকাশ-কুসুম ফুটিয়া উঠিতে লাগিল। তাহার এই দুর্ভাগিনী জন্মভূমির জন্ত ভবিষ্যতে সে কি না করিতে পারিবে তাহার কোথাও কোনো হিসাব-নিকাশ, কুল-কিনারা রহিল না। বাহিরে বসন্ত-জ্যোৎস্নায় আকাশ ভাসিয়া যাইতেছিল, সেই দিকে চাহিয়া হঠাৎ তাহার রমাকে মনে পড়িল। অল্প কোন দিন হইলে সঙ্গে সঙ্গেই তাহার সর্বাঙ্গ জ্বালা করিয়া উঠিত; কিন্তু আজ জ্বালা করা ত দূরের কথা কোথাও সে একবিন্দু উত্তাপের অস্তিত্বও অনুভব করিল না। মনে মনে একটু হাসিয়া তাহাকে উদ্দেশ্য করিয়া কহিল, তোমার হাত দিয়ে ভগবান আমাকে এমন সার্থক ক'রে তুলবেন, তোমার বিষ আমার অদৃষ্টে এমন অমৃত হয়ে উঠবে এ যদি তুমি জানতে রমা, বোধ করি কখনও আমাকে জেলে দিতে চাইতে না!—কে গা?

আমি রাধা ছোটবাবু! রমাদিদি অতি অবিশ্বাস করে একবার দেখা দিতে বলছেন।

রমা সাক্ষাৎ করিবার জন্ত দাসী পাঠাইয়া দিয়াছে। রমেশ অবাক হইয়া রহিল। আজ এ কোন্ নষ্টবুদ্ধি-দেবতা তাহার সহিত সকল প্রকারের অনাস্থি কৌতুক করিতেছে!

দাসী কহিল, একবার দয়া ক'রে যদি ছোটবাবু—

কোথায় তিনি?

ঘরে শুয়ে আছেন। একটু থামিয়া কহিল, কাল ত আর সময় হ'য়ে উঠবে না; তাই এখন যদি একবার—

আচ্ছা চল যাই, বলিয়া রমেশ উঠিয়া দাড়াইল।

ডাকিতে পাঠাইয়া দিয়া রমা একপ্রকার সচকিত অবস্থায় বিছানায় পড়িয়াছিল। দাসীর নির্দেশমত রমেশ ঘরে ঢুকিয়া একটা চৌকি টানিয়া লইয়া বসিতেই সে শুদ্ধমাত্র যেন মনের জোরেই নিজেকে টানিয়া আনিয়া রমেশের পদপ্রান্তে নিক্ষেপ করিল। ঘরের এককোণে মিট মিট করিয়া একটা প্রদীপ জ্বলিতেছিল, তাহারই মৃদু-আলোকে রমেশ অস্পষ্ট আকারে রমার যতটুকু দেখিতে পাইল তাহাতে তাহার শারীরিক অবস্থার কিছুই জানিতে পারিল না। এইমাত্র আসিতে আসিতে সে যে রকম সঙ্কল্প মনে মনে ঠিক করিয়াছিল রমার সম্মুখে বসিয়া তাহার আগাগোড়াই বৈঠক হইয়া গেল। একটুখানি চুপ করিয়া থাকিয়া সে কোমলস্বরে জিজ্ঞাসা করিল, এখন কেমন আছ রাণি ?

রমা তাহার পায়ের গোড়া হইতে একটুখানি সরিয়া বসিয়া কহিল, আমাকে আপনি রমা বলেই ডাকবেন !

রমেশের পিঠে কে যেন চাবুকের ঘা মারিল। সে এক মুহূর্ত্তেই কঠিন হইয়া কহিল, বেশ, তাই। শুনেছিলাম তুমি অসুস্থ ছিলে—এখন কেমন আছ তাই জিজ্ঞাসা করছিলাম ! নইলে নাম যাই হোক সে ধ'রে ডাকবার আমার ইচ্ছেও নেই, আবশ্যকও হবে না।

রমা সমস্ত বুঝিল। একটুখানি স্থির থাকিয়া ধীরে ধীরে কহিল, এখন আমি ভালো আছি।

তার পরে কহিল, আমি ডেকে পাঠিয়েছি বলে আপনি হয়ত খুব আশ্চর্য্য হয়েছেন, কিন্তু—

রমেশ কথার মাঝখানেই তীব্রস্বরে বলিয়া উঠিল, না হই নি ! তোমার কোনো কাজে আশ্চর্য্য হবার দিন আমার কেটে গেছে ; কিন্তু ডেকে পাঠিয়েছ কেন ?

কথাটা রমার বুকে যে কতবড় শেলাঘাত করিল তাহা রমেশ জানিতে পারিল না। সে মোন-নতমুখে কিছুক্ষণ বসিয়া থাকিয়া বলিল, রমেশদা,

আজ দুটি কাজের জন্তে তোমাকে কষ্ট দিয়ে ডেকে এনেছি। আমি তোমার কাছে কত অপরাধ যে করেছি সে ত আমি জানি ; কিন্তু তবু আমি নিশ্চয় জানতাম তুমি আসবে, আমার এই দুটি শেষ অনুরোধও অস্বীকার করবে না।

অশ্রুভারে সহসা তাহার স্বরভঙ্গ হইয়া গেল। তাহা এতই স্পষ্ট যে রমেশ টের পাইল এবং চক্ষের নিমিষে তাহার পূর্বস্নেহ আলোড়িত হইয়া উঠিল। এত আঘাত প্রতিবাত্তেও সে স্নেহ যে আজিও মরে নাই শুধু নির্জীব, অচেতনের মত পড়িয়াছিল মাত্র, তাহা নিশ্চিত অনুভব করিয়া সে নিজেও আজ বিস্মিত হইয়া গেল। ক্ষণকাল চুপ করিয়া থাকিয়া শেষে কহিল, কি তোমার অনুরোধ ?

রমা চকিতের মত মুখ তুলিয়াই আবার অবনত করিল। কহিল, যে বিষয়টা বড়দা তোমার সাহায্যে দখল করতে চাচ্ছেন সেটা আমার নিজের ; অর্থাৎ আমার পনের আনা তোমাদের এক আনা ; সেইটাই আমি তোমাকে দিয়ে যেতে চাই !

রমেশ পুনর্বার উষ্ণ হইয়া উঠিল। কহিল, তোমার ভয় নেই আমি চুরি করতে পূর্বেও কখনো কাউকে সাহায্য করি নি এখনো করব না। আর যদি দান করতেই চাও—তার জন্তে লোক আছে—আমি দান গ্রহণ করি নে।

পূর্বে হইলে রমা তৎক্ষণাৎ বলিয়া উঠিত মুখ্যোদের দান গ্রহণ করায় ষোয়ালদের অপমান হয় না। আজ কিন্তু এ কথা তাহার মুখ দিয়া বাহির হইল না। সে বিনীতভাবে কহিল, জানি রমেশদা, তুমি চুরি করতে সাহায্য করবে না ! আর নিলেও যে তুমি নিজের জন্ত নেবে না সেও আমি জানি ; কিন্তু তা ত নয়। দোষ করলে শাস্তি হয়। আমি যত অপরাধ করেছি এটা তারই জরিমানা ব'লে কেন গ্রহণ কর না।

রমেশ ক্ষণকাল মৌন থাকিয়া কহিল, তোমার দ্বিতীয় অনুরোধ ?



রমা কহিল, আমার যতীনকে আমি তোমার হাতে দিয়ে গেলাম। তাকে তোমার মত ক'রে মানুষ ক'রো। বড় হ'য়ে সে যেন তোমার মতই হাসিমুখে স্বার্থত্যাগ করতে পারে।

রমেশের চিত্তের সমস্ত কঠোরতা বিগলিত হইয়া গেল। রমা আঁচল দিয়া চোখ মুছিয়া কহিল, এ আমার চোখে দেখে যাবার সময় হবে না ; কিন্তু আমি নিশ্চয় জানি যতীনের দেহে তার পূর্বপুরুষের রক্ত আছে। ত্যাগ করবার যে শক্তি তার অস্থি-মজ্জায় মিশিয়ে আছে—শেখালে হয়ত একদিন সে তোমার মতই মাথা উঁচু ক'রে দাঁড়াবে।

রমেশ তৎক্ষণাৎ তাহার কোন উত্তর দিল না। জানালার বাহিরে জ্যোৎস্না-প্রাবৃত আকাশের পানে চাহিয়া রহিল। তাহার মনের ভিতরটা এমন একটা ব্যথায় ভরিয়া উঠিতেছিল, যাহার সহিত কোন দিন তাহার পরিচয় ঘটে নাই। বহুক্ষণ নিঃশব্দে কাটার পর রমেশ মুখ ফিরাইয়া কহিল, দেখ এ সকলের মধ্যে আর আমাদের টেন না। আমি অনেক দুঃখ-কষ্টের পর একটুখানি আলোর শিখা জ্বলতে পেরেছি ; তাই আমার কেবল ভয় হয় পাছে একটুতেই তা নিবে যায়।

রমা কহিল, আর ভয় নেই রমেশদা, তোমার এ আলো আর নিববে না। জ্যাঠাইমা বলছিলেন, তুমি দূর থেকে এসে বড় উঁচুতে ব'সে কাজ করতে চেয়েছিলে বলেই এত বাধা বিশ্ব পেয়েচ। আমরা নিজেদের দুর্গতির ভারে তোমাকে নাবিয়ে এনে এখন ঠিক যায়গাটিতেই প্রতিষ্ঠিত করে দিয়েছি। তুমি আমাদের মধ্যে এসে দাঁড়িয়েচ বলেই তোমার ভয় হচ্ছে ; আগে হ'লে এ আশঙ্কা তোমার মনেও ঠাঁই পেত না। তখন তুমি গ্রাম্য-সমাজের অতীত ছিলে, আজ তুমি তারই একজন হ'য়েচ। তাই এ আলো তোমার গ্লান হবে না—এখন প্রতিদিনই উজ্জ্বল হ'য়ে উঠবে।

সহসা জ্যাঠাইমার নামে রমেশ উদ্দীপ্ত হইয়া উঠিল ; কহিল,

ঠিক জানো কি রমা, আমার এই দীপের শিখাটুকু আর নিবে যাবে না ?

রমা দৃঢ়কণ্ঠে কহিল, ঠিক জানি ! যিনি সব জানেন এ সেই জ্যাঠাইমার কথা । এ কাজ তোমারি । আমার যতীনকে তুমি হাতে তুলে নিয়ে আমার সকল অপরাধ ক্ষমা ক'রে আজ আশীর্বাদ ক'রে আমাকে বিদায় দাও রমেশদা, আমি যেন নিশ্চিন্ত হ'য়ে যেতে পারি ।

বজ্রগর্ভ মেঘের মত রমেশের বৃকের ভিতরটা ক্ষণে ক্ষণে চমকিয়া উঠিতে লাগিল ; কিন্তু সে মাথা হেঁট করিয়া শুক্ক হইয়া বসিয়া রহিল । রমা কহিল, আমার একটি কথা তোমাকে রাখতে হবে । বল রাখবে ?

রমেশ মৃদু কণ্ঠে কহিল, কি কথা ?

রমা বলিল, আমার কথা নিয়ে বড়দার সঙ্গে তুমি কোন দিন ঝগড়া ক'রো না ।

রমেশ বুঝিতে না পারিয়া প্রশ্ন করিল, তার মানে ?

রমা কহিল, মানে যদি কখনও শুন্তে পাও সেদিন শুধু এই কথাটি মনে ক'রো আমি কেনন করে নিঃশব্দে সহ্য ক'রে চ'লে গেছি—একটি কথারও প্রতিবাদ করি নি । একদিন যখন অসহ্য মনে হয়েছিল সেদিন জ্যাঠাইমা এসে বলেছিলেন, মা, মিথ্যেকে ঘাঁটা-ঘাঁটি ক'রে জাগিয়ে তুললেই তার পরমায়ু বেড়ে ওঠে । নিজের অসহিষ্ণুতায় তার আয়ু বাড়িয়ে তোলার মত পাপ অল্পই আছে ; তাঁর এই উপদেশটি মনে রেখে আমি সকল দুঃখ-দুর্ভাগ্যই কাটিয়ে উঠেছি—এটি তুমিও কোনদিন ভুলো না রমেশদা ।

রমেশ নীরবে তাহার মুখের দিকে চাহিয়া রহিল । রমা ক্ষণেক পরে কহিল, আজ আমাকে তুমি ক্ষমা কর্ত্তে পারচ না মনে করে দুঃখ ক'রো না রমেশদা । আমি নিশ্চয় জানি আজ যা কঠিন বলে মনে হ'চ্ছে এক-

দিন তাই সোজা হয়ে যাবে। সেদিন আমার সকল অপরাধ তুমি সহজেই ক্ষমা করবে জেনে আমার মনের মধ্যে আর কোন ক্লেশ নাই। কাল আমি যাচ্ছি।

কাল? রমেশ বিস্মিত হইয়া জিজ্ঞাসা করিল, কোথায় যাবে কাল?

রমা কহিল, জ্যাঠাইমা যেখানে নিয়ে যাবেন আমি সেইখানেই যাব।

রমেশ কহিল, কিন্তু তিনি ত আর ফিরে আসবেন না শুন্টি।

রমা ধীরে ধীরে বলিল, আমিও না। আমিও তোমাদের পায়ে জন্মের মত বিদায় নিচ্ছি।

এই বলিয়া সে হেঁট হইয়া মাটিতে মাথা ঠেকাইল। রমেশ মুহূর্তকাল চিন্তা করিয়া দীর্ঘনিশ্বাস ফেলিয়া দাঁড়াইয়া কহিল, আচ্ছা যাও; কিন্তু কেন বিদায় চাইচ সেও কি জান্তে পারবো না?

রমা মৌন হইয়া রহিল। রমেশ পুনরায় কহিল, কেন যে তোমার সমস্ত কথাই লুকিয়ে রেখে চলে গেলে সে তুমিই জানো; কিন্তু আমিও কায়মনে ভগবানের কাছে প্রার্থনা করি একদিন যেন তোমাকে সর্বান্তঃ-করণেই ক্ষমা করতে পারি। তোমাকে ক্ষমা করতে না পারায় যে আমার কি ব্যথা সে শুধু আমার অন্তর্যামীই জানেন।

রমার দুই চোখ বহিয়া ঝন্ ঝন্ করিয়া জল ঝরিয়া পড়িতে লাগিল; কিন্তু সেই অত্যন্ত মৃদু-আলোকে রমেশ তাহা দেখিতে পাইল না। রমা নিঃশব্দে দূর হইতে তাহাকে আর একবার প্রণাম করিল, এবং পরক্ষণেই রমেশ ঘর হইতে বাহির হইয়া গেল। পথে চলিতে চলিতে তাহার মনে হইল তাহার ভবিষ্যৎ তাহার সমস্ত কাজ-কর্মের উৎসাহ যেন এক নিমেষে এই জ্যোৎস্নার মতই অস্পষ্ট-ছায়াময় হইয়া গেছে।

পরদিন সকাল-বেলায় রমেশ এ বাড়িতে আসিয়া যখন উপস্থিত হইল তখন বিশেষরী যাত্রা করিয়া পাঙ্কিতে প্রবেশ করিয়াছেন। রমেশ দ্বারের

কাছে মুখ লইয়া অশ্রু-ব্যাকুলকণ্ঠে কহিল, কি অপরাধে আমাদের এত শীঘ্র ত্যাগ ক'রে চললে জ্যাঠাইমা ?

বিষেখরী ডানহাত বাড়াইয়া রমেশের মাথায় রাখিয়া বলিলেন, অপরাধের কথা বলতে গেলে ত শেষ হবে না বাবা ! তাতে কাজ নেই । তারপরে বলিলেন, এখানে যদি মরি রমেশ, বেণী আমার মুখে আগুন দেবে ! সে হ'লে ত কোন মতেই মুক্তি পাব না । ইহকালটা ত জলে-জলেই গেল বাবা, পাছে পরকালটাও এমনি জলে পুড়ে মরি আমি সেই ভয়ে পালাচ্ছি রমেশ ।

রমেশ বজ্রাহতের মত স্তম্ভিত হইয়া রহিল । আজ এই একটি কথায় সে জ্যাঠাইমার বুকের ভিতরটার জননীর আলা যেমন করিয়া দেখিতে পাইল এমন আর কোন দিন পায় নাই । কিছুক্ষণ স্থির হইয়া থাকিয়া কহিল, রমা কেন যাচ্ছে জ্যাঠাইমা ?

বিষেখরী একটা প্রবল বাস্পোচ্ছ্বাস যেন সংবরণ করিয়া লইলেন । তার পরে গলা খাটো করিয়া বলিলেন, সংসারে তার যে স্থান নেই বাবা, তাই তাকে ভগবানের পায়ের নিচেই নিয়ে যাচ্ছি ; সেখানে গিয়েও সে বাঁচে কি না জানি নে কিন্তু যদি বাঁচে সারা-জীবন ধ'রে এই অত্যন্ত কঠিন প্রশ্নের মীমাংসা করতে অত্বরোধ করব, কেন ভগবান তাকে এত রূপ, এত গুণ, এত বড় একটা প্রাণ দিয়ে সংসারে পাঠিয়েছিলেন এবং কেনই বা বিনা দোষে এই দুঃখের বোঝা মাথায় দিয়ে আবার সংসারের বাইরে ফেলে দিলেন । এ কি অর্থপূর্ণ মঙ্গল অভিপ্রায় তাঁরই, না শুধু আমাদের সমাজের খেয়ালের খেলা ! ওরে রমেশ, তার মত দুঃখিনী বুঝি আর পৃথিবীতে নেই, বলিতে বলিতেই তাঁহার গলা ভাঙিয়া পড়িল । তাঁহাকে এতখানি ব্যাকুলতা প্রকাশ করিতে কেহ কখনও দেখে নাই ।


রমেশ স্তব্ধ হইয়া বসিয়া রহিল ; বিষেখরী ঐকটু পরেই কহিলেন, কিন্তু তোর ওপর আমার এই আদেশ রইল রমেশ, তাকে তুই যেন ভুল.

বুঝিস্ নে । যাবার সময় আমি কারো বিরুদ্ধে কোন নালিশ ক'রে যেতে চাই নে, শুধু এই কথাটা আমার তুই ভুলেও কখনও অবিশ্বাস করিস্ নে যে, তার বড় মঙ্গলাকাজ্জিগী তোর আর কেউ নেই ।

রমেশ বলিতে গেল, কিন্তু জ্যাঠাইমা—

জ্যাঠাইমা তাড়াতাড়ি বাধা দিয়া বলিলেন, এর মধ্যে কোন কিন্তু নেই রমেশ । তুই যা শুনেছিস্ সব মিথ্যে ; যা জেনেছিস্ সব ভুল ; কিন্তু এ অভিযোগের এখানেই যেন সমাপ্তি হয় ! তোর কাজ যেন সমস্ত অগ্রায়, সমস্ত হিংসা-বিদ্বেষকে সম্পূর্ণ তুচ্ছ ক'রে চিরদিন এমনি প্রবল হ'য়ে ব'য়ে যেতে পারে এই তোর ওপর শেষ অনুরোধ । এই জগুই সে মুখ বুজে সমস্ত সহ্য ক'রে গেছে ! প্রাণ দিতে বসেচে রে রমেশ, তবু কথা কয় নি ।

গতরাত্রে রমার নিজের মুখের দুই-একটা কথাও রমেশের সেই মুহূর্তে মনে পড়িয়া দুর্জয় রোদনের বেগ যেন ওষ্ঠ পর্য্যন্ত ঠেলিয়া উঠিল । সে তাড়াতাড়ি মুখ নিচু করিয়া প্রাণপণ-শক্তিতে বলিয়া ফেলিল, তাকে ব'লো জ্যাঠাইমা তাই হবে, বলিয়াই হাত বাড়াইয়া কোন মতে, তাঁহার পায়ের ধুলো লইয়া ছুটিয়া বাহির হইয়া গেল ।



সম্পূর্ণ

গুরুদাস চট্টোপাধ্যায় এণ্ড সন্স-এর পক্ষে

প্রকাশক ও মুদ্রাক্ষর—শ্রীমদেবিনন্দন ভট্টাচার্য্য, ভারতবর্ষ প্রিন্টিং ওয়ার্কস,

২০২/১১, কর্ণওয়ালিস ষ্ট্রিট, কলিকাতা—১











